目录

【卷一百六十一】	2
【卷一百六十二】	20
【卷一百六十三】	31
【卷一百六十四】	46
【卷一百六十五】	70
【卷一百六十六】	94
【卷一百六十七】	110
【卷一百六十八】	133
【卷一百六十九】	156
【卷一百七十】	173
【卷一百七十一】	194
【卷一百七十二】	209
【卷一百七十三】	237
【卷一百七十四】	251
【卷一百七十五】	257
【卷一百七十六】	282
【卷一百七十七】	301
【卷一百七十八】	323
【卷一百七十九】	345
【卷一百八十】	367

【卷一百六十一】

许庚身

许庚身, 字星叔, 钱塘人。同治壬戌进士, 由中书官至兵部尚书、太子少保。谥恭慎。

题文恪公送杨迈公中丞还朝诗册

三年膏雨颂声驰,敬展先臣述德诗。故里尚留何武爱,前徽兼触阮咸思。渊源累世龙门远,清白相传燕翼贻。东鲁好修循吏传,绍承阀阅佐明时。

朱逌然

朱逌然,字肯夫,号味莲,余姚人。同治壬戌进士,改庶吉士,授编修,历官詹事。

渡汨罗江

行尽沅湘路,征骖又汨罗。浅沙犹拥渡,流水自生波。古戍明枫橘,余香歇芰荷。中流 渔父过,不敢扣舷歌。

谢维藩

谢维藩,字翊天,号麐伯,又号振士,巴陵人。同治壬戌进士,改庶吉士,授编修。有《雪青阁集》。

送王柳坪比部出塞

拂天花雨停金樽,轮台万里风云昏。故人佩剑将西征,青丝络马咸阳津。咸阳杨柳玉关雪,美人如花马如血。毡庐弦管回春风,废碛骷髅照寒月。吁嗟穷臣出塞古所悲,辞隔天日来荒陲。不遑将母瘁王事,侧身掩涕今何时。中原年来疲挞伐,野番窥边时窃发。战士饥搜黑水鱼,将军勇堕天山鹘。愿君袖石奠昆仑,他年待君神武门。

怀庆道中

王屋风烟卷客旌,覃怀古道接漳衡。雨余万木绿成海,战后新苔红上城。四国金汤推健 垒,连村刀剑误春耕。眼前击檝波如砥,南下河流慨不平。

劳生

野色起平阴,苍然万里心。劳生感行役,吾道托孤吟。华岳归云迥,茅津落日深。拊膺 思骨肉,欲语重沾襟。

送王斗坪同年之榆林

吹笛山楼秋月清,故人匹马向边城。木兰东去瞻天近,莫作寻常出塞声。

野人送菜感赋

僦室迩菜圃,寒绿侵书楼。岁除馈盈把,野人意绸缪。苦言今冬冷,地冻菜不稠。强能饱妻子,天赐固已优。城外兵过地,千家但空畴。搜括及筐篚,何能问秋收。盗贼所未屠,饿死骨满沟。主兵匪不严,耳目诚难周。连营压汉水,笙歌进珍羞。朝廷方用兵,小民何敢尤。述罢叹息去,辍食泪雨流。

马丕瑶

马丕瑶,字玉山,安阳人。同治壬戌进士,官至广东巡抚。有《珠溪存稿》。

题李剑秋大令劝农图

催科不扰政刑清, 雨后来听叱犊声。绿野无边生意满, 杏花香里看春耕。

吴鸿恩

吴鸿恩,字泽民,号春海,铜梁人。同治壬戌进士,改庶吉士,授编修,历官山西冀宁 道署布政使。

重九龙岩登高

才报兰秋又菊秋,重阳重到藿川游。亭高风急鸣蝉翼,岩古云生傍马头。祭野弥增霜露感,催租漫作稻粱谋。故乡山好难为别,人去还因桂树留。

平步青

平步青,字景孙,号栋山,又号侣霞,浙江山阴人。同治壬戌进士,历官江西粮道。有《越吟残草》。

春日游青藤书屋登孕山楼谒天池先生像赋赠闲谷

瑶宫小谪飞仙人,餐霞饮瀣游凡尘。骑鲸一去三百载,夕阳老屋青藤存。十年梦想不得到,一朝假馆逢陈遵。春晴岸帻肃客入,荦确怪石纷横陈。绿阴一径入深处,古藤十丈蟠高垣。枝柯攫天瘦蛟舞,时共风雨相飞奔。清池一勺活不涸,乃是天汉之分源。岁久岂无蛰龙睡,儵游不敢投丝纶。举首突兀睹庭柱,摩挲剩墨无磨磷。大书深镵见笔力,倔强欲与藤簸掀。登楼鞠月卺谒遗像,画图肃肃来精魂,开窗四顾万山入,咫尺包孕迷朝昏。想见当时抱膝坐,论兵慷慨乌角巾。酒酣不识督师贵,短兵狭路非其伦。先生亦一诸生耳,乃能筹海除奸民。徐汪先后同受馘,奇功不让楼船军。惜乎才大不竟用,山人摈落同茂秦。后公而生叹公遇,咄哉弄斧班输门。

诗巢怀古

輶轩古不入于越,三百之内无篇章。山川磅礴毓奇杰,词坛大振扶舆光。后人好古事搜讨,邦贤一瓣追心香。秋水长天阁云圯,崇祠复建龙山冈。大书揭橥六君子,贺秦方陆偕徐杨。秘监梦寤忽不乐,疏乞道士东还乡。酒肆谪仙人把臂,四明狂客胡云狂。处士偏师揭竿起,眼底颇欲无文房。幽栖剡曲事渔钓,隐逸姓氏馨三唐。元英先生老不第,补唇已矣颓颜苍。配食严陵谢晞发,击竹如意同悲凉。论忠独许渭南伯,少陵每饮君不忘。南国作记亦忠告,何至比党韩师王。铁厓乐府有奇气,如出金石声铿锵。三史书法待裁定,正统论息诸蜩螗。天池山人称后劲,嘉隆伪体扫秕糠。妄庸巨子竞树帜,阙编俯首袁中郎。千山万壑风雅窟,岂无健者纷登场。代更四姓禩七百,六君子外谁抗行。我来吊古事展拜,匠门弄斧惭登堂。斯人代兴有正派,恨无妙手图西江。泊鸥吟社亦澌尽,春秋享祀谁烝尝。西园遗址久衰草,残碑剥蚀埋夕阳。主持大雅望来哲,斯人不作心苍茫。

仇炳台

仇炳台,字竹屏,娄县人。同治壬戌进士,改庶吉士。有《笏东草堂诗集》。

日本刀歌和张叔未韵

笔锋出匣如宝刀,文光腾踔层云高。星芒欲动忽不动,胸中郁郁龙豹韬。先生读书意不得,投笔空嗟时事亟。男儿五十手无柯,夜半长吟誓报国。谁欤索地思弄武,不识中朝有尚父。腰间久佩日本刀,酒酣拔地为君舞。使星朗映风忽狂,狂风吹折青琳琅。胡为割地出下策,毋乃未见刀吐光。此刀百炼堪一试,海外陈师请从事。貔虎能扬大国威,豕狼永戢窥边志。笏溪今日酒尊开,歌辞慷慨有余哀。刀光如雪雪花落,会看直上凌烟台。

袁保龄

袁保龄,字子久,项城人。同治壬戌举人,恩荫内阁中书,历官直隶候补道。赠内阁学士。

壬申春率成酬吉田

少小读文史,卓荦轻常儒。悠悠三十载,岁月忽已徂。朝随金马仗,暮窥天禄书。簿领得余暇,诗酒追朋徒。高歌《梁父吟》,醉击处仲壶。持此耗雄心,优游聊自娱。沈侯旷世才,早弃终童繻。拂拭到燕石,投赠分琼琚。天葩耀奇采,开函惊喜俱。矫矫一西望,伫立以踟蹰。伯兄事长征,数稔治军储。与君同袍泽,骖靳时相须。遥遥贺兰山,战血方模糊。三边苦鸣镝,万里劳飞刍。何日荡逋寇,策勋青紫纡。君来一握手,共醉城南隅。

和朝鲜使赵蔼石诗步韵

凤翙高冈鹤在阴,名贤邂逅喜推襟。相期戮力千秋事,不负论交万里心。阊阖正开天铁荡,沧滨遥望海重深。愿君黾勉崇明德,侨札风流又见今。

行经邯郸

为蜨为周作是观,又来无梦过邯郸。百年勋业归蜗角,千古文章笑鼠肝。勉在伦常守兢业,敢云担荷怕艰难。神仙本不离忠孝,未许忘情一例看。

刘凤纪

刘凤纪,号竹云,南城人。同治壬戌补行咸丰戊午举人,历官宾州知州。有《籋云仙馆诗词集》。

月夜闲步

呼吸直通天,星晨落眼前。钟声随月度,铃韵抱风圆。笔墨余生老,头颅故国缘。还家如有梦,郑重五更眠。

将抵建郡

與中忽听建昌音,此日还乡百虑侵。衣紫已虚今世望,焚黄莫慰九原心。穷愁恨逐风前起,感愤诗从月下吟。曾是儿时游吊处,茫茫烟水渺难寻。

烽火移家各一方,他乡翻觉胜家乡。昔年奔走同辛苦,此日亲朋半死亡。孰肯预为身后 计,那堪回忆少年场。繁华历尽风情减,况复苍苍两鬓霜。

晚朓

何处蒲牢送夕晖,一声催得老僧归。随身不必游龙恃,薄暮犹多野马飞。枯树含生仍寂 寂,墟烟将散故依依。风光毕竟江南好,二月春深试袷衣。

陈昌年

陈昌年,字龄昉,一字菱舫,吴县人。同治壬戌举人,官户部郎中。有《清溪草堂诗集》。

即事

秋风秋雨满重城,难夺清间冷客情。几翦幽兰诗骨瘦,一瓯香茗酒肠清。偶留好友商棋阵,爱读奇书论墨兵。小阁镫檠挑欲灺,满庭风露又三更。

四月初八日

春色随人类转蓬, 峭寒天气尚东风。梅阴子密遮楼翠, 药槛花飞压草红。催促丁年愁隙 影, 消磨卯饮费诗功。怪他雏燕无离思, 镇日呢喃小阁中。

吴重憙

吴重憙,字仲怿,山东海丰人。同治壬戌举人,官至河南巡抚。有《石莲闇集》。

送文信国公铁如意歌

鸣乎信国公,从容殉大节。于今五百八十年,遗泽犹留一钩铁。铁背铭词镌六字,曰圣瑞文天祥制。诗僧拓墨共流传,我观公物见公志。公昔生也兆紫云,公及冠也擢状元。公既相也宋已去,公之死也未五旬。乌金一握思风度,山河半壁凭分付。赐字新镌柄上铭,知是登科年后铸。我闻公性初豪华,唾壶或以和筝琶。又闻公也自贬抑,军中或佐指挥意。自从真州夜走空坑败,悲凉柴市铭衣带。击节高吟《正气歌》,遗器遗文同百代。吁嗟乎!物之显晦信有时,公之遗爱今在兹。云孙小印玉带砚,枯桐尾勒青原诗。乃知物以人重同不朽,足与齐简狐笔良椎武节千秋垂。晞发参军公知己,琅玕一握恰好相追随。惜哉象弈图谱四十局,竟随玉{尸奠}埋蒿菜。尝将臣节论忠义,明季差堪侪宋季。铁工输与张鳌春,姓名犹得传附骥。呜呼两公如意从此留人间,艺林歌咏成嘉事。有宋一代文信国,有明一代赵忠毅。

劳山白云洞

千松万松何离奇,千石万石何累垂。松寻石罅逞夭矫,石凌松上争{厂垂}{厂义}。主峰一石最奇崛,俯首乃受松之欺。直据其巅盬其脑,苍髯恣肆鳞之而。左轩一石势崱峛,蛟背如立湘妃危。右伏一石于菟卧,不甘帖耳形耏耏。两株鸭脚那肯让,腾空四散青珊枝。道人何年觊天奥,梯以石栈支以。阴崖不借鬼斧劈,{穴奥}突应是天工施。门前双峰屹相向。崭如头角真嶷嶷。沧溟万里泻澒洞,直来脚底如奔驰。我当重九命山屩,杖藜犹待人扶持。骨酸趾茧乃得到,冥搜不觉忘辛疲。西峰亏蔽日易落,结璘早射长空辉。银鳞倒倦云万叠,谡谡时有西风吹。为我送云东海去,好教鸡唱看朝曦。

华岩菴

天风海水声刁骚,忽闻细籁吟笙匏。路转山腰入山腹,万竿凤尾萦翛翛。凿幽缒险拓此径,幽菴乃结峰巅茅。寺门那许世人识,箨龙鞭起围周遭。青霞斜截断厓脚,绿云密补虚岩坳。槐龙对盘势拏攫,级尽乃叩禅关遥。地僻尽多花木趣,秋深红紫纷僧寮。篮舆才歇凉雨至,四山如沸沧溟潮。我闻二劳胜非一,此山此竹应翘翘。春雷怒迸蛰地筍,秋风齐扫干云梢。昔访桃源武陵境,幽谷趣与筼筜饶。二十年来系心目,旧怀新赏同相撩。鬓丝禅榻感变易,夜窗怕听声萧萧。已知食肉素无相,禅有玉版吾将逃。

钓龙矶

大石逆波波骤惊,惊波扑石石能鸣。锐石剑锋平石砥,矗石壁立圆石罂。陂阤石作斜下坂,脊露石如高建瓴。波来那论容与否,一气激宕无休停。前波方逆后波退,后波又拥前波行。高波直越矮波过,立波乃压横波生。夺罅疾如箭脱筈,散溜纷若檐悬绳。冲突迅具奔马势,洄涡圆转旋螺形。银涛密溅飞雨射,赭岸怒走晴雷轰。初疑九天落欬唾,齐进十万珠玑莹。又疑千年不化雪,飓风回舞来沧溟。铁骞不退组练白,冰花倒喷鱼龙腥。自我入山即傍海,斜阳万里波涛晴。去时曾立矶头望,岛屿遥接帆樯轻。回时才入湖海底,喧豗即异前番听。此夕正当月之望,圆灵如镜东南明。再向矶头立缥缈,耳目眩乱身疑倾。我想子丑开辟会,山脚尚有山尖横。自从洪水尽归海,澒洞乃与峰峦平。名山岂甘没波底,头角各欲分峥嵘。天吴海若不相下,故以搏击成纷争。金波佥欠*滟那得渡,几回惆怅移鼍更。仙人空说钓龙去,水底时有龙吟声。

西汉绥和雁足镫歌

长定宫中黄叶秋,大司马用新都侯。淳于赂败曲阳去,咸阳王业彫潜谋。是年孝成祚欲尽,建元七改仪容修。君王心不化明烛,但照宫馆罗纨愁。鸿嘉以来隆内宠,阳阿祸水倾炎刘。是镫绥和改元铸,相掾丞令名雕锼。不及班姬照辇道,铜沓祇映金涂浮。慵来装点石华褎,红摇春影椒墙留。赤凤歌残灿归路,绿熊席暖辉舌篝。汉宫奢丽那得见,眼界输与残檠优。史传孝宣精器械,元成以降难追求。建昭竟宁两雁足,乾嘉老辈争吟讴。此镫后出幸快睹,生晚不抱昌黎忧。信都食官建始造,临虞万岁元延镂。余家高镫亦永始,三朝较量俱无俦。未随阳朔例颁赐,弃掷得免渐台陬。尝将古今论兴废,始凝须作冰霜筹。桓灵先短汉献祚,熙宁早翦徽钦庥。西京元气蹶此命,哀平薄佑将何尤。鼃声紫色讬官礼,九锡遂欲唐虞侔。一朝事关九庙重,美新致累扬云羞。阅历残镫泣风雨,坐对缸粟如悬疣。

莒小子双即诗三十六韵

国侨昔使晋,赐莒二方鼎。重器古所贵,况兼骈以整。我观传纪间,所载亦井井。纪甗齐贿珍,襄钟郑赂诇。寿梦与甲父,郜舒文互省。宝鼎虽不一,奇偶势殊等。伟哉莒国器,至今余炯炯。二鼎虽已沦,双即乃犹并。文曰莒小子,万年宝用永。徒家弗受文,佐祝文考鲠。同质非殊范,一文乃异皿。纹回云点黑,班留苔翠冷。枵腹略类瓠,象圆欲说饼。弯环形抱珥,朴素义尚褧。黝若髹点漆,泽比金出矿。先子宝其一,珍重如搢珽。常念延津剑,何日得合并。李丈念两美,不合心终耿。连城乃归赵,商于不欺郢。瑞若联珠璧,断岂续颈胫。遂使千载下,艺苑快雄骋。尝考莒世次,略可得其梗。兹及郊公,七主生非挺。获拏季友归,出仆行父请。务娄及灭明,奔执不自拯。密郓城恃陋,防兹地非迥。蜗角国难为,强邻况压境。岂类汉孝宣,技巧夙精警。乃与所制器,今古同彪炳。什袭重绨锦,装潢斫檀瘿。非独虞壶俪,直与齐罍逞。子产号博物,晋赐始管领。我不黄熊辨,两器乃独秉。众金同纷罗,譬若囊出颖。离合千百年,薈萃乃俄顷。摩挲发古思,作歌志深幸。

陶城堡

推篷日对水潺潺,沙鸟风帆自往还。东望数峰青扑面,不殊江上六朝山。

苌弘墓

西去麻鞋谒至尊,烽烟何日靖中原。故人尽节难回首,怕过苌弘化碧村。

和韧叟归耕釜麓出都感赋元韵

江水茫茫山色苍,昔年行役又同行。六千猿鹤悲君子,八百桑株学武乡。略仿买田苏玉局,相偕归隐孟襄阳。也如鹦鹉前头意,云树无言但泪浪。

伊人露白更葭苍, 宾雁俄看起一行。共叹崦嵫新岁月, 幸联桑梓旧家乡。诗人历下推庭 实, 野语齐东署弁阳。说我故园耆宿事, 风流文达记沧浪。

渊静用韧曳韵赠诗依韵奉和

湘累何计问穹苍,雨雪其吁携手行。讵有南楼风月兴,且寻东郭水云乡。前年红树游萧寺,此际黄昏是夕阳。谁是濯缨谁濯足,各将心境取沧浪。

唐拓武梁祠画象残册为李一山题

古今以来推画手,椎轮如自东西京。自从齐鲁逮巴蜀,前人箸录垂典型。元嘉元年武氏石,天水以后蒿莱平。历金元明乃复出,百六二象犹发鉶。此图仅存十四幅,唐时旧拓传溪藤。忆十一龄戊申岁,大梁随宦曾眼经。越七十载岁戊午,我八十一重开縢。虽经昆焰火不尽,古香古色仍奔腾。茧理腻若截肪细,麝煤重比沈云崩。国初题自朱查手,《小石帆亭》集大成。竹垞山舟各七一,尚书梁公八旬盈。雪礓持赠秋盦手,声价直许同连城。东洲斋两钜制,后有作者难抗衡。惜哉陈王两巨眼,墨缘未得传风镫。近人重搜获一石,毡蜡昼静闻登登。嗾獒晋主激宣孟,知兴贤母咨王陵。击磬有心来何蔶,节义杵臼兼程婴。地不爱宝并世出,紫云山色增峥嵘。我闻文翁高联张收作石室,帝王圣哲摹画无不精。至今迹相不得见,孝堂郭巨三十留题名。其余东麟西爪互显露,太尉沛相述叙文清明。冯绲六玉丁房峙双阙,李翕五瑞渑池尤著名。此图七圣一暴四孝子,俯视他象只如中下乘。家臧武梁题字如隶释,《小蓬莱阁》注字明珠莹。白楼先生昔赠先阁部,惨遭劫火此竟逃天刑。李唐至今一千有余载,得见祖本眼福还相矜。昭陵六马道子佛,唐画当时知服膺。蔡家有邻韩择木,唐隶当时应禀承。复斋款识并入仲安室,衎斋二妙文字今犹馨。前人歌诗已穷精奥义,贱子附尾钻纸如冻蝇。

朱寯瀛

朱寯瀛,字芷青,大兴人。同治壬戌举人,历官河南知府。有《金粟山房诗钞》、《续钞》、《佛冈宦辙诗》、《汴游冰玉稿》、《周滨集》、《陈州集》、《素园晚稿》、《上瑞堂集》。

答李莼客农部见怀

一篇劳赠我, 疏磊见襟期。醉与白云契, 吟惟芳草知。世事慨如许, 古人交似谁。鉴湖 朱处士, 深荷李孳颀诗。

广王维西施咏

多少蛾眉去,吴宫颦未伸。不知尝胆辈,可念捧心人。

与客论诗示二绝句

洲翻鹦鹉竞奇新,闲咏于今亦少真。纵使雄才推一世,不关情性岂诗人。

偶随人境写悲愉,时代迁流体格殊。我有真情浩如海,沧桑万变不能枯。

王子献同年权河南府篆未接任旋省卒于差次距余来汴不数月也客偶谈及怆怀旧好辄成 长句 玉堂美人来大梁,翠蕴下阐蓬壶香。风雅粉泽似前代,再睹睢涣呈文章。内史长才迥清 异,卧阁犹堪理群治。朱轮紫马何纷纭,坐使鸾皇不一试。多情好古两相怜,竹里筒贻过百 笺。祇今伊水仍东注,子晋龡笙何处边。金薤琳琅称世宝,镜湖待访丛残稿。我来梁苑亦枝 官,为怆君游乞归早。墨如果蜕君其仙,歌期君闻情浩浩。

闲遣

施菉丛中自葆真,懒从詹尹问前因。老将及耄宁争智,生本多忧任贺贫。耻效纵横欺世辈,甘为勤苦授经人。握兰总受皇天眷,肯道儒冠误此身。

劫灰几度阅人寰,尚恋觚棱住此间。养少青田怜鹤瘦,封辞碧海乐鸥闲。尽堪比拟聱齖 叟,无复逍遥供奉班。太息时流厌常道,竞随徐市访仙山。

劳乃宽

劳乃宽, 字偶庵, 桐乡人。同治壬戌举人, 江苏候补知府。

南还示玉初

机云入洛旧齐名, 倦鸟思还约耦耕。愿尔早将尘鞅脱, 一帆逐我阖闾城。

还嘉兴视玉初疾

白头兄弟话镫前,旧事依稀记昔年。怕上芝桥桥上望,山丘华屋倍凄然。

宏文馆外少人行,寂寞门阑碧藓生。记得白袍如鹄立,满身风露听呼名。

杨柳湾头噪晚鸦, 金陀故里夕阳斜。庄严独有精严寺, 却少墙阴梓树花。

周长庚

周长庚,字莘仲,侯官人。同治壬戌举人,官彰化教谕。有《周教谕遗诗》。

赠林琴南孝廉

柴门平掌练波流, 斫脍淋池尺幅收。瘴海才名珊网老, 华年肝胆剑花秋。涛头哀角寒诗梦, 劫外残烽照杞忧。凄断濂江新乐府, 西风吹泪满南州。

玉山

玉山在天不在地,山半隤云尽下坠。云气阻塞人不前,护此太古未破天。水玉磊砢堆山巅,山色一白全化烟。或云此山寒冰穴,压尽盘古以前雪。羲和鞭冻轮不热,坤维脉与太阴结。太阴所固日无功,寒气一束东海东。世人不知呼作玉,几人亲插峰头足。

火山

火维众山插天险,天半熊熊起烈焰。火光所触金铁流,阳气郁勃燔炎州。雪威不到滕六死,天地长夏无冬秋。或如金红挂天半,烛龙衔烛照银汉。或如野烧横秋空,天吹不动海底风。飞光上腾影倒射,万壑一色作奇赤。有时石罅溅沸泉,一喷一吸泉生烟。响泉自喷火自爆,火水争穴互相搏。生硝黑气烘马牙,坐恐瀛台坤轴灼。当年补石天龃龉,宗动掷下洪钧炉。阴阳余炭煽未熄,照见满海红珊瑚。

台北稻江楼和友人韵

际天黑箐坠斜曛,龙气腾空作火云。山势百支垂海尽,江流双派到楼分。豪游有约青丝 鞚,韵事无心白练裙。欲作逢场竿木戏,娵隅蛮语笑参军。

丁谦

丁谦,字益甫,嵊县人。同治壬戌举人,官象山教谕。有《寄鸥居诗》。

幽居

幽居忽不乐,远游南山岑。山光迎暮霭,归鸟皆投林。簌簌涧上松,风过闻远音。泠泠涧中水,浣我尘世襟。山鹤有闲意,山鹿多野心。旷然一相对,机械何从侵。静境触斯悟,幽念息逾深。安知太古上,非复如当今。请从彭泽公,一抚无弦琴。

种竹得幽趣,种兰有幽芬。孤怀澹相寄,非期世所闻。东邻有隐士,洒然离俗氛。朝夕过我游,结契连风云。赠君流黄机,报我蜀锦纹。锦纹织奇字,密意通殷勤。殷勤那敢负,誓绝莸与薰。春花与春草,向荣各欣欣。相期共樽酒,薄醉眼斜曛。

刺促行

刺促复刺促,人生百年鸟过目。前有一樽酒,后有一丛菊,把菊饮酒安事役,役迷阳生途行且伤足。山多虎豹水多蝮,时时飞而食人肉。请看东门悲牵犬,何如生来抱黄犊。

题夏闰枝青镫有味图

至文肇六籍,洙泗执枢纽。鲁论四教垂,文实居其首。天地虽广大,万物虽繁茂,厥理靡不包,一一资析剖。譬如城门轨,万马此辐辏。自遭秦坑焚,汉兴葺残漏。讹谬日渐增,糠秕遂杂糅。厥后流益分,笙簧百家奏。经史子集区,金石梨枣寿。儒者生近今,简册如山阜。区区两目力,讵易遍寻究。又况是非间,错互眩妍丑. 出主或入奴,输攻而墨守。谁能折其中,轇轕辨纷纠。夙昔有志斯,披诵就窗牖。炭然夜一檠,不觉柄移斗。所嗟识趣卑,衣食复奔走。所学无一成,蹉跎竟谁咎。闰兄劝学人,翩翩绍华胄。研摩日不遑,未恃得天厚。我时共折证,悬河资辨口。醰然心得言,岂屑拾牙后。示我青镫图,小册恰藏袖。开帙肖清神,夜景亦深秀。梧桐三两株,竦立秋光候。萧萧竹几丛,掩映茅亭右。斗室煜孤镫,书外百无有。恍闻金石声,琅琅激林薮。我时将南旋,惜别同心友。敬当临歧言,得勿附琼玖。相期各努力,业成致不朽。此味殊酸咸,知音果谁某。还拟问铜芽,历历心领否。

田延年

田延年,字友羲,浑源人。同治壬戌举人,官长子训导。有《希达斋存稿》。

卮言

残月如垂钩,潜鳞罢游戏。新月如张弓,征鸿侧身避。蟾兔本无心,鱼雁胡多事。信从 海上来,书自云中寄。拆书复见信,就中有深意。上言疑其形,下言畏其势。

夏虫难语冰,井蛙难语海。是固习之偏,无乃性不改。天地一何宽,嗜好非一端。唐虞相授受,巢许乐考槃。武周仁人粟,夷齐乃不餐。居身贵特立,处世贵达观。所以古圣贤,不强人所难。

己卯重阳前五日题许村双松寺后禅壁

二十年来此地违,旧时楼阁尚崔巍。乔松千尺白云挂,法鼓一声黄叶飞。拾穗乱闻村妇语,敲门仍识老僧归。西风刮面惊霜肃,惆怅穷檐未授衣。

健妇打虎行

林深月黑风撼山,健妇乳儿茅屋间。虎听儿啼夺门入,虎入风回门自关。健妇见虎胆如斗,手掷小儿姑向后。急取炉中未烬薪,带火狂呼驱虎走。人既抽薪虎欲咥,转身一挥鹰隼疾。毛焦肉灼气已衰,争奈门关不得出。大吼一声天地秋,人来虎往不能休。举薪乱击虎狂跃,满室红飞火绣球,夫从外至疑有寇,见虎犹疑他野兽。虎趁门开逸且奔,妇几一蹶不可救。吁嗟乎!健妇虽健妇人耳,胡为彊梁遂至此。此时健妇知有子,知有子,虎可制。见虎时,骑虎势。

登大行绝顶

突兀压神州,苍茫据上游。群山皆北向,沁水自南流。地远三川见,天晴万木秋。故乡 在何处,回首白云浮。

张祖同

张祖同,字雨珊,长沙人。同治壬戌举人。有《湘雨楼诗钞》。

小孤山

浔阳之水分九派,汇入大海流汹汹。彭郎矶下忽一折,小孤屹立森当中。天门阊阖影铁荡,倚傍谢绝蓬莱峰。江山半壁厄天险,万壑帖伏不敢东。我来正见白日堕,石级百仞愁难穷。山神拱揖若相告,昔岁兵革殊忽忽。敌人何由据要害,岂有飞渡无交攻。先声后来贵夺隘,誓死并力临其冲。楼船蔽水箭满眼,彭公飒爽人中龙。巨雷翻空烈火沸,昼夜但见江光红。撼山山动贼尽溃,黑云摧拉天无容。出师以来数百战,湘军此举成大功。吴头楚尾固筦

钥,腹背自与淮淝通。自从江南殄残贼,长鲸敢作洪涛风。浮云朝暮互起灭,太息尚有南飞 鸿。移山叠浪挂帆席,隐隐听打寒烟钟。

扬子江

十年烽火金山寺,孤棹蒲帆铁瓮城。日暮鱼龙纷出没,云边鹳雀自飞鸣。江流万古无归日,野没千村有哭声。几处楼船笳鼓动,极天风浪一伤情。

夜泊螺山大雨不克谒王子寿丈怅然赋诗

適园咫尺隔惆怅,客里轻舟泊洞庭。独夜雁归天漠漠,孤洲风急雨冥冥。别来魂梦江湖阔,老至诗歌涕泪零。清晓推篷一回首,楚天犹近少微星。

葛岳乔自晋入都客中见访因赠以诗

离忧七载忽相见,忽问萍踪意苦辛。上党地为天下脊,王郎謌属眼中人。不堪歧路怜词客,且喜他乡奉老亲。幸际圣明须努力,天涯惭愧一儒巾。

九华山

长风缥缈赴瀛海,吹落数朵青莲花。孤舟雪尽正东下,云外玉屏张九华。天低积铁壁孤倚,梯石横嵌蹋龙尾。豫樟十抱翻回飙,俊骨无声半空起。传言灵气钟盘陀,上寺下寺云嵯峨。玉京群帝白昼下,亦应旌旗相荡摩。却瞻齐山渺难识,洞天卅二无颜色。虎豹噤声林木尽,兵戈世外仍消息。日夜山边走怒潮,蓉溪荻港萧条极。兴衰之事不足陈,江翻岸倒空千春。兹山得名自李白,怅望书堂无复存。兴酣落笔凌绝顶,只今谁是谪仙人?

东西梁山行

梁山峭拔分东西,壁立断岸悬晴霓。两峰对面势欲搏,巨灵一笑扶天梯。深潭锦鲸作怒吼,长风击碎青玻璃。群山俯首尽退让,挂笏岂克相排挤。金陵上流固锁钥,胚胎凿空开坤倪。槎丫山谷绣众绿,古色斑剥何萋萋。我行六月忽到此,小舟一叶如凫翳。江流铿鍧俨互答,直视绝顶愁攀跻。舟师忽尔眼流泪,向我称述色惨凄。咸丰之初岁癸丑,拏舟舣泊前边隄。须臾贼兵万蜂集,帆樯林立鸣鼓鼙。登舟劫掠斫篷缆,大众何敢轻诃诋。老者杀戮少者缚,血流江面声澌澌。我时忄習慑伏未能窜,一贼捉人如捉鸡。梁山荆棘恣搜索,怪鸮暗哭乌夜啼。贼中飘零倏五岁,逃亡九死逾山蹊。间关乞食返乡国,手足破裂面目黧。风饕雪虐衣败絮,入门涕泣见老妻。火伴十数走相庆,急佐杯酒盛盐齑。早知波涛兀险恶,曷不壮岁扶锄犁。黄金不能救身命,江湖倾荡悔噬脐。江南贼尽复过此,魂魄犹悸道路迷。我闻斯言心语口,讵独尔辈声凄凄。兵戈异数苦糜烂,城郭战斗戈横提。锦衣玉食尽何在,纷纷骨肉生乖睽。东南承平近十载,土人归去无依栖。枯芦败苇支破屋,日愁秋涨淹青泥。蒿莱四野田尽废,新种数亩多稗梯。吁嗟疮痍待兴复,伫望长吏相招携。长江击楫转愁疾,按剑更欲驱鲲鲵。山神肃然若拱揖,隐放一线潮头低。扬帆直上乱山走,仰见明月明如圭。

江上

满目浮生苦,清时景物非。岸边民舍尽,江上估船稀。暮色无秋树,寒烟上客衣。浔阳知未远,海舶去如飞。

泊九江

帆落匡庐近,天低湓浦流。鸣猿随雨断,过雁下云愁。乱定严关権,秋清冷舵楼。海邦 人种柳,高舞九江头。

浙西余生久客楚南今将从军塞外诗以送之

乱定仍为客,悲来敢惜身。行辞万里路,不作五湖人。楚越隔塞远,伊凉奏曲新。封侯 殊未卜,鼙鼓觉伤神。

桃源

入山秦人曾避世,流水今日浑忘机。野云缥缈自来往,仙洞幽深疑是非。坐爱瀑布午阴 直,尚余桃花春暮飞。此中信步不知远,重问前津知者稀。

远望

平原望辽阔,孤鹤不知还。烟远欲无树,云微似有山。丛阴连百粤,天势落重关。南斗长沙近,萧森未可攀。

黄体芳

黄体芳,字漱兰,瑞安人。同治癸亥进士,改庶吉士,授编修,官至兵部侍郎,降通政使。

信陵书院作追述耆献留别院中诸生叠仙屏河帅韵

飒爽须眉太史文,原尝侠气并时闻。监门上座犹常事,为国申威最轶群。安得屠儿诛嚄 唶,并将媾使痛锄耘。荐绅莫笑衣冠敝,此辈肝肠不负君。

草疏饭客淡弥亲,巾袖高谈亦伟人。车似鸡栖偏疾恶,釜惟鱼在卒全身。服边讲授堪连席,申夏韬潜耻触纶。此后晋材推阮庾,藻思还复数安仁。

载酒蓬池好物华,上头诗笔最清嘉。广文肯啖慈恩柿,中尉难汙宰相麻。董史直声青简上,并州伟略白江涯。吹台别有三贤迹,更向荒祠舞楚芭。

三馆木天深秘地,八韩二宋惯联车。最难伯厚持冰鉴,岂独元褒校石渠。台阁弹章赖通 议,河湟诤论有尚书。中华夫子如长在,谁道东氛未易除。

繁台重剔藓碑昏,文献弥多鼎盛门。博士榆枋新撰稿,好官桑枣旧栽痕。子衡绩载家藏集,损仲书同国史论。更羡禹州马端肃,晏然名节峙乾坤。

熙朝昕鼓以时催,洛学昌明涤草菜。八子馨香俱沆瀣,两河灵秀此胚胎。中牟云集生徒盛,仪邑天褒礼乐才。当日黄流劳圣虑,得人斯兔泽鸿哀。

许振祎

许振祎,字仙屏,奉新人。同治癸亥进士,改庶吉士,授编修,官至东河河道总督。谥 文敏。

题邓弥之白香亭诗稿

泪河西注返湘舟,死尽浮生旧匹俦。岂忍衰龄为远别,更堪一诀是千秋。贤名信有蛇年 厄,旅寓终罹鵩舍忧。我恸匪关知己尽,四朝文献恐难求。

少日都梁一俊人,褐裘岸帻照青春。小心四海能求友,茧足千程急卫亲。文字江湖余涕 泪, 遭逢天地有风尘。同时落魄长安道, 尊酒招呼话苦辛。

怅望人间百事违,辞官重恋老莱衣。重围趋死义不辱,尽室报恩情庶几。完节居然名地好,冒功那问几人非。当时祇有西江月,曾照危陴泪暗挥。

北兰寺前荒草稠,娄妃墓下寒江流。兵尘一扫无陈迹,旅客伤心更独游。避地酒徒颜尽墨,傍湖春树色先秋。可堪符节无人绾,付与书生类楚囚。

锺陵直下古临川,新领苍头士八千。劝客南行焚笔砚,从征西市买鞍鞯。异才不信为时出,强寇能摧弃甲旋。终是虎头无骨相,中山一谤又空拳。

霜天黄菊作重阳,战地书来更断肠。烈士尽为知己死,寒郊枉是哭人忙。鲸鱼失势成京 观,燕雀何人处画堂。秋尽风蓬从西散,始知吾辈可怜伤。

同谒征南幕下年,麻源高会最多贤。迂辛短李为欢谑,刻烛摊笺放老颠。告别又经新岁月,鏖兵重访旧山川。不堪并马城南路,暮雨萧萧绝可怜。

京尘相逐忽轩眉,三月杨花似海时。客久鸾龙雄意气,交深金石少磷缁。直言尽罢刘蕡 策,远適终伤王粲诗。讵料吾军真早废,茫茫詹尹似先知。

变起仓黄天地昏,累臣无复谒修门。满城一溃皆鱼鳖,失路方将化鹤猿。海国沧桑催返棹,楚歌兰杜与招魂。乘时各奋风云会,那有巫阳下问冤。

青山红树白香湖,免为君王再荷殳。返哺尽闻乌鸟乐,献嘲嗟幸草堂无。水中金石看千变,谷口池亭记八愚。犹有高名动寥廓,著书愤世陋王符。

翰墨场推老伏波,故人招隐出烟萝。军筹檄笔雄谁并,铜柱勋名勒几多。拜表元戎闻荐达,罢官下潠自蹉跎。萧然百粤经行地,祇草龙蛇落涧阿。

悔别师门三十年,西州重过泪潺湲。遂良早白清湘鬓,供奉休回贺监船。曾感吐茵容国士,共来持菊荐江天。平生风义凄怀甚,更苦城危夜雨悬。

河鲤江鱼各自流,劳君高兴动扁舟。不辞千里迫年尽,相引一觞为道忧。老大心情双白 鬓,啸歌天地总青眸。追欢却有前时感,力与排愁未解愁。

雨丝风絮黯平台,此别分襟更可哀。目极天涯孤客返,梦悬江表尺书来。苦怀未忍从深 诉,慰语重游约后回。白发故交寥落尽,不禁清泪湿苍苔。

千里飞书自告亡,一惊断尽故人肠。临危所眷惟知己,阅世如流益可伤。留集东林谋不 朽,修文碧落恐犹忙。素车行哭吾无及,惭负人间范与张。

濡泪吟成纪实词,还如杜集有严诗。骑鲸天夺胡偏遽,扪虱谈深故可思。一例文章憎命 达,从来孝友是男儿。龙骧鹊起俱尘土,且读林宗第一碑。

李嘉乐

李嘉乐,字宪之,光州人。同治癸亥进士,改庶吉士,授编修,历官江西布政使。有《齐鲁游草》。

谢袁子久观察赠马

驴背寻诗味饱谙,拟将行李一囊担。驰名已觉输中驷,赠别偏劳释左骖。备位八驺君可致,起家五马我何堪。鞭丝遥指青州路,{西乏}驾毋贻旧友惭。

前堂古槐作歌张之

老槐苍莽覆高阁,疑服仙人不死药。何时裂腹树中分,一半生机尚自若。即今得半气输困,南柯独伸龙臂攫。上有密叶干青霄,下有垂枝张翠幕。故老传闻不计年,自有此州根遂话。日久群惊有物凭,人过其下孰敢谑。烟云百丈势冥冥,香火一龛灵灼灼。风来飞舞厚将崩,昔人已铸铁縆缚。我到更增一木支,岂惟老物伤摇落。千百年亦重留贻,十三贤或经摸索。守吏虽无齐令严,得人差免鲁邦削。政余颇爱此扶疏,视作鼎彝慰寂寞。广荫真看可蔽牛,通神果少来栖雀。化身痴想作槐安,古而无死何如乐。

赵国华

赵国华、字菁衫、丰润人。同治癸亥进士、山东候补道。有《青草堂集》。

寻灵岩寺遇雨

朝出泰安郭,暮抵灵岩原。好山似贤主,延客开篱樊。屏翠何窈窕,侧侧松云繁。前溪忽杳霭,白雨来山村。涧水砉然急,与人争路根。山舆蹀四足,泥涉如跛鼋。行行且复止,疏滴犹霑辕。草店幸可即,徒御猜黄昏。断蝉起林薄,明霞红在门。层岚晃新沐,对尔酬清尊。

翠微寺

石径萧萧里,钟楼落翠微。暗泉穿竹出,薄雨入松稀。山鸟吟黄叶,秋僧补衲衣。从来 清旷境,未觉此心违。

舟抵广陵

江浦雁声秋,西风木叶流。一帆下淮水,三日到扬州。不遇王司理,谁为把臂游。碧箫明月夜,独上酒家楼。

丹徒江口晚望

日暮群帆集,长江此一隅。涛声来白下,山势走丹徒。寺远钟依约,云寒雪有无。射堂游胜地,樽酒不愁沽。

京口

万里西来江水声,北风吹客放帆行。山连宋武丹徒宅,日射孙郎铁瓮城。人物远淘千古 浪,戈艘近息十年兵。岸头蜃气何由在,不觉中流忆祖生。

游峨岭遂至赵秋谷饴山旧园

四山松影罨城庐,一路泉声曳筍與。南郭堞横青黛里,北亭觞尽白头余。几人下马寻秋草,当日谭龙已索居。太息荆坡无恙在,未应竟自付樵渔。

钱塘舟中遇张振卿典闽试归

仁频叶大荔支甘,江上相逢秋正酣。听彻玉蟾宫里曲,筍篷凉月下西南。

莘县城西见荷花

县小常可喜,晨出暮必至。行行烦暑散,飒然寡车骑。隐约城西隅,田水湛明媚。迤逦 三四亩,藕花出禾穗。邑境久荒瘠,见此足心慰。立马暂向前,宛尔纳凉地。参差缀香梗, 野风满翘翠。亭亭处幽静,喧戏谢童穉。他日吾不知,咫尺愧为吏。傥有高怀人,独清在衡 泌。

田家

田家始筑场,禾黍刈成束。老农知稼穑,护惜甚珠玉。日暮牛羊返,濈濈角相属。稚子合柴扉,茅檐映炊烛。席地少长集,新味野蔬足。早晚官赋完,坦然脱荣辱。人声稍渐歇,鸡犬眠亦续。淡月入村来,园林静寒绿。

山行

驱车入丛山,行行夕阳暮。人迹杳然绝,取迳傥已误。乱石来相难,崎岖有余怒。返照 瞰高草,乔木奥前路。垂崖似古门,想像俨深固。鬼魅良可愁,神仙亦堪怖。我生贵平易, 不欲得奇数。言念采樵子,愿因觅栖住。

潭西行赠柳生文洙

天根旧咏城南柳,侠卿亦谓真吾友。济南山水方英多,嵯峨扬波何不有。柳生好剑兼好书,潭西半亩从僧租。为招同志二三子,扫轩觞我倾新沽。其时落叶生除宇,隆寒狡狯诈秋雨。戴笠言从窈窕门,佛楼一片风铃语。离离净线梳垂杨,瓦亭四角回虚廊。七十二泉绿如凿,当年桂老殊平章。引澌激溜窅然细,潺湲珠玉随圆方。五步十步作人立,崚嶒瘦石窥琴床。春红秋碧各已谢,小桥疏竹攒横墙。庭阴倒斝群谊绝,宛与栖身向岩穴。插槛纷看碎琐云,披帘坐听玲珑雪。自古清流清可人,无疑诸子来怡悦。穷年永昼乃据此,吾将妒尔难为别。还山他日不可求,引领飞空捉明月。

登遵化城楼

虚楼足清暇,夕日忽已曛。断雁入黄叶,远山齐白云。边城不可见,登眺空殷勤。鼙鼓中原满,秋笳谁忍闻。

任城太白酒楼

当时李太白,足迹半中原。贺令一杯酒,兹楼千古存。绕城沈市籁,平槛渡帆痕。此日 风流地,怜才谁更论。

湖上

美人桃叶渡,名士木兰舟。垂柳绿平水,夕阳红在楼。草间蝴蝶乱,花外杜鹃愁。买醉 吾非吝,当春孰共游。

车中望腰带诸山

斜阳大道白沙明, 钝马单车过县城。鸿雁北来晴有数, 乱山东去老无名。谋生安得田夫子, 誓死曾闻戚总兵, 绝塞由来关锁地, 何因坐放虎狼行。

送王竹葊北归

寒食天涯遇故人,湖城旅思作平分。绿波梦好惭江令,春草吟成对范云。失意宦如花耐冷,知心别似雁离群。泺源门外千条柳,为语依依远送君。

远戍曲

万里龙沙羌海滨,十年羽骑满边尘。数声新雁长天暮,无限金闺望远人。

许玉瑑

许玉瑑,初名赓飏,字起上,号鹤巢,吴县人。同治甲子举人,历官刑部郎中。有《诗 契斋诗钞》。

同农门度孙家岭过下天井序之寓斋

朝光丽阳崖,秋气肃晴巘。岩桂金英霏,佳招及兹践。孤岭阻重深,蹞步不辞蹇。曲径修蛇悬,碎石流丸转。仰企势逾迥,俯拾意转坦。露磴搴茅篁,雨斑贴苔藓。直视憺远神,危坐息微喘。及巅梯已穷,下坂步难展。振衣重踟蹰,慎哉失足免。

人语堕木末,雉窜起箖箊。秋草没樵磴,积水生沮洳。意行出丛薄,芳气动衣裾。回首辨来径,高与铜井俱。丘亭辟门户,官道交槐榆。此间地稍洼,方池碧萦纡。盆盎委废圃,华表森路隅。甃井石阑净,窣地秋阴铺。款款入深巷,乃造幽人庐。小团一瓯熟,炉烟散庭除。

秋夜词

山月下檐秋气森,孤花泫露栖墙阴。画楼恍惚非昨夜,踌躇无语停瑶琴。瑶琴岂为知音 惜,一水盈盈共明月。伯劳西飞孔雀东,各有天涯怨离别。

抱冲丈海天觅句图

万灶攒烟火,千军沸汐潮。幽人独高寄,奇句出尘嚣。白日淡将匿,青山谁见招。浩然 发长啸,极目送盘雕。

空阔俯城阙, 窈然思以深。鹓鸾京国梦, 猿鹤故山心。多难居同谷, 无聊动越吟。平生师友谊, 牙旷讬知音。

闻络纬作

篝镫欲尽夜光微, 巧妇惊寒亦下机。惟有纬娘声不断, 无人知是叹无衣。

丁蓉绶

丁蓉绶,字竺云,长沙人。同治甲子举人,官户部主事。有《磨绮室诗存》。

阻风

一困沙泥一上天,欲参真谛识前缘。年时怨羡都无著,见惯人家顺水船。

感秋

西风挟愁来,一岁一相侵。引手掬秋意,浩旷不可寻。胡为愁因依,苍然与之深。得非

缠缚怀,乘此萧飒音。倾膏入尘缘,迫使煎其心。静思了能悟,百虑澄孤襟。君看中天月, 万里云无阴。

朱鉴成

朱鉴成,字眉君,兴文人。同治甲子举人,官内阁中书。有《题凤馆诗集》。

大风雨泊镇江

万里江寒雨气腥,壮游有数几人经。鱼龙喷沫天真醉,莺燕惊啼客独醒。城阙风雷沈鼓 角,海门潮汐走精灵。金焦浊浪声如旧,可有英雄枕剑听。

沈昌宇

沈昌宇,字子佩,武进人。同治甲子举人,直隶候补知县。有《泥雪堂诗钞》。

宝盘歌

噫吁嘻!宝盘之来,乃自洪河之东,太华之西。沈埋光景二千载,潜匿不啻蛟与螭。岐山崩颓灞水竭,此宝乃一鸣其奇。土衣厚裹十重甲,苔藓蟠驳鳞之而。含垢忍辱无不可,奚必汲汲求人知。今日出世毋乃早,我为宝盘痛哭垂涟洏。神物久晦岂能不一显,所惜今也非其时。成周之盛称宣王,中兴令辟开明堂。命将北伐天威扬,驱逐玁狁过朔方。归来纪绩书旂常,乃作重器垂辉煌。祭告清庙牵骍刚,股肱二虢同趋跄。是时大狩岐山阳,伐石作鼓志宪章。籀也惟史古之良,刻画金石尤所长。勒兹盘铭传无疆,钩磔作作生锋釯。鱼鱼雅雅词轩昂,侯其祎而骏烈张,历十四代腾其光。我见此盘在徐氏,良二千石有孙子。灵光道自日边来,奇气惊看室中起。呜呼咸阳钟虞销为泥,承露金茎早摧圮。自从周鼎沦太丘,空令千人没泗水。沧桑变易陵谷迁,法物西京长已矣。惟有此盘今巍然,精铜百炼重且完。长牙山含岈辟邪怒,渍血朱碧龙文斑。叩之其声中无射,琅琅摩戛锵八环。长廓密室相掩护,犹有宝气彻夜腾星躔。我为此盘发三叹,摩挲百遍心茫然。若非埋灭在九地,似尔光怪何以能久全。不潜而见际时变,顷刻城郭生烽烟。盘兮盘兮尔室已易主,得无从此伤其天。此盘阅世二千载,笑我小子言詹詹。刘争项战见惯等闲事,况此幺麽蛮触何忧焉。我思及此重叹息,人生难与金石同其坚。噫吁嘻!宝盘之来,乃自洪河之东,太华之西。侧身四望心依依,西方美人我所思。

哀吴阊

西风萧萧梧叶秋,梧官寂寞吴王愁。一番荣落随时易,百代兴衰逐水流。吴阊自昔繁华地,郁郁层城发佳气。秋晚枫江蟹稻肥,春深虎阜莺花丽。楼台烟雨梦南朝,旧苑长洲草未凋。镫火夜归青雀舫,酒旗晴护绿杨桥。吴姬生小能歌舞,打桨乘潮自来去。子夜新声按绿幺,丁香艳锦缠琼树。水色山光无尽妍,踏青车子采莲船。漫惊烽火三千里,已盛烟花二百年。人间祇觉阳春好,天上那知霜雪早。白马环江吼似潮,红巾遍地屯如草。大帅逃威过晋陵,督师车骑尽东奔。仓皇关效鸡鸣度,慷慨陴呼爪士登,孝穆才华信殊众,堂堂开府声华重。债帅何期竟倒戈,岩城从此遂摧栋。阊阖西南轶荡开,金戈铁马震如雷。可怜槚墓鸱夷去,又见稽山甲楯来。短兵狭巷相驰突,白屋朱门遍搜索。廉使空屠朱亥刀,县官都化王乔

舄。百雉崔巍九四城,如何蚁贼竟纵横。开关到此成延敌,失策于今悔募兵。分班竟占吴宫宿,吮血磨牙厌人肉。上国何因患豕蛇,荒台祇见游麋鹿。馆娃名号又重新,浪蝶狂蜂惨变春。捉得雏姬充养子,传来羽帖署真人。服妖遍地迷红紫,伐鼓枞金乱盈耳。蛮奴厮养锦缠头,蜑户长年银约指。真娘墓上月如霜,响屎廊前草不芳。杜宇凄凉啼碧血,燕泥零落堕雕梁。百年名胜归何处,金粉山川变尘雾。渔父空寻避世人,参军漫作《芜城赋》。君不见金陵自古帝王州,花月秦淮一旦休。又不见西子湖头好山水,柳色莺声今已矣。江山形胜总堪哀,长使英雄心事灰。祇有胥江鸣咽水,阖庐城下日徘徊。

狼山大观台

他乡经乱独登台,万里江天眼暂开。山势远从京口落,潮头高过海门来。百年世事翻棋局,半壁桑麻换劫灰。日暮寒林霜叶下,秋空一雁发声哀。

九派源通巫峡上,五山地尽大江东。古人去我日沈岭,新恨满怀帆饱风。忧乱闲身烽火外,悲秋清泪死生中。义乌遗墓空衰草,沦落天涯慨尔同。

宫词和顾缉庭同年

太液春波似海宽,玉人无数倚雕栏。长门十载朱颜改,镜里妆成不忍看。

阖门新敕待传宣, 粉本先呈进御前。多恐雾中花气杂, 画师并不爱金钱。

陌上春风拂路尘,秾桃艳李斗芳辰。可怜绣辇司花女,不及章台走马人。

【卷一百六十二】

张之洞

张之洞,字孝达,一字香涛,晚号抱冰,南皮人。同治癸亥一甲三名进士,授编修,官 至体仁阁大学士。赠太保,谥文襄。有《广雅堂集》。

哀时

刁调青蘋末,终致沙石飞。嵬騀金隄高,安知蚁穴危。清晏五十年,养此氓蚩蚩。文吏吾公醉,武卒市人嬉。江南信可哀,河北守者谁?势欲括赤县,与之作潢池。泰极否所伏,剥穷复继之。泰否乃天道,剥复在人为。天道已板板,人事仍熙熙。

人日游草堂寺

人日残梅作雪飘,出城携酒碧溪遥。无端杜老同心事,四海风尘万里桥。

杜工部祠

少乞残杯道已孤,老官检校亦穷途。荣名敢望李供奉,晚遇难齐高达夫。凭仗诗篇垂宇宙,发挥忠爱在江湖。堂堂仆射三持节,那识流传借腐儒。

铜鼓歌

咸丰四年黔始乱,播州首祸连群苗。列郡扰攘自战守,盘江尺水生波涛。府兵远出连城 陷,合围呼啸姎徒骄。纯阜天章久愈炳,义民岂惑狐鸱妖。我先大夫慷慨仗忠信,青衿白屋 皆同袍。吴公祠下水清泚,百口并命甘一朝。冲焚罂听贼计尽,凿门而出穷追钞。民兵五千 凭感激,疾如振箨覆其巢。奢香系颈降道左,济火革面居前茅。不见援师助空弮,那有馈饷 分箪醪。三城百寨并扫荡,箐谷黯黮湔腥臊。收其积聚供馆榖,放其牛马还林皋。俘其子女 赦不杀,授之畬田使耕薅。清酒一锺亦不饮,独取一物深于丁宁短于鼛。降夷稽首述故事, 传自汉相安獞猺。呜呼汉相信神武,拜表讨贼先不毛。岂不知秦川宛洛皆争地,未清堂奥难 及郊。隄官隗构四郡戴,攻心一语参军教。范铜为鼓赐酋长,坎地宝护埋山坳。岁时祀鬼乃 敢击,芦笙巫唱纷嗷嘈。不然战斗合徒众,花鬘赤脚奔相招。一面足可直百牸,擅一为富擅 十为酋豪。鼓亡苗灭古记语,以威报虐将焉逃。鬼方冀方远遥遥,致之重烦毡席包。连驽铜 牙虽罕覯, 此物犹见天威万古悬云霄。围径四尺脩八寸, 四耳无当约其腰。文螭蟠拏朱鹭翥, 细乳三百有二相周遭。仿佛篆文不可辨,屡烦画肚终牙聱。土花绀碧沁肌理,雷纹宛转环皋 陶。中心莹滑不留手,恰受二尺楢椎敲。良辰会客风日美,水面考击鸣蒲牢。如观溪峒跳明 月,宰牛呷酒欢相邀。忽然蛮风卷瘴雨,中有铁马声萧萧。一击再击转激楚,战场万鬼皆啼 嗥。不用趣战用行酒,铜龙悲愤发长号。国初诸老始赏咏,黄湄秋谷俱清超。查氏书堂复继 起,徒为玩物争抽毫。我闻燕然既振旅,仲山宝鼎来归朝。此诗述德因爱物,子孙永宝当不 桃。藏之宗祏无忘在莒事,亦知乃祖乃父于国宣勤劳。剖符领郡三十载,不蓄长物甘萧条。 罗施石丑不足载,此鼓只如薏苡来南交。圣人有道四夷服,何用大食日本歌金刀。

五忠咏 • 石阡知府严谨叔和

溪峒飞鸢处,凄凉马援兵。樵苏艰一饱,秦越厄连营。决胜宾僚智,扶衰骨肉情。如何 箕尾促,不得话平生。

五忠咏 • 署都匀知府高廷瑛式如

文采蜚科第,称师艾至堂。义师巡助远,儒吏伍从王。肺附皆虞殡,同袍又国殇。城云 丛坏气,祠俎并英光。

五忠咏 • 署贵西道巴图鲁于锺岳伯英

部曲从先子,艰难矢石中。论诗七子杰,破阵万夫雄。缟素孤儿泪,丹青乃祖风。牂柯 迟悔祸,不奏贵西功。

五忠咏 • 思南府学训导张鸿远

甫成倾盖乍, 據报夕烽来。凤羽寒虽短, 豺牙厉不摧。涣奔时事棘, 守道腐儒哀。凄咽

乌江水,相期愧不才。

五忠咏 • 册亨州同云骑尉刘宝善

贤子册亨吏,尊公老岸司。卑官如一辙,惨节不同时。野哭红江暗,招魂碧血滋。欲求 公百辈,为帝守边陲。

东海行

东海在何许,乃在神州东。振策登之罘,万里青濛濛。日月星汉互吞吐,江淮河济来朝宗。鳀壑蜃窟多诡怪,齐人道是蓬莱宫。但见天吴鼓浪黑,那有珊树殷天红。君不见排难鲁连子,玉貌却敌围。城中抗疏胡邦衡,屈膝苟活羞容容。一怒便欲从此逝,甘狎鱼鳖随蛟龙。皓皓不受浊流滓。《怀沙》《惜誓》将毋同。我本海滨士,独衔幽愤希高踪。坐对天池一长啸,枯桑槭槭生天风。王伦不斩秦竟帝,吾舍二子将安从。

送莫子偲游赵州赴陈刺史之招

黄沙舞风白日晡,眲叟束书戒仆夫。何事犯寒须冻结,南渡衡滱饥来驱。臣朔履破不足道,君亦如此堪卢胡。蚤年高名动帝都,西南郑莫称两儒。犍为文学毋敛尹,三千年上攀为徒。涩体惯作孟郊语,瘦硬能为李潮书。今年京国朋不孤,瑰琦跌宕刘与吴。经生壮士各异态,臭味自合无差殊。刘归吴逝君去国,远游宝璐何人沽。君诗送我西山麓,重裘装缠秋林疏。我歌送君燕市外,剑筑萧瑟冬原枯。勿饮赵茶浇赵酒,平原公子无时无。

海水

海水群飞舞蜃螭,甘泉烽火接令支。牟驼一旅犹言战,河上诸侯定出师。地孽竟符苍鸟怪,天心肯使白龙危。春秋王道宏无外,狭量迂儒那得知。

十载艰虞选将才,牙旗玉帐上游开。不关陆九纶言痛,已见陶公义檄来。槃敦肯捐河北地,衣冠幸免广明灾。江头余烬千门年巢,蒲柳无春更可哀。

古风

橘柚生云梦,童童如羽葆。甘果既累累,冰蕤亦袅袅。华实均足珍,众彫见孤好。霜中 溢清芬,能香不愿早。世人称松桂,兹物不复道。乃知耳目外,薶藏多瑰宝。

上山采苦菜,青青不盈筐。暮春茁寸玉,食之生清凉。菲薄野人味,岂荐鼎俎旁。自殊春荠甘,敢望秋藿香。贵人餍刍拳,肠腐亦当防。为君已内热,恐君不能尝。

山鸡对镜舞,盘旋无时休。文章召争竞,知与生为仇。不如抱我朴,神与太素游。儵忽 不相凿,攻取当无由。人世纵迫隘,持此狎海沤。

西蜀严君平,下帘玩道德。襄阳司马徽,善鉴仍守默。褐衣卖畚人,治乱若黑白。抒之 不可既, 閟之亦自得。士不着贫贱,有道处岩穴。 布衣受人恩,甘以身为酬。白日见肝胆,微生如蜉蝣。荆卿一酒人,晚遇燕太子。揕柱虎狼愁,气夺镐池鬼。战守术已尽,出奇岂得已。信陵破秦军,只为得士死。所惜时已晚,未并剧乐美。赵吟山木下,齐栖松柏里。大义独燕存,光芒照易水。

憔鲔悦回渊,惟鹿安茂林。濯莽何所恋,寒蛩乐以吟。大道随所挹,志士各有心。殊涂 訾异端,党同感知音。不好自不知,暖姝岂足钦。为谋无相强,偏至方钩深。八纮罗群彦,一目焉得禽。

良马千里足,媚人不知貍。球场逐鸡狗,安辨騄与骐。不道无所用,安知非其时。塞草动朔风,喷玉偶一嘶。朝刷医无闾,夕饮西母池。但酬伯乐顾,岂为黄金羁。

霜气陨万物,长夜耿不眠。独立望九垓,高穹敻难攀。斗杓倦不转,流星如雨繁。昴毕生芒角,三台惚怳间。文昌倾厥筐,王良失其鞭。独有积尸气,灿白如纯绵。参斿靡不张, 枉矢钝不穿。缩元武颈,虓怒白虎颜。森森华盖下,荧惑岂敢干。警旦盼神鸡,辉辉扶桑颠。

吹台行赠任丘边云航

啸台低,吹台高,台下瓦砾生黄蒿。登台吊古逢吾曹,故人谁欤今边韶。大梁本是霸王地,至今白沙三丈没城壕。五季如风青城虏,惟有信陵死不腐。中原荡荡不自立,金戈蹂践徒辛苦。当年汴水入泗流,清明上河尚可游。南下朱仙四十里,大车辚辚,小车辘辘,彻夜无时休。一自河决汴流断,中州贫索来寇乱。锦衣甘食皆河兵,那有健儿习征战。君来蔡州营,我去宋州城。宋蔡相望列三帅,千群边马仍横行。尔我少年容易老,王粲从军欢情少。饮我酒,为君歌,金梁水月吹酒波。试看战骨白,岂惜朱颜酡。抱关侠士不可见,只有宪王乐府堪吟哦。

采桑曲

紫燕对舞春风柔,风开桑眼青如油。家家晒箔急蚕事,女伴不作嬉春游。十七鸦鬟臂苦短,大妇扶将小妇挽。蚕瘦叶稀不满筐,那有心情更回眼。谁家游侠儿,鸣鞭陌上走。自觉口中衔石阙,不知纤条伤素手。春日脉脉春云阴,恨无绿绮通春心。路人千百说长短,自惜年华自不禁。君不见,鲁国秋胡妇,忍死不受狂夫金。

登牛首山望终南曲江樊川辋川作歌

我升燕台望太行,西旋北绕如龙翔。今登牛首望秦岭,南面连横如堵墙。截然平壤起都会,桑乾渭水浑流黄。幽雍以外降一等,汴京釜底洛土囊。金陵仅栖偏安主,便有陂陀号龙虎。临安湖山最灵秀,低首称臣玩歌舞。乃知丘壑与湖溪,止娱寒士游醯鸡。文章绮靡士气薄,市廛儇巧民心携。赤乌草草樊山驻,乌喙郁郁会稽栖。平城广莫魏猾夏,和林荒苦元开基。辽金并起黄龙外,周秦先居》幵渭西。建国由来戒沃土,势高气厚人文武。润色繁华由后王,当年山川本朴鲁。关中今日少王气。奥区自全非上计。持戟百万无定形,以雍比幽广狭异。小儒论都逞雄才,欲建行宫望幸来。小戎不敌回纥马,陆海已尽南山材。方今天子守四海,提控岂在西秦隈。碣石难将渤海阻,丸泥岂禁函关开。后拥突骑护辽沈,前调兵食收江淮。一朝立国有根本,况复驾驭今恢恢。守国在德亦在险,大险惟有轩辕台。

极乐寺海棠初开置酒会客

今日不雨,明日复不雨。白日能笑花能语。今日不出,明日复不出,回风舞雪随黄土。 火急邀客城西去,绛蕾如珠点碧树。莫嫌来早香未齐,犹胜繁枝逼春暮。当年合抱二十株, 主僧蜕去花亦枯。一株傫然似房老,新丛稚齿斗娟好。忆昔上林未罢时,侍臣下直寻春嬉。 五侯七贵来觅醉,棋子方褥青螺卮。即今游赏虽萧索,静昼晴光亦不恶。那须银烛按凉州, 巾履徘徊到日落。秦翁白发非少年,心情犹逐春风颠。手裂冰缣写艳骨,醉来辄就花阴眠。 君不见定惠院宇今寂寥,碧鸡坊底生蓬蒿。画成题诗付老衲,要令来者思吾曹。

送王壬秋归湘潭

鸣华钟,调素琴。漆室老女方哀吟。不嫁不悲好颜色,不知何事伤春心。春心千里岁华晚,洞庭风起白波卷。游子对酒思故乡,秋士登高悲送远。不如一觞欢今夕,此会不比新亭集。横流能无沧海忧,陆沈差免神州泣。情怀难遣游梁人,声价犹同入洛日。机云入洛正青春,屣履公卿竞到门。东宫绝艳徐陵体,江左哀思庾信文。笔豪费尽珊瑚架,墨沈书残白练裙。璧月如花照琼树,汉皇好文偏不遇。谈经何意动红阳,献策岂能感杨素。贵游偶餍五侯鲭,微识早成豪士赋。作赋雕虫悔误身,横刀负羽耻依人。河北军中呵太守,征西坐上笑参军。十年偃卧衡山里,侯王徒隶峥嵘起。已知马槊胜文章,犹倚儒冠侮兵子。乡人不荐马长卿,生意刁骚殷仲文。种柳江潭忽已老,蓬莱再到今扬尘。闲关北来谁共语,朝野欢娱奏钟鼓。千官重见汉威仪,故宫仍是周禾黍。词客吊奇偶经过,野望苍梧涕泪多。不信禳灾凭属玉,竟符妖谶陷铜驼。沈炯登台空拜表,梁鸿过阙独哀歌。哀歌莫被中朝怒,拜表幡然念乡士。淮南丛桂娟娟生,不乐留住长安城。秦嘉上计终思妇,王式徵来本强行。九疑窈窕湘波绿,高楼正临湘水曲。女儿授学书满床,小妇弹筝美如玉。尽添鸿宝付名山,会听蒲轮动空谷。君去江干兰自芳,君诗荡气更回肠。欲从无奈湘潭水,我亦金门执戟郎。

题彭侍郎画梅画为何人所藏其人亦能画

春分三日雨雪霏,闭门蒙幕篝熏衣。忽撑冷眼看冷画,怒蕊贴幹交柯稀。此花倔强如此 老,老将画笔龙夭矫。晕墨偶用华光法,放笔羞摹仲圭稿。但见岭头月挂树,不知世上霜杀 草。岂止霜寒冰已坚,长松巨柏今凋残,独持幽艳媚空谷,石肠玉貌无人怜。日日画梅万毫 秃,宝刀绣涩髀生肉。西邻有客喜贞苦,故遗驿使慰幽独。君欲报此一枝春,何不画作孤生 竹。

秦子衡为孙驾航画崇效寺丁香海棠卷

奔走幽僻寻春花,白纸坊下逢僧家。禅房昼掩草断路,几年不见金犊车。朽株卧草强八尺,当年曾媚嬉春客。小丛薄艳不成娇,妸娜银钩黯石墨。王朱种花留诗句,翁吴题诗补花树。两孙来游尚有花,和诗写花费毫素。丁香{" 中鹿}千株圆,海棠霞晕扶春烟。至今纸上斗香色,疑骄似妒如能言。国初可怜多诗老,翁吴后来才渐小。祇今又作古人看,争使红芳不枯槁。劝君莫问西来阁,坏壁空廊宿燕鸽。唐贤石刻苔钱生,故相榜书蛛网络。京洛岁岁花连天,只有才调惭前贤。此图不灭花不老,人物苍茫二百年。

题董研樵太华冲雪图

白日无语天云同,浩然忽忆莲花峰。望之纤掣类仙子,缟衣练帨凌虚空。大麓乍叩玉泉院,弃基更求集灵宫。冰坚石泐马蹄踣,宾从敛手无能从。独裹旃裘结縢屩,济胜之具天所丰。樵苏不出行迹灭,往往虎蹂参麋踪。嘘气在须作集霰,悬瀑冻涧僵长虹。红衫踯躅出林表,那惜素面嫠寒风。舍马而徒更十里,乃拂落雁过苍龙。鼯缘猱附两俱绝,铁縆下引天能通。金神逃匿博箭烂,玉女老秃天浆封。回头眴慄不敢视,千里银海欺青瞳。岩阿道人拔关出,瞠目讶是真灵逢。忍饥不闻噪乾鹊,闭蛰免使愁元熊。下观三辅只洼垤,飘飘便欲游鸿濛。何用投书骇世俗,自厓而返亦已雄。归来人家皆偃卧,呼酒百倒颇黎锺。趾皲手坼定始觉,襦袴更取桑薪烘。看山琢句斗清峻,槎牙咄咄生心胸。两过华阴不登眺,悔我前日殊忽忽。贵人游山待供帐,如此幽险谁能穷。伸图洗眼真叹绝,天下健者惟董公。

九日蒸仁寺毗卢阁登高谢麟伯何铁生陈六舟朱肯甫董研樵陈逸山王廉生同游

吾欲反悲秋,秋气实快哉。木落天雨霜,万里无氛埃。志士如黄鹄,人海厌沈埋。且登 三藏阁,何异九成台。磴道既多剥,步櫚又已摧。秋花亦疏薄,辛苦残僧栽。纷然俦侣集,解带倾尊罍。晴空拥太行,万马脱衔来。芦沟浊似汤,蓟丘低如坏。决云一雕起,拂霄群雁排。逸气翔寥廓,顿使襟抱开。诸公皆能赋,一一大夫才。下视九陌人,营扰徒喧豗。年年有重阳,望古令人哀。此寺盛明季,法筵閧如雷。国初犹庄严,庙市奇书堆。亭林赁庑住,渔洋游春回。近日寿阳相,重复辟蒿莱。坐客皆龙气,张陈朱曾梅。嘉会已陈迹,行径生荒苔。各自有千古,恨不相追陪。抚此白露零,感我玄鬓衰。靡靡枝上叶,常被商声催。请看双虬松,铁幹无摧颓。牛山景下泣,秋井杜衔杯。二子孰为贤,悠悠非我怀。

戒坛松歌

策蹇寻山冒残暑,食宿招提已四五。仙嶂灵湫那得逢,枉使人畜挥汗雨。精庐雕饰为檀越,佛衣陊剥见黄土。佛法一线在戒坛,叩门先听松声寒。横广平台五十步,穆穆护法排苍官。墨云倒垂逾万斛,压折白石回阑干。潮音震荡纤壒扫,气象已足肃群顽。矫如神龙下听去,赫若天王司当关。十松庄慢皆异态,各各凌霄斗苍黛。一株偃蹇甘独舞,不与群松论向背。此树问年臆可知,开皇下迄耶律代。门内白足鸣鼓钟,年年传法欺愚蒙。何人饱食携坐具,享此万壑清凉风。风动树开见山趾,帝畿浩浩穷百里。长波如带抱坛来,历劫不枯桑乾水。回望西山众精蓝,只如房蜂与穴蚁。彼法开山信有人,善踞灵奇为栖止。定知末法三千年,法终不灭松不死。

同张绳庵访僧心泉因与同游南洼

簪组如林森机械, 拙者转喉招嗔怪。辛苦酬答两无益, 適野寻僧差足快。清远无如龙树阁, 风水鳞鳞漾蒲稗。白日闲澹罕游人, 午鸠独鸣寂梵呗。三人不知谁主客, 错综谈端等针芥。会心即答倦即默, 茗碗无温聊一嘬。此际鞿鞅尽摆脱, 何异枯柳揩马疥。禅客洒落不参禅, 偶参金石及书画。远识阮姚近戴刘, 略述旧闻资感喟。海宁达受号博古, 法眼炯炯同宗派。缥囊犀轴积如仓, 投老尽偿柴米债。此亦五阴障真如, 今朝始入四禅界。文畅爱文心无著, 如满游山力未备。我虽钝根可渐磨, 师老难回年齿迈。留此孤云伴我游, 洒然何知世网隘。

五北将歌 • 广州副都统乌兰泰

桓桓都护须髯紫,平日爱兵如父子。万里征讨毒瘴乡,能结士心得士死。左江右江贼如麻,四方征调糜虫沙。按炮持燧不敢发,一里以外犹呿嗟。始将火攻教懦卒,可惜利器无开花。老罴据险气山涌,水窦孤军摇不动。黑夜出奇卷甲来,以少击多无旋踵。独恨诸军不和辑,老将兀兀成孤立。桂林桥上铁雨飞,五管军民同雨泣。呜呼庸相真无谋,充骏任驽祸神州。当年若使乌向为两翼,安有长鲸直下江海成横流。

五北将歌•湖北提督塔忠武齐布

湘沸江腾虎出柙,千城百垒如摧拉。谁翻败局据胜势,破贼首见满洲塔。艰难起义曾太傅,左提右挈无人助。猛火光里识奇男,一旦英雄归驾驭。南来帐下三百人,一一材武皆冠军。童彭刘毕劘豺虎,杨鲍黄李翔风云。军门神武殆天授,能用水师兼步斗。六合枪诀无人学,出必先人归殿后。上游湘潭城,下游九江郡,行二千里无顿刃,兵势如龙贼如草,百船銕年巢一宵烬。归营僵卧不知人,明朝蓐食仍陷阵。田镇故垒临江湄,父老方之叹且悲。中兴诸将列茅土,开创风气非公谁。我闻但有胜将无胜兵,惟在运用能神明。请看塔公部下诸将士,岂分勇营与绿营。

五北将歌•西安将军多忠勇隆阿

明公将步布将骑,纵横天下皆如意。胡公东征善知人,鲍步多骑左右臂。收取太湖扼潜山,奇兵横绝集贤关。马队八百敌万众,无发无捻无精坚。陈狗失穴如游拂,鼎内安庆无援已在掌握间。江淮大局进退在一战,挂车河水流血成朱殷。古来骑将专击搏,今看陷阵良足乐。灌婴季布平阳侯,不及将军有智略。关中祸乱留花门,三辅焦烂无完村。外援到陕已却步,内兵渡渭徒进奔。将军钟鼓鸣灞上,终南山色开朝昏。盩厔坚巢城如铁,将星遽碎城亦裂。部下金善长穆王曹雷,余威扫尽葱岭雪。从来步骑难兼长,何况能谋能战平生无败创。所恨仓卒不待一二载,生写形容上紫光。

五北将歌•科尔沁僧忠亲王

南军尚持重,北军尚剽疾。湘淮两帜战江表,河北独有名王一。中原旷荡几千里,铁骑腾蹴一万匹。神京既奠遂南下,年年征讨无休日。海东劲卒材昂藏,漠南蕃部性雄强。目瞋语难孰能驭,指挥赴敌如驱羊。射雕羽箭二斤重,诈马绳竿九尺长。正兵螺旋迭进退,奇兵鸟翼相舒张。不知何者为兵法,但见万马并为一马无能当。连镇街,冯官屯。杞县城,金楼村。白莲池上东捻灭,马山口外西捻奔。大沽夷船亦夺气,蒙城苗练先亡魂。大功数十小战不知数,所到惊呼赤面如天神。诚感悍镇化野性,指授良将成高勋。残寇狂走趣战迫,强驽穿缟不自惜。红旗一队称军锋,先向平原洒战血。尽歼大憝覆鸟巢,甘酬素志归马革。廿年大帅多如林,车后遗弃粱肉庑下堆黄金。阿史社尔行军无卧具,沙陀朱耶报国惟赤心。虮虱满甲几曾浣,刍藁一束时难寻。艰苦廉朴鉴天地,家家私祭同霑襟。呜呼!异姓贤王罗青史,李郭徐常非其比。不独战功近掩策凌超勇王,合将忠诚远追扩廓奇男子。

五北将歌•塔尔巴哈台参赞大臣署伊犁将军锡纶

匈奴象人射郅都,楚祭北门为黔夫。敌国所恶我所宝,羊陆市诈将人愚。迩来阃外盛材武,敢战内寇怯战虏。何况罗刹逞睢盱,六国同声畏狼虎。一自昆弥叛不朝,王庭十载沦天

骄。狡黠老渔伺便利,盗据瓯脱容逋逃。豪杰陷贼能自拔,习惯沙场从结发。贤父战死沙州城,桓靖美谥荣忠骨。贤兄博学高名起,武达文通一门里。国难家仇在西域,孤儿甘赴边城死。绝远无如塔城孤,斗入斯科环杂胡。藩篱外收哈萨克,掎角内结呼土图。匈奴未灭家何有,闭壁不许通妻孥。垦荒起疲变重镇,鄂博一步谁能逾。西邻责言众积毁,热血未冷霜盈颅。玉门望断敌人喜,刀笔纠擿纷纷起。私文不责许田郑,恩宽仅杀饰终仪,柳翣凄凉归万里。二卵弃将古有之,长城顿坏今已矣。鼓鼙声壮磬声悲,我皇听之思者谁。屯田未熟征夫老,界上来争帕尔碑。

金山观东坡玉带歌

党人文字毁不留,章蔡疾之若仇仇。带一围落方外,山僧宝之若天球。岂惟僧俗知敬爱,压伏海门百灵怪。曾瞻黄伞对延英,更抵传衣镇法界。传衣传钵碎南华,道君玉押埋胡沙。可怜攒宫一片石,理宗不保归真伽。世事由来有反覆,故主谪臣殊荣辱。南巡圣藻身后荣,宣仁社饭当年哭。我哀公遇诵公诗,八州遍到拜公祠。一事堪令古人羡,今是天海澄清时。四大五蕴皆空相,惜公爱公公岂知。欲访中泠桑田改,紫金浮玉成陆海。京口十年作战场,缁徒千人无一在。此玉不焦亦不濡,龙珠上护白虹采。峨眉险巘瞿唐艰,不如北固好江山。妙高台上月明夜,应见骖鸾数往还。

谒胡文忠公祠

枢轴安危第一功,上游大定举江东。目营四海无畦町,手疏群贤化党同。江汉重瞻周雅盛,山林始启楚风雄。长沙靖乱诚相似,未及高勋又赤忠。

二老当年开口笑,九原今日百身悲。敢云驽钝能为役,差幸心源早得师。圣虑当劳破吴 后,雄心不瞑渡河时。安攘未竟公遗憾,儌福英灵傥有知。

彭刚直公挽诗

神州贯长江,其南际涨海。江海幸息浪,砥柱今安在。持危望同心,事棘公不待。回忆越祲昏,炎方门户殆。天降江神尊,气吞海若倍。军离终成睦,民恐顿忘馁。雪涛拥虎门,两角高崔嵬。孤军壁其外,免胄不披铠。共苦感士卒,任难服僚案。我亦受危任,同臭若兰茝。论奏出腐儒,谬谓谋可采。王师入龙编,虏肉不足醢。捣虚势已成,行成逞欺绐。返旆三军呿,撞斗老夫唉。天鉴刚且直,戆言宥不罪。两年栖庵闾,择地斥爽垲。雾潦看坠鸢,浸淫中肩骽。烂烂紫石棱,疏髯苍绕颏。扶掖始下床,英姿终不改。九州服威风,所至绝奸贿。灿烂妇孺口,张皇及琐嵬。画梅遍人间,自吐冰霜蕾。北归未过衡,一面至今悔。急难不尸位,此意空千载。袍泽入魂梦,孤愤结磊磈。鲸牙日锋厉,箕尾失光彩。群嵩岂任柱,雨泣问真宰。

易实甫以司马温公残帖砚见赠乃温公与其侄九承议手札后半段其眉亦缺数字就残石作砚叶东卿故物翁覃溪刻字题为断碑砚误上有元吾子行印及昌龄印昌龄满洲人乾隆时官学士多藏旧椠本书余每见之印朱文曰长白敷槎氏李南涧日记载其人疑此为昌龄所刻诸家真迹法帖不详帖何名又不知真迹在何所此其半石也

介甫书颠狂,子瞻书豪纵。穆穆司马公,落墨必谨重。邪异贤亦殊,朝局成一閧。宵磨

党碑名,俘掠花石贡。贵贱在公道,残帖今传诵。遗书问九郎,无异鹄鹜讽。忽忆《停云帖》,书势相伯仲。结体取宽平,挫笔少纵送。固知任诚悫,或少智术控。誉王已过厚,任蔡良可痛。独惜通鉴稿,细书失充栋。此石仅八寸,其价璆璧共。幸免佞人污,壶卢未押缝。易生信慷慨,如石充僧供。坳墨谨洗涤,廉棱戒磨砻。作我方正友,泚笔岂敢弄。嗟哉六月相,昊天不祚宋。绍述肆诋诬,天怒神怨恫。政荒相若鬼,敌喜国如梦。居洛十八载,伏如鸡处瓮。有园甚荒率,忘机到仆从。花药助读书,独乐不与众。我意独慕此,守黑甘无用。点易滴新泉,石田春可种。谁能考凤墅,抱残夸博综。

蜀葵花歌

兰论畹, 蕙论亩, 荷华菡萏泽陂有。看花满眼意始快, 艰苦骄矜何足取。世俗贵耳斗奢华, 洛花道好蜀葵丑。十千一窠且难得, 不赏园林赏罂缶。可怜光采弄顷刻, 愁阳愁雨劳逻守。田间野客爱蜀葵, 谓是易生兼耐久。娟若芙蓉斗秋霜, 直如枲麻出蓬莠。烂然千朵应时发, 粪溉岂出园奴手。美锦难比缣利用, 河豚岂如鲤適口。广庭廓落无雕饰, 萝薜挂墙一尺厚。花光喷溢充虚堂, 最好旭初及雨后。我欲表微张此花, 为集嘉客倾美酒。此花虽贱君子贵, 君子为谁?司马君实号迂叟。

登采石矶

艰难温峤东征地,慷慨虞公北拒时。衣带一江今涸尽,祠堂诸将竟何之。众宾同洒神州 泪,尊酒重哦夜泊诗。霜鬓当风忘却冷,危栏烟柳夕阳迟。

石钟山拜水师昭忠祠坐芸芍斋

南疆水战两奇踪,赤壁东来数石钟。千里江湖成竹破,一时贤俊等风从。灵旗月闪惊栖 鹘,礨空波鸣起睡龙。太傅功名谁不赞,服公胜算在从容。

江行望庐山

朝见庐山临江漘,青翠腾跃来迎人。暮见庐山忽杳霭,首尾隐若龙登云。从来倔强五岳外,鼓蠡作杯江为带。内蓄百涧包灵奇,外切太虚定澎湃。江表名山数第一,俨若大贤兼通介。寻幽有约近十年,疗渴须酌康王泉。学道未成游未遂,谁令忽遽妨萧闲。思得素心共山水,海客狎鸥呼不起。苍苍五老笑我忙,高樯长风送旗尾。山林聚会尚阻格,世事难为可知矣。人爱庐山高,我爱庐山深,欲到深处须抽簪。世无慧远堪结社,且听东林钟磬音。

题潘伯寅侍郎极乐寺看花图卷

西郊密春云,出门澹尘虑。陟原得清旷,即麓转盘互。氵虢氵虢循澄流,霭霭见嘉树。南直贝子园,北眺西涯墓。郁郁鬘陀林,诸天散香雾。乔幹肤皵茧,灌丛容妍嫭。哲王珠榜书,经师松牌句。侍郎敬爱客,于野集簪屦。鸣珂傔从屏,行厨觥筹具。所憾期集迟,绛雪纷委路。抚柯惓胜赏,驻景讬绢素。前游值始华,嘉会我未与。后游已烂漫,良辰薄春暮。令姿少长年,畸士艰良遇。主僧笑我愚,狂华扰真悟。请图镇山门,永敕善神护。俯仰成今昔,兴怀等禊序。秾华有枯菀,妙墨无朽蠹。授简不能辞,窃比寒具污。

秋兴

归鸿警边吹,离羊嘶商音。夷则伤万物,肃然恻我心。夕溥砌菊露,晨损庭柯森。元蝉 閟曼响,蜻蛚振促吟。虚堂细缃素,珍此一寸阴。陨落悚困学,澂颢愉烦襟。褰衣览城阙,披露西山岑。凉宇绛蝀敛,颓照碧氛沈。登稼农休耒,授衣女急针。荒陂稍夷旷,蒹葭犹萧 椮。此日叹竭泽,昔游鉴清湛。潘生赋不达,汉武乐已淫。玩易自无闷,歌唐独思深。欲辨谁为质,命琖聊孤斟。游息止艺圃,翔集耽文林。谁云秋可悲,且操履霜琴。

正月初二日同杨叔峤登楼望余雪

自丑银幡白发人, 晴光喜见照城闉。山通佳气犹明雪, 江泛柔波已漾春。冠佩渐劳知老至, 羽书方急愧年新。悯牛谁诵《河东赋》, 清啸南楼恐不伦。

秋日同宾客登黄鹄山曾胡祠望远

群公整顿好家居,又见边尘战伐余。鼓角犹思助飞动,江山何意变彫疏。三年菜色灾应 澹,一树岩香老未舒。我亦浮沈同湛辈,登盘愧食武昌鱼。

九月十九日八旗馆露台登高赋呈节庵伯严诸君

矶上严城晚吹凉,凌风壮观补重阳。柳仍婀娜秋生色,荷已离披水吐光。风动白波寒楚佩,梦回青琐在江乡。寒烟去雁穷怀抱,强为群贤一举觞。

慈仁寺双松犹存往观有作

千步廊前车如织,归来中满不能食。无聊欲共草木语,城南双松上胸臆。琳宫百堵无片瓦,远见精神出草棘。伟哉衣冠绮与黄,曾睹秦火三月熄。龙鳞如掌丑愈妍,返照在顶晃黝碧。崇效僧图遭掠卖,长椿九莲难踪迹。此寺瓷像亦俄空,佛救不得凭谁力。访旧多为游岱魂,求如汝寿那可得。同游俱是感慨人,藉草相看到曛黑。往年妖乱等一梦,锦库成灰铜仙泣。遗此区区老秃树,岂足增壮帝京色。虽不中用亦复佳。留与后来阮亭望溪弄笔墨。

和云门南河泊之作即同九佳韵

江海无能一病骸,独欣薮泽免尘埋。早凉树鹊声先喜,残睡渔翁眼乍揩。谋野曾无裨谌 获,游车姑学邵雍乖。鉴湖傥荷君恩赐,致仕何妨被硬差。

中兴一首答樊山

流转江湖鬓已皤,重来阙下扶铜驼。故人第宅招魂祭,胜地林亭掩泪过。前席颇怜非少 壮,小忠犹得效蹉跎。神灵今有中兴主,准拟浯溪石再磨。

九日登天宁寺楼

过阙当行复暂留,数将新绿到深秋。贪看野色时停骑,坐尽斜阳尚倚楼。霜菊吐香侵岁

晚, 西山满眼隔前游。廊僧亦有苍茫感, 何况当筵尽胜流。

白日一首示樊山

又到山寒木瘦时,黄鸡白日去如驰。诗才已为尘劳尽,霜鬓空教海内知。送远添愁身是客,解忧无效酒盈卮。梦中争苦烦惊醒,枥马依墙龁断萁。

正月十七日发金陵夕至牛渚

牛渚春波浅涨时,武昌官柳已成丝。东来温峤曾无效,西上陶桓抑可知。

政务处诸公招同樊樊山廉访游积水潭示樊山

东省夔龙坐上齐,招凉同到后门西。旧人惟有樊山老,愁绝僧墙续旧题。

对岸乔林付爨烟,荷花愈少愈堪怜。虽然不是沧桑事,但惜西涯变稻田。

国子监拜熙文贞王文敏两公祠遂观石鼓

戟门阶下绿苔生, 凤翥鸾翔老眼明。人纪未沦文未丧, 岿然十鼓两司成。

留滞都下日久时有唱酬

李谢王袁宿草萋,区区风雅亦陵夷。薛能自忖无功业,不耻粗官好说诗。

拜宝竹坡墓

翰苑犹传四谏风,至尊能纳相能容。枫林留得愁吟老,晨乐疏星独听钟。

百疏危言日月光,差传子政作金方。市楼一琖良乡酒,那得鱼头共此觞。

过张绳庵宅

卅年奇气伏菰芦, 虎豹当关气势粗。知有卫公精爽在, 可能示梦儆令狐。

过芜湖吊袁沤

七国连兵共叩关,知君却敌补青天。千秋人痛晁家令,曾为君王策万全。

民言吴守治无双,士道文翁教此邦。白叟青矜各私祭,年年万泪咽中江。

凫雁江湖老不材,百年世事不胜哀。盖公堂下青青树,曾见传杯读画来。

读宋史

南人不相宋家传,自诩津桥警杜鹃。辛苦李虞文陆辈,追随寒日到虞渊。

读白乐天以心感人人心归乐府句

诚感人心心乃归,君民末世自乖离。岂知人感天方感,泪洒香山讽谕诗。

【卷一百六十三】

王先谦

王先谦,字益吾,号葵园,长沙人。同治乙丑进士,改庶吉士,授编修,历官祭酒,加 内阁学士衔。有《虚受堂诗存》。

赠李禹臣

不是从黄宪,何缘御李君。并名中表录,同揖上将军。镫几晨联草,戈船夜定文。犹拈 《渭城曲》,顾我许同群。

戏柬禹臣

军中不眠宜作候,当食那辨几觞豆。怪君文潜肉山肥,苦学子美饭颗瘦。即今黄州电扫 平,放笔试草洗兵行。丈夫能事上下马,叱咤会有风云生。

自黄州南返登岳阳楼

甘入烟波伍老渔,拂衣长啸别飞舻。举头明月黄泥坂,落手扁舟青草湖。流涕凭轩仍似 杜,得鱼携酒不如苏。茫茫身世今何著,剩欲呼天问左徒。

早起

不寐看窗色,徐行映日华。水田深戏鸭,村树暗辞鸦。煮茗依丛竹,移盆接早花。市廛 亦不远,幽意自山家。

晓晴

春气满庭阴,山低日色侵,蝶来花更韵,莺啭竹逾深。倦起书抛架,微酣酒涴襟。轻寒散曝背,时作白云吟。

维舟

维舟近高岸,散步出平陆。春气浮野田,细麦青如沐。行行入岩径,人家聚山腹。笑语空外飘,炊烟澹相属。桃花三两红,幽景媚林麓。农人归日夕,行歌去相续。羡彼室家好,愧我身世蹙。怅然独移时,飞鸟入穷谷。

夜行

暮色悄而至,群动迷所向。新月安天中,斜阳尽水上。长年猛一榜,及此帆无恙。舟疾 四野迎,风雄万流让。寒犬吠人语,密树动鸟吭。村远意先亲,途平胆欲壮。进退两无主, 然思焉得忘。时来骑危篷,注目落清旷。

过耒阳有怀杜工部

自古湖南地,难招旅客魂。渔歌屈颜悴,《鵩赋》贾声吞。抑郁忧时老,潺湲伏枕痕。 当年下巴蜀,何苦向湘沅。罕见亲知面,徒抛肺腑言。蓬蒿辞朗照,杯炙落尘喧。淼淼衡阳 去,依依郴岸昏。聂贤空接待,崔舅谬温存。实谶湖边旐,虚谋汉上园。厄深千载恸,道屈 百家尊。舟子传疑墓,诗翁问旧村。公真悬日月,我亦走乾坤。浦树思依倚,滩流有愤冤。 篇章极冥契,飘泊共谁论。

远游

远游俗虑静, 永日求所適。雨余沙自清, 睡起山更碧。幽禽低水语, 丛篠乱风色。呼茗喜新煎, 课诗矜创获。见闻犹昨事, 迈往续陈迹。终藉药饵扶, 乾坤小行役。

赠子美

牙幢待入百蛮烟,美意犹闻部曲传。利引唐河归故道,欢腾樊镇溢新廛。虽为五日张京 兆,颇似三年白乐天。遥想汉滨开祖帐,襄阳耆老泪潺湲。

酒后赏雪舟中

薄醉不自倒,衔杯对玉山。犹能醒诗眼,何处看尘寰。风弱舟微重,天空鸟任闲。光摇 明镜里,复讶失酡颜。

莫愁湖柬曾劼刚

江南眼入十分愁,及到湖边万事休。水宿连宵镫暗雨,风吹破帽客登楼。遥山湿雾仍侵 晓,高阁孤尊自送秋。来岁寻君行乐处,梦中同上采莲舟。

题龙皞臣诗草

朔风吹微雪,被酒昏不醒。畜眼见龙侯,使我志气盛。世烈蔚通材,儒术成健令。旧知德业广,近接词华胜。浮空波澜老,入冶金铁迸。攀古学阴何,步今揖王邓。愿言举高翮,侧听敷新政。再读县居篇,私怀国桢庆。

将以重九放榜前一夕书此赠绎{广今}偶谈及新修滕王阁之胜故并及之

忆年庚午初乘传,长寿虎头同笔砚。青袍白纻四千人,手拔高材充上选。一朝兵气洗滇海,济济英贤赴秋宴。汪子告余同志难,他日持衡应请念。羲轮下坂條几载,与君被命辞深殿。握手千言见夜镫,论心一盏忘朝膳。迩来文格变已甚,谁挽狂澜注天壍。功名有命君所柄,心目虽疲余敢倦。妍媸略似较美人,洗尽铅华见真面。喜从湖口得异石,终恐丰城埋古剑。重阳已近风雨来,一夕微寒袭深院。桂舒丹蕊正堪折,菊泛清尊催入宴。传闻新阁高插云,好看秋心澄曳练。卻思旧日饱游衍,刚是残黎脱征战。百废未举官私急,遗址难寻桑海变。西山南浦待公来,碧瓦朱甍尽题遍。人生会合有夙分,意气许与蒙深眷。李侯共被又一时,贺监服膺那足羡。掷简聊歌白雪曲,传衣各有青云彦。君看夜静奎宿堂,射斗文光如曜电。

自菴丈以董香光画卷见赠赋此志谢

大江驱蜀下海门,东陵中扼禹所云。洞庭北贯江横分,极望长沙空白云。华亭宗伯画死杰,家在江南卧黄叶。梦游贾杜伤心地,万古湖南自清绝。扁舟上溯纵所之,千岩万壑皆生姿。遥睇衡山泊湘渚,应是先生阁笔时。三百年来如逝水,断缣玉碎埋燕市。乱云脱坏随卷舒,残树迷离半生死。吾师笔法华亭传,一一点染还天全。少陵脱字真可补,道子破佛嗟无缘。公今付我传孙子,他日南归水云里。呼儿展画对潇湘,再拜谢公不敢忘。

寄黄觐虞太守

颇怪邮筒问讯迟,年来佳趣我能知。先生书就元和脚,侍女妆成天宝眉。似说悬弧庆张 盥,定教掣笔叹羲之。吴中老学浑无用,病榻孤吟鬓似丝。

苍梧山

当年沧海东南坼,想见神山高下开。会稽失卻白水峡,郁州半割苍梧堆。我疑溟鹏惯远徙,不数灵鹫能飞来。已陋景纯笺草木,试招虞舜归蓬莱。

戏赠寄禅师

道人心如水镜寒,笑视尘海空迷漫。忽逢童子掷瓦砾,清泠不觉生微澜。异时佛杖何住著,四海飘飖一行脚。闲田招客谁使令,坐遣天机落禅缚。世无姬文化斗争,虞芮几时来质成。拂衣长啸八云去,汙渠蚊蚋徒纵横。君不见趯瓶倒钵古坛主,田与上人安所取。纤埃不著一物无,请更从师下转语。

述怀

余幼好奇伟,不畏俗子詈。食其虽儒冠,仲翔有高气。偪侧闾里中,耻顾蜗蚓饵。长怀千载友,宁论一室事。弱龄经丧乱,楼船管书记。老彭曾竞走,壮王时并骑。不能从俯仰,颇复多慢易。尚枉孟公留,甘作杨津避。忽逢长沙友,邀共泉陵辔。饱看山水归,穷途亦高致。陇西开幕府,陕南伫儒帅。中道有分张,微材免瑕累。梁公实桓桓,胆气固少二。抗手杯酒间,披肝野营次。大江平若席,酣卧有余地。谍报群撚来,早市缠妖燧。深宵呼起起,

草檄不成睡。尚想九真役,凶徒俄蚁萃。元戎空瞋目,老将或垂泪。飞炮鸣我前,高唱倚薄醉。突围走天门,道左纷贼帜。湖桥中夜断,纵马泅更坠。移军蕲水县,张幄孤峰翠。炙背当骄阳,披襟逐凉吹。习勇喜观陈,受降甘报使。蹴踏骸骨场,见惯了不异。顾惭百炼质,庶获一割利。何期忝高科,谬得陪清位。低心就绳墨,眵目觑文字。肉食远谋虚,头衔流俗贵。悠悠世事改,冉冉颓年至。方隅空砥平,瀛海竞鼎沸。我如祖士雅,时有声警寐。又似曹景宗,尚忆火出鼻。事愿每自违,身世已无系。由来抚髀叹,不溷洗耳志。艰难况饱历,生死久慭置。天公不见收,水伯亦屡弃。长歌射虎山,奋袖啼猿寺。悠哉复游哉,终已快吾意。

送吴子修学使归杭州

廿年不踏长安地,梦想朋游醉文字。闻君持节渡湘来,喜入镫花照无睡。知君慧眼湘月明,信君澄怀湘水清。贤名一日播万口,邦人引领神先倾。甄文救弊不遑恤,远接朱张近无匹。乘轺崔浩时共荣,奏赋相如自称疾。王程三载甫经年,何意告别乘归船。君身岂藉官职重,所惜多士无良缘。明廷衮衮登英杰,不信扶危少施设。育才堂馆高切云,劝学文书纷似雪。树人敢谓匪嘉谋,城社狐鼠难可搜。狂夫横议惧民散,相忽得非根本忧。我今伏处成衰暮,箝口藏身真自误。君虽暂归行入朝,莫忘青蒲陈谏疏。

吴汝纶

吴汝纶,字挚甫,桐城人。同治乙丑进士,官冀州直隶州知州,赐五品卿衔。有《挚甫诗集》。

次韵和许涑文观察拟诸将

见说关城卧鼓鼙,又闻应响变鸣鸡。三边列障通青海,九市华筵舞白题。武帝威棱歌宝马,黄支职贡记生犀。长城约束分明在,可任边人节度携。

绝域归来更大何,办装未办口悬河。乘槎路远天忧大,缚马书来国论多。一借荆州还岂易,尽抛瓯脱议尤讹。云蒸龙变归神略,回首沧溟久不波。

四海游谈愿识韩,壮图先见战皋兰。出尘军略戈鋋老,绝塞风烟道路难。麾羽幕前迟谢 艾,盘矛帐下渴陈安。匡时一疏扶清议,早晚天山看筑坛。

诸葛云霄万古名,郎君杖节事孤征。料知樽俎冲能折,休道关河草不横。东阁异时陪客座,宗臣高论屈人兵。家声燀赫怀柔远,元老垂绅且仰成。

卧虎潭潭守便宜,人中蓍蔡仰前知。两隅略地无长锁,万国朝天有乱丝。得意轩车曾宠鹤,当时田猎梦非彨。艰危此日纡筹策,明目仍闻岳牧咨。

北征别张廉卿即送其东游

昔人各有千秋抱,百不施为乃著文。牝掷黄金真误我,缟穿强箭独怜君。堂前莫漫嘲轮扁,后世安能无子云。元凯盈朝身暇豫,且须呼酒叩阜坟。

我歌《伐木》行求友,钟虡莛摧不肯鸣。海运鲲鹏通变化,气联龙虎有逢迎。汉阳晴树帆初远,钟阜秋云酒共倾。早晚探奇窥禹穴,傥因朔雁一传声。

摄任丘令张君琴府以东坡雪浪石铭属题

至人发兴真卓诡,以画喻石石喻水。埋盆激水写离堆,坐揽岷峨五千里。岷峨到眼归不得,海上石芝行可食。鹤峰雪流舞阶砌,高斋法供无消息。阎浮一沤身一叶,嗟石与人谁主客,奇章平泉真大惑。不见北齐冢中石,去入谁家作阶城。张侯也是好事人,藏此纸本如奇珍。岂会东坡思两孙,意亦故山聊心存。平山堂下君家园,树石幽好泉娟娟。何时宦成归林泉,百株石林对洼尊,仇池九华安足论。

过朝鲜王京

攘臂言兵议已疏,锐身字小却良图。分民本计適已事,窃帝一时聊自娱。千载箕封遗俗 在,九州禹迹远邻无。鲰生目睫疑空论,鲂枯鱼势故殊。

游本愿寺

一镫传过海,祖印提来未。低头拜空王,乞与转轮慧。

大木作高栋, 一国不能两。若无百围柱, 颓坏欲谁仰。

旧日园林胜,三年问劫灰。临流惊结构,疑是钓鱼台。

天上止一月, 自可印千池。那用凿邻壁, 光辉共有之。

舟势已欲转,扶危杖柁工。紫藤在彼岸,祇借一帆风。

任其昌

任其昌,字士言,秦州人。同治乙丑进士,官户部主事。有《敦素堂集》。

夜坐书怀

昔贤在穷居,忧乐同天下。小人志温饱,气量不可假。乾坤含疮痍,安得常萧洒。铅刀 贵一割,何用轻注瓦。婉娈入歧途,立身惭大雅。寄言轩冕客,营营何为者。

微雨洒轻尘,春郊送远瞩。草木有生意,萋然变微绿。吾心本澹荡,胡乃自局束。倚杖数过鸟,缘源寻水曲。即事自萧洒,何必更秉烛。世路有夷险,知足庶无辱。日暮复归来, 围镫煮醽醁。

乡思

豺虎飞腾日,乾坤战伐余。归心悬井里,生计失樵渔。西海犹传箭,东军敢射书。安危 关大计,天意定何如。

东道王师至,豪华误将才。秋风空按剑,春色病登台。雨雪旌旗暗,梯冲郡国开。凄凉 三辅地,处处长蒿菜。

天长三秦祸,人摧万里城。悲风号大树,冷月照危旌。竟夺全军气,何曾小敌轻。遗民过二曲,飘洒泪纵横。

读史杂感

令史兰台绝妙辞,燕然终欲树丰碑。雄风为震葡萄塞,《小雅》应歌《杕杜》诗。岂有 天心归白帽,谁怜地角望朱旗。凤林鱼海皆王土,莫遣苍生尽泪垂。

北庭寒月夜临关,回望烟尘一惨颜。《禹贡》不通蒲类海,尧封欲弃贺兰山。尚闻虏帐擒生远,曾是将军奏凯还。可惜如丝天际水,年年流血到人间。

甲马飞腾压陇东,大旗落日动苍穹。千军榆塞犹排阵,十载天山未挂弓。岂有班超护西域,翻教师旷验南风。男儿不负封侯骨,合有忠勤慷慨中。

北平飞将旧登坛,新息雄威老据鞍。王气山川应未歇,人才今古欲同看。云鹏未见抟风起,铤鹿翻愁走险难。地老天荒须努力,未妨亡命有彭韩。

冬夜杂咏

莫笑微云滓太虚,粼粼清水总无鱼。敢言西子真殊色,也道《南华》是僻书。漱石枕流 存慧解,别风淮雨听钞胥。人生只有忘机好,黑白分明计便疏。

素衣京洛染淄尘,百岁谁全不■身。长坂秋兰庸作佩,小山丛柱枉留人。清风月白原无价,鹤怨猿啼信有因。试听商颜《采芝曲》,可怜黄绮未称臣。

大王山

黑水之北山崷崒,阴岑遮回半边日。孤根低蟠地底深,方顶高耸云间出。暮色入林生黯黪,阳光满野转萧瑟。稜々白石砺锋铓,惨惨黑纹傅髹黍。岂有藤萝缀长蔓,更无樝栗垂秋实。鬼神呼雨峰峦重,魍魉啸风崖壑溢。我行其下畏窅窱,人迹未逢增懔慄。径途在眼又辙迷,隶子攒眉愁路失。涧水曲注走蛇蚓,峡角束窘罗梏桎。最忧棘茨能破肌,为陷坑阱屡屈膝。负耒不见收野芋,登梯谁与割崖蜜。扪参历井古所难,履险乘危兹未毕。仙药旧闻采方壶,天池行且窥太乙。滈沣鄠杜不汝容,寂寂孤云闭石室。

唐仓道中望花石山

幽壑散曙色,寒烟开远汀。清澜卷白石,水激风泠泠。北上得平陆,孤村道所经。衰柳 堕黄叶,晚花生微馨。南山独磊砢,百里罗高屏。近瞩烟漠漠,远眺云冥冥。作势欲飞去, 屈蟠虬龙形。初日升海峤,雾散天容青。岧峣视吴岳,未始相迳庭。植基不得地,吾谂诮山 灵。

庙儿岭

岭云横高天,石气青濛濛。暮色苍然至,万壑生阴风。跻攀千万仞,绝顶谁能穷。迂路至山脊,下视幽谷重。涧流怒奔峭,水石相撞春。两山挟之走,攫拏飞双龙。秋树莽交叉,密竹森横纵。三五见聚落,惨澹茅茨空。注坡辗露草,蓦涧踏霜矼。巨石蹲当路,磊磊垂元熊。翘首见新月,悬挂苍厓东。旅栖尚何处,暝色逾昏蒙。谷口清风寺,市墟抱危峰。脱骖晚饭罢,倚枕听僧钟。

曹秉哲

曹秉哲,字吉三,番禺人。同治乙丑进士,改庶吉士,授编修,历官山东按察使。有《紫荆吟馆诗集》。

和吴梅村宫扇

宣皇避暑通明殿,碧槛丹幮开四面。照夜谁呈越国珠,招凉思换齐家扇。南内宫中御制奇,良工雕刻采章施。薄缫蛱蝶千丝茧,柄削珊瑚二尺枝。丁歌甲舞看不足,匣启玻璃环佩玉。纱晕轻摇烛焰红,罗纹细叠帘波绿。五月皇都富贵城,榴花十里晓霞明。昭容带醉交钗影,侍女承欢动钏声。离宫宴罢樱桃熟,一卷《豳风》挥汗说。九华殿角南薰来,在抱冰壶两清绝。禁苑颁传赐近臣,阁门携谢拜恩新。雉尾移来云五色,蛾眉捧出日双轮。水晶帘卷烟如绣,玳瑁筵开花献寿。入手争夸书画名,回头翻笑蒲葵陋。幽赏由来惬圣衷,清凉世界画屏中。银床冰簟芙蓉梦,雾鬓烟鬟茉莉风。玲珑绝代翻新式,转眼繁华增太息。一自秋风怨洛城,残纨断竹无人识。桐叶纷飞夕殿凉,菱花瘦损美人妆。彩线空教金凤系,丹符徒把玉麟张。旧宫零落新宫废,遗物摩挲悲割爱。宝匣萧条蠹粉残,华箱寂寞鱼鳞碎。苦忆君恩祇自哀,雕红镂翠总成灰。祇今惟有南楼月,犹似当年扇影开。

移家

十载忽忽疾若驰,一身泛泛渺何之。家如客燕频营垒,官似残蝉又过枝。检点琴书余长物,流连花竹胜前时。闲云一出浑难驻,惆怅还山未有期。

苔

地老天荒处,无人有绿苔。空山閟秋色,大造出闲材。罽细雨丝织,衣轻风翦裁。可怜 花落尽,幽径为谁开。

归乌曲

天涯一只惊霜乌,欲归望远心踟躇。踟躇不归问何意,答言恐负高飞志。高飞壮志难遽酬,可怜倦翮无时休。不如株守故林侣,饮啄翱翔得自主。吁嗟乎!乌不归兮栖何之?乌竟归兮哺何资?将归未归两难决,愁煞斜阳欲暮时。暮景人间容易变,及时归去乌莫恋,巢中

老乌泪如霰。

不寐

春来愁易觉,况值雨侵帷。运蹇孤名早,心闲怪梦迟。柝延将尽夜,镫了未安诗。渐老 豪情减,闻鸡总不知。

题孙忠靖公遗像并墨迹诗册

无计挽乾坤,悲风吊雁门。尺书徒促战,一剑痛衔恩。竹寺诗中影,萧关月下魂。至今 生气在,成败不须论。

人误天尤厄,身亡国亦休。血膏沙草碧,泪涌雨霖愁。忠愤偕儿女,清凉负壑丘。遗篇 谁解唱,榆塞鬼吟秋。

濮文暹

濮文暹,字青士,溧水人。同治乙丑进士,历官南阳知府。有《见在龛集》。

书事

我生误文字,平贼无奇术。远闻三里城,受攻四十日。报国固不才,亦莫救家室。有弟杀贼归,犹抱老母膝。膝前妹娇痴,向之索枣栗。忽惊刀矛撞,投怀涕潜溢。是时屋瓦飞,雷从地底出。烟中互长梯,与贼相甲乙。三登而三堕,催以万觱篥。全家争督战,不解避斧锧。致身臣应尔,寸土守敢失。贼富民愈贫,雀罗鼠更掘。雀鼠幸未空,全军仍以律。朝向大吏述,暮向大吏述。大吏无援师,忍怒日受叱。昨日兵力分,十已遣六七。近郊贼方横,山城遑与恤。驰书慰众心,此情不忍笔。但言大军来,重围破可必。讹语纷刺耳,入梦亦不吉。仰天问消息,鸿雁杳无一。不来肝肠裂,来亦肝肠裂。上言民可怜,下与骨月诀。我思化黄鹄,飞入罗网缺。贼营三十里,去恐羽翼折。将心且随月,黯照战场血。旂渍血花紫,月下惨成列。登陴见予季,此时心骨热。书生弱有年,一旦横磨铁。老母素怜儿,今不闻呜咽。昨驰告急封,家书竟断绝。公义不及私,此举太豪杰。独不计汝兄,请师喉屡噎。家人祇解啼,首蓬面不洁。巍巍雨花冢,深深大峨穴。德薄者祀斩,或免天所罚。服官三十载,吾父多清节。生儿诚太愚,处世又不哲。恃此臣子心,安危总一辙。圣诏渴求贤,所恨学尽拙。男儿好身手,甘兹尘土灭,煌煌君父恩,及时好施设。

癸亥自夏徂秋偶有所得汇而录之既无次序亦不标题

微笑忽破睡,情梦媚幽独。春烟定后痕,荡漾在心目。欲说境已志,鸟语碎空绿。

老蝉断续吟,夕阳乱明灭。雨气集空林,揽之有余热。悠悠一寸心,事事郁相结。复此 多炎凉,何处生分别。腥风吹断虹,云腰又中截。

喜雨

丹凤城头风渐清,黑龙潭畔日将倾。才闻祈泽传天诏,便起挑镫听雨声。清晓农歌应旖旎,东南军令可分明。关心衣带黄河水,好为淮流洗甲兵。

今战场篇

古战场,沙与虫。今战场,罴与熊。天戈西挥日不东,昨日将军今上公。美人载归千艨艟,岂无夫家皆鬼雄。乌鸢狐狸饱不尽,髑髅磨苔生青铜。呜呼今战场,犹照古时月。呜呼古战场,不染今人血。古人战场重边功,今人战场中原中。

入蜀

云踪留印古苍苔,猿鸟惊疑客子哀。云雨有灵谁梦见,河山无恙我归来。一夔守险成孤 注,八阵窥图失将才。闻道玉关犹遣戍,莫将滟滪比龙堆。

送清环道人南归

再见能几何,别君复兹晨。深意幸有话,仍恐含未申。感君万里来,爱我性情真。往往 作痛语,不为伤孤贫。半生无所有,何以赠远人。去去君莫愁,敢不惜其身。乱花插行李, 锦水亦何春。愿持一勺水,预洗征衫尘。

人生大邂逅,多在阡与陌。飘零各异地,异地成咫尺。持来双镜光,互照好颜色。岂惟 照颜色,肝胆了不隔。平生失途马,颠蹶在荆棘。君既宛转导,又为施羽翼。君今弃我去, 好春失消息。柳条与梅花,为谁更妆饰。本自无远别,生灭年仅百.所悲再见期,又非此旦 夕。既作有情物,得不泪沾臆。登堂慰君母,母正缝衣裳。衣裳亦何丽,鬓发亦何苍。知君 当早还,君还我何方。君今别母时,有我相扶将。行当我别母,不见君在旁。劳燕各背飞, 春风尔何忙。独余慈乌声,绕屋空徬徨。

峨眉六月雪,芙蓉半城花。花开雪再春,游子当还家。怜我诸弟妹,风中尘与沙。楚泽香采兰,越溪寒浣纱。群流尽归海,君亦平泛槎。次第相见之,因缘满天涯。我怀不堪述,转为君长嗟。

秋夜感事

蛮花犵鸟镇相怜,无那元戎苦著鞭。入蜀锦袍争艳艳,赛秋铜鼓自渊渊。牛腰万井金银气,蚨血千家子母钱。卜式已贫刘晏死,登楼憔悴独筹边。

花姑沈醉竹郎祠,鸡卜喃喃问出师。风雨万山人鬼界,刍粮千里圣明时。最难抛掷黄金赏,欲诉功名白骨知。闻道滇池半清浅,至今鹬蚌苦相持。

过涪州有感

十五年前泪,江流尚有痕。沧桑一家感,君父两朝恩。山色旧城郭,水田新子孙。北岩 几回首,俎豆最消魂。

天中节舟次感怀

朝辞白帝暮黄牛,云水忽忽漫洗愁。佳节思亲便西笑,大江拒石不东流。文章有用期前路,家国无依剩此舟。野艾山榴空自好,怜他风露满汀洲。

早发山海关

归心无远近,一夜度重关。蛩语月孤枕,马蹄秋万山。长安旧碪杵,乐府大刀镮。不是 边儿曲,金闺应破颜。

夜吟

帘卷香依旧,书抛睡未曾。雨声在黄叶,秋影坐青镫。官事远行客,孤怀入定僧。平生 辛苦地,霜月碧澄澄。

朱丙寿

朱丙寿,字少虞,号梦鹿,海盐人。同治乙丑进士,授户部主事,历官潮州知府。有《榆 荫山房吟草》。

渡扬子江

一江春水静微波,柔橹声中听歌。醉眼漫疑沧海小,客愁争似暮山多。飞飞北雁衔云去,叶叶南帆背日过。每念壮怀悲击楫,秣陵西望尚干戈。

朱储村访徐次云

半村新绿树痕齐, 访友无端到剡溪。背指锦川桥一曲, 乱山深处夕阳低。

江璧

江璧,字南春,江苏甘泉人。同治乙丑进士,官武宁知县。有《黄叶山樵诗钞》。

村居夜坐

黯黯霜华重,漫漫月色昏。虫声咽枯树,人影灭孤村。犬吠别家客,邻敲隔院门。寒窗 镫一粟,相对悄无言。

晚泊如皋

浮生飘泊走关河,落日平湖水不波。沙鸟渐随帆影减,炊烟都杂海云多。渔家有圃栽松 竹,樵径无人长薜萝。烽火年来未销歇,江乡何日靖干戈。

姚斌敏

姚斌敏,字子廉,汉军旗人。同治乙丑进士,官漳浦知县。有《木癭庵诗存》。

雨后望西山山色

雨洗长空净,西郊日又西。云光天外落,山色马头低。古增红泥塔,柴扉白石谿。无须 寻栗里,长此结茅栖。

芜湖舟中

虽无祖生志,慷慨且登舟。山色朝昏异,涛声日夜流。灵风殊恍惚,沙鸟自夷輶。落日宿何处,萧萧芦荻秋。

早至鄱阳一昼夜行四百余里矣

西风直欲撼天河,水入江心九派多。一夜扁舟落何处,万重山翠万重波。

舟过金陵感怀

歌残玉树变愁颜,从此莺花属等闲。词客浪传三妇艳,夕阳多在六朝山。依依鸿爪前踪 认,渺渺春波短棹还。高咏不酬霖雨愿,也宜盟对白鸥间。

莫愁湖

《子夜歌》声出画楼,湖名从此擅千秋。无愁天子愁还在,争似卢家有莫愁。

吴世晋

吴世晋,号晋卿,秀水人。同治乙丑补行辛酉、壬戌举人。有《语鹤楼稿》。

壬戌述怀

惆怅平生莫我知,美人香草寄幽思。南冠濡滞吹箫客,北海飘零卖饼师。门内有谁怜阮籍,曲中久分失王维。杜鹃不解人潦倒,常向东风唱别离。

胡寿颐

胡寿颐,字梅仙,号耆仲,浙江山阴人。同治丁卯举人,官兵部郎中。有《洗斋病学草》。

范紫绅自甬上来越喜赠即饯别

藏书后起有清才,少慰良朋宿草哀。秘笈惊人传世久,轻舟奉母渡江来。谢家裙屐留诗卷,越国山川照酒杯。最是秋风添别绪,海云东望几■回。

孙诒让

孙诒让,字仲容,瑞安人。同治丁卯举人,官刑部主事。

题焦山定陶鼎拓本

陶陵祭器尚流传,大礼尊崇濮议前。丁傅翦除元后寿,宗彝零落二千年。

题吉日癸巳石刻

昆仑西母事微茫,黄竹歌成已耄荒。不有骅骝千里足,祇愁徐偃是真主。

自题变法条议后

《六典》《周官》炳揭橥,輶轩绝域更蒐书。中西政法原同贯,始信荆公太阔疏。

锲舟瞀论陋儒冠,属草奇觚急就难。纵是屈平能制法,却愁腾怨到椒兰。

党狱纷纷士气伤,秋荼禁网到文章。兰陵祭酒门久,犹有新书法后王。

午贯姑榆战教宗,漫天飞旝苦连烽。杀机金父终当尽,要看潜霆起蛰龙。

孙德祖

孙德祖,字彦清,会稽人。同治丁卯举人,官长兴教谕。有《寄龛诗质》。

晓发西陵钱江舟次即目

已是春深草未齐,平沙十里卧长隄。烟开日媆江帆稳,潮落风微海燕低。隔岸山光连远近,中天云影自东西。明朝准醉杭州酒,打叠新痕上客衣。

赵瑾伯户部病疟经月就谂所苦辄投百有五言煮三升酒朗吟数四当知其效也

痴蟆腹葬老蟾魄,青磷乱飞沙草黑。四更漏断万籁寂,何物幺{麻骨}吹紫笛。若有人兮髯植戟。高撷绿袍岸赤帻。喑呜叱咤摧霹雳,当头一喝鬼脚踣。纹苇为索穿鬼脊,截蒲作剑裂鬼革。横磨狼牙泰山石,瘿臂兽爪嚼狼藉。胔投畀豺虎食,旋挽海水洗天幂,二百八十晴峰碧。

九日登风穴山

快马踶跌不可羁,平沙十里秋烟飞。眼前突兀见青嶂,苍翠欲与高天齐。道旁甘泉泻清冽,道上精蓝矗金碧。塔铃自语檐鸽鸣,老鸮一笑诸天惊。狻猊吼怒〉歇不走,安得山泉成美酒。手捧瓠尊接飞瀑,净洗诗肠尘与垢。可怜会稽此落日,把酒临风度佳节。阿兄莫上龙山巅,醉看茱萸独愁绝。

官庄

向晚荒邮酒一尊,菜羹芋臛上盘飧。懒云卷夕山都睡,废垒经秋柳未髡。马带饥声嘶破 驿,鸦翻寒影入遥村。霜浓月黑双螯美,簖火星星梦故园。

次韵谭仲修同年古意

乍可种合欢,不愿采将离。与君缠绵意,续续春蚕丝。欲妆妆镜黯,天涯一何远。陌上花乱飞,君归一何缓。去日复来日,自怜容鬓非。知君心不改,犹著去时衣。阿侯如妾长,君来应不识。宛转文锦襦,是妾机中织。

与君始结发, 画妾蛾眉长。妆成相媚悦, 携手登华堂。翘翘翠云冠, 皎皎明月珰。怜君抱美玉, 三岁怀中藏。拔我头上钗,珍珠十二行。为君缀锦鞯, 送君结客场。铅华从此洗, 寂寞掩幽房。君看缕金裙, 摺破双鸳鸯。

叶县即目

此乡景物似东都,半可诗材半画图。十日老暒芦荻瘦,千村新种麦苗腴。乌鸦向暖凄林屋,黄叶因风入筍舆。玉舄不随仙令去,夹隄流水浴双凫。

闰月望夕京兆衙斋坐月

孤客坐凉月,空庭似早秋,树深还见影,衣薄不胜愁。身世双蓬鬓,乾坤几泊鸥。遣悲惟中酒,何处可登楼。

浙水三千里,蓬山一万重。流年如激箭,深夜又闻钟。客思霑裳易,家书下笔慵。清辉 空复好,见汝更愁侬。

古诗一首呈张孝达师

吾闻康回冯,怒触不周天。柱折地维绝,盘古错愕天皇愁。可怜开辟费神力,纤儿撞坏 谁能修?大哉娲皇鼓洪炉,补天乃用五色之石头。中有一石不见收,孤悬天中如赘旒。我过 石所闻石语,啾啾复唧唧。尔何所怨?尔何所苦?高高者天厚者地,容汝顽躯那不足汝所。 石亦无所怨,石亦无所苦,如我辈行者,衮衮升天阊。何况有人手持造化之橐钥,能以阴阳 为炭炼五金,精写跃冶之不祥。毋使散作蚩尤芒,范大千界铸成倚天长剑,先刳吞月痴蟆肠。 以次屠裂天狗,不教饕餮蚀太阳。然后一钓连六鳌,瀛海东尽断鳌足,分排八极支穹窿。再 更十二万年元会穷,永永不弛扶桑弓。昆冈互古无毒爓,石寿得与天地同,我独弃掷无怨恫。

刘溱

刘溱,字芙裳,黄冈人。举人,官江陵训导。有《小隐山房诗钞》。

苦兵

百战淮南道,烽烟尚渺漫。民劳知祸稔,世乱觉贫安。野贼援戈起,嬴军袖手看。穷途 无限泪,凄绝尚谁弹。

平安山吊吴制军

朔雪寒风裂战袍,一军桴鼓手亲操。澶渊办贼成孤注,都督横江拥万艘。堕水子颜空据马,濒危光弼竟抽刀。伤心十丈陈陶水,终古精魂咽怒涛。

乱后和黄子鹿苹春望

东风吹柳绿毵毵,一路烟痕障远岚。莫倚高楼望天末,断肠春色是江南。

武昌江上送季父半青北归

乍见各无语,相看泪满巾。须眉经岁改,骨肉异乡亲。老大仍为客,艰难累此身。高堂 有衰白,长日忆归人。

渡滹沱

北风横蓟北,大雪渡滹沱。野旷云俱阔,天寒水不波。关河燕赵险,忧患帝王多。惆怅 南宫道,渔舟入浦歌。

早发

瘦马踏残月,模糊认驿程。路长愁日短,风重觉裘轻。旅况寒尤苦,名心老渐平。疏帘横树杪,知有酒人行。

汉皋中秋

木落江声急,天高雁影寒。何人此遥夜,吹笛起危栏。屈指秋将老,回头泪暗弹。频年 好风月,强半客中看。

朱衍绪

朱衍绪,字镇夫,余姚人。同治丁卯举人。有《大椿山房诗集》。

迟暮

炳烛流光倏已徂,暗将迟暮切忧虞。未能入世驯龙性,只合论交到狗屠。崖树多阴滋雨露,盆鱼响沫自江湖。园林岁晚留生计,会放山中养橘奴。

桐城访张相国故第

築戟销沈石兽蹲, 穨墙凉雨蚀苔痕。诸郎官亦登清省, 过客今犹识相门。乱后沙隄残劫尽, 生前华屋几人存。莱公自有非常业, 不筑楼台庇子孙。

秦际唐

秦际唐,字伯虞,上元人。同治丁卯举人。有《南冈草堂诗选》。

秋怀用昌黎韵

空廊飞流萤,冷抱枯枝乾。残焰作深碧,色若青琅玕。谓是腐草变,安能比月团。熠燿 亦转瞬,偷息■为安。百年一朝暮,清泪流淋浪。天地如逆旅,游景驶若丸。劳劳车马客, 何不回征鞍。

馥馥秋坂兰,颜色难久好。疏疏篱豆花,争妍苦不早。孤根互相倚,誓以终始保。严霜 户外催,畏威两俱槁。生质本柔脆,零落勿复道。

盋山杂诗

少年思致身,浮名苦缚束。垂老入名山,山灵笑我俗。及兹补桑榆,余景未云促。两山相向中,著我数椽屋。门庭如水清,四围长新绿。户后垂疏桐,庭前植修竹。短篱缭其间,野花扇余馥。一笑脱尘鞅,斯人在空谷。

方潭广数亩,垂柳荫其旁。杂以千株桃,镜里窥明妆。曲曲支危桥,孤亭遥相望。山半留丛祠,一角藏红墙。风来摇钟声,坐久闻花香。白鸥亦忘机,沙渚相翱翔。

陈克劬

陈克劬,字子勤,丹徒人。同治丁卯举人。有《晴漪阁诗》。

弃妇篇

好月不常满,流波无重回。为妇被弃捐,委落同枯荄。君子申信义,三载亲结褵。既得话仁字,永谓亲光仪。整我玳瑁簪,洁我翡翠帷。膏沐不时御,为君修容姿。君痒妾搔背,君饥妾视炊。君坐侍茵席,君行随履綦。君喜共愉悦,君怒同凄悲。身影两依附,清浊谁见嗤。长风从西来,比翼吹参差。时节一朝异,言语乃致危。霜威厉严冬,勿复回春熙。夹道蕙兰花,下堂不能顾。昔年从此来,今日从此去。妾来兰蕙芒,妾去荆棘长。含冤不用白,所虑君凄凉。君意本相亲,弃捐由妾命。君听偶不聪,岂谓出本性。不惜弃妾身,惧伤君子情。菅蒯虽见遗,君岂忘平生。文轩临玉墀,昔时燕坐处。今应以妾故,寂寞当日暮。流苏宝象床,鸳鸯昔双宿。今应以妾故,明月照单独。席上鹦鹉杯,壁间文绮琴。俱应以妾故,流尘日相寻。兰房深窈窕,留待新人入。愿言胜故人,毋使君意失。百番拂君意,岂无一日好。丑行在君心,勿为他人道。他人萍水俦,君妾昔绸缪。他人鄙妾行,亦复为君羞。广袖合欢襦,昔时君家物。持归不忍浣,上有君手泽。宝镜玉龙缠,妆台旧绣奁。贻留照新人,似妾依君前。君为杨柳枝,妾心杨柳丝。摇落有时遇,缠绵无尽时。

春阴泥人孤怀难遣效何大复明月篇体为春阴曲以寄情得二百八十字

春寒著人如泼水,拥被不知残睡美。起来搴幔盼朝暾,堕地湿云飞不起。海棠一树娇春寒,几日春晴惜粉乾。阴多又压玉肌损,零落一庭红雨残。鹁姑多事声相唤,唤起春愁如雨乱。不语斜窗对落花,燕子微闻替花叹。此时何处不伤春,何处伤春不损神。绿杨津外扁舟子,红杏楼头殢酒人。君行江上蒙春雾,妾上江楼望江树。树长江远望难通,惟有分明梦来去。梦魂一夜到江南,妾意君心两不堪。有恨绿波添晓涨,无情烟树隐春帆。沈沈江上春帆重,帆迟苦被风吹送。行人望断最高楼,远水遥山寂如梦。却忆高楼红粉妆,鸭炉坐烬水沈香。搅愁百丈游丝重,惹恨千丝烟柳长。千丝百丈纷难理,侬亦闲情坐相似。白云迢递望何穷,红豆相思渺难已。闲斋寂寞下帘栊,故故欺人晓院风。散帙连编走红蠹,启窗方网罥青虫。一般有恨和谁诉,永昼迢迢等闲度。竟日伤春春不知,流莺啼过桃花去。

大观台望江

不尽寒涛泻大荒,海天东望思茫茫。地分吴楚千秋壮,源溯岷峨万里长。终古有声流日月,祇今何处限津梁。儒生别有凭阑意,不独临风感鬓苍。

【卷一百六十四】

谭廷献

谭廷献,字仲修,号复堂,仁和人。同治丁卯举人,官合肥知县。有《复堂诗》。

潮

天地无颜色, 涛声上古台。秋风江水阔, 落日暮潮来。缥缈鱼龙气, 艰难舟楫才。十年沧海思, 何处问蓬莱。

述旧叙怀送陈云钦北游五十韵

草色王孙路,柳条天下春。鸿宾高念侣,鹰絷曲随人。问俗衣冠拙,杜门谈笑真。相驱饥有力,靡骋乱无因。伐鼓中原贼,炊珠吾土贫。稻粱啼寡妇,烽燧亘征尘。月旦评黄宪,沧洲挈惠询。断金数轻薄,抱玉与沈沦。海出珊瑚气,霜知栝柏乡。素交原有属,别恨为重陈。忆昔书堂聚,逢君早岁亲。盟心俱落落,逐队各振振。文史三冬益,恩情千载新。音余山水意,迹自駏蛩伦。风日开轩好,家庭置酒频。莱衣朝烂缦,缟带坐逡巡。榴叶青于染,荆华艳似紃。铜镮留紫燕,碧井狎文鳞。物态婵娟足,交期脱略信。嫌都忘弟妹,欢不间宵晨。世事翻云雨,浮生感溷茵。药笼遗小草,车毂是劳薪。绝塞飞狐险,高台骏马珍。关河惨幽蓟,战伐阅燕秦。白日辞乡树,黄流暗去津。江南载书剑,天北指星辰。恻恻倚闾望,飘飘去国身。之官依夏馥,惊座到陈遵。浩荡游无色,萧条笔尚神。故人多落魄,远道独含辛。作客山陬晚,违时跬步迍。田问叹鸿鹄,地上走骐驎。谋食惩书卷,登场易笑颦。儿曹且纨绮,昼气亦金银。乡县浮云隔,荒斋暝雾屯。壁昏蜗寄窄,檠浅鼠窥嗔。归梦迷难觉,

离居意未申。出门春黯澹,伏枕母嚬呻。深涧松根郁,孤芳兰佩纫。洪炉金莫跃,洴澼手还 龟。羁旅空骧首,天涯送去。江云飞缥缈,岳树望嶙峋。壮志看青镜,君行近紫宸。圣贤闻 赠处,韦布待经纶。

同王以湘沧浪亭怀古

游丝罥花天阴阴,隔花啼鸟青林深。古人不见古亭圮,惟闻流水如鸣琴。清流不洗世人耳,满城弦管多繁音。昼漏迟迟歌未歇,豪竹哀丝为谁发。此时蔓草遍池台,当日金钱买风月。胜地由来有盛衰,何况人生易华发。天涯吊古复伤离,人物风流各有时。云树江南留不得,争知来者复为谁。

答内阁侍读叶名澧

二《南》王化始,江汉有风诗。皎皎长安月,泠泠寡女丝。古人思见我,大雅得同时。 燕草逢摇落,牢愁醉莫辞。

挽叶润臣观察

闽海归来日,当君辍瑟辰。平生重知己,当世失斯人。楚雁来何暮,燕云闇不春。金徽 留古调,弦绝自伤神。

哭吴子珍

人生山海别,日夕念所亲。君子忽沦亡,然疑已悲辛。既信祗野哭,逆旅岂寝门。寒雨鲜春气,黯黯太空云。高堂多白发,寡妇犹青春。稚子未毁齿,无术赎君身。长安有何恋,闻见皆伤神。忧来多狎游,醉饱铄精魂。我今结习尽,牙琴不复陈。著书真旒赘,子毋惜遗文。

我昔长安归,秋风吊袁生。袁吴为中表,各负侠少名。我谓子记室,亦呼袁骑兵。袁死子已孤,子死我益惊。生死凡夫中,苍苍有权衡。但惜二十年,苦为名教争。推移我岭外, 肝腑摧已平。军中周伯子,勿乃犹硁硁。

故乡忽残毁,群盗横戈矛。刀光满城市,火云复浮浮。两家老弱在,仓卒将谁投。子家 我在远,我家子已休。结客虽云多,缓急孰与谋。重足待消息,奔命还吾州。羡子入下泉, 亡知当亡忧。不能为国殇,七尺真悠悠。

建宁试院送杨晋熙广文丈归杭州

北来云气纷如墨,一春灵雨春无色。雷殷空山草木仆,饥禽塌翅危巢侧。殊方客子悲余春,消息乡闾不忍闻。昆冈玉石有余望,握手相看各苦辛。贼去仓黄问家室,千里归人气萧瑟。我有高堂胡不归,口不能言但凄怵。中流失船冯一壶,赤手救火空奋呼。书生乃尔等木石,艰危到此还峙足屠。先生意气吾乡里,同客天涯异行止。风鸣万竹仙霞关,晴见双台富春水。营门笳鼓任喧阗,补被孤征路如砥。再拜乞君谂吾母,未暇闺房念妻子。去作人间丁令威,人民城郭是耶非。魂梦相随度岭去,杜宇声中泪满衣。

符雪樵先生挽诗

满径蓬蒿泪雨殷,故人忍再叩松关。流传文字真知少,阅历甘辛死日闲。浩浩惊风吹积水,萧萧群木下空山。如何千里江乡路,祇见翩翻白旐还。

金山

笳鼓声销战气收,金山无恙出中流。江光自上南朝寺,春色遥连北固楼。飞鸟回翔来去客,浮云变灭古今愁。旧人不识岩前路,载酒聊从步屟游。

吼山同陶方琦子珍

夫容倒垂作奇石,春流日漱灵根白。下削云肤几千尺,东宕鸟啼西宕闻。云窗雾阁参差分,美人离立锦绣裙。振衣直出烟萝上,翳竹盘松各殊状。万壑千岩郁相向,蜡屐颇愧阮步兵。安得秋携双玉笙,云石峰头吹月明。千秋高举寻遐契,流水浮云看世事。樵风可乘休入市,廿年心力未著书。名山笑我当何如,白头与子来结庐。

飞霞阁吊戴子高

阁外山如屏,伴君四三年。我行蹑秋草,到君旧榻前。须眉不可见,云物故娟。正坐读书误,事事无世缘。西风满阑槛,何能不凄然。零落平生契,言语徒自贤。唐生古死友,遗书为君传。出门淮水西,雪涕亦潺潺。安得蒋山石,奇骨与同坚。

得陶子珍湖南书

楚天迢递此征鸿, 沅澧微波语乍通。郢客有歌皆白雪, 使车何地不春风。徘徊芳树人千里, 夙昔缁尘酒一中。落日浮云看不见, 高山流水几时同。

义士行书张炳元传后

班超布衣一诸生,奇功三十六人成。奇功绝域尚可立,胡乃义士歼名城。谁与男子张应 庚,宛转虎口蓐棘荆。翻城反正再三试,云作死气鼓死声。气经百折不少挫,事败狂寇魂犹 惊。是时大帅亦雄杰,艰难百战扬麾旌。一念持重事机失,坐甲遂老十万兵。西风秦淮草不青,汉月犹照将军营。卅年高歌洗兵马,来吊国殇胸不平。伊子悲歌向燕市,田生握手浊酒倾。奇闻涕泪述同志,烈士骨相终徇名。辱哉降官亦男子,朽骨遗臭迷纵横。至今王夜蒋山上,义士精气为列星。

湛侯至自黔遂有晋游

梦阻高张路,俄惊客在门。间关辞黑水,垒块借青尊。自尔怜同调,终焉念旧恩。已违池上酌,相送又江。

孝肃祠堂

祠门云气接华光,待雨先秋试早凉。水鸟飞来蒲苇碧,青山影里芰荷香。好从尊酒频中 圣,见说清时有谏章。芳草远寻歌楚怨,人间何地不三湘。

诸可宝

诸可宝,字璞斋,一字迟鞠,钱塘人。同治丁卯举人,官昆山知县。有《璞斋诗集》。

澄心堂歌

青华镂笔红丝砚,澄心堂纸白于练。宫中保仪女掌书,江山如笑排鸾燕。姊妹承恩侍李皇,提鞋刬袜事荒唐。通天一帖题昭后,初月双跌创窅娘。烧槽琵琶暖玉柱,君王小令歌行路。别翻曲子念家山,弹绝冰弦愁日暮。瓦官阁下黄花波,啼鸟声声帝奈何。最笑仓皇辞庙日,听来犹有教坊歌。君不见官家恨不作词史,金粉南朝悉如此。

车中读元曲漫题

十二珠帘不上钩,红牙短拍试新喉。文章曲似琴心转,宫谱传将笛眼偷。秋雨梧桐谈院本,春风杨柳唱《伊州》。词场从此多研调,毕竟元人胜一筹。

通明山

泰山何巍峨,支尾直北走。百里一起伏,阴阳自分剖。众峰罗儿孙,峻岭试培塿。兹山特权奇,崛然拱岳后。踞形若置箕,圆顶如覆瓿。树燥泉源微,草丰土力厚。苍翠岚色妍,凸凹石骨丑。当阳具二孔,洞达左与右。摩挲至正碑,苔藓蚀螭首。所言山穴中,光明绝昏黝。堕月辉东流,杲日景西受。行云时出入,飘风历前后。谁凿混沌窍,傥辟仙灵牖。为想鸿濛初,造出天地手。徂徕及新甫,平揖与之友。虚中乃生白,秀外或非偶。责实名必循,妙理寓陵阜。荡荡尘翳空,吾以师无垢。

黑水洋看月

东发紫竹林,南下黑水洋。当其初放船,海水皆浑黄。沙净黄渐灭,清彻若油碧。绿极成青蓝,蓝深转为黑。水面往往生云烟,风吹云开月上弦。仰观素魄俯黑水,水月长与船盘旋。水上指天天下水,波涛叠叠星絫絫。蜃气嘘翕蛟涎腥,景物中宵益荒诡。波光映月月夺色,明月到此不能白。晴霄闇澹入睡乡,软浪千重限南北。远水愈黑天愈青,骊龙弄珠辉入溟。雄奇不可言语形,古来此景何人经。江湖既明瑟,关山亦寒慄。或照思妇楼,傥邀酒人室。圆灵赋后有遗迹,彼但清华此横逸,谁合元虚希逸笔。四更未已榑桑红,再上舵楼看日出。

施大上舍薄游江夏奉题通雅堂诗钞即送之潜江县幕兼讯传经书院诸肄业生

浑金璞玉尊彝贵,斯品斯才独有君。健笔能扛百斛鼎,清谈下视六朝人。要从工部亲传道,但觉空同许问津。一别三年又成集,潇湘灵瑟故粼粼。

及余翦烛联床夜,重与论文把酒初。补得笙诗歌有獭,传来门客食无鱼。和戎时尚安边 论,富国谁求平准书。此去沱潜傥相访,故人笼壁近何如。

泮山双柏行用少陵古柏行韵和金山吴教谕同年山在郡庠之西北隅

昔来岱庙观汉柏,平台屹对榑桑石。威仪侠陛犹郎官,意气去天将咫尺。圣门端楷匹灵奇,别院唐槐同慨惜。飞来一凤毛羽青,结就六龙甲鳞白。昨来听鼓东吴东,馆娃访古无梧官。旧闻北宋沧浪在,胜地南园树石空。独留双柏忘年岁,几历三冬耐雪风。大德不孤必有偶,话身得所谁为功。此材何待充梁栋,泮山灵岳等珍重。葆我天真赖表章,阅他人世成迎送。要知错节更盘根,也视祥麟与威凤。吁嗟乎!吾乡尚有向南枝,太息精忠未酬用。

邓六训导应南皮尚书师聘将之武昌内子制诗扇送行为写楚山补空赠题

雪样齐纨月样圆,女媭短语写婵媛。送君小别三千里,昔我浮家二十年。良马素丝方藉甚,白云黄鹄尚依然。渚宫山色描来熟,与证师门翰墨缘。

乘兴西行访故人,开堂都讲礼分宾。敢如嘉淑能酬唱,况复潘杨是世亲。楚客相思烟浪 阔,吴天已过石槐新。祇余削牍犹从事,未扑襕衫十斗尘。

锺体志

锺体志,字泽生,射洪人。同治丁卯举人,官新喻知县。有《澡雪堂诗钞》。

过巫峡

万里蚕丛事,都归此浪淘。大江形若束,两壁势争高。石脚穿云立,山腰结屋牢。萧森 今昔感,长啸起飞涛。

陈启佑

陈启佑、字子后、号我珊、武陵人。同治丁卯举人、官彭泽知县。有《耐冷山房诗存》。

登越王台

西风吹短鬓,独上越王台。割据今已矣,英雄安在哉。笳声边宇急,帆影海门开。歌舞冈何处,寒鸦日去来。

度大庾岭

千仞雄关矗,秋风匹马过。天梯蹑云雾,古寺锁烟萝。相业高山仰,劳人终古多。愿将 万梅树,补种遍岩阿。

乐乡次唐陈伯玉韵

驻马寻遗迹,愀然共远征。黄沙迷旷野,白日暗荒城。旧国猿声杳,新村戍鼓平。故园 回首处,烟树万鸦鸣。

十二连桥

十二长虹碧汉通,鞭丝帽影借怱怱。好风为扫尘沙去,收拾湖光到眼中。

一镜平开映远天,草荔青共麦苗妍。若非帆影来烟外,错认沙湖作水田。

柳丝斜挂碧毵毵,隄畔人家住两三。竿立鸬鹚门晒网,卖鱼风景似江南。

蛙声阁阁送轮蹄,喜见新秧出水齐。十二红栏都倚遍,此身疑在洞庭西。

松滋道中

四围山色里,天气半阴晴。野草有生意,幽禽多好声。炊烟茅屋接,流水小桥平。最喜民风古,机丝轧轧鸣。

界石

楚蜀交关处,危崖一径分。滩声疑作雨,石气宛成云。溪市沽新酒,山楼挂夕曛。布帆 烟外去,猨啸寂无闻。

西郊散步

西风动山郭,飒然秋气深。散步出郭门,山光青上襟。蝉声咽远树,樵语归平林。黄云卷四野,篝车娱苍黔。俯仰殊各得,大哉天地心。闻道五年前,孤城边骑临。登陴不遑食,干戈苦相寻。我来幸无事,弦诵有余音。人偿室家乐,边乏桴鼓侵。藉此足高枕,怀抱宽古今。林壑开图画,曳杖恣行吟。薄暮独归去,墟烟苍翠沈。

张王熙

张王熙,字欣木,秀水人。同治丁卯举人,官太平教谕。

岑港访木城遗阯

移家入海投山乡,城西迤逦山路长。指顾忽下岑港岭,炮轰震耳来何方。我生才得出水火,一枝聊借开巾箱。编零简断亦何考,询诸土人知其详。云昔有明在中叶,倭人来寇窥海疆。悬悬内瞰觊盘据,兵法扼隘此其吭。不难御炮沙土碎,木城坚峙逾金汤。城乡首尾击能应,更有戈船相翱翔。山坳重叠亦天堑,狡贼离披潜遁藏。吁嗟御寇似御水,横流一溃难隄防。往事迁流二百载,人士吊古空斜阳。

江珍楹

江珍楹,字静轩,号子平,德清人。同治丁卯举人。

游平山堂

金粉飘零尽,我来邗上迟。秋光闲引蜨,新竹翠于眉。风月晴湖,文章太守祠。五亭桥畔望,心事败荷知。

严锦

严锦,字云客,号公绣,桐乡人。同治丁卯副贡。有《懒云楼诗钞》。

野步

雨止石渐乾,木落野愈旷。长风驱云归,半天卷屏幛。一径忽细纡,步窘骤难放。行行登高原,了了见古圹。断碑无岁年,何时此卜葬。惯听樵斧声,久绝麦饭饷。呼起冥漠君,告尔勿凄怆。方今楚氛恶,驱人入烟瘴。骸骨万里抛,妻子终岁望。尔生当盛平,不见乱离状。死获黄土埋,长眠幸无恙。巍巍南面王,此乐亦不让。我诗非谀墓,聊代鲍家唱。归途闻怪啼,一鸮立树上。

岁暮

岁暮萧条感索居,寻诗懒跨雪桥驴。醉封乡外侯千户,穷送门前鬼一车。何日归田平子赋,几行乞米鲁公书。春风渐绿池塘草,魂断西堂梦醒初。

愤思击筑和荆卿,悲欲投诗赠屈平。泪满一升难换酒,喙长三尺敢谈兵。负嵎虎问谁能搏,赴壑蛇看不住行。犹得青青几年鬓,那堪愁里听笳声。

草堂

石罅新栽竹数竿,草堂六月已生寒。出帘香篆因风断,挂壁琴丝得雨宽。偶一课儿亲笔砚,岂真厌客懒衣冠。时人未识疏慵性,误作墙东避世看。

锡珍

锡珍,字席卿,蒙古旗人。同治戊辰进士,官至吏部尚书。

安州道上

路向安州落照时,薰风习习拂旌旗。舆中入梦人游倦,陌上飞花客到迟。一水稻分高下陇,满山松茁短长枝。剧怜官道生幽草,软踏芒鞋总不知。

朝鲜贫弱时事棘矣慨然有作

营州逾海地东偏, 犹是箕封礼俗传。赫赫中天依日月, 茫茫下土奠山川。海潮终古无消

长,人事于今有变迁。漫说通商为受命,他时涕出更谁怜。

纳清亭

一湾通略行,遂至纳清亭。长路怜幽草,崇岩下晓星。渔榔前浦歇,樵斧远山停。谁咏《高轩过》,将为驻马听。西风秋瑟瑟,白雨昼冥冥。又是新安道,群峰不断青。

凤凰边门

边门以外地,数百里之遥。榛莽谁从辟,{艹佳}苻不见招。算缗缘木税,诘慝到山樵。 晋有桃源乐,秦收陆海饶。未堪将客逐,安得作荒烧。据国争非触,临边俗异要。吴沙赋可 受,泽瓦首先枭。旷土成都邑,流氓有暮朝。不游町疃鹿,应革泮林鸮。智慧乘时出,功名 与世标。再能加富教,便可入风谣。除是皇华使,谁停问俗轺。

通远堡

幽居林壑小,款客暮天青。乍卷云千叶,仍飘雨数星。野虫鸣蟋蟀,山果熟梬楟。苦说 盘飧少,相邀醉绿醽。

辽阳城

忆从东国经行处,千里王程尽叆江。疆域虽殊风景似,万山不断到辽阳。

游医巫闾

黄月东升黄日落,秋郊旷朗风萧索。薄暮游踪取路归,犹将回马瞻云壑。云壑万重游不成,石棚穴漏泉流声。旷观亭已埋幽草,转见千秋万古情。

宝应舟中

海上归槎迥,淮南返棹轻。湖茭添客馔,隄柳入诗情。兴废徒怀古,关河正洗兵。翻悲身历碌,终是绊浮名。

晓至山阳

一夜扁舟霜满篷,棹歌声在月明中。渡头寒鸟噤无语,踏折枯枝逐晓风。

宝廷

宗室宝廷,字竹坡,郑献亲王济尔哈朗八世孙。同治戊辰进士,官至礼部侍郎。有《偶 斋诗草》。

杂诗

无名何必求,有名何必避。有名与无名,皆我身外事。天地生我身,与众原无二。悠悠 流俗中,何劳自矜异。今朝有酒钱,正可谋一醉。醉后欲题诗,迷离不成字。

六月二日作

孤愤填胸怒不禁,一阳安得退群阴。有怀报国知何日,无力回天剩此心。草欲当风惭弱质,葵思向日抱愚忱。举头阊阖高千丈,路绝丹梯迥莫寻。

九日偕镜寰公玉少甫稚甫大儿二儿饮八里庄酒家醉后登摩诃菴东南石楼题壁

大海西风烽火收,佳辰与客上僧楼。残年屈指犹余几,行乐无时况觅愁。

偶成

解忧堪贳酒,况复对黄花。官罢人同惜,家贫我自嗟。夕烽南海火,古戍北庭笳。何日销兵气,吾生幸有涯。

岱顶题壁

独立众山顶,乾坤一望收。九州皆在眠,四岳尽低头。日月窗前涌,云霞槛外浮。何时 重策杖,岩壑遍登游。

金沙道中

驿路回旋弯复弯,崎岖不惮屡登攀。云拖雨气横过岭,风卷滩声倒上山。画意诗情随处 见,乡愁旅恨暂时删。千重峻阪前途阻,何日仙霞返故关。

瓜州夜泊

野旷烟昏月未升,波心夜泊旅愁增。荒洲戍近先闻鼓,远浦舟来但见镫。拍岸风涛流滚滚,隔隄云树望层层。唐家旧镇今何在,翘首江天叹废兴。

石门舟中即景

风翻轻浪碧悠悠,两岸桑林送客舟。莫讶此间风景异,水光山色近杭州。

许景澄

许景澄,原名癸身,字竹筠,嘉兴人。同治戊辰进士,改庶吉士,授编修,官至吏部侍郎。谥文肃。有《许文肃公遗诗》。

和子裳中秋作

小园松竹尽环围,水槛烟明撤烛辉。对月几人犹绿鬓,入秋易怨是瑶徽。路穷星汉家何

处, 书滞长安雁亦稀。毕竟一年今夕好, 遣愁莫负羽觞飞。

赋赠梁星海鼎芬

如锦花开满洛阳,独回松格傲繁霜。茂陵壁立秋无恙,玉宇高寒梦未忘。渡海题诗珊树丽,登楼汎酒荔支香。名山青鬓诚难得,坐看浮云起灭忙。

七夕奉怀洪文卿阁学

满地横流仗一壶, 宵分看剑忆风胡。三年泥雪曾如梦, 万里星河想不殊。觇国屡询回纥马, 筹边待献月支图。灵槎西望多佳气, 惭愧飘零到柳蒲。

直北星躔变旦昏,锋车自此罄黄坤。日南烽火忧时泪,江表弦歌待士恩。早识禁中需颇 牧,暂令域外料曹孙。庙堂驾驭增新政,好待归朝借箸论。

题画

一径坡陀里,山行已早秋。乱峰回落日,瘦马倦长邮。渔渡枫林暗,人家槲树稠。休文 饶古致,展卷思悠悠。

柬袁磢秋同年时初授芜湖关道

十年台妙最知名,今日欣看直指行。天下军输缗算重,大江锁钥雅歌清。徙戎深念烦江 统,谕蜀风流羡马卿。缄取相思驰万里,汉家帛雁正南征。

联元

联元,字仙蘅,满洲旗人。同治戊辰进士,改庶吉士,授检讨,历官内阁学士。谥文直。

大观亭和袁重黎韵

危亭鹤俯啄,奇石兽仰搏。林衣青缤纷,山果丹璀错。洼疑仰叵罗,凸俨弯繁弱。张之嵇生琴,韵以洞庭乐。佳客赏心同,主人嫌酒薄。湛醪乞芳邻,轰饮吸巨壑。清浊一中之,贤圣欣所话。哦如坚金撞,契比蕤铁跃。浮澜耸层观,胜寄标夙约。未觉秋为气,浮云扫萧索。时乎多忧虞,兴到足斟酌。青鹄瞰楼船,白蝯论秘钥。海图开曲纡,善策戒肤廓。东思前筹,北供伟庙略。师以后直强,弈贵先几著。雄藩规朱蒙,铭勒靖松漠。方将封云亭,毋为安蝘蠖。

何如璋

何如璋,字子峨,大埔人。同治戊辰进士,改庶吉士,授编修,历官詹事。有《袖海楼诗草》。

赠源桂阁故侯

轻盈舞袖绾双鬟,洗盏殷勤劝小蛮。含恨低翻旧时曲,一声声是念家山。

留髡送客日初斜,相约春游兴又赊。记取清明好时节,墨川东岸看樱花。

宾筵酒馔翻新样,乐府笙歌倚旧声。沿习太平唐代舞,诸伶白首说西京。

潘衍桐

潘衍桐,字菶庭,号峄琴,南海人。同治戊辰进士,改庶吉士,授编修,历官侍读学士。

雨中过峡石驿

驱马度重关, 殺函隐约间。钟鸣知寺近, 云翳欲无山。险路频年熟, 劳生几日闲。杏花 开几树, 倩汝照酡颜。

西园杂咏

- 一桥纳群影,影百不可摹。仪徵文笔佳,有记如绘图。寻之路三折, 究与虹腰殊。夜半 荷花开,清香襟袖俱。
- 一径入寒云,万竹昼深碧。红英尚迟吐,照此春月白。幽林不逢人,癯鹤有行迹。半琖绿茶香,无言对凉夕。

刘廷枚

刘廷枚,字叔涛,吴县人。同治戊辰进士,改庶吉士,授编修,历官祭酒。有《慊斋诗钞》。

丁丑人日张幼樵侍讲健盦太史朱砚生侍御汪柳门司业顾皞民水部许鹤巢曹紫荃两舍人 集于归砚山房即席次柳门韵

盍簪几辈喜相随,椒酒春开酌玉卮。交淡祇应来旧雨,官闲不禁赋新诗。东坡合共神仙望,南阁咸深景仰思。除却二三同志外,草堂韵事有谁知。

鲍存晓

鲍存晓,字寅初,会稽人。同治戊辰进士,改庶吉士,授编修。有《鲍太史诗集》。

独酌

一碧了无际,衔樽起浩歌。悲笳闻贼垒,远道阻天戈。满目鱼游釜,全家雀在罗。秋风吹不已,日暮渺山河。

世变已如此,天心胡可知。秋来愁里路,劫满局中棋。家散身逾重,时穷道不疑。是谁 能解事,相与尽寒卮。

洪良品

洪良品,字右臣,黄冈人。同治戊辰进士,改庶吉士,授编修,历官户科给事中。有《龙 冈山人诗钞》。

赤壁于清端公祠

独拜荒祠绕薜萝,堂堂遗貌壮山河。清名白日雷霆动,故老青天涕泪多。千载招魂悲宋 玉,一龛香火伴东坡。雪堂夜静虚明月,风马云旗缥缈过。

楚怀王墓

沱水弯环齿墓门, 峣关归魄夕阳昏。当年已雪商于恨, 三户亡秦尚有孙。

庾台

昔书《枯树赋》,如见庾兰成。故宅空文藻,荒洲绕县城。远烟三澨晚,残雪五溪明。 萧瑟登台意,悲风日暮生。

荆南讲院晤王子寿先生

先生壮岁谢簪缨,归卧沧浪白发生。自谓羲皇陶靖节,许身稷契杜文贞。渚宫花老啼莺尽,梦泽云荒断雁征。愧我周南久留滞,巴山夜雨梦春明。

魏迺勷

魏迺勷,字吟舫,德州人。同治戊辰进士,历官江南道监察御史。有《延寿斋遗稿》。

露筋祠

碧湖云树噪栖鸦,古瓦笼烟草径斜。一片秋帆残照里,野风吹折女郎花。

陈将军歌

将军面白如书生,十五二十能将兵。杀尽青徐贼百万,河北草木知姓名。财帛妇女无所喜,纵横雄辨富文理。下马辄乘书画船,昂藏走入扬州市。扬州繁华天下无,豪门藏垢多贪汙。灌夫生平惯使气,麾斥大滑如庸奴。庸奴恃势公行赂,良懦含冤莫能诉。身余一剑报不平,坐持短长得远戍。远戍乃至黑龙江,获谴不为薏苡囊。铁衣摧残壮士死,英魂犹得守边方。边方帅府镇沙漠,羊羔饮罢无所作。马革弃置不上闻,逾岁泉台尚寂寞。寂寞谁怜鼙鼓臣,有真御史为乞恩。吾乡荐绅思旧伐,合词吁请动至尊。得旨建祠祀将军,吁嗟乎!将军有功于齐鲁。神之灵兮在东土,东人祀君君不吐。卫青去病何足数,李广不侯已千古。

齐孝孙占魁坠塔歌

百尺塔,七尺身,广川得孝女,涿鹿见孝孙。孝女出华胄,孝孙为细民。民何知,有至性,一言能愈祖母病。民何能,有卓行,一死能代祖母命。浮图对峙督亢城,上有乌鸟肠断声。濡血下染土花紫,孝孙万劫犹长生。吁嗟乎!儒家侈口谈伦理,全而归者常言耳。我方据案讲《孝经》,废书一叹泪如水。

蔡以瑺

蔡以瑺,字季珪,萧山人。同治戊辰进士,改庶吉士,授刑部主事。

月夜

一径入昏霭,渺然吟思生。楼台团远雾,镫火闪层城。古月发新趣,幽悰落世情。徘徊 恋情话,窗外斗参横。

陶模

陶模,字方之,一字子方,季水人。同治戊辰进士,改庶吉士,官至两广总督。赠太子少保,谥勤肃。

咸丰丁巳六月芦雨禽观荷至者十九人用古诗十九首韵得客从远方来

濯足弄涟漪,临流清且绮。水乡苦少山,一发青尔尔。芦苇声萧萧,听雨合蒙被。入山何用深,巢许或不解。坐中几诗老,一杯应惜此。

戊午六月从沈南一陈子松两先生及张倬云沈谱笙诸君观荷芦雨盦欢饮至月上始罢用少 陵丈八沟诗分韵得放字客字

临水结茅菴,位置自清旷。芙蕖若亲人,灼灼窗前放。布席面澄波,遥峰淡相向。酒酣一散步,烟际闻渔唱。

对酒溯前游,转瞬一年隔。少壮不自励,岁月真虚掷。安得二三子,裹饭挟书策。烟萝相与娱,胜作风尘客。

寿生寺晚步

纵目青冥外,飘然兴独赊。夕阳明远水,暝色在寒鸦。溪抱僧居小,林藏细路斜。鬓丝 无限意,重为惜年华。

吴大澂

吴大澂,字清卿,号恒轩,又号愙斋,吴县人。同治戊辰进士,改庶吉士,授编修,官

至湖南巡抚。有《愙斋集》。

正月二十八日宁乡益阳道中作

和煦天光杂嫩寒,阴晴不定计程难。土膏滋润泉回抱,山脉纵横气郁蟠。万户烟稠村路滑,一犁雨足水田宽。老农不识绣衣使,笑指鸣驺是大官。

二月朔日益阳道中遇雨作

细雨濛濛泻绿渠,时逢野老担园蔬。万竿修竹萧疏影,半坞长松僻静居。茶市将忙初试 翦,秧田未插尚悬锄。个中别有王维画,一树梅花一草芦。

二月二日龙阳道中作

山村如画里,小市两三家。几担白莲藕,一篱黄菜花。草霑旗角湿,柳拂帽檐斜。津吏 逢迎熟,行人静不哗。

袁思韠

袁思鞸,字锡臣,贵阳人。同治己巳补行己未、辛酉、壬戌三科举人,官内阁中书,广西候补知府。

过江南

溟濛烟雾锁沈潭, 翠帐笙歌夜宴酣。谁识水云空阔里, 满船明月过江南。

铁锁沈江事可哀,夕阳红到旧楼台。莺花锁尽无人迹,惟有春潮自去来。

施补华

施补华,字均父,乌程人。同治庚午举人,官山东补用道。有《泽雅堂集》。

飞来峰

谁将万柄青夫容,横空倒插成此峰。性情自出依傍外,气势尚在回翔中。孤根一削不盈 尺,危乎殆矣逾玲珑。旁有巨穴幽且怪,以火来照天光通。苔纹迸裂石乳腻,蝙蝠侧翅惊盘 空。松杉千尺覆其上,长根乱走如蛟龙。野亭一角就平衍,山光下射青濛濛。群流趋涧众响 激,魂魄凄慄天无风。冷泉判事有苏老,风流照耀谁能同。我来但得遂佳赏,归将眼福夸邻 翁。问尔几年辞印度,飞来傥有神灵护。冥冥雷雨满秋山,万石腾空待飞去。

有作

士女春游尚满山,马蹄潜度独松关。黑云惊压高城上,白刃旋飞大道间。踊跃貔貅千队 入,凄凉门巷几人还。湖隄花树垂垂发,照眼浑疑战血殷。

萧大夫马歌

驽骀足屋足族满天下,执策而临叹无马。谁知世有萧大夫,独得名驹色丹赭。大夫起家军旅中,十年战伐多奇功。常骑此马入阵斗,四蹄风举行如空。大夫忠勇万人敌,此马肝胆能与同。陟深历险屡转战,巧随人意为西东。归来爱马如爱子,亲饲刍豆杂马僮。刀疮箭孔手摩抚,腾槽意若相感通。今年大夫死殉国,此马悲鸣惨不食。雄姿猛气顿销沈,拳毛脱落无颜色。愿为鬼马驰鬼雄,风雨阴森从击贼。部下健儿不敢骑,茹上词人早相识。方瞳峻耳形未殊,日日来看泪霑臆。呜呼人头畜鸣今更多,怀恩感义汝则那。少陵无人曹霸死,寂寞丹青奈汝何。

送戴子高

一自凌生去,交游汝独亲。如何争战日,又作别离人。把酒檐花落,停舟浦草春。眼中 朋旧少,行矣泪霑巾。

好忆高堂泪,临行滴汝衣。黄金富天下,难买是春晖。雁断谁将信,乌飞失所依。白云时一望,应胜寄当归。

双林逢姚子展

延缘聊作苇间行,密友初闻喜更惊。乱后重逢疑隔世,愁中过慰胜同生。风尘面目恒饥色,患难文章变徵声。执手欷歔仍自笑,胸中五岳几时平。

賸水残山孰主持,吞声踯躅泪如丝。真成杜老无家别,聊和陶公《乞食》诗。万户虫沙 悲故国,三年薪胆在今时。欃枪痛扫非无日,投笔功名与尔期。

严氏家庙松歌为秋樵丈作

方练奇节天下崇,何人为表严司空。五百年来事隐约,依然祠庙菰城东。行人下马动凭吊,轮囷手抚当门松。白昼时闻飞霹雳,空堂宛欲腾蛟龙。摧颓老幹出生气,盘屈孤根回曲衷。劲质何辞霜雪烈,精灵或与风云通。何来史氏致身录,肆口诬蔑言非公。宫中老佛既乌有,翠华安得中途逢。晚死差为十族计,耿耿何愧诸公忠。摩挲独叹后凋节,惨淡如见孤臣容。南枝苍苍鄂王墓,黛色郁郁丞相宫。爱惜亦期人勿伐,萧条却恨时难同。飘然时危一老翁,不忘祖德干戈中。手携画卷命题句,忠魂劲节相交融。危时永忆栋梁器,大材不藉丹青功。森然寒气入诗骨,笔端谡谡来长风。

端午日同严秋樵劳巽卿袁孝宰南观饮酒

鲥鱼出水菖蒲长,松陵江上逢端阳。龙舟竞渡事萧瑟,廉纤细雨僧堂凉。王瓜槜李那得致,白芷自袅炉中香。尚思佳节会良友,荒厨炙酒开蒲觞。严翁五十饱识字,鬓边白发垂秋霜。巽卿清疏孝宰静,坐中二妙谁能当。其余数子各媕雅,议论足令吾军张。皇天似为慰羁旅,此会难得非寻常。梅风拂槛助森爽,栀花蕉叶交芬芬。须臾酒罢客亦起,负手来往循长廊。默思稚齿过此日,榴花浓压东家墙。中山进士须似戟,婵娟小妹凝红妆。纷纷鬼妾与鬼

马,杂遝左右相扶将。堂中悬挂好画手,抱看惊汗流如浆。西邻姊似斗心巧,停针不绣双鸳鸯。蒲人艾虎手自缚,为我插鬓驱灾祥。枇杷累累比金弹,杨梅细核夸先尝。二十年来讶飘忽,感时触事空自伤。儿童光景足摸拟,闭目往往游其乡。洗盏更酌不堪说,恐令四座霑衣裳。

慈仁寺谒顾亭林先生祠

蔓草枯杨断客魂, 朅来烟寺阅朝昏。云霄不傍诸甥贵, 涕泪难忘老母言。短鬓萧疏临易水, 长歌慷慨赋夷门。山头棠树花争发, 杜宇声声万古冤。

地老天荒万事非,徵书迢递此心违。远游关塞身将老,何处山陵泪独挥。著作必传羞待 访,乡园虽好忍思归。双松谡谡经行处,惟有祠堂傍夕晖。

忆家

客行无远近,门外即天涯。落木秋将老,寒镫夜自花。霜清虫负户,风急雁啼沙。欹枕 山楼静,沈沈独■■。

去岁

去岁逢兹夕, 沂州听雨风。五更千里外, 一我万愁中。仆散囊钱尽, 驴鸣栈豆空。今年 安吃饭, 不怨校书穷。

将归留别萧穆敬甫

枕上潮来万马声,寒镫孤馆梦魂惊。天空鸿雁传归信,岁晏妻孥忆远行。此会偶然同逆 旅,相亲何意若平生。明年待尔孤山侧,千树梅花一笑迎。

赵铭

赵铭,字新又,号桐孙,秀水人。同治庚午举人,官直隶补用道。有《琴鹤山房遗稿》。

杂诗

雨露滋万卉,枯荄转苏融。心苗一寸槁,生死天无功。何以资灌溉,古人书丛丛。开卷若有得,灵芽逗春风。化机偶长养,结撰天葩红。柰何忍就萎,委折如秋蓬。

万物随波荡,金石止不流。奇文中有骨,耻与世沈浮。精意渺六合,真气横九州。敛之 行墨间,融结为珠镠。君看周秦制,历劫乃常留。士无不朽志,安用文章求。

庚桑处畏垒,武陵逢桃源。叩其所以然,十九皆寓言。岂知胸次旷,豁然见吾天。达人 所投足,自成一山川。无心远尘累,有情生世缘。浊流胶扰中,何必有神仙。

韬光同玉珊作

鹫峰炫天奇,兹寺静自匿。万竹阑俗驾,一莲峙仙菂。曲折行百盘,精蓝窈未觌。云光自离合,泉语互喧寂。俯视脚底寒,芬陀雨四滴。梯霞到绝顶,古坛枕巉壁。瑶空下青鸾,招之適无笛。浩荡见无垠,清啸未敢砉。茫茫海如杯,磊磊星可摘。忽悟斯境高,本自前山历。从来妙理封,纡境须冥觅。矫首吟天风,苍莽意何极。

李莼客同年用山谷以双井茶寄子瞻诗韵叠寄三首依韵奉答

我乡诗老数朱李,梅里并时徵鹤书。看君用意直相仿,光焰欲夺明堂珠。春明雅集洵可图,渔蓑宫锦恣所如。何必挂帆始言隐,身在魏阙心江湖。

陶侯绝学继越缦, 卅年手仇洨长书。鞭心入微恣幽讨, 冥若缒海探骊珠。为文伤命古有诸, 岂徒茂陵病相如。红蟫已化素编在, 仙魂飞渡来镜湖。

吾衰屡婴子桑疾,老去欲焚王寿书。袖中往往得诗简,美人睡起新弄珠。丁香花发春满除,海棠娇艳雏鬟如。迟君不来苦相忆,何日载酒寻杯湖。

闲居

新营小筑十年余,棐几湘帘得静居。秘阁评花皆史例,草堂话梦亦仙书。避人柳下偏宜 锻,叠石梅根未许锄。长日闭门无一事,自开绣帙曝蟫鱼。

几日西风瘦不胜,晚凉池馆露如冰。磁缸清许红菱养,药铫深宜白术蒸。难得秋帘犹有蝶,可能暑簟竟无蝇。掩闺好遣维摩疾,落叶声中一点镫。

魏塘舟中

月落潮回迫五更,魏塘孤棹汎烟横。篷边霜色欺衾冷,船尾镫光透隙明。远罶星沈天在 水,残芦风折雁无声。江湖滋味亲尝惯,青鬓萧然百感生。

五厘

落梅风里峭帆停,系缆斜阳绿水汀。哀雁语从中泽诉,乱蛙声带断潮听。疏烟起岸浮芒 屩,凉月窥人倒瓦瓶。却忆年时曾宿客,萍蓬两地各飘零。

陶在铭

陶在铭,字仲彝,会稽人。同治庚午举人,官江西候补道。

千辰仲春檄调上元留别高淳士民

粗官滥吹易三年,回首春风入境天。芳草一畦黄犊雨,晴波干顷白鸥烟。清时桴鼓声都歇,野老衣冠望若仙。不信南朝金粉地,桑麻鸡犬独翛然。

王鹏运

王鹏运,字佑遐,号半唐,又号鹜翁,临桂人。同治庚午举人,官吏科给事中。

辛未礼闱后张孝达制军与潘文勤公大公名士于龙树院治觞选客手札七通夏闰枝编修装册徵题

槐龙突兀老秋霜,犹护当时选佛场。二十七年谈旧事,依稀墨沈姓名香。

月旦偏从下第新,尚书冰鉴重人伦。牛心未啖周郎炙,愧负平生毷氉身。

材用由来为世储,诸贤遭际定何如。可怜憔悴风尘底,付与荆州数鲫鱼。

益都清宴徒佳话,吴县风流賸断笺。极目烟尘坛坫冷,朱门槐柳自森然。

颜嗣徽

颜嗣徽,字义宣,贵筑人。同治庚午举人,历官镇安知府。有《望眉草堂诗集》。

秋晚登黔灵山

岱宗七十二家封,不到南天别有峰。半壁烟萝嵌古碣,一林霜叶年巢寒钟。山环玉回奔 马,瀑倒银河启蛰龙。试展胸怀发清啸,虚声时度最高松。

杨恩寿

杨恩寿,字鹤俦,号蓬海,长沙人。同治庚午举人,湖北候补知府。有《坦园诗录》。

过昭平峡

桂林之高高接天,奔湍直泻无盘旋。一气贯注四百里,小舟跕跕如飞鸢。行过昭平势渐狭,山形屈曲同巫峡。一线涛飞万丈高,洪流竟被青山胁。初犹伛偻循山根,渐进豁朗开重门。雷霆风雨一时作,白日遁匿天为昏。篙师使篙如使笔,大敌当前神暇逸。事惟扼要始争奇,须知斗巧不斗力。大石耸立凌船头,狰狞怒欲求攫舟。从容一篙拨之走,水懦何敢须臾留。出峡回头望峡口,波声终古成狂吼。顽云下垂腥风粗,峡门开闭痴龙守。

呈吴南屏孝廉丈并题东游草用集中湘乡侯相奉赠原韵

寒云逗日风帘簁, 髡枝败叶霜华摧。洞庭渺渺布帆发, 巴陵诗老飘然来。大雅未坠耆宿健, 宛游经市依黄槐。我生后公三十载, 盛名在耳春霆豗。平湖八百阻衣带, 艰难良觌成违乖。太岁在戊月建卯, 烧痕绽绿藓寒灰。张子招邀作禊饮, 祓除失喜无烦灾。维时撰杖荷矜宠, 奋身恍惚登蓬莱。零章断句今尚记, 纸鸢风里喧婴孩。我嗜公诗信颇笃, 饱吮余味如贪豺。深杯款款酒未冷, 湖山有主怀归哉。隙驹迅走鸿雁杳, 起居安否时疑猜。岁星一周手再握, 灵光鲁殿何曾隤。太息仲蔚今已逝, 门蒿萧瑟含余哀。脱手清凉示传稿, 皎皎慧镜开尘

霾。不嗟诗事苦晦塞,大光明放何皑皑。吴越既平盛文物,定知侧席争传杯。读诗漏尽忽兴起,源头一线灵湫开。寒嘶抱槁等自桧,正声《雅》《颂》原周邰。

春感

几日东风尽放颠,阑干如水夕阳天。桃花红雨梨花雪,春到人间便可怜。

谢郭筠仙侍郎问疾

重帘渺天涯,沈疴失嘉会。空斋邈无俦,萧然形影对。言念素心人,甚至形梦寐。枉公高轩来,跃起为拥篲。慰我久病躯,反覆极宽譬。如读工部诗,疟鬼悉惊避。豪谈鼓颓唐,隽语饶诗味。对此松柏姿,益增蒲柳愧。交亲及两代,高谊迈流辈。几日离药炉,闲游逐鸥队。首夏余薄寒,当花谋一醉。

柳商贤

柳商贤,字质卿,吴县人。同治庚午举人,官宁海知县。有《蘧盦诗钞》。

拟元次山舂陵行

徵求日以繁,逋欠日以积。斯民丧乱余,哀哉生计拙。大户尽逃亡,小户遗单孑。可怜墟里间,往往炊烟绝。去年又歉收,亩穀不盈石。尽室一饱难,愁肠蕴百结。刺史职抚字,何以安兀臲。流离尚未定,官符下稠叠。国用有常经,敢不勤督责。频年普蠲减,朝令非甚迫。奈何期会逾,罪谴懔莫释。起视鸿雁嗷,哀哀满中泽。田园非所靳,儿女非所惜。独恨受者谁,相与增哽咽。百死余一生,那忍更摧折。朝廷鞭扑具,岂为穷黎设。况复室悬磬,鞭扑亦何益。忆昔奉简书,此邦移节钺。帝曰咨汝才,努力务存活。圣人重爱民,敢惜一官掷。私愿宽法令,起死而肉骨。庶几流亡归,稍稍复征额。民穷盗贼源,谁其鉴覆辙。流涕为此诗,輶轩尚采择。

慈仁寺

慈仁寺里双古松,霜皮铁幹蟠半空。枝柯纷樛宛成盖,盛夏凛烈生长风。我来冲暑憩松下,鸣涛谡谡骄阳中。禅堂深窅梵诵歇,一声两声花外钟。閟殿载瞻般若像,巧制不与寻常同。庄严璎珞肉相好,僧言窑变非人工。更有佛画惜未见,蛛丝烟炱尘久封。虚廊窈窕暮烟合,西山一点青濛濛。吾乡亦有佳山水,朅来踪迹惭飘蓬。素衣尽缁面目槁,不如归去聊从容。林屋幽邃甲天下,芒屦一双支孤筇。银床石室许相访,穷探或与灵威逢。

徐銮

徐銮,字金坡,嘉兴人。同治庚午举人,官黄陂知县。

戚砥斋先生检书图

丈夫生不能校书天禄阁,枯坐一毡徒碌碌。蝇钻蠹蚀自年年,砚墨磨人放声哭。砥斋先

生世守经,楹书手泽都能读。撑肠锦绣五千篇,压架琳琅三万轴。百城坐拥亦足豪,况此便便不负腹。饥来驱之出门走,疲骡偃蹇行驰逐。从此嫏嬛系梦思,校仇手自编书目。遗经自古胜籝金,差幸砚田岁不恶。吾友尘仙善继志,经史如瓶翻水熟。一门师友证渊源,两美丰凶擅榖玉。相见殚精下董帏,咿喔书声出老屋。无端鼙鼓动地来,燎原一炬谁能扑。心付昆池劫后灰,嬴政焚时无此酷。噫吁嚱!凡物有聚必有散,自古盛衰如转毂。祇今留得画图看,犹见当年富储蓄。披图展视重吁嗟,有书能读宁非福。我亦年年事远游,长剑在装笔在橐。案头册籍久飘零,断简丛残鼠生簏。悔不编成几卷书,惟对此图长跼足。

许印芳

许印芳,字麟篆,石屏人。同治庚午举人,官永善教谕。有《五塘诗草》。

九月晦日逢苏昆圃

苍凉风雨催秋去,黯淡江山送客来。纵酒追为重九会,望乡莫上最高台。十觞茗艼歌钟 阕,千里萧条战鼓哀。南木溪头氛祲满,故园黄菊为谁开?

游燕子洞放歌

马蹄踏碎冈峦影,路转冥然堕眢井。斗如刺船沧海东,淜滂訇礚闻惊风。茫茫万古不计愁,多少洪涛汩没悲英雄。入门方拟穷奥秘,物感情迁欲反辔。彳亍中辍望流川,始见沪江泻澎濞。沪江出巴甸,发源异龙湖。盘江经阿宁,引泄为尾闾。此间山界划两州,沪水西来湍濑遒。石岩瓮肚穿窦窖,潜演汩淈安阳侯。连嶂叠崿互攒倚,寂 长浮二十里。鷾鸸高垒当极冲,截江断道愁龙公。大蛟萦天作牛吼,狂飙吹沙石乱走。五雷奋椎入水凿山脉,壑谷既通,神怪是宅。上有巨蟒吞象积骨成荒丘,南海大士编木为窠坐其头。下有魔子魔女噏波喷沫戏,灵府三十二将学化身倒垂。百千万亿降魔杵,影壁之面窊隆诡戾难为言。但见伏羲鳞身女娲蛇躯扬鬐矫首而上奔,兔窟之曲渴饮露,赤虹圆晖成桥跨穹窿。桥上玉树连蜷,偃蹇疑是月中桂。桥下金庭萧条,清泠疑是广寒宫。琼楼玉宇不见霓裳羽衣舞,中秋之夕不见轩辕老作东道主。飘飘忽忽往来齐驾飞云车,却见乌君陪燕女,背飞向啼为一家。造物造此亦太弄狡狯,乌衣国别开世界。遂令奇境传滇南,慈利县石无人探。我思筑室深岩里,避兵愿从猗玕子。但恐阴壑多毒雾,夔{鬼虚}虺{或虫}更蟠踞。人间信有桃源路,鸡犬桑麻在何处?惟看黑浪奔腾向东去。

山夜

月照西山山气深,深山松柏阴森森。湖光百里蹴山起,山中明月浸湖水。游人不寐登山楼,落叶哀蝉鸣素秋。一夜霜风吹白草,高堂白发知多少。

滟滪堆

三足立千尺,一身通万窍。沃焦海坚强,底柱河竦峭。鼎镇龙伏毒,城鏖水敛暴。流分折合劲,行曲平直躁。狂澜江心抵,浮航峡口导。篙嵌撑审固,舵准捩执要。乘波趁奔腾,捎濆避攻剽。冬喜鲸牙拔,夏怵虎尾蹈。奖功归神明,惩罪示形貌。大濒牛马危,小受龟鳖吊。庾公祷或灵,苏子赋惟妙。飞仙挟游敖,磐石坐垂钓。

二言诗送王圣铁入楚

秋鸿,毛丰。长安,顺风。行旅,得所。沅渚,湘浦。洞庭,月明。弹筝,吹笙。龙女,歌舞。龙姥,笑语。龙君,乘云。御天,观民。浸渐,入坎。汎滥,磨飐。九州,浮沤。蛟鱼,敖游。鳞介,曷害。鲸大,可脍。千将,纯阳。过刚,摧芒。鸣髇,射潮。海涛,岳高。烈士,感涕。执义,摩厉。城心,坚金。口箝,佯瘖。肝胆,铸剑。血染,花艳。陆兮,断犀。水兮,剸鲵。南楚,净土。择主,水府。风胡,吹嘘。湛卢,与俱。佳对,可意。赘婿,华毅。旧姻,柳门。新婚,汝联。珠玉,牣屋。属目,餍腹。龙窝,宝多。太阿。奈何。用而,城麾。舍而,铗归。

胡友梅

胡友梅,字雪村,庐陵人。同治庚午举人,官乐平教谕。有《听雪轩诗钞》。

山行

两三茅屋是谁家,门外参差绿树遮。樵客归来春日暮,抬头时见杜鹃花。

睡觉

清簟晚睡觉,啼鸟喧我屋。出门看夕阳,冥色在修竹。山空寂无人,懒云已早宿。萧萧 天气凉,随意坐苔绿。堕地铿有声,幽林松子熟。

三叠泉

五老骨瘦峭,箕踞窥天半。群峰互相从,俪立各傲岸。中间一缝坼,飞瀑下碧汉。三叠始到地,疑是玉龙窜。雷霆日夜随,轰轰势凌乱。云净练孤悬,风激珠四散。峭壁含阴森,盘涡泻浩漫。山灵命严扃,屏嶂交卫扞。险巇横礌硌,结纠蔽丛灌。危步足生茧,暂坐背息汗。泠然肺膈清,耳目匪常玩。奇境未梦见,平生兹游冠。

叶道源

叶道源,字心渠,宿迁人。同治庚午举人。有《大瓠山房诗集》。

遣兴

久向人间觅赏音,偶然冥想到山深。芝兰自带烟霞气,鸾凤原无枳棘心。一献已羞和氏玉,再来谁问伯牙琴。栖栖负此拏云志,仍作当年抱膝吟。

柬崔心孚

彭门流落久,慰我意深深。不作感恩语,恐违知己心。干戈孤士愤,猿鹤故山吟。赖有 机云在,醇醪夜共斟。

舜琴移家勺湖寄诗索和书此卻寄

共道勺湖好,烟波五月凉。水花跳白雨,寺柳覆红墙。菱渚鸟声乱,荷风人语香。晚天 鱼笛起,击檝咏沧浪。

黄良辉

黄良辉,字耀庭,汉川人。同治庚午举人。有《黄氏诗钞》。

过黄坭坪

险绝黄泥坂,萦纡仄径开。凝寒冰耸骨,突怒石离胎。松老疑龙立,篁深讶虎来。劳生 畏形役,惭愧勒铭才。

秋日感怀杂咏

不与世俱去,千秋惟此心。名王动星象,烈士感苍禽。蜀魄悲何益,湘流怨至今。君看 北郭外,寒日下枫林。

偕张方伯樵野琴台秋襖

银潢界西隅,逸踪袭二七。穆若眄昌辰,祓絜将阶吉。翠漪绰奇态,雕云绚天质。哲牧喟萧序,簿领劳丹乙。迢递琴台期,夙翰召灵匹。造櫩琼裾翔,中座组珮溢。雪藕羞轻丝,冰菱荐文实。桂醑既射越,兰蒸复沤苾。凉苔雨逾滋,寒花晚更密。拘解疏属年,趣协沧洲日。游盘惜晷遽,欢浃忘景毕。何事拊牙徽,水木自明瑟。

炎岭富鹓鷟,翰飞陵楚甸。嘤鸣索其俅,阔音振逸面。阊阖厉严飙,缮威诘戎战。貙膢 岁聿举,折胶敉萌变。愉此暇日丰,衿綦盛驩燕。气清沙羡出,霜落翼际见。赪苕缨广隰, 绿芜络修院。锵洋太音希,曶罔元风扇。邈缅汉儒疏,眇默晋臣传。殊世抗高躅,遗徽鹜奔 电。虽乏鹍弄娱,云物餍遐眷。君子福所绥,嘉祥日衎衎。

析羊典云佚,刑马仪攸缺。咏郑摭暄萋,赋鲁采凝节。禳殊汉右苇,萦符周先茢。绎古模渊旨,渺今飏芬烈。及斯商令佳,吹万齐姑洁。俨騑讯咫路,揽袂遘朋杰。高义薄穹霄,微言涣晶雪。天籁苟冥悟,风弦徒虚设。时哉迅熛忽,瞬稷吟纤蛚。哀乐荡精魄,所思弥菀结。遂欲遏六螭,迫嵫秘扃鐍。丹青焕且彫,令名焉可灭。

往运萃阳九,汉南横氛雾。于兹轨清夷,庶康同王路。逖扬灞涘风,迩撷洛滨步。泠然排元筌,振衣豁尘务。偶欣金序晈,弥惬石交晤。天末认逵鸿,烟际辨汀鹭。层台阅废兴,流水鉴今故。大雅此焉陟,百代绵余慕。岂异棠阴憩,躬仁化行露。咨予樗散姿,于野相牵附。敢负凰桐奇,谬希夔尹顾。庶奏渌水谣,因风答咸濩。

黄炳垕

黄炳垕,字蔚亭,余姚人。同治庚午举人。有《诵芬诗略》。

重读行朝录感赋

高墙天子气, 夙昔著英风。三诏人心系, 两年王运终。入闽怀远志, 依郑弃前功。纵有 黄苏相, 无如历数穷。

陈豪

陈豪,字止庵,号兰洲,仁和人。同治庚午优贡,官汉川知县。有《冬暄草堂诗集》。

子寿先生招饮乃园同子缜赓甫迟菊

即事有远心,所在成林僻。主人爱夏凉,延客布芳席。清尊取次斟,情话日已夕。揽衣循幽蹊,杂坐藉白石。茶味瀹花气,湛然沁胸膈。有亭面夷旷,栖迟类村陌。蓺菊连瓜畴,灌莲引泉脉。素月东方升,圆光补林罅。好风何处来,余意诚莫逆。平生丘壑志,眷焉怀在昔。良会自古今,誉名贵无斁。何以酬大贤,念此日乾惕。

游汉上琴台同紫缜伯晋

琴响久消歇,斯台遂今古。三人成此游,意至无宾主。野风吹藕花,花态各飞舞。入门 讶清迥,炎曜忘亭午。薇妍红欲笑,林静碧无暑。倚窗盼湖天,柳阴过柔橹。山气余凉润, 快哉昨宵雨。图画或不到,造化为之补。桅樯隐参差,遥情极江浒。暂与尘喧隔,徜徉乐兹 土。俯听流水声,灵弦傥再鼓。

初夏

初夏坐南轩,园列滋敷荣。阶草亦含润,芳气薰晓晴。胸次已久静,何缘荆棘生。昨夕得快雨,天宇遂澄清。颇闻农夫语,新苗布纵横。默祝苍昊意,但期岁功成。人事暂以济,吾心奚所营。悠然念时运,欣慨常交并。平昔不嗜饮,一杯偶独倾。乘兴弄柔翰,时来白衣人。翻笑柴桑翁,高眠愁酒贫。澹静澄众虑,大贤百世师。葛侯与陶叟,襟抱无差池。和风吹我室,朱明已及时。拂簟展蕲竹,分盆供蜀葵。新荷未著花,芳翠良足怡。雨过流晨气,几研有余滋。游山方听泉,得闲偶赋诗。人境实深阻,吾道终泰夷。富贵何如贫,斯理曩昔知。湛然中有宝,百年慎自持。

有约

寻幽有约叩禅扃,风雪连朝未肯停。昨夜梅花来导我,蹇驴驮梦过南屏。

题画

得鱼易醉已微酡,泛宅浮家涉历多。鸥鸟同眠江上稳,转疑朝市有风波。

芦花风起水天宽, 午睡垂头正饱餐。消受个中凉意味, 此儿曾未梦长安。

周家禄

周家禄,字彦升,号奥 ,海门人。同治庚午优贡,官江浦训导。有《寿恺堂集》。

蓬莱阁早发望海

神女献大珠,奉槃出沧海。忽为羲和夺,掩面失光彩。龙宫起严装,千山擎笏待。俄顷朝天阶,拂衣霜皑皑。星冠一摇动,漫天散珠琲。可惜青珊瑚,堕水不可采。

黄县山行寄林怡庵

冥行万山颠,忽然堕云海。赤日扶我起,烧天作奇彩。谁言青山色,万古长不改。倏忽 幻波涛,芙蓉愁不采。据鞍四顾望,直下何磥磥。处卑良所叹,升高行复悔。蓬莱高阁下, 秋花黄蓓蕾。持螯日痛饮,凭阑几人在。

昌邑道中和张謇

芙蓉城北旧台池,贪看风光上马迟。出郭泉声新雨后,过河山色夕阳时。闲寻题字知曾到,坐论人才醉不辞。莫对庭柯感摇落,拂床仍有柳丝丝。

朝鲜王京送沈主事内渡

朝鲜旧号高句丽,汉唐文物今为夷。平壤春山空寂寂,汉城秋草何离离。离离秋草埋宫阙,住尚凄凉况堪别。闽江尽处是家乡,举眼千山万山雪。昔年文肃初开府,绀憾绿軿秋按部。部民喜迓杜征南,天子遥咨仲山甫。大星夜坠三江水,身后萧条竟如此。松柏南台何处坟,葛帔西华谁氏子?扬子江头初识君,天寒落叶正纷纷。同舟万里沧溟水,骑马三韩日暮云。西风冻滑水原道,失笑相扶玉山倒。围炉屡话十年游,翻箧仍钞百篇稿。感君意气剧纵衡,心知不言仍有情。谈深岂恨赏音寡,论创惟忧座客惊。与君身世还相似,道义订交从此始。他乡念旧幸有人,仕不为贫好知止。

将发朝鲜留别东士大夫

春风杨柳汉江波,零雨三年有凯歌。汉将龙旂回日月,王人虎节照关河。楼船横海威名盛,台笠遮山惠爱多。二十一都驰马过,城南风景奈愁何。

王师七月下东方,国难悬知痛未忘。岂有亡人仇卫辄,似闻故剑在昭阳。檀君废壤关时 局,卫满荒营彻旧防。宵旰两宫频左顾,诸君何以副尊王。

连鸡策士有阴谋,从楚微闻欲背周。四郡从来为左翊,九夷何处著欧洲。徙薪曲突君终谅,揖盗开门我定忧。崇礼门前重回首,出城江水正悠悠。

熙宁雅乐宫悬,铙吹从人索和篇。冬雪貂皮辽海市,春旂牛种汉阳田。明农事业归留相, 老论风流萃众贤。七子赋诗如见宠,东浙文教为君传。

辰阳驿咏石

古有大力人,天地始开辟。割裂大圜体,扶峙九州脊。蛮方五溪险,苗疆六里籍。山高 偪天小,溪多侵地窄。吾从马底司,来趣辰阳驿。千流进一怒,一关搤众嗌。请迥使者车,暂止游客屐。为君瀹清泉,听我貌奇石。大股嵩华剖,小垛磊砢积。植柯仰厉斧,筑堵俯开隙。木札险离斤,衣袽破就刺。元冥汎水痕,祝融炽火迹。红陈廪君粟,断烂穆满册。其间杂丑怪,乍睹惊辟易。虎视爪齐奋,熊经掌待擘。层絫牛戴牛,偻立躄迎躄。鬒女笑整鬟,人怒脱帻。皮坚幕浑敦,窾空鼓礔礰。由来少文章,颇复有络脉。赋形不害蠢,取姿全在瘠。江南佳山水,吴中盛园宅。百金买皱瘦,寸顽抵圭璧。良工费搜罗,兹地独狼藉。君知天下奇,造物故不惜。

武昌留别汪巩厂

横议千家互倡酬,微言六籍恣冥搜。坐看白日真成暝,不为苍生亦自忧。风柳过墙堪受 月,露葵临砌易当秋。高谈向尽离愁始,对此茫茫江汉流。

武昌遇郑苏龛追悼亡友林怡庵

谢舅何甥并一时,逢君偏恨十年迟。尊前海错思珧柱,汉上秋山对鬓丝。举世不为犹好句,九原可作剩哀词。北来旧对知谁在,日没黄垆冻酒卮。

姚园答沈刑部

离离霜菊满池台,身逐斜阳更一来。易主园林秋烂漫,上游江汉客低回。关山老病真成废,文学俳优定乏才。木落洞庭愁日暮,感君诗句拂尘埃。

后楼感事

寂寂高楼俯水滨,喧喧龙鹤竞残鳞。帆开云影移书幌,花落风枝损砚尘。衰病渐看成废物,艰难无处著闲身。江南四月鲥鱼美,何必猪肝苦累人。

城南感事

冻雪归鸦乱后村,觚棱斜日下营门。英灵河朔人才尽,花事城南野烧存。山寺卖浆贪客过,水亭题墨共谁论。桓公老去萧公贵,且向黄垆问酒尊。

【卷一百六十五】

瞿鸿禨

瞿鸿禨,字子玖,号止庵,善化人。同治辛未进士,改庶吉士,授编修,官至外务

部尚书协办大学士。谥文慎。有《瞿文慎公诗选》。

题刘君浯溪钓隐图

浯溪岸曲回明漪,古木蔽崖阴倒垂。风吹钓船自来去,幽意独写无人知。白鸥与我 同浪迹,手持钓竿坐盘石。日暮空归亦自佳,本不取鱼惟取適。

七日伯严招集樊园探梅

春来未识如新交,人目出访郊西郊。罗浮缟衣忽到眼,一笑媚妩开林梢。初寻篱角露冷艳,断桥野水轻冰胶。参差绕屋三十树,疏影破空横冻蛟。海旁蜃市金碧气,徒眩俗目纷喧呶。樊山寄庐独娟好,园亭到处含红苞。坐看香雪喷成海,直拥仙云围作巢。偶从人外憩清绝,得此佳趣知天教。陈遵爱客续嘉会,乘兴招赏罗杯肴。欲将画意写萧澹,未尽诗妙空推敲。关山莫忆断魂日,且向天涯随结茅。倾觞痛饮荡尘抱,不尔正被梅花嘲。

甲寅三月三日补松招饮樊园新居看碧桃花

去年三月斜桥西,衣上红沾杏花雨。樊园此时未有园,今日樊园成地主。一廛买得远尘嚣,半亩平分学农圃。不种桑麻种花竹,穿林百鸟来歌舞。柳条婀娜拂金绦,柏叶鲜妍张翠羽。碧桃六树倾城立,粉白脂朱娇欲语,笑倚春风醉半酣,然照晴云艳初吐。先生好花如好诗,意夺化工天可补。移根几日便烂漫,特与幽居生媚妩。元都观里空无存,度索山前杏何许。乞栽独送浣花村,入画真成辋川墅。延陵父子雅好事,求友嘤鸣欣得所。山阴脩禊第二春,从借行厨饮吟侣。武陵仙源那得入,问津疑复逢渔父。海濒一日不还乡,岁岁来寻此花坞。行看十丈出垂檐,高放红霞满庭户。莫教损折问公幹,酒兴不空须记取。花下飞觞酩酊归,更肯夜游还秉炬。

樊山有诗留别同社索和与乙庵同次原韵

从来乐道不忧贫,天问终难测盖浑。昨夜微霜催客子,明年春草忆王孙。飘萍聚散 真无定,蟠木轮闲自有根。梦里东华风景异,铜驼应感止车门。

盟主风骚上将坛,朋簪频盍筍皮冠。逍遥岂待培鹏背,造化奚为弄鼠肝。别意去随 江水尽,无心出作岫云看。掉头巢父归应早,东海珊瑚拂钓竿。

乙卯二月予还湘省墓散原亦返崝庐適同轮舟乃彼此不相遇怅然久之抵沪晤散原言 发南昌时方意归途邂逅有诗见忆爰和此篇

云迷宰木连山冈,清明泪洒游子裳。感君昨岁已上冢,念我久客从还乡。同舟并发不自意,共一老秃须扶将。峨峨巨舰失交臂,判隔户牖藏蜂房。初闻喜跃继怊怅,咫尺离合成参商。诚通肝胆绝楚越,不见蔑面庸何伤。回帆邂逅入梦寐,握手袖视琼瑶章。悬求友声出岩谷,春风簧啭调清吭。崝庐诵芬慕前烈,泷冈树表今欧阳。吾翁执友怆宿草,两家旧德俱义方。百罹流徙诒余痛,浊世礼坏川无防。墓门斧棘郁松柏,岁寒晚节敦偕藏。抱残各守遗经意,忍饥濡煦聊徜徉。

送伯严还金陵散原精舍

举世共安迁,怜君聊复归。悠悠大江水,历历故园扉。雨砌花垂昼,风帘燕怯飞。 渊明北窗下,犹有酒觞挥。

节庵归自焦山属为海西庵僧慧松写诗因作此

眼底金焦几变迁,旧游如梦梦如烟。幽情付与葵霜老,古寺残阳听暮蝉。

避世高人故隐居,瓜牛今日更无庐。石门夜话寻禅榻,一苇江天纵所如。

理安寺

山行窅无路,尽被梫柟占。丛桂缭连蜷,淮南无乃僣。金风散天馥,吹襟想清艳。欲返秋怀悲,转惜春游欠。理安存绀宇,望古发深念。季宋儒效微,不如三尺剑。茫茫横江流,何处见天堑。且说三乘法,真空依净梵。香积分伊蒲,老甘蔬筍餍。游情锺王迹,石墨照翠爓。

泛西溪至交芦庵

西溪狭如沟,小艇仅容桨。携家促膝坐,跼曲不可仰。微风吹一叶,穿影乱菰蒋。 泛浅出虹桥,底磨石濑响。童孙初识船,呕吐恶摇荡。樊笼锐欲脱,推篷感其颡。强挟游芦 庵,林壑接幽敞。趣怡戴奚画,灵肃杭厉飨。清堂燕留客,野蔌饱僧饷。舆人迟失期,花坞 欠一赏。洒然羞歧路,薄暮理归榜。虚舟触无心,何碍適莽苍。重来看秋雪,留待携壶往。

法相寺老樟

掀天古樟老气凝,屈铁作幹嵌金绳。戟髯山立巨无霸,控射强驽横修肱。太阴倒垂云雨黑,霹雳破裂双龙腾。寒芒凛凛鳞甲动,遁避不敢栖鸦鹰。我寻山寺访神物,拄杖逼视愁攀登。从来不材赦斤斧,有用幸免诚天矜。风霜千禩炼坚节,阅劫世远忘哀兴。佛镫隔院照遗蜕,不死能陪长耳僧。

劳乃宣

劳乃宣,字季瑄,一字玉初,号矩斋,又号靭叟,桐乡人。同治辛未进士,历官京师大学堂监督,署学部副大臣。

刘聚卿参议出示大小二忽雷唐宫乐器也

示我当筵两忽雷, 刘郎古意抱琼瑰。摩挲别动兴亡感, 曾奏唐宫法曲来。

过金陵丰润门

江表回车日未昏, 凄凉丰润有新门。经过莫制西州泪, 碧血难招蜀道魂。

题自订年谱后

偃蹇乾坤一腐儒, 老来牛马任人呼。铜仙阅尽沧桑劫, 剩有难忘是故吾。

吾谋不用拂衣归,绕屋清流静掩扉。领略乡园风味好,冬舂米软晚菘肥。

筑室盈廷社鬼谋,坐看鱼烂更谁尤。鸿飞祇有冥冥去,回首天阊涕莫收。

回头往事已成烟,聊记鸿泥旧日缘。自序敢希班马笔,愿随五柳传同传。

车厂歌

车厂村,青山为壁溪为门。中有良田几千亩,父老菑畲子孙守。上有租税供天家,下有余粮活子妇。生不见县吏面,老不入县官衙。年年饱看桃源花,一朝部符忽下县。农家田是王家佃,分茅故府有藏书,蕞尔齐民敢私擅。赫赫王家奴,巍巍贤令君。红旗耀白日,遍插峰头云。峰头云,泪如雨。从此农家无寸土。王家赋重皇家轻,嗟我乃作王家氓。催租吏来榖未熟,鸡飞过篱儿女哭。吞声不敢惹吏嗔,拌向前村卖黄犊。我今捧檄来谘询,村民语我双泪沦。但愿死作皇家鬼,不愿生作王家人。村民村民毋蹙蹙,此日明良正相勖。为尔谱作车厂歌,聊当监门图一幅。

后车厂歌

晴峦抱丛薄,野水萦孤村。驱车荦确中,来款村肆门。坐中一老叟,白发垂缤纷。叩我来何方,问姓惊重陈。曩有劳委员,按事曾来存。今君与同族,彼是君何人。笑言我即是,狂喜如有神。大呼是天降,果是吾神君。吾村昔年狱,家家皆戴盆。鹰鹯一搏击,怨毒从兹伸。荏苒三十年,念诵今犹新。导我还其家,儿女罗饎餴。偕我陟林麓,指点鸿雪痕。峰岚犹蔼蔼,原隰犹畇畇。回首若梦境,惝恍移心魂。老者闻我来,重道当日恩。壮者闻我来,缅述儿时闻。杂遝话旧事,语拙情弥真。愧我德凉薄,得此殊不伦。此邦俗良厚,足可称里仁。愿言挈细弱,来结山家邻。为我求山田,叱犊耕春云。为我觅村舍,茅檐纳朝暾。呼儿学把耒,植杖观耔耘。晨炊饱脱粟,夕膳甘菜根。愿为童子师,执卷故业温。理乱不入耳,共作羲皇民。夕阳下西崦,我仆促返轮。幽栖坚后约,临别还谆谆。

归耕釜麓出都感赋

南云望断故山苍,且荷犁锄倚太行。渔父笑人殊楚泽,居民爱我即桐乡。漫将食藿歌空谷,便拟搴薇步首阳。回顾觚棱天尺五,临歧惟有涕浪浪。

和沈盦守岁感赋用元遗山甲午除夕诗韵

发愤谁能识史迁,无言我欲效焦然。浮云身世离群雁,逝水光阴下濑船。旧岁几人 思汉腊,寒宵有鹤话尧年。山中甲子今何日,醉读《离骚》独问天。

刘农伯过访静公谪至谈论其快别后有诗见寄依韵答和

晓月犹悬玉一弯,蓬门无客昼常关。故人方喜骑驴到,邻叟俄逢弭策还。世事共悲 渊底日,乡心对语梦中山。何时双桨桑阴下,与子追随十亩閒。

题青岛新居

海色苍茫外,还疑别一村。窗虚山作画,林密树为门。宴坐时忘我,携行或弄孙。 不知寰宇内,万里战云昏。

雨中偶作

细雨霏霏酿暮寒,春深犹怯敝裘单。崖根石润生新溜,楼角窗虚失远峦。海上有书诗债逼,山中无事睡乡宽。胡床且觅瞢腾梦,一任林花满地残。

张佩纶

张佩纶,字幼樵,号蒉斋,丰润人。同治辛未进士,改庶吉士,授编修,历官候补 四品京堂。有《涧于集》。

书陆月湖先生手校宣公奏议后

龙门传贾生,不载《治安策》。至今悲长沙,如对宣室席。昫京岂良史,唐肆求马迹。榜子加点窜,貌形神已隔。呜呼唐贞元,聪察亦令辟。朝困二吴谗,夕受一裴厄。冰炭固宜然,苍蝇岂爱璧。邺侯时无伦,造膝全国脉。垂死引晋参,遗贤吁可惜。颇疑史失之,家传稿盈尺。嗟哉君子操,介立如松柏。嗟哉小人交,夺正如朱碧。德孤且不邻,物腐易求隙。未相道已睽,焉免忠州谪。太息建中忧,泚光竟寻逆。三军涕何从,禹汤能自责。功同衣白人,灵武赞谋画。天非材不生,相在君之择。谁与裂白麻,阳城空有驿。谁与进奏疏,端明亦终斥。契合世固难,吊古无荒宅。吾师理残编,误本亲纠摘。即今中兴年,抱道辞徵辟。阅世有名言,出辞戒直迫。讽谏意缠绵,君心匪难格。何用撮古方,活世此砭石。

柳叟招同人复游苇湾用伯潜韵

前游未及旬,出郭复蜡屐。山容幻晓晴,野色炫余泽。清渠静不风,秋意漾水碧。 主人不解耕,以花作阡陌。波清代出绿,菱芡恣饷客。烟水二顷余,鸥渚拓圆席。孤亭始何 年,俯仰忆畴昔。凉风对面来,薄爽生两腋。坐久忘形骸,不觉日将夕。

七月四日圭盦复招同人由天宁寺至北河泊观荷仍集苇湾柳叟醉堕水再用前韵调之

侍御兴不浅,老理庾公屐。水仙亦亲人,沐浴振芗泽。秋色扑画窗,杯浸太行碧。俯视万花笑,轻尘净绮陌。茅屋倒清尊,列坐忘主客。我醒已若狂,杯来不避席。餟醨餔其糟,宁辨昔酒昔。失足堕水中,患乃生肘腋。恨非新丰市,一笑竟千夕。

丙戌重九用东坡丙子重九韵

亲友望我归,我归固无家。茱萸遍朝士,何必手得花。茶香足当酒,半銙通犀窊。 野果亦可口,不辨橘柚柤。堂堂白日去,迅如赴壑蛇。杜陵老未达,登台动咨嗟。君看田间 饮,年丰话桑麻。或有临江阁,孤鹜飞落霞。斯世同一醉,秋心浩无涯。横风吹雁过,万树 栖昏鸦。

故人夙戒我,同搴北山去。乘兴忽中败,劳哉章使君。今年山雨足,高土生苔纹。 奔流下冀野,糜沸如汤沄。恤邻不闭籴,佳节敢犒勤。荒居尚得蟹,惠与三老分。此邦岁独 乐,蔬蕨缘溪濆。我忧亦何补,闲入麋鹿群。尽遣百朋从,随在生幽欣。邻翁为我计,便乞 营田耘。

薄暮石秀才儒珍自宣镇至欲陪余登云泉山不果呼酒夜酌便用前韵赠之

谁赍庞通具,直入渊明家。篮舆欲命驾,山僧亦无花。清泉自寒冽,绝磴时欹窊。时沙莽千里,历历见翟柤。猛石伏如虎,长川曲如蛇。挟君幽并气,望远空吁嗟。俯仰忆陈迹,知旧余疏麻。佳辰剩独笑,山月斟流霞。君来已不寂,烂醉吾生涯。何必登高赋,戏墨聊涂鸦。

处士水北隐,游踪漠南云。屡骑将军马,久客平原君。口数卅六国,灿若掌上纹。 我心已止水,波涛不沄沄。虽羡投笔壮,肯辍莳药勤。雄谈五斗后,不觉静夜分。老坡瘴海 谪,新居枕江濆。西邻翟夫子,索漠聊为群。眼前此异客,秋谷春欣欣。勿预龙山会,从我 归耕耘。

过严子陵钓台

沛公故人主吏掾,暮年徒跣谢前殿。当时祇有张子房,能致商芝来侍宴。英雄使君帝室宗,师卢从郑臣卧龙。龙卧强为三顾起,钓竿茫茫独烟水。沔南丑女不归山,却羡梅家婿乡美。皇汉三君乃一流,儒风道骨邈无俦。帝坐辉光客星去,俯视列宿犹通侯。怀仁辅义天下悦,阿谀顺旨要领绝。两言咄咄即谏书,进退确然此高节。君不见翰林李白谪仙人,亦慕先生事隐沦。一误楼船成放逐,太息香炉非富春。

塞上食物将尽得乾鱼数番下酒醉中作

突黔甑尘菜空盎,朵颐忽动江湖想。炰鳖难升吉甫筵,植鳍愧肖胥靡象。浑河泔浊不藏鳞,那似清泠容结网。谪庖商度到薨物,义不及宾堪一飨。莫嫌乾枯少滋味,触手腥汙先涤荡。固知受炙更芳芗,何苦登盘仍木彊。余腊投地狗莫牙,短铗辞门客谁饷。可哀便似武夷君,恨少虹桥孤月朗。虚斋薄饭独谋醉,归梦濡浭触菰蒋。稻花十里涨初肥,径尺生鳞触竿上。渔山止合具熐蠡,缘木可怜逢罔两。空烦湿沫相呴濡,波臣肯乞升斗养。孙叔残羹枉自调,子山小启何劳仿。由来休王配五行,清庙供羞宜夏长。大州献鱐备坚刚,笾人郑重天官掌。请看片片掷风涛,噀酒成龙引千丈。

塞上秋热用王荆公韵

木柴僵落白草摧,禾麻残立如枯骸。邪气袭逆中结轖,忍汗不待《七发》枚。焦头颇苦张火伞,炙肤无乃团冰台。大漠骄阳四千里,沙石烂煟如烧灰。使者饮泉渴不择,候吏

背血谁矜哀。九边畏官甚于魃,岂待荒旱生椎埋。我知酷虐匪天意,道逢牛喘犹低回。东南 更闻厄霖潦,忧勤何日尧眉开。太息年时论边事,疏成殿阁凉风来。

客心豫为秋风摧,与狐谋裘苏病骸。独贪避暑胜河朔,入握阴泉珠一枚。炎官恐我不耐冷,余威直到单于台。边人嘲是带来热,吾养其内心死灰,素琴自理那成操,谁和万壑松风哀。清宵独立感皓月,虚鉴偶著埃雾埋。大寒盛景谅难久,清商劲气将邅回。阙地置冰亦何取,方床八尺琉璃开。跫然无音绝褦襶,笑问蝇蚋从何来。

和东坡石炭

雷斧击崖臀股断,防风骨节颛顼骭。海国机心凿窍开,怒鉴飞车恣畔换。厚坤富媪 蕴阴阳,预鞴鲛龙炉底炭。坛升黑玉黦有文,澒积青金焰不散。西北家家足炊爨,周后升图 请传看。欧冶薛烛亟物色,折兰卢侯斩锐悍。炎炎火山石可樵,铮铮铁山戈乃锻。漆身面人 作劳,何苦獠奴求阿段。

君不见塞南童土樵采断,樵子号寒衣至骭。方筐拾得马通归,流人翻取名香换。我 观广莫山宛延,上者金银下瑞炭。单于不知利有孔,但逐水草牛羊散。土人然石火风腥,夜 气神苗更谁看。五千山荣杂代貉,莫笑岩顽与石悍。人居未稠地宝閟,谁迁程卓业冶锻。鹁 鸪斑斑胡桃文,贵官烧木论条段。

曼农省余塞上同游云泉寺为别用东坡与子由同游寒溪西山韵

故山菘蕨无一畦,全家飘泊军都西。少游下泽合乡里,为我长辐溓深泥。且寻泉脉 洗尘壒,村沽不假尊罍携。横沙乱水纷到眼,但有惊雁无闲鹥。积年残雪尚封窦,昨夜急雨 初鸣溪。柳不知春况三暑,羲轮摧冻声玻璃。嗟我肝脾伏炎瘴,忘归决占寒岩栖。野僧乞句 已满壁,藏貍让窟将成蹊。须眉渐改语音变,子勿见追徒惨凄。阿奴归去更碌碌,莫更疏直 遭排挤。临分苦语岂浪出,惩羹未可疑吹齑。万羊鞭叱尽成石,醒来落月圆如圭。

右臂作痛弥月歌以起之

不挽九石弓,不抚七弦桐。三年曲肱枕北风,天生此手竟何用。胡为拘挛橶挶百患来攻。霜蹄小蹶不腾踔,病翅欲舞怜氋氃。臂化为鸡窗下语,谓此神佑非天穷。先生一抵掌,屈横能为纵。入门俯坐客,尘毛奋掷谈辨雄。但令贵戚相敛避,自揽六辔孤乘。焉知千夫指争集,短狐暗射沙濛濛。鬼薪折掇白粲春,百金无药龟隆冬。茫然四顾一摇手不得,犹且终宵运笔撰说丛。及今小休息,一节偶罢全体充。酌以忘忧酒,导以灵寿筇。支离或免役,优游归作新丰翁,不然时来折臂犹三公。我闻强起忽狂笑,士能截腕难偻躬。长揖将军信兀傲,木材接续今更难为恭。焉能仆仆走秦楚,苦以小体撄心胸。君不见张侯矢贯肘,枹鼓严军容。国人耳目属却克,谁知流血轮殷红。又不见子公凌寒出西域,谷永耿育讼其功。可怜两臂不信;出,颓唐卧守边亭烽。人生何者非遭逢。吁嗟乎!善射射难封,善书书不工。柳生冥伯岂必意蹶蹶,静玩物化神行空。无官何待讬风痺,蠲疴不饵千年松。公等诚不能案摩析枝为长者,吾能挟山超海独障狂澜东。

晚春

市尘知避俗, 兀坐玩春深。火烬茶香细, 书横竹个阴。惜花生佛意, 听雨养诗心。 傲吏非真寂, 虚空喜足音。

和梦所居庸九日韵

秋色无南北,人心自浅深。毫枯搜猎兔,弦静下归禽。老守行千里,长城亘百寻。 驼铃诗思倦,争似戍楼碪。

谪居

清时乘障谪居安,六拍悲笳且罢弹。牛血调能明蒋琬,乌头何惜誓燕丹。短衣离地 與台笑,芒屦循溪父老看。九死孤臣亲齧雪,恩深未觉塞堧寒。

梦所来守宣化过郡话旧赋赠

故人怜我滞刀环,乞郡遥临纳款关。久徙略谙田牧利,联吟须放簿书閒。广延宿士 休悬榻,便作州民决买山。微有江湖流落感,梦中重侣旧鹓班。

汉家九郡竞边功,论治终归长者风。平野禾麻新雨后,前朝亭堠夕阳中。早知上谷 得元伯,却宴南楼忆郑公。逐客春来萍掷浪,暂开襟抱一尊同。

自笑

钝根自笑困阵编,经不能神笔未仙。郑学粗通嫌引纬,坡诗细读懒参禅。渊源何取 孙王辨,门户真知洛蜀偏。一卷乍开犹异说,固应朝市动纷然。

梦所书来盛称新室之美促余过郡戏成长句

州宅何曾似越中,自夸素壁画图工。祇应布被平津客,聊避弓闾广莫风。木石生云山气紫,主宾对雪酒颜红。新诗美政流传遍,便恐虑声到盖公。

始得伯潜书时筑室石鼓山中以诗寄怀

十年同梦蹑天梯,自屏尊罍急鼓鼙。一触网罗江水阔,几回书札塞云迷。闲琴独理 龙潜听,裂素难投蠹坏题。已是结邻乖夙约,放归我亦涧于西。

寄高阳师时奉命郑州行河

举朝动色议寘河,枣野陻成又瓠歌。汉使博求中策赘,禹功利导下游多。傥迟竹落 三旬塞,豫怯桃花二月波。今日狂澜仍只手,儿童走卒叹公皤。

释戍将归寄谢合肥相国

捐弃明时分所甘, 无家何处著茅庵。便凭黄阁筹生计, 愿寄沧洲得纵探。冰积峨峨

几止北,鸢飞跕跕罢征南。负刍越石嗟枯槁,门下虚烦解左骖。

别察罕用坡公别黄州韵

边城谁谓久牵鞿,三见修罗翠作帏。司隶渐安长子徙,中郎岂分朔方归。未回天地 空横耒,尽有烟波许拂衣。堪笑痴儿频数日,惊猜赦宥尚疑非。

界突羁縻肯受鞿,申椒狼藉耻充帏。屠龙伎俩殚家授,射虎功名论赎归。郊外三年 宜以玦,墙阴七日感无衣。箧中职贡残图在,黑水惊湍触物非。

读樊川集有感

司勋胸臆在孤行,浮世传诗亦强名。仍岁江湖疑中酒,几人霄汉肯论兵。能容两党 非无术,不作三公为有情。莫举前身江总例,鬓丝心铁感平生。

响水梁

百折终归海,徐之浊亦清。如何微搏激,便作不平鸣。

昌隆寺孤松

残经卧佛隐孤峰, 谁飞泉养伏龙。手抚苍官宜作弟, 道光二十八年松。

孝达前辈致海南香雷州葛

一穗轻烟雨后山,妄心尘梦已全删。蔚宗多事成香传,便落膏昏甲俗间。

惊雷飞雹起无端,五月披裘怯夜阑。独有故人知傲骨,葛衣能敌九边寒。

张楚宝赠肃毅刀乃壬辰德国格鲁森厂所制文忠命其监造者率赋

敛尽中原百胜锋,晚经锤炼壮军容。昆吾大食终何用,神笔凄凉老折冲。

孙吴秘钥郁胸中,酷喜张侯有舅风。回首戟门参语夜,酒阑横膝论英雄。

鲍临

鲍临,字敦夫,浙江山阴人。同治甲戌进士,改庶吉士,授编修,历官司业。

和渔笙岁暮即事元韵

万物纷纭录计然,扫除赖有笔如椽。惊闻巷口催年鼓,赢得床头押岁钱。好客都归诗社里,苦吟闲寄酒炉边。明朝记是新春日,影事从教算旧年。

吴观礼

吴观礼,字子俊,号圭盦,仁和人。同治辛未进士,改庶吉士,授编修。有《圭盦 诗录》。

除夕感赋

征衫乍脱彩衣新,惆怅归迟别太频。五日春盘惭侍奉,一年家计感艰辛。即听爆竹 非前度,况饮屠苏少几人。风雪残冬书不达,他乡苦累倚闾亲。

西征

久郁从军志,西征气始豪。浮家湘水远,前路华山高。将帅纷旗鼓,云霄见羽毛。 至尊重推毂, 多士感同袍。旧政宵披牍, 新规昼建旄。尤思徙薪计, 大作运粮艘。幹济今无 匹,忠清古所褒。人才关事业,幕府集英髦。贱子邀青眼,经年佩锦弢。仍为后车客,同饮 上流醪。弱冠游燕赵,炎荒正驿骚。枭棋频失算,鸿泽莽哀嗷。慷慨论三户,沈沦厕六曹。 时还资战略,岂谓袭戎。易醒春明梦,回看浙海涛。艰危惊厝火,忧愤见徵牢。陟岵悲何极, 离乡首重搔。罪言并酒止,羁隐讬禅逃。偶作登楼粲,遥怜运甓陶。为牺宁未悟,吓鼠信相 遭。去病当求艾,惩邪务斥蒿。狂歌叩牛角,宝剑拭鹈膏。出处从容甚,亲朋问讯劳。真无 千里马, 岂少九方皋。吉筮从鸣鹤, 飞轮驾巨鳌。披襟逢吐哺, 雅韵续题糕。五岭氛犹炽, 残冬阵再鏖。尽教濡盾墨,曾未纳靴刀。奏凯期真速,旌庸典滥叨。早知平玁狁,会且出临 洮。老树从侵雪,秋鹰欲脱绦。迢迢沙碛净,猎猎朔风饕。岁月争梭疾,英雄付浪淘。奇勋 须习胆,余慧薄簪毫。审地追新息,持心念莫敖。何当裘带暇,更与鼓枹操。节度方移镇, 书生分属囊。驰驱情勉勉,瞻望思忉忉。回首违亲舍,冲寒泛客舠。常吟谢池草,待种武陵 桃。適楚谋诚善,还吴意尚謟。本支期衍瓞,嘉会负弹璈。裾忍牵温峤,诗应报窦滔。承欢 轻奉檄,乐道盍观濠。母曰酬知遇,儿行勿阻挠。终非为鸡肋,可许挽乌号。果惬平居愿, 奚辞万里翱。将军矧充国,窃据异隗嚣。能识犬羊性,毋矜罴虎嗥。徙戎堪实塞,兴灭效庐 漕。汉使收天马,周廷贡旅獒。请看长揖去,归橐谢葡萄。

感事

宁闻周召制鹰扬,拜将登坛重启行。兵柄谁侵天策府,元戎直拟虎贲郎。若为善驭 临淮部,可有专征赵郡王。多难岂容矜意气,累朝旧制未应忘。

东坡生日集外舅寓斋谨赋

奎宿在天光熊熊,千秋文府呼吸通。有时降精流玉虹,在宋则生苏长公。文章风骨凌华嵩,生当风寒晚节崇。真气直煦冰雪融,自能寿世包化工。当时毁誉浮云空,帝后动色知公忠。撤金莲炬宠眷隆,纵遭迁谪恩遇终。身行万里明益羾,安论磨蝎临命宫。今之坡老爰臂翁,平生梗概将毋同。陈笠屐图拜鞠躬,酒脯罗列簋有饛。恍陪觞咏黄楼东,语我旧事意态雄。凤台官阁甥馆中,诗思斗落如长洪。寿公满引流霞红,五十年来何怱怱。表忠宝墨新磨砻,西泠旧祠肃楹栊。讲堂梅雪方溟濛,主公祠宇承流风。惜疏荐菊嗟转蓬,庭前瞻拜呼儿童。夜分催诗钵打铜,南飞一鹤声玲珑。我如子立邀青瞳,小草亦倚芝兰丛。玉堂著作才未充,时艰阅历忧心忡。世间荣落胡啬丰,惟三不朽德言功。居今稽古思何穷,再拜献诗

公听聪。

与谢舍人论文

震川望溪评迁《史》,谁欤述者后有王。蜀輶归来书满箧,此本斑駮留丹黄。炎云忽堕雨点白,门外车声动霹雳。挟书剥啄寻幽人,共手一编恣探索。波澜壮阔疑忘归,秋鹰欲下盘空飞。龙门奇谲不可状,薪火孰与扬余煇。东坡气似峻坂騧,昌黎古榦无杂花。韩苏闳肆各有得,格判唐宋徒吁嗟。亦从精微造真放,江河浊浪纷淘沙。才力由来夸横绝,切理应须透冰雪。刘繁方简姚吐含,醉翁法嗣森成列。画师画马论神骏,骨肉相包始清稳。梅氏犹称具体微,余人率借空虚遁。中声要入黄锺宫,二京文艺罗西东。宅心醰粹性灵足,博厚期与《诗》《书》同。千秋义法求统宗,秘旨乃在葫芦中。行无地难且践迹,涉猎子长师扶风。

星斗南

斗南一人大星坠,内讧外寇乃驯致。帐中自呼星斗南,骑箕天上回戎骖。平生未快屠鲸手,力挟丰隆海西走。岛夷千载未祠神,遂震威灵荐圭卣。中奉历朝天可汗,惟一个臣在庑右。写金教识麟风姿,覆杯肯飨蒲萄酒。汉民掠买岁几千,惟神护持抚摩久。岂无虐死为鬼雄,会当搏噬奋功狗。吁嗟乎!男儿生不遑请缨,死将叫阍与帝争。不共戴天宁反兵,秽人何物来要盟。众仙排云孰可使,须骏马监傅介子.龟兹就戮匈奴臣,笑斩楼兰目壮士。灵旗既下犁鞬城,视我将星东北指。术赤遗封生虎狼,包藏祸心越疆理。神力驱除冰海头,铜柱拓边还万里。异姓藩开奇渥温,世扞牧圉承皇恩。声教四讫弥海垠,一洗诸派婆罗门。神兮归来配烝礿,丹青自有凌烟阁。

蜀两生行

石城山顶窥峨眉,胚胎灵秀争幽奇。岷源水入锦江碧,奔流到海无尽时。两生生长山水窟,合有清气相扶持。我知两生名,初未识两生。五色动眸子,双璧夸连城。青鸾铩羽大鹏息,黄金之台高不极。有才自与岁月深,思闬何殊在京国。但令每饭念宵衣,莫辞三载聊家食。炎曦喝人行路难,十旬羁滞犹长安。长安冠盖富豪俊,事贤友仁良所欢。乔生好客肝肠热,门限将穿眼森铁。与人娓娓不忘规,言泉喷落离堆雪。毛生广坐兀徘徊,峭如石筍撑寒梅。闭门颂酒自孤枕,梦吞溟渤杯中来。一凔一煦颇殊致,两人测交敦古谊。携手同行胡弗徐,投诗话别忧时事。九州饥馑流民多,况闻苦旱家书至。荧惑摇芒室壁间,仰视太阳丽天驷。斗车凭戴筐,骑卫信环侍。雾雾升降岂有徵,榆桂参差且循次。汝今涕泣悲路歧,我剩凄凉已无泪。望云羡汝共言归,坐令兀兀吾心醉。不敢噂沓矜谈天,为汝少损摩兜鞬。殷忧启圣眷畴昔,先帝中兴方冲年。采芑江汉鞠师旅,驺虞麟趾依亲贤。拊膺玉几迭霜露,天荒地老愁神仙。宣仁尧舜终乾乾,所嗟中外多备员。及今英劭为时出,奋发犹可追先鞭。行矣各自爱,剑气腾星躔。愿友天下士,更揽形势全。南下吴淞叫精卫,西入夔巫号杜鹃。山泽崇朝有霖雨,畎亩要在能力肩。余生早衰盼双杖,道逢工『竹烦留连。

将乞归示同志

别离在俄顷,一刻逾千金。茫茫百端集,匪独悲牙琴。白日自天上,浮云且勿侵。 神仙谅虚语,忠孝珍素心。但恐同志少,终苦力弗任。掉头已巢父,淮南秋渐深。不见空中 书,祖筵酒重斟。酒酣论古事,涕泪沾衣襟。圯上一谋面,赤松何日寻。僧寮芋初熟,未解长源簪。炊粱不就枕,息羽宁入林。岁月积薪暇,陟屺思故岑。眷言审出处,所愿加砭针。踟蹰乞片语,坐右以为箴。

绿阴

廿年陈迹杳难寻,回首人天几绿阴。自叹吾衰情顿减,宵来梦阻桂花深。

陈廷黻

陈廷黻,字已云,号渔笙,鄞县人。同治辛未进士,改庶吉士,授编修。有《镇亭山房诗集》。

次韵毛溪芷别后见赠

相逢且漫讯频频,多恐容颜审未真。乱后余生犹剩我,尊前朋辈更何人。传家尚有 青毡在,历劫惟添白发新。对坐残镫无一语,不堪泪落已盈巾。

李问樵明府招同陶子方前辈孔培生太守暨杨心裁姚仲容两大令饮城南曹氏园

飞盖出重闉, 咫尺城南园。丹甍隐林薄, 高馆抗层峦。藤架环曲栌, 槿篱缭疏垣。 开芳异金谷, 野花何烂漫。蹑梯缘石磴, 旷焉俯平原。浮云敛野色, 天地为之宽。置身百尺上, 凭风修羽翰。

明府敬爱客,选胜开琼筵。酾酒漉桑落,盘列河鱼鲜。朱华夹绮席,绿茵铺茸毡。 爱此园林景,长日堪流连。座客尽时彦,才藻纷联翩。陶侃勤运甓,尤称当世贤。

边城五六月,炎威殊未逼。微雨从东来,云气黑如墨。皋兰与五泉,对面失山色。吾与二三子,游宦共一域。于君虽新知,乃如旧相识。今日良宴会,欢乐讵有极。安知转瞬间,分辙不南北。杲杲方出日,其雨自难测。聚处即有常,百年亦顷刻。相期千载后,乃时各努力。

钱清道中

向晚山阴道,扁舟一棹横。归云栖树在,明月逐波生。何以景芳躅,因之寄远情。 瀰瀰江上水,千载有余清。

爱伯赠诗有国事艰难正乏才句重感其意叠韵志愧

鲇鱼依旧上竿来,谁许沧溟跋浪开。已判沈沙埋折戟,那能余沥乞分杯。楚囚空洒 新亭泪,栎社终非大厦才。径欲拂衣从贺老,鉴湖一碧净无埃。

次韵和云门同介唐酒后过敦夫寓斋

兰苕翡翠斗新鲜,酒后新诗写满笺。竹屋一镫人扰扰,梅窗半月夜娟娟。我曹狂饮 能千古,此夕清谈足百年。莫被市人知此态,买丝恐作画图传。

陈宝

陈宝,字百生,东台人。同治辛未进士,改庶吉士,授检讨。有《陈百生遗集》。

军行杂咏

蒐材于覆军,得士岂能勇。纷纷下第人,辇下聚秋蠓。长安非我家,道路正汹汹。 对酒思貂裘,将车愁铁笼。开门一客至,下马千言涌。要我孱夫笔,佐彼军事冗。我方嗒焉 丧,闻言三曲踊。走告王与钱。壮语相怂恿。亦有尼行者,嗫嗫儿女恐。人生取快意,失蜀 匪望陇。儒冠裹人头,终古茧居蛹。卷书市鞍辔,僮仆日夜董。偕行有三子,通名交揖拱。 同是毷氉身,相看一笑唪。

中州一公子,言事忤当轴。京朝久闲冗,阅世屡蒿目。一朝动感慨,屏人书奏牍。 上言垒在郊,主忧臣乃辱。中言贼未殄,先臣死犹哭。下言诸将帅,往往旧部曲。愿借一尺 棰,联之若轳辘。庶几挽天河,救燎增一掬。用酬累世恩,亦为先臣告。温诏下中枢,祖筵 集华毂。急装辞国门,如笴斯赴鹄。王臣则匪躬,父书岂徒读。

西捻从西来,陕西及山西。长驱不留行,躏我燕赵齐。析津国南门,到此迥妖旗。 句河而股海,运河实弦之。区中卅余邑,马足纵横驰。千里断邮报,击柝闻王畿。宫中三圣 人,日旰忧烝黎。禁旅屯近郊,火器升城陴。五城兴团防,列肆谨所讥。三方既命将,十道 犹徵师。防剿各有职,廓清常指期。庙谟岂操切,威克今所宜。亟当洗赤县,然后靖四陲。

日落车班班,言至赵北口。连延十二桥,一线穿臣薮。滹沱众流汇,畿南北枢纽。 关门得虎豹,可以一夫守。我闻南方兵,臂金缠到肘。旗兵一何贫,悬鹑结衣绺。荷戈有菜 色,翻缘酣豢久。战阵固未经,岂足威戎丑。居重以驭轻,此语慎非偶。濛濛帆入烟,戢戢 鱼在笱。使者自断饮,为客设村酒。我欲讯形势,浦上进渔叟。

饮马涉河水,水深当马膝。土团练未坚,周垣筑甫毕。千里列防戍,岂能寸寸密。 以我晨星稀,当彼飘风疾。捣虚猝莫御,走险逝何及。此贼固天亡,翱翔未思出。养{疗雍} 虑终决,执尾忧骤失。握奇有竞絿,沈思耿中夕。

闻昔咸丰初,有贼林凤祥。名王仗天戈,捣之于高唐。尔后十余载,未见兵尘扬。 去年任与赖,隔此河之阳。兹土非上腴,颇亦能耕桑。枣实大如卵,秫杆高于墙。朝墟趁烟 火,夕野牧牛羊。贼至鹰集抄,兵来鸟鸢翔。兵贼互传舍,游散生虫蝗。妇稚岂可问,鸡犬 尽已殃。流人哭暑雨,尸官道旁。皆缘屯堡废,缓急难逃藏。坚壁与清野,先病谁储方。所 以将帅武,不若司牧良。

刚铁截作筒,柔铅煮成豆。阴火孕蛇腹,神机啄鸟咮。争长轶弓弩,命中洞介胄。兹器识利用,夷舶重金购。初止一夫敌,把玩秘怀袖。近日堂堂师,每配千万副。他兵一时废,步伐亦夷授。鬼方初猾夏,肇衅在卮漏。神州比多故,乘时逞践蹂。上赖九庙灵,西獒不复嗾。蚩尤至今日,制器亦云富。戎心未可启,慎勿示之陋。

得官须得印,握刀须握柄。鞭好马亦骄,箭长弓始劲。面谀多背憎,貌让乃心竞。 小水噀不得,逆风呼岂应。六辔在人手,安能工纵磬。

系马在深闼, 剖箱为之槽。追鸡忽踏瓦, 击豕先趋牢。瓶盎尽翻倒, 窗棂便摧烧。比舍破斧声, 誓不遗秋毫。醉饱发高唱,裸卧纷爬搔。一妇牵出窖,争先起群嚣。老冤方惴惴,执爨供刍茭。齐俗固强悍,吞恨乌能消。每值毕骑过,或伺中途要。驱来授畚锸,临穴无一逃。所报或匪仇,玉石躯命淆。仇杀迭相寻,将怒兵能挑。昨日长平坑,今日阿房焦。

流潦不可止,师进石桥。万马行淖中,疲蹄不能骄。我身豕负涂,聊作强虫跳。雨过日在顶,蕴隆蒸发毛。下马不夕食,坐甲犹终宵。昨者捷书至,军声为之高。封羊岂不易,预在扃其牢。群帅利所获,纷纷探巢。莫肯分偏师,留俟半涉要。坐令出柙者,假息犹炰烋。书生亦咄咄,健剑须横腰。

雷锺德

雷锺德,字仲宣,安康人。同治辛未进士,改庶吉士,授编修,历官成都知府,四 川候补道。有《晚香堂诗存》。

九日陶然亭宴集

帝城风物渐凋摧,佳节登临此举杯。日月久淹京国梦,亭台还共酒人来。海门潮落 津云白,碣石霜寒塞雁哀。一眺五云最高处,郁葱佳气满蓬莱。

吴柳堂侍御挽诗

痛哭先皇帝,恩容折槛臣。余生抱肝胆,趋死犯沙尘。黄鸟哀无极,苍龙意可亲。 精魂不归去,夜夜鼎湖滨。

弓剑虚遗器,讴歌自野人。今皇伦谊重,微悃血书新。铁券留千古,山陵泣百神。 苍凉遗疏在,寝树不胜春。

改官出都留别馆阁旧交

万怀郁勃纸难宣,去国心情更惘然。凤阁文章原小谪,龙楼日月正高悬。时清漫发 平边策,诗健能吟出塞篇。九万里程今此始,平生谁信少游贤。

欧苏作吏风尘久,都是玉堂挥翰家。官职岂能轩轾士,人生无定溷茵花。岸巾气满 安西座,揽辔风生孟博车。珍重明时强餐饭,同袍才俊各天涯。

成都杂诗

英雄跃马终何事,帝子风流久寂寥。岂有江山容草窃,可怜歌舞总烟消。天边杜宇啼残血。江上芙蓉咽暮潮。终古西南形胜在,惠陵松桧自萧萧。

森森翠柏锦官春,丞相英灵亘古新。名士风云关气数,乱时鱼水几君臣。星沈大野 天何意,潮转空江石有神。独对斜阳吊先哲,西风吹泪满衣尘。

初至涪州

江涨夜多雨,秋深天尚温。峡猿吟到晓,沙鸟语当门。巫鼓迎神曲,村歌劝世言。 蛮方盛鬼魅,日日只招魂。

登楼

倚剑崆峒梦已沈,高秋风物试登临。东流浩浩西江水,南雁年年北客心。微雨鸟归 萧寺宿,落帆猿傍楚船吟。风云满眼知何兆,独倚栏干看夕林。

忆旧

长安门外散直归,柳花如雪春乱飞。联镳接骑酒家楼,五侯鲭膳郎官杯。宫中翻出 霓裳谱,紫玉红牙妙歌舞。酒阑曲罢不归去,莫愁门巷正春雨。

夜半大雪呼鞍马,臂弓腰箭阴山下。射得双雕落马头,平明归衙鼓犹打。边城九月沙草黄,大斝行酒炙黄羊。一声哀笛山石裂,唤取羌儿唱《伊》《凉》。

罗大佑

罗大佑,字縠臣,江西德化人。同治辛未进士,历官台湾知府。有《粟园诗钞》。

月夜溪桥散步

皎月自东升,光照千山昼。长桥蹑飞空,倒影泻奔溜。寒潭净泥沙,岩崩石骨瘦。 波痕浸虚白,表里尽通透。幽人一散步,惜此光明候。万籁浩无声,木末严风逗。数舟依浅 濑,明灭镫如豆。欲去闻清讴,余响入遥岫。

夜静群动收,百物同一息。逝者如斯夫,奔流无停刻。如彼明月光,西没复东出。昭昭河汉间,不碍蟾蜍蚀。一元运终始,伟哉造物力。水亦长无尽,月亦永无极。流观宇宙内,妙理寻可得。仰首视高天,万古青苍色。

舟泛彭蠡

叠浪浮终古,中流混太清。地吞章贡阔,天入楚吴平。薄宦常为客,孤槎又远征。 匡君招手语,去住总关情。

登楼赠畿臣

山城木落乱蝉秋, 剑水嵯峨拥石流。远道凉风催寒雁, 极天诗兴落沙鸥。一官浮世

笑五斗, 与子提壶销百忧。聊话廿年刀剑事, 暮云吹角向夔州。

春情

柳条漾碧草毵毵,蝶妥莺捎花气酣。斜立熏笼温睡鸭,绮窗无语梦江南。

晓风紫陌嫩晴天,杏子衫轻乍换绵。似向石家楼畔醉,绿珠花底试秋千。

读山谷集

高岩插天石笼{^{**}丛},飞瀑薄石孤根动。金眸苍鹰立突兀,摩空瞥击毛禽恐。双井水煮云腴茶,肝肺竹木森桠杈。取琴再弹亢以节,顿洗人世千筝琶。

汪昌

汪昌,字咏之,吴县人。同治辛未进士,官德清知县。有《退思居集》。

拟结客少年场

轻裘披鹔鹴,宝剑佩干将。徵逐长安道,酣饮集壶觞。侑歌金谷伎,较猎羽林郎。 相期在意气,一诰千金黄。不知有朱郭,遑论金与张。日月曾几何,朱颜变老苍。悉数平生 友,各在天一方。悔不早努力,老大徒悲伤。

边瀹慈

边瀹慈、字云航、任丘人。同治辛未进士、官宝丰知县。有《霁虹楼集》。

感事

飘泊无归计,羁孤有世官。贫缘求仕早,卑觉立身难。泽尚绵三世,才谁授两餐。 荣衰如转毂,岂独晋原栾。

车服成虚器,当阳落太阿。贵非王者驭,官比盛时多。易捧毛生檄,何劳甯戚歌。 但愁铭隧日,书绩奈卿何。

糟粕空方策,屠沽有壮图。白头仍诵读,赤手已公孤。说剑神俱王,当歌气益粗。 果能开绝漠,汉将起人奴。

各上下

飞鸟翔,一下复一上.平生栖宿同一枝,咫尺遭逢判霄壤。青天白日抢枋榆,稻粱易得身不孤。嘤嘤求友鸣相呼,卑枝刷羽低将雏。仰视云端去如箭,毛羽初丰未能健。六翮 抟风掩毕罗,长空一落何由见。天阙沈沈暗不开,梯云何处望蓬莱。神龙堕地不如蚓,何似泥中睡得稳。

严玉森

严玉森,字鹿溪,一字六希,号虚阁,仪徵人。同治癸酉举人,官户部主事。有《虚阁遗稿》。

客话太白武功之胜因怀康对山修撰

忽急友难游瑾门,琵琶不以迁高官。死余大小鼓三百,绝世风流天地存。今日游公乡,昔日登公山。扬州艳说修撰好,要知公之气谊山河尊。华山不为高,黄河不为深,公乎奇节超昆仑。文章丝竹偶然耳,后生小子之论何纷纷。丈夫不作王右丞,清流第一申屠蟠。三秦豪杰谁景略,但见泾渭水合流浑浑。潼关望中条,司空诗境愁云屯。坐客谈武功,太白之雪绵秋春。清泉白石忘寒温,商雒深山多隐沦。蟪蛄朝菌忽忽甚,怪柏寒松爱避人。

由衡岳南台寺历玉版桥至半云庵后山谒庭柏禅师墓还至田家醉书

入山复十里,积翠交万重。曾经太华险,履此能从容。霞外鹄影微,霁初雪意慵。 薄薄田舍酒,疏疏远寺钟。泉汲思中泠,樵衲来上封。乡梦莼一丝,春锦花千峰。万类共悲喜,孤筠观淡浓。兹游任醒醉,箕颍怀前踪。

可园独游梅花盛开

文襄文诚去已远,嵩云衡云来作花。疏篱密护断人迹,铁骨横空群鸟嗟。当年觞咏 倏泡影,天山剑戟今桑麻。此花阅世将二纪,冷极无言听晚鸦。衡山雪薄梅亦少,泉根几树 微烟遮。炎荒孤赏抱冰雪,乾坤一气春萌芽。可园人散尔清寂,空廓不断新云霞。夜深脉脉 来鹤语,门外时时喧马挝。湘上何人吟水涯,黄河西北无悲笳。绕花千转伤心极,白发青门 长种瓜。

陈允颐

陈允颐,字养源,武进人。同治癸酉举人,历官浙江杭嘉湖道。有《兰墅诗存》。

锡兰古寺作

谈何容易到西天,入手欣繙贝叶篇。龙汉劫余开世界,鸿泥印遍悟因缘。青鸾一去 无消息,白马重来有岁年。尘海茫茫情海竭,回头我亦欲逃禅。

东游

言旋欧土甫经年,忽漫浮槎到日边。濯足沧溟惊海若,纵眸寰宇渺齐烟。秋津浩荡 疑无地,富岳恢奇别有天。南望中山北平壤,我思王会一怦然。

鸥梦楼即席敬步节使原韵

夕照衔山月上天,烟波极目思悠然。士从魏晋多于鲫,诗到齐梁噪等蝉。澄景漾成千尺练,秋声进入四条弦。不知何似南楼宴,其事其人要可传。

彭祖润

彭祖润,字岱霖,长洲人。同治癸酉举人,历官浙江候补道。有《玉屏山馆诗草》。

蜃楼歌

东海微明日将出,水天渺渺昏晓割。轻舟机轴镜中行,疾如飞鸟来空阔。瞥见长城雉堞堆,千门万户洞然开。六街扰扰隔烟雾,人影憧憧往复来。楼阁玲珑半隐现,分明阊阖开宫殿。云母明窗扇扇排,卷帘红袖窥真面。觚棱铁马迎风鸣,仿佛漏声催晓箭。无何华屋变长林,万幹千株罨绿阴。柳浪欲迷幺凤采,松涛还泻老龙吟。忽然变幻成岩壑,瑰奇宛似五丁凿。森森石筍撑青冥,朵朵芙蓉悬碧落。迷离恍怳心忡忡,人间世变将无同。大千形质终消灭,惟有滔滔流不穷。

庚辰六月入都重过旧第有感

萍踪飘泊几经春,老屋重过倍怆神。自种梅花已如客,惯来燕子尚窥人。红尘依旧 嘶马,绿野苍凉卧石麟。二十余年歌哭地,不堪回首话前因。

周炳蔚

周炳蔚,字升华,号虎如,灵川人。同治癸酉举人,历官直隶补用道。有《川明书屋诗钞》。

临肃五弟以雨后江亭远眺诗见示即次元韵

快磨浓墨写时晴,飞到鸾笺老眼明。廷尉山头新《世说》,史官柱下旧家声。北窗 我愿师陶令,前席人当问贾生。闻道乡评高月旦,难容葛亮久躬耕。

孟继埙

孟继埙,字志青,天津人。同治癸酉举人,由内阁中书历官湖北盐法道。有《绿庄 严馆诗存》。

石阡杂兴

几树修梧荫碧天,时閒一到讼庭前。报衙吏少民无事,喜雨人多岁有年。橘柚送香 花作瘴,棕榈如扇叶摇烟。小山直上平于砥,助我登临听响泉。

满城桃李万千枝,如此风光可入诗。卷耳遍生新雨后,画眉偏叫落花时。兰芽空谷 无人问,莎草横塘有梦知。更喜园林消夏处,一枝香玉放山栀。

唐赞衮

唐赞衮,字韡之,善化人。同治癸酉举人,历官台南知府。有《鄂不斋集》。

蝶梦园

门迎魁斗美人乡, 寂寞园亭冷夕阳。一枕陶然谁唤觉, 蘧蘧为蝶忽为庄。

残碑鬼物尚捴呵,中有高人隐薜萝。 化蝶寻秋香入梦,感时花溅泪痕多。

何延庆

何延庆、字善伯、江宁人。同治癸酉举人、历官知府。有《寄沤诗文集》

夜静

夜静疏星落,山深冷雨悬。浮云如客倦,寒月逼人眠。性命怜知己,功名负少年。 那堪成老大,终岁警烽烟。

松江老兵行

松江老兵八十四,为我追述纯皇事。纯皇当日真圣神,十全武功古无二。是时老兵年二十,军中转战称无敌。功成不居归江南,马槊由来推第一。归来自幸身犹在,同我太平六十载。已见年来武备荒,难将曩日雄心改。一朝妖焰扰云间,老兵谈笑麾金鞭。如此逆贼真鼠辈,誓与此贼不共天。百战不输一战负,老兵向前众兵后。末路英雄不自由,无端罚作城门守。上海城门当冲要,微秩居然尚游徼。执梃门前大声呼,是何意态亦可笑。自怜少小本豪英,老去凄凉百感生。畴昔弯弧夸伟略,今来击柝博微名。老兵言罢吞声泣,予亦停车为悒悒。老兵老兵尔勿悲,我有一言君听之。君不见战国侯嬴能酬知,晚监夷门人所思。又不见西汉梅福辞北阙,为吴门卒犹尽职。古来贤豪不得志,往往萧条屈下位。君生不作李西平,犹幸身作灞桥尉。峨峨城门冠盖多,贾胡碧眼无讥呵。穷途有客归不得,盱衡厉色君则那。归鸦点点斜阳暮,老兵无语入城去。秋色萧疏古道寒,一鞭直指松江路。

舟行偶成

古人入邻疆,其识在觇国。新墙卑故墙,谓其民力竭。我昨至芜湖,高楼半天矗。市廛何繁富,所陈皆异物。转舟至宁太,曲折凡三日。瓦屋无一椽,鹑衣多百结。嗟我耕作俦,略似沟中瘠。升平三十年,无旱乾水溢。元气应早苏,民穷胡此极。此故人知之,未语先叹息。土货百不行,利尽他人得。鸦片遍闾阎,其害为尤剧。万方胥一概,偏隅更何说。其荣在毛发,其瘁在筋骨。即有仓扁来,望之神先夺。借问医国手,何以挽斯劫。作歌谂有位,采风慎勿辍。

叶大庄

叶大庄,字临恭,号损轩,闽县人。同治癸酉举人,历官邳州知州。有《写经斋初

稿》、《续稿》。

石壁客店

众峡东回溪,风湍互跳旋。崭崭斗绝壁,绿削缺瓜面。单椒耸千寻,秋色丽丹绚。 磵底伏潜流,琮琤声一片。羊肠在其上,窅窱祇如线。客店悬崖孤,居停信云善。竹镫酌新 篘,擩染到诗砚。昨雨今初晴,舟行路尤便。下滩不用篙,上滩不用纤。十里方广岩,廿里 永福县。

严滩舟中

桐君留客三日雨,我爱晚晴更韶妩。红霞翠霭光有无,一峰缺处一峰补。林回路转两崖高,下有白石细可数。有时峰峰竦对峙,白者是云碧是树。下滩舟语上滩舟,今夜鸬鹚源里住。兰溪女儿船为家,越州美酒杭州花。行行且止泷七里,一月渠侬在泷里,兰溪女儿惯如此。

芸敏同居法源寺累月初夏余先出都作此为别

四月南风雨新霁,麦花初飞柳条曳。短衣匹马走关河,回首觚棱在天际。故人落落金闺彦,横槊论才雄一世。手校华林《七录》书,石渠轮笔先承制。国家右文迈前古,汉学经生持绝诣,旷代承明著作家,卢钱王纪今谁继。佛楼镫光暗高树,日日绳床坐谈艺。诗派商量摘句图,碑林校证题名例。明知春尽将首涂,强为藤花三日憩。吾穷去矣固其所,断翮湖天叫凄戾。君胡亦复厌长安,金爵月明怆分袂。无田栖栖安得归,不饮兀兀甚于涕。帛槌茶磨清江居,自醵社钱作春祭。早晚题诗寄水庄,仪禺绝忆我家弟。潦倒残吟冷醉身,寥天海气吹妖蜧。

叔伊寓高昌庙过访贻诗叠韵

县厅决事返便睡,鱼菜何以娱嘉宾。淋浪密雨响窗格,寒禽叫水湖亭漘。冲泥巷南越巷北,谈碑校艺今无伦。枇杷初黄芍药老,香车大道驰辚輑。名姬论钱值千万,贫嫁厮养寻常人。东风卷地不动尘,华镫顾曲樱桃唇。马蹄不到人迹少,君家独树柴门春。诸郎读书墨满案,瘦句喜作无病呻。手搜女真蒙古事,字仿刘懿兼刁遵。繄予忍饥困州邑,乌帽雪鬓常参晨。行将投劾去晞发,衣囊渔具荒江滨。外集论诗记甲子,内景受道持庚申。漫承桂段曲为比,一脉家法真龂龂。洨■令长定何职,中天万古双嶙峋。

崔家庄

任是倪黄意境殊,林枯篠秃画来无。岳光含雪迎班马,河响捎风叫老乌。人近圣居 孤学抱,天闚鲁望众灵趋。云端咫尺登封镜,刺促行程但首涂。

秋尽从文山归过开化禅院

苇白吹花上竹林,霜澂湖水夜寒深。乱山遥看孤帆去,野寺间携短策寻。农歉稻香伤夏潦,僧愆茶话赏秋阴。不烦俯仰论陈迹,繄记风光恰在心。

弢庵再约游听水斋六月十八日往憩半山亭作

书至先将出峡闻,僧云到寺夜初分。栖迟佛地缘何密,版筑山斋绩太勤。坚坐愿听 无尽雨,孤行似逐不归云。盘陀祇合吾侪据,牵率谁期竟及居。

水退弢庵拏舟往视

传呼有客泛轻航,熟眼村翁识侍郎。一涨望衡知共视,两家插架喜无妨。雨来不已 吟坡老,水大如斯过子桑。却与山中添故实,吾庐受冻属寻常。

春雨闲居招俶玉

满山寒雨杜门居,睡到无聊起校书。人日草堂题句后,玉壶茅屋买春初。李花绽白梅相似,菜甲含黄柳不如。出郭风光君爱否,总期发兴赁篮舆。

阳羡道中

路入渔洋诗句中,铜官射鸭竹枝弓。落镫门巷家家雨,补被江程夜夜风。似雪溪光成罨画,方春花信在空濛。忍寒来访灵雏拍,满意填词作寓公。

桐江舟中漫成寄兰溪补堂明府

水远山平去路长,梦残拥被晓天凉。平生听遍江南橹,第一关心是富阳。

李超琼

李超琼,字紫璈,一字惕夫,合江人。同治癸酉举人,官长洲知县。有《石船居古今体诗剩稿》。

巫山县

小县千峰底,重闉百仞颠。连桥岩作路,入笕雪成泉。暮霭从江上,春镫共斗悬。 不闻神女珮,新月正娟娟。

元夕舟抵宜昌

至喜亭边水势平,江山开展落颿轻。灵旗暮雨湘累庙,火树银花步阐城。客梦祇循 鱼腹上,滩声还为虎牙惊。楚天寥落乡音少,愁对元宵大月明。

昨闻

昨闻瓠子动悲歌,楗行淇园正塞河。大泽鱼龙争北徙,中原鸿雁渐南过。通渠六辅 儿宽少,平世三公蔡廓多。千万金钱休太息,卅年填海更如何。 正月二十日由枫桥至五江众泾用东坡是日女王城诗韵

朝来轻棹过齐门,踏遍湖东水上村。春酿余寒风有力,雪经微雨地无痕。声此日千家肃,蔀屋何时五袴温。野岸梅花如旧约,停桡香便引诗魂。

秋怀用东坡韵

秋风有寒意,所忧在农时。苦雨日以至,吴棉摧可悲。藤轩积阴黯,湿晕生书帷。 老榦若梯磴,静夜腾鼪狸。可怜双鹊来,不敢栖虬枝。腐草知多少,为萤争飞追。微明亟自 炫,遑计霜雪期。霜雪岂有择,无为长嗟咨。木叶倏已脱,松柏彫总迟。

昨宵声喧豗,卷地走飞雨。凄切傍枕鸣,亦有孤蛩语。似诉穷黎心,今夕愁败堵。 茅屋破且颓,遑论滴漏苦。不识滨湖田,谁能捍禾黍。三吴亟水利,宣泄汇黄浦。胡为三日 霖,遂使忧百亩。蛩兮尔毋然,会见晴光吐。

病余

病余未损是诗心,镜里添多白发侵。香绕碧帘盘古篆,树留绿叶护秋阴。年华如水 消沈易,时事关怀感慨深。闻道东征军大溃,惊呼三叹自愁吟。

寓言一首谳狱丹徒感事而作

治民不恃法,宽猛施贵当。爱民不在迹,煦妪祸转酿。蚩愚亦何知,意溢情易放。可亲不可亵,实惠恒相忘。昔闻西邻叟,容容具雅量。出见同巷儿,果饵必分饟。一朝馈未周,面诟来无妄。又闻东邻媪,爱子情盎盎。方深舐犊怀,已见食枭状。优容既养奸,滥予亦丛谤。昨来案爰书,眦裂难曲谅。静思蠢尔徒,谁使恣凶抗。百钱害所基,骈首良悲怆。所以郑大夫,火烈称良相。寓言即自箴,小惠安足尚。

张清瀚

张清瀚,字文澜,平湖人。同治癸酉举人,官分宜知县。有《传经精舍诗钞》。

和徐花农太史迎秋诗韵

西浙才名久冠时,趋朝待漏隔花迟。庭梧一叶凉先递,窗竹千竿暑未知。生面特开摩诘笔,秋心合赋少陵诗。长天领略清华景,犹记吴山折桂枝。

莫炳湘

莫炳湘,字觐廷,湘阴人。同治癸酉举人,官如皋知县。有《莫大令遗稿》。

新秋游冶山竹居晚归

携得新茶竹里煎,晚归踏破小桥烟。一镫红出虫声外,万木黄从雁影边。月落渐昏 邻院树,钟残犹到隔江船。悬知坐待痴儿女,欲遣僮迎正未眠。

刘大受

刘大受, 字绍庭, 侯官人。同治癸酉举人, 江西候补知县。

登古吹台

旅居复如何,朔气忽已至。悠悠出门去,杖策随所憩。闉都掠眼过,平野迥舒辔。惊蓬多风沙,杂树失青翠。我来正长夏,单衣犹在笥。今兹还几时,践此霜雪地。岁月去浩荡,身世惄如醉。离忧能伤人,徜徉聊自恣。

抠衣蹑层台,游心肆远瞩。阡陌递回亘,川原洞相属。旷野黄尘飞,白日淡无旭。 闭关伏空案,生事常碌碌。凭高一瞻眺,始觉羁意足。寒云何层层,中有南飞鹄。安得附书 去,道我心中曲。顾影忽不见,观望空踯躅。

嚄唶吟

北方苦旱南苦雨,天倾地缺谁能补。幽州五月尘塞空,麦苗一寸不出土。谁知南中夏潦发,鼋鼍登堂鱼窥宇。四十年来又见之,熊兵桥东水丈五。入春以来常苦霖,十日不得两日晴。吴棉著身夏不脱,高堂习习清风生。连城鲑菜已无种,况乃泛滥妨深耕。中宵忽报双江溢,顷刻巨浪排山立。惊沙大石随潮至,万户千村卷蓬疾。乱流作势向城来,七城黯黯昼不开。疾雷一声破空下,三条九剧声号哀。垣墉杂遝任摧倒,白骨死葬洪涛堆。我家城西当水头,水高过人人上楼。大墙如山向我倾,危楼黠戛亦有声。老人呼天稚子哭,顷刻性命成漂腾。城墙结筏冲波出,此身但存他何恤。烈风三日水归壑,沈沈万灶炊烟息。回家瓮盎百不完,老屋半欹犹未坼。我时游梁方病暑,石铫调汤手自煮。仆夫言有尺书来,开缄手颤不得语。安全百口自天幸,萧条四壁奈何许。一身俯仰宇宙窄,高堂阔绝关山阻。人生百年无事无,忧患相煎何太苦。

后嚄唶吟

生不必荆吴九州陌,华驺横路交霜戟。亦不必河阳十里园,珠帘锦障围春暄。胡为 3 希膏棘轴走四海,乃不抗首归柴门。浮云万变渺难执,但见日月催晨昏。故乡亦未归,旧 事不可论。忆我未坠地,大父已作吏。作吏三十年,还家旧物惟青毡。吁嗟先君我未面,北 堂有母传遗编。寒宵篝火课我读,有时泪下如迸泉。大父归来时,我年已长成。我母望我长,我长乃复远徂征。栖迟两射金门策,飘零更作梁园客。梁园日晚西风急,沙尘蹴天窗牖黑。九衢车马去如织,觌面相逢不相识。黄河之水滚滚东南流,客子有家归不得。中夜孤吟起太息,家贫洁养干微禄。何曾盗得太仓五斗粟,半管毛锥残欲秃。忽忽走路歧,恻恻身上衣。重闱念我心伤悲,目断直北征鸿飞。腐儒刺促天所嗤,明年更索长安米。呜呼!苍天何不且使朔饱侏儒饥。

杨郎山夜泊即事

云阵欲东下,急风争向南。精灵战雷电,鲛鳄拔秋潭。断港群舟拜,中流大浪酣。 艰虞更留滞,水宿况真谙。

江行杂作

深冬未遣放严霜,阳月江行似瘴乡。雨接日光云断续,秋留树色叶青黄。烟容醉眼翻宜睡,昼景闲吟转觉长。舟子落帆祀神福,还呼僮仆泛杯觞。

遣闷

肯劳七尺易浮名,聊借遗文遣此生。大地云烟随百变,闲居岁月自多情。评论史案 萧何律,推廓词场黄帝兵。长日消磨真不恶,悲秋奚事叹无成。

步小西湖有怀黄丈石城欣园曾子幼荃家兄旭初

旧游成梦杳难追,独自闲吟独自回。十里湖隄霜信老,墙头肥透隔年梅。

郭福衡

郭福衡,字友松,娄县人。同治癸酉举人。

氵殿山烈女亭银杏树歌

槎桠老树高参天,行人道左足不前。八角荒亭映斜日,四山列障团寒烟。啼鸟声声语何苦,生年偏值单门户。蓦地风波欲断魂,要将一死传千古。姓氏邻家戒莫谈,灵风拂拂余香龛。祇剩秋来几株树,纷纷黄叶盈茅庵。山亭突兀半椽倒,剔苏扪碑字完好。冢畔原生连理枝,墙阴莫问西邻枣。女有灵时树不枯,女所瘗处山不孤。踪迹流芳鲜绰楔,表扬实事传江湖。树本生苔篱插槿,似同处士含孤愤。佳果真羞产白衣,新装奚必调红粉。朅来山麓作清游,十景流传一一搜。默对灵脩诉刚直,朔风狂欲号松楸。此树生成忘岁月,余杯酹罢拂衣出。闻道青溪有小姑,云车风马无相失。

吴绣虎

吴绣虎,字颖士,嘉善人。同治癸酉举人。有《辕下吟》。

冷泉亭

危峰势欲压,凛乎不可升。峭然一石壁,独立当崚嶒。众绿静于水,空亭客语应。 立久我欲去,打包来一僧。

秦树敏

秦树敏,字秋伊,号娱园,会稽人。同治癸酉举人。有《娱园诗稿》。

柳姑祠

春风祠树噪灵鸦,渺渺仙云护钿车。三月明湖波泻黛,六朝残梦柳飞花。青山门外 闻湘瑟,黄竹江干唱越娃。最是粉榆箫鼓里,夕阳烟水泊渔槎。

【卷一百六十六】

乔树柟

乔树柟,字茂萱,一字损蕃,华阳人。同治癸酉拔贡,历官学部左承。

十月朔雨雪

十月朔雨雪,或者疑非时。橐驼马肿背,我自妄听之。宵来复盈尺,丰岁真可期。哀彼无褐家,喜极翻成痴。小民亦不痴,往事心自知。宁受一冬寒,不受一年饥。往者春夏交,旱极夷生滋。新秋大雨水,畎亩沦汙池。区区望岁心,忍作祁寒咨。愿随田舍翁,共谢皇天慈。故人武子卿,示我山中诗。木瓜报琼瑶,我亦无愧词。希文做秀才,忧乐无所私。为我谢苍生,创钜其愈迟。

宁受一冬寒,不受一年饥。踏雪出门去,朗诵山中诗。闻者窃太息,问我将谁欺。 饥亦不易忍,寒亦不易支。相彼高明家,重楼深翠帷。貂裘饮醇酒,旁有太尉姬。朔风天半来,到此忽倒吹。吁嗟我农夫,冒冷畊畲菑。足赤雪没胫,衣单寒沁脾。妇人十指僵,犹作 无米炊。临流濯野蔌,两手濡沙泥。负贩入城市,寒冰犹在衣。天寒分所受,米贵良异宜。 钱百不满升,饔飧安取资。我闻仰天叹,愧极真无词。敬谢田间人,艰难天自知。輶轩或采 择,为尔平疮痍。

赠吴铁樵

十年席帽走神京,覆额佳儿已长成。闻道苦心知孝爱,更能深识济艰贞。而翁胸有 愁千斛,课子家余书百城。终见神驹起山泽,渥洼雷雨一纵横。

纪梦二首哭吴季清

昨夜梦故人,对案相与坐。右为西安君,曾笃在其左。共话西安事,哭罢俯首卧。 嗟我神明衰,梦境亦昏惰。明明西安君,浓须色不挫。却谓是他人,扼腕叹奇祸。无乃示佛 谛,曰此非真我。水火及刀锯,皆似空中过。我老心学荒,祇有泪雨堕。何当语潍县,谓是 何因果。

因果谁复识,思君涕重流。堂上有老母,西南驶归舟。儿孙各幼小,劫后嗟遗留。 颇闻山中妻,孝爱良独周。我时在官寺,俯仰煎沈忧。事后百余日,凶问始见投。我亦历九 死,六驭方悠悠。黾勉循旧职,含泪推疲囚。默念平生友,存者各九州。斋居勘真契,只坐 不自修。却忆十载前,欢会宁易谋。终须挂冠去,长与无何游。

武昌舟次次均答赠顾所持

顾郎年少吾能说,今日江头送我还。手版教人怜姓字,心期知汝在湖山。旌忠绵竹 谁公论,感旧西安有悴颜。日暮兰成漫相拟,本无词赋动江关。

丁未二月十三日舟过镇江金焦在眼不得登览

东坡居士行歌处,苦对山僧忆故乡。今我南来阙登眺,飚船独立心茫茫。巫山巫峡 凌青苍,呼召六丁排帝阊。谁怜衰翁一念力,要与巴国开羊肠。

纪钜维

纪钜维,字香,一字伯驹,号悔轩,晚号泊居,献县人。同治癸酉拔贡,官内阁中书。有《泊居剩稿》。

夏日雨后集苕华室观同人所藏书画

那计痴儿笑老颠,尽寻乐事傲顽仙。云烟过眼能娱我,晴雨何心莫问天。画里溪山 疑隔世,镜中勋业惜流年。壮夫正有屠鲸技,如此消磨亦可怜。

梁节庵招集吴公祠登高用朱文公天湖寺诗韵

望秋蒲柳早衰时,旅食江关久未归。假日登临舒倦眼,寥天风物尚清晖。也知钝士难供世,争信缁尘解涴衣。欲抚朱弦还敛手,遗音谁与辨希微。

饲鹤

朱顶元晴旧缟衣,芝田有梦未能归。区区莫羡潭皋粟,上相从来不要肥。

鸡鹜群争尽日忙,一声清唳晚风长。怪渠本具凌霄翮,苦傍人家觅稻粱。

西郊

鸡头菱蔓满溪湾,渺渺渔村白水环。隄下行人隄上柳,夕阳驴背看秋山。

方燕昭

方燕昭,字伯融,安徽定远人。同治癸酉拔贡,官江苏候补道。有《十万琳琅阁诗 存》。

重九日登高用少陵九日韵

苍茫四顾皆陈迹,落日同游戏马台。寒雨满城连夕霁,黄花三径一时开。乾坤秋色 留清赏,颜谢风流不再来。烂醉高歌容我辈,夕阳天际莫相催。

邵伯道中

一声欸乃客惊眠,月落星稀欲曙天。曲曲碧波飞白鹭,片帆翦破半湖烟。

粼粼春水净无烟,两岸人家断复连。回首广陵看不见,数声鸣雁夕阳边。

平山堂怀古

残月在天蜀冈晓,无数青山隔江小。欧公携客昔登堂,梅花万树生寒香。太守与客 共欢醉,放眼江山皆渺茫。如云胜事去未久,佳地又为苏公有。苏公谪宦守淮南,公余赋诗 兼命酒。呜呼老髯与六一,此去彼来无多日。文采风流甲一时,千百年中无与匹。名山终古 依名郡,物换星移几更运。贱子乘槎海上来,登堂不觉思高韵。佳景依然人事捐,万峰空自 列堂前。汀花岸柳半湮没,轻烟十里斜阳天。谁能高唤二公起,狂歌痛饮开华筵。

暮春北栈道中杂兴

崇峦回合客过稀,匹马嘶风下翠微。刺水秧针经雨长,黏泥柳絮带烟飞。半岩日暮 闻樵语,一径松阴唤犊归。杜宇声中春去尽,落花芳草两依依。

客途十步九停车,雨后岚容分外加。风趁鹭鸾低掠水,露黏蝴蝶弱依花。深林有寺云常锁,野渡无人日自斜。太息离乡今两月,青山送我到三巴。

观莲亭怀东坡

坡公不可作,寥落剩荒亭。一水绿摇槛,数峰青入庭。古碑眼蔓草,细雨战浮萍。 胜迹寻来遍,孤舟傍郭停。

顾森书

顾森书,字纶卿,金匮人。同治癸酉拔贡,分省补用知州。有《篁韵盦诗钞》。

过彭泽次藻青韵

寂寞秋江上,经霜木叶殷。数村高下屋,一路浅深山。隐吏洁身去,荒城终古闲。 我行愧飞鸟,意倦不能还。

朱培源

朱培源,字怡云,新阳人。同治癸酉拔贡,官靖江训导。有《介石山房遗集》。

洗兵马

妖旗夜落蚩尤星,炮声怒卷飞雷霆。倒泻海水浴泰岱,万里净扫烽烟清。我朝乂安二百载,列圣继轨开承平。拓地远置日南郡,受降更筑天西城。地大物博孽芽伏,草泽乃有奸民生。汉家戹运际阳九,赤径青犊交横行。殷忧自古启明圣,商宗恭默成中兴。今皇嗣位圣神武,掆鼓一奏人皆惊。深宫撤膳忧社稷,彤廷简钺求贤英。朔方九道会义旅,招讨四面开行营。天戈所指贼氛息,跳梁小丑敢纵横。前年王师下淮甸,崇朝瘴雾收金陵。三吴士女获安枕,如出水火衽席登。捻匪豕突未知悔,负恃爪距犹狰狞。皇心赫怒敕将帅,务穷巢穴犁其庭。已遣萧相领财赋,复移光弼麾旗旌。六师大举入兖沂,不惜赏赍倾金缯。军心凫藻气百倍,如汤沃雪海浇萤。昨闻露布驰驿骑,逆徒果见天诛撄。贝州生缚王则献,禀街斧钺申常刑。首恶就戮胁从散,青齐氓庶均安生。捷音朝达百官贺,上殿万寿争称觥。告成郊庙荐礼乐,叙次勋力酬功名。金瓯一统更无缺,梯航山海来赆琛。珠囊晖丽烛寰宇,妖鸟永绝罗平声。野人喜剧不成寐,坐视天狗潜无形。银河熠熠耿千丈,安得手挽洗八纮。长使宇宙不见兵,子孙世世安樵畊。

秋日乡行

平田无畔土枯白,沟渠流浅仅盈尺。小车历辘行途中,晴久飞沙满衣帻。西风侧帽 苦尘昏,何若江南水绕村。渔庄蟹舍吴淞路,两桨艖直到门。

夜闻角声

寒重江城月未高,短衣几辈走流壕。角声吹断清宵梦,渐觉霜痕上鬓毛。

喻先恩

喻先恩,字葆森,远安人。同治癸酉拔贡。有《芸畬堂稿》。

太湖署中呈郑湛侯明府

淡泊安儒素,循良喜著声。民肥缘吏瘠,事险要心平。执法参诗律,攻愁藉酒兵。 晋熙一湖水,不减在山清。

胡发琅

胡发琅,字肃藻,江西兴国人。同治癸酉拔贡。有《肃藻遗著》。

甲戌重九后登乐平县城遂观汪氏林园

鞿靮倦烦淫,积昏况佳叙。晨兴帏景,霍若沈疴去。衰木哀绪风,励霜响劲羽。轧 轧寒女机,悠悠远津鼓。归思结去棹,薄衿怨孤侣。寒波逝日夜,夏徂秋复举。含凄下隤垣, 结写咨薆圃。寄言素心者,勿厌山泉聚。

山居

世故无洪纤,可说皆争端。振衣事独往,廷颈旷{四良}间。春雨洒平途,百卉相新鲜。寒村蔽远树,落日明孤川。山原澹纡郁,车马自不闲。奥赏溢虚期,徘徊意已先。本无固得心,途穷辄自还。

岁晚不適意,俯仰越山木。峻霜未舆梁,清浅伤我足。心知道途缅,离居在中谷。 入门闻欢笑,慰问盈堂麓。自与君别来,人事多反复。吾言遂令负,坎窞在心曲。人生重离 合,谁能数昔宿。夜深澹相对,忘言意弥笃。

张洵佳

张洵佳,字少泉,江阴人。同治癸酉优贡,官上蔡知县。有《爱吾庐诗钞》。

寄同年华子才内翰

昔日鹅湖我旧游,杜陵广厦最清幽。一从听鼓长安道,不断思君明月秋。卧病相如仍健饭,依人王粲尚登楼。他年鸿爪重重印,访戴还乘雪夜舟。

自三峰至兴福

兴福今重到,唐时寺有名。泉声幽涧滑,山色晚霞明。穿径篁争出,窥人鸟一鸣。 野僧癯似鹤,相揖淡忘情。

邓嘉缉

邓嘉缉,字熙之,江宁人。优贡,候选训导。有《扁善斋集》。

秣陵织业行

秣陵无好丝,但夸织工巧。非徒经纬多,亦贵颜色姣。承平之日甲天下,水载以舟陆运马。富商大贾工负贩,仰给至无游手者。兵燹以来未复业,湘乡相公发军帖。招集四方织户来,吱吱轧轧机房开。机房开,丝不贱。火船载丝出洋去,富者乾没贫不便。今年丝价高于珠,我见童子泣路隅。自言家有织机匠,年年衣食才有余。而今十机不织一,身闲那得摇丝车。我为童子三叹息,长官机捐设正急。

平原君祠

翩翩公子有遗祠,想像风流奠一卮。臣亦毛生思脱颖,不知可有处囊时。

人日宴集莫愁湖即席

莫愁湖上逢人日,胜侣招携蹑屐双。举酒心情还属客,登楼风景独当窗。梅花破雪香生树,山色连云绿过江。惭愧群贤远相召,醉扶春影渡渔矼。

忆石公卻寄

别君何处最相思,多在松阴月上时。对我清辉皎如此,故乡俦侣可曾知。尺书问讯 劳相忆,浅琖浇愁醉不辞。还寝剧怜风露冷,愿移残梦落书帷。

临朐喜晤绍由同年

游历来停黄宪车,入门一笑各轩渠。相逢每惜须眉老,把晤翻嫌音问疏。高士愧悬徐孺榻,经生争识郑公居。厚期无负名山业,共拟元和郡县书。

王振声

王振声,字劭农,顺天通州人。同治甲戌进士,授工部主事,历官徽州知府。有《心清室诗存》。

归路

忽忽晓起放归舟,两岸霜痕满目秋。指点遥村疏树外,依稀塔影是通州。

自题小像

我面不自识,我独知我心。欲古而不古,似今而非今。读书不甚解,披画常摹临。 无事且酌酒,有时还抚琴。况遇好时节,花木有清阴。悠然禽鸟乐,我亦爱绿林。静观皆自 得,幸无尘俗侵。写意画图中,聊以开胸襟。即时当行乐,何必问升沈。

赵次山同年前辈属题鲁斋年伯阳穀殉难事实敬步公松球歌韵

天兵压境除群丑,腹负将军握枢纽。贺兰拥众尽熊罴,睢阳危立无刁斗。况乎阳榖 仅弹丸,固圉无庸兵力厚。坐视不发一旅师,竟任孤城入贼手。宰官五日京兆耳,胡不讬故 越境走。丈夫志节卓如山,进退讵因人左右。百里之城当要冲,岩疆岂容贼人有。一邑之宰 朝命尊,臣节当为天子守。靴刀单骑奋直前,嚼齿捐躯不顾后。誓甘一死报朝廷,天经地义 正非偶。乔材本自起岩阿,劲草绝不委泽薮。树立早负凌云姿,艰贞岂避狂风吼。正如泷冈 松结球,瑰奇锺毓由天受。赫赫天祖所鉴临,烈烈风沙难杂蹂。移孝独完臣子心,仗节聿昭 岁月久。宜乎继起皆达人,伟烈丰功同不朽。

张船山先生嘉庆庚午出守莱州冬日履任次年辛未冬乞休壬申春二月解组归时年四十有九予光绪乙巳出守徽州冬日履任次年丙午冬乞休丁未春解组归与先生若合符节然予年已六十有六矣因赋二绝志之

蓬山云海一年游,冬往春归太自由。诗画兴浓官兴淡,徽州颇不让莱州。

一到蓬莱即告归,早知四十九年非。我今周甲才回首,愧听旁人说见几。

论诗

诗到三唐已别裁,不图生面近重开。字能泣鬼无灵气,语必惊人有霸才。七宝楼台 迷片段,九天珠玉障尘埃。百思索解终难解,安得香山老妪来。

张景祁

张景祁,字蘩甫,钱塘人。同治甲戌进士,官连江知县。有《研雅堂诗》。

台湾纪事诗

塞天箐木绝人寰,帝力经营到百蛮。自昔嵎夷曾建宅,尚余盘古未开山。朝廷郑重 珠厓议,瀛海周遭赤县环。独怪严霜飞暑路,八同关外振师还。

洪涛山立鹿门开,澳市风腥蜑户来。楼阁幻成蛟蜃气,兵戈横扫髑髅台。惯从蕃舶 徵环宝,谁向昆池验劫灰。莫讶赵佗轻敌汉,擎天孤柱亦雄才。

冲波楼橹下澎湖,衔璧降王出国都。绝域漫夸天设险,灵山忽见海呈图。修罗好战 今何有,穷发开荒古亦无。从此冠裳被殊俗,不缘吾道叹乘桴。

天教鳌足奠沧溟,海若东来尽效灵。气泄金银穷地脉,志搜神怪补图经。鸡番也解 输賨布,雉堞争看建屋瓴。持节那堪回首望,中原一发万山青。

怪雨盲风海外多,拊循百洞待天戈。屯田有策师充国,辟瘴无方疗伏波。但使投文 驯巨鳄,底须蒙鼓斫灵鼍。诏书恻怛来穷岛,喜听芦笙四面歌。

奥府由来擅海王,不因地力尽农桑。接天瘴雨榔暗,绕郭鳞塍薯芋香。漫说丰穰占 鹿社,休矜货贝出龙堂。愿教佩带无牛犊,棨戟何劳岁渡洋。

琅峤苍茫接大瀛,全疆锁钥上游争。穹庐散结千村寨,战舰分驰十道兵。地偪诸夷 成互市,天生一岛作长城。防边早建忧时策,莫倚旃裘帐下盟。

忆从闽海逐浮鸥,仰愧元珠浊水求。蛮语未参宣武幕,月明空吊庾公楼。谈瀛有客搜奇句,破浪何年补壮游。应笑张骞多凿空,欲从邹衍问神州。

台疆杂感

基隆形势逊安平,使节偏屯北府兵。筹海十年成铸错,东溟从此失金城。

井邑初开尽废田,狮球通道集人烟。而今还作青芜国,屈指沧桑几变迁。

皇仁偃武恤创痍,岂把珠崖度若遗。穷发一隅怀汉德,鱼龙队里树旌旗。

虎符龙节镇全洋,帐下儿曹似将狼。未见寇锋临战垒,忽惊刃血溅公堂。

岛国新更自建族、登坛拜印励同袍。煌煌露布书犹湿、一叶扁舟驾海涛。

劫夺残伤事可哀,军储百万委蒿菜。摸金校尉知多少,不斩楼兰一级来。

大旗日落将星孤, 半壁支持仗寄奴。犹道越南雄略在, 鸦军齐作黑云都。

绝岛尘生动鼓鼙,闭关难得一丸泥。鸡番亦惧刀兵劫,越险争防大甲溪。

昔年作尹海东头,宫阙金银发隐忧。眼见蛟龙营窟宅,从今域外问谁收。

投荒念乱湿青衫,时事阽危口欲缄。差喜故人无恙在,身经破冢得归帆。

王麟书

王麟书,字松谿,钱塘人。同治甲戌进士,官万安知县。有《慕陔堂稿》。

赠庐陵胡凤九员外

凤九员外古之狂,生友死友醉忽忘。少年杀贼桐树冈,贼平弃刃归故乡。故乡荦确 文山阳,日星在上分光芒。古朴拙塞为文章,有司苦以绳尺量。行年七十身且强,山行百里 携糇粮,闲来觅醉如渴羌。

张百熙

张百熙,字埜秋,号潜斋,长沙人。同治甲戌进士,改庶吉士,授编修,官至邮传 部尚书。谥文达。有《退思轩诗集》。

别屠梅君庶常

风尘荏苒黑貂寒,异代关河马上看。晓日一鞭挥手别,乱沙如雪糁征鞍。

酬秦梦九同年

故乡嗟尔路迢遥,乱后民如草木凋。话到十年兵火事,夜深茅店雨潇潇。

闻笛

秋城月小银河夕,孤馆镫昏正愁寂。万瓦沈沈露气深,谁家冷擫高楼笛。微风低度得纤妙,宛转悠扬意如惜。此意分明入倚栏,相思何处不关山。销魂莫按杨枝曲,瘦尽离人镜里颜。

丁穉璜宫保丈节署燕集谈次及山陕近事感赋

北风北来雁南飞,哀鸿四野将安归。黄狐白昼入人室,泾阳几日天无辉。葭萌关头云气恶,远控襃斜连剑阁。官军慎莫疏边防,北川亦复嗟年荒。

市橘

我家山中双橘林,秋来结实如黄金。客游道远那得食,泥土汙肠尘满襟。阿奴市之自村谷,啖我忽如餐露菊。径思持此向风尘,凉遍炎炎贵人腹。炎凉异情难可知,霜重且保 潇湘姿。清香贡入蓬莱殿,莫忘寒山晼晚时。

书梦

昨夜王师大合围,骁腾万马尽騑騑。八方草木森兵气,一震雷霆壮国威。天上喜看 飞将落,阵前生系左贤归。涛声卷地惊残梦,孤艇镫昏百事非。

白帝城谒昭烈庙

澹日颓云晚萧飒,苍莽荆榛见荒堞。汉家寂寞千载余,一片遗墟壮夔峡。忆昔先主师东征,七百里路纷连营。猇亭折辱亦天意,夜遁乃入公孙城。永安旧事难重问,玉殿空山豁幽闷。跃马全荒割据心,啼鹃尚带偏安恨。君不见建业还都王气销,楼船直捣金陵潮。吴宫花草黯春色,祇今故垒生寒飙。又不见阿瞒汉贼倾天下,末路分香泪空泻。一代英雄让使君,漳河铲尽铜台瓦。成败三分迹已非,独留祠庙镇崔嵬。年年滟滪滩前水,呜咽东流更不回。

君贻伯翰见过

金茎不解孤怀渴,玉树欣攀二妙姿。梦里潇湘共清浅,愁中京国各淹迟。谈深烛影 低窗瓮,秋老霜威入鬓丝。龙气郁蟠双剑在,豪情相望夜阑时。

送舍弟啸石入闽

尘劳汝命无宁岁,岁暮天寒更远游。闽海烟波悬万里,楚江风雪下孤舟。读书识字终何益,别妇抛儿不自由。我亦艰难多病日,鹡鸰沙晚思悠悠。

过蔡与循兄寺居

长安五城朝复昏,古寺冷落城南根。百年鼎鼎不相待,万事悠悠难可论。嗟老未老 镜中影,欲归不归湘上村。祇应吾党二三子,早晚造君来叩门。

和黄麓泉户部湘轩雅集之作

酒宴共赏湘祠秋,寄舫应同湘上游。云梯一取古时月,吹管三更何处楼。西江小社得君好,东轩新诗开我愁。吟余抚枕发清啸,破睡不须茶满瓯。

题潇湘寄舫

我从潇湘来,苦忆潇湘水。不见潇湘见明月,月下关山几千里。去年秋气入悲歌, 今年秋来情更多。张翰莼鲈等闲事,扁舟不决当如何,香王老人发奇想,宦海苍茫支奇舫。 破浪时无宗悫风,蓬莱路阻行安往。眼底滔滔不可云,荒荒溟渤一迷津。狂澜势倒谁能挽, 愁绝中流击楫人。

青城山歌题易中实观察旧游图册

青城第五之洞天,真箓纪自轩皇年。宝仙九室此福地,上司岳渎蟠西川。二千里远势横绝,苍然秀压坤维裂。下界低飞灌口云,高台近见峨眉雪。灵区奥府接紫冥,搜奇讨胜徵图经。栖真古有丈人观,化鹤今谁徐佐卿。我行旧是成都客,惆怅名山游未得。妙绘何期入尘眼,蕉窗斗落芙蓉色。手君青城图,诵君青城诗。真形缥缈不可见,想见锦屏玉壁初攀时。幽岩猿鸟应前导,采药相逢几丹灶。瑶草琪花世外春,俗缘凡骨都稀到。石泉如雨洒玉坛,天风飒沓非人间。上清皛皛日月古,太素漠漠冰霜寒。行歌跨鹿刚秋霁,卅六霄光碧无际。蜡屐归来万绿中,襟裾半带星辰气。君乎壮游谁与同,为君吟望写灵踪。径思六翮凌风去,饱看岷山第一峰。

春隄试马图为何润夫京兆题

东风绿尽西湖树,春好凭谁觅春去。得意何郎试马来,寻春直到春深处。绣勒锦鞯新凿蹄,一鞭花雨草萋萋。天然画景垂杨路,知是苏隄是白隄。飞鞚翩■疾于鸟,骏马才人争騕袅。可怜绮陌艳阳春,不见离宫旧时道。御道当时迤逦开,南巡仙跸扈龙媒。羽林万骑从天下,天厩骅骝尽轶材。雨骤星驰人事改,宫门冷閟湖山在。萧条林壑鸟呼风,盛事真应旷千载。寒日铜驼感慨中。乾嘉荏苒到咸同。黄尘蹴踏兵戈起,百战才收汗马功。遗踪划尽繁华歇,擫笛声凄唾壶缺。莫问龙盘九殿云,更无鹤守孤山雪。尊酒流连退省庵,幽寻我亦旧停骖。南屏钟动淹归辔,韵事无人写夕岚。君心清绝侔冰玉,选画徵诗灿成轴。一眴春游二十年,年年梦堕西湖曲。去住休论今昔情,壮怀如月向君倾。据鞍顾盼英雄事,君不见麟阁云台万古名。

漫兴

广乐钧天事有无,梦回帝所一身孤。人间何路求三岛,世外扁舟隔五湖。耕钓逝当 从漫叟,文章聊可学潜夫。药洲洲畔花如绣,独向西风听鹧鸪。

画马

{西乏}驾昔闻千里马,良工谁是九方歅。更无羁靮遭惊败,但有新图寄慨呻。隐痛苍生餧豺虎,高歌青眼望骐驎。驽骀减尽天闲色,神物何时一降真。

潮州刘教授以所辑东坡居士居儋录见贻意有所感遂题其后

绍圣当年党祸深,遗编千载一霑襟。神京北望恩非浅,瘴海南迁老更侵。报国孤忠 空白首,投荒九死见丹心。桄榔尚说庵居旧,笠屐风流何处寻。

意有未尽再题二律

奇才知遇感先皇,晚岁邅回徙瘴乡。万里岭南余涕泪,千秋海外有文章。采风手校《居儋录》,醉月心悬载酒堂。一事类公差不恨,七年供奉殿西廊。要使天骄识凤麟,读公诗句气无伦。岂期变法纷朝政,差免书名到党人。修怨古闻章相国,推恩今见宋宣仁。过书举烛明何在,削牍真惭旧侍臣。

南园画马为翁尚书题

天不见房星化马如化龙,地不闻渥洼产马成青骢。腥六合尽泥滓,谁与汗血收奇功。咄哉何处得此种,意态雄奇声价重。轩然神力扫驽骀,似恐驰驱忧驾{西乏}。南园画笔迥绝伦,此马一出真空群。想当奇气发胸臆,泼墨淋漓如有神。意匠经营工画骨, 智霍精灵下云物。径思揽骏籋昆仑,伫盼成龙蹴溟渤。豪情壮志不可偿,风尘万里天苍茫。沙寒草衰苜蓿短,但见凡马多肉夸腾骧。监牧天闲有专政,御马深期知马性。骊黄牝牡亦何有,要豢长材成上乘。黄金骑,绿玉螭,绝足不假劳鞭笞。识途之效古所重,发纵指示今其时。按图低徊求画意,闻道人中有骐骥。

骖鸾

骖鸾自何年,祠宇犹空山。春雨洗丹灶,秋星炯瑶坛。窈窕帝子灵,月影时姗姗。 烟岫晕螺黛,风泉鸣珮环。仙境閟岩阿,神光日斓斓。荒碑字明灭,遗迹萧梁间。缥缈散花 天,凡骨无由攀。空阶草色晚,邃殿松阴寒。不见蓬莱宫,但见飞鸟还。谁能测元邈,灵妙 倾人寰。

陈棨仁

陈棨仁,字戟门,号铁香,晋江人。同治甲戌进士,官刑部主事。有《藤华吟馆诗录》。

汉平津侯镜歌

公孙丞相儒家流,七十射策猎封侯。布衾脱粟不可见,尚有一镜争千秋。铭一十字 大及尺,过眼如窥汉月魄。铁钮翠环薤篆疏,铜花碧绣菱纹蚀。当年东阁夸宏开,恶宾故人 纷遝来。清光能洞汲黯直,朗鉴偏失江都才。招贤馆静空明发,尽道晶辉映毫发。可怜日日 照衣冠,不照轮台战死骨。茂陵金碗秋未槁,牧豕旧容镜中老。荒凉片月弃不收,残字空传 元朔造。

谭宗浚

谭宗浚,字叔裕,南海人。同治甲戌一甲二名进士,授编修,历官云南盐法道。有《荔村草堂诗钞》、《于滇集》。

春雨

侧侧微风澹澹烟,彻宵疏雨总堪怜。一春况味如中酒,三月轻寒未卸绵。里巷时光 祈麦处,山棚生计焙茶天。绿阴如幄花如雾,争遣诗人不惘然。

落红门巷记阑珊,日日阴晴称意难。润气微知炊灶湿,繁声翻当钓篷看。江乡春草 思游子,镫影檐花称冷官。愁绝天涯多旧雨,可能车马似长安。

悄倚阑干觅句来,片云头上已先催。愔愔芳径无行迹,草草年光负酒杯。词忆杏花 虞学士,句传梅子贺方回。南朝四百烟中寺,多少楼台暝不开。

喜看新绿满亭皋,一片青山望眼劳。但有关心谈稼穑,尽多生意到蓬蒿。潮头涨满 鱼儿出,陌上尘销马首高。无限绿芜门外长,莫将颜色例青袍。

为问

兵戈犹未定,复此寄江干。落叶下前岭,孤村生暮寒。贫疑诗卷崇,病爱酒杯宽。 为问秋来燕,雕梁几处完。

吕纪画鹰歌

华堂月净螀啼露,主人爱客陈缣素。怪兹咫尺轩楹閒,何得突兀槎桠之古树。细观劲翩翩然翻,想见炉锤笔端铸。我闻画鹰者,最数姜楚公。边昭及林良,厥技颇亦同。纪也下笔相追从,方其冥想动真宰,意欲惨淡无天功。当年侍从南薰殿,豹房日暮争嬉宴。泰彬前导朱寿来,追逐围场若驰电。偶然点笔成此图,往往深情存谲谏。不图宫阙图草莱,寓意微茫果谁见。嗟余枨触百感生,与此旧恨偏殊情。鹰兮禀气最猛鸷,啄睛掐脑群雏惊。胡为敛伏不一试,草间狐兔犹纵横。北风昨夜萧关起,愿尔决云驰万里。一击乱群穴,再击妖领死。扫除六合会有时,莫向凡禽惊爪觜。吁嗟乎!材官突骑今岂无,驽痾局缩非壮夫。鹰兮鹰兮人不如,傥登刘表高台上,我亦乘风试一呼。

泮塘晚步

西郊独归雾冥冥,茨茹未长茭筍生。幽禽避客就烟没,黄叶打门知雨鸣。前溪后溪 有竹树,东崦西崦开柴荆。吾乡胜游自不乏,安用阳羡筹躬耕。

峡山寺

峡中无白日,当昼亦常昏。雨急瀑争地,峰阴云出门。忘机飞鸟暇,阅世老榕尊。 莫问修罗劫,残僧几辈存。

邝湛若天风吹夜泉砚歌

书君悬针垂露之,奇篆写君离鸾别鹤之悲吟。忠魂缥缈去已久,但有贞珉一片知君心。当年此石诚非偶,滃郁春云落君手。用之愈久德愈全,合伴书窗为益友。鸦咋岭,鬼门关,孑然书剑来猺蛮。山魈狰狞伏洞里,巨蟒睒睗悬林间。砚乎辛苦定同历,幸不弃置埋榛

管。不然军中时草檄,掷笔悬空飞霹雳。丹心耿耿长不磨,愿与东南支半壁。穨城一角阴云愁,日影惨淡悲清秋。奇才岂仅屈宋并,毅魄直同张许游。片石犹存岂君意,悔不烽尘遭破碎。砚池点点浮青痕,尚似忧时贾生泪。桥亭字,墨妙碑,此砚与之应并垂。忽忆旧时好琴癖,画有同嗜安能——搜剔全无遗。我来摩挲看款识,闲对遗踪思往事。洗处曾来虞苑游,捧时定合青琴侍。君今骑鹤归太虚。砚亦转徙经燕吴,愿祈六丁下摄取,永镇朱明洞府神仙都。

舟中读阮太傅重刻西岳华山碑拓本

帝临高居奠八维,兑位所宅金神司。厥有华岳崔以巍,林巅谷越相蔽亏。群峰刺天白差差,泄云不散阴雾披。荒霾陡绝人莫窥,升降灵{雨澍}嘉颖滋。福庇黎庶除疠疵,在昔炎祚朝政隳。浮屠媚鬼兴淫祠,诅祝妖惑崇祥禨。况兹岳渎尊神祇,宜有翠琬铭丰碑。陈留徵士鸾鹤姿,博赡渊雅工文词。真迹妙绝时人推,群龙宛宛出水嬉。五采凤羽垂褵褷,想当落笔纵横时。腕力袅拄如悬丝,偃仰回复无不宜。千年巨碣争护持,剥蚀青翠蟠蛟螭。宝光迸射来天墀,上掩奎宿腾斗箕。帝曰斯宝诚绝奇,六下下取雷电随。地媪摇撼惊莫支,人间传拓嗟渐希。三同异纷差池,琅环馆主持使麾。倩工摹刻重补治,缜密方劲争毫釐。益以别本全无遗,若金镕鑛玉泯玼。嗟哉隶法明季衰,破列轨范争亻爪离。国朝媕雅多大师,远溯秦汉卑献羲。竞辟阃奥开藩篱,末流泛滥吁可。体制诡越遗馽羁,或乃丑拙兼斜欹。方若画屋圆穿锥,俯趋鼠穴遗坦夷。刻画西子成戚施,古法渐邈谁复追。此碑摹刻时代迟,朗若刮目黄金鎞。惟川有涘山有基,正谛在是奚外歧。况今廿载兵尘驰,潢池盗弄烦鞭笞。啸聚妖丑藏魅魑,文选楼前劫火悲。汉原秦畤多旌旗,朱门贵邸罗尊彝。亦复散佚随仆厮,深山陵谷安可知。他时岁月随迁移,购此或亦千金赀。我闻岳庙临西陲,碣铭壁画镌{厂垂}{厂义}。何时赤手携毡椎,搜剔榛莽穷险巇。或有铭碣前代垂,与此合卷装琉璃。平生宿愿难遽期,侧身西望长嗟咨。

游百花洲

闻道东湖胜,寻幽惬讨论。雪光寒照座,水气暗侵门。鹭起沙隄净,鱼噞石穴潭。 尘闤隔咫尺,佳景俨郊樊。

十顷渌波净,荷花相间香。平铺轻浪暖,并送小亭凉。蛤蜊缘隄堰,鸬鹚晾石梁。 论园如买夏,何必减沧浪。

曲榭千房闭,长廊百折分。引泉微注笕,叠石欲生云。竹啸助吟趣,苔乾疑篆文。 天工饶点缀,沙鸟自成群。

老柳如僵立,何年插小池。迎风低散缕,拂水卧生枝。自得萧闲趣,偏多倔强姿。 如何经劫火,飐冉似当时。

灌圃平生愿,来看胜地幽。园蔬收鸭脚,溪芡熟鸡头。劚药应旋长,烹鳞不用求。 虽无贤地主,胜赏足句留。

避地怀苏子,孤芳迥绝群。高风秦博士,逸操汉徵君。乱世容闲卧,斯人不可闻。 廊碑重抚读,湖气冷斜曛。 享祀崇祠配,风流老辈存。诗名犹未沫,经术至今尊。侧想干戈日,曾经浸沴昏。 斯游良不易,雅赏接琴樽。

吾乡原水国,名胜擅林泉。对此卜居地,应吟《招隐》篇。待营因树屋,拟蓄卖文钱。相约羊何辈,归耕且授廛。

泊舟南昌大雪作歌

吾家岭海居南陲,赤日长照恒炎曦。隆冬飞雪洒不到,但有千树梅参差。朅来豫章偶携酒,云气昼黯纷迷离。波涛叫呼朔阴集,山石凛冽寒飙吹。天公忽蹴痴龙起,倒泻琼瑶八千里。横空欲度西山来,疾雨斜吹入江水。若有人兮在云中,跨缟鹤兮骖素鸿。瑶池阆风赴高会,堕羽飘坠来虚空。盘旋回折不相下,变灭的皪难为容。不然河伯张宴浓,洞庭乐奏酣笙钟。缠头十万翦鲛縠,片片映出蛟鼍宫。前者进入烟濛濛,后者卷作涛汹汹。噫号声势塞大块,一洗万古尘沙胸。隔岸遥看雾痕湿,枉渚回汀纷出入。天前阔远千树涌,沙际冥茫万鸥立。我生憔悴百不宜,穷愁惯被江神欺。倦游千里厌久泊,忽看世界堆琉璃。江山奇景恣游眺,造物贶我原非私。偶然留滞亦殊得,岂必捷足争先驰。君不见章江门外帆如织,千枝万枝作竿直。几人住乡得安適,大半风尘走南北。烹羔暖酒渠有命,此乐岂须吾辈得。眼前欢会且高歌,何用牢愁叹湮塞。夜来沈沈月无色,万种愁心乱难极。会当唤取潜潭蛟,起弄霜天吼铜笛。

循狮子岭度十八盘

奇峰欲干天,失势忽斜落。弯环疑互缠,奋击起相搏。万叠凭巑岏,一条开荦确。 望中见纡郁,意外出巉恶。怪棱低钩衣,仄势怒齿索。兹为入山路,有似门启钥。微生寄舆 夫,喘息不敢作。登顿愁趼疲,窥觑虑魂弱。不信人世间,坦途尚清廓。遥见青林端,秃当 响檐铎。知有梵字崇,盘空横岝崿。

雨中由黄草坪过武陵山

涉想登灵峰,昏旦忽移景。飞失寸晖,晦色惑诸岭。贾勇循涧崖,筍鞋任驰骋。风 霆浩啸翻,草树逞妍靓。陡缘万松巅,趋下若窥井。一诺许山灵,颠踣吾有命。媻姗趁蒙茸, 暗昧露光炯。缒幽一岩穿,造极万峰迸。却乘险阻尝,喜得妄邪屏。险中博欢娱,事过趣弥 永。轩冕有危机,何者真乐境。平生游屐多,屈指半天幸。山中难久留,浩歌下萝径。

游甘露寺

一峰藏竹底,竹外得天光。浅濑通鱼穴,空崖聚蜜房。巾瓶添净契,蔬筍亦真香。 携得山云返,城中作晚凉。

青莲洞

仰窥石下垂, 仄步石横拒。平生耻折腰, 至此随仰俯。兹为青莲龛, 榛莽限深阻。 扪苔负壁行, 魂弱不敢语。悄然风叶飞, 恐有山魈觑。元人旧镵碑, 洞狭不容武。侧身偶蹲 窥, 破垂玉箸。昔人绝技传, 未肯草木伍。好奇此雕镌, 作计亦良苦。久立畏森寒, 攓衣出苔户。携将白石还, 好向僧厨煮。

小蓬莱峰下有瀑泉三叠旁列横石可坐十人

是谁觞群真,涧底置瑶席。洼尊久不存,罗列賸奇石。遥对清泠泉,各各据高壁。 出窦纷室通,注谿错回直。意同长风争,急起赴石隙。群山如踔跳,声过有余力。道人了不 闻,合掌对凝碧。泄怒任叫嚣,守柔自冲默。渐进岂不佳,胡为苦相激。感物遂写怀,浩歌 日将夕。

书事

新传严诏馺娑宫,玉虎晨威一震同。卧护西陲稀健将,角巾东第到群公。本来袁窦原殊气,却比萧周已尽空。独使至尊忧社稷,未央前席策平戎。

衮衮鹓鸾又一时,上林阿阁最高枝。朝恩别自求新剑,世事休教覆旧棋。宛马蒲萄前代略,河鲂杨柳中兴诗。宣光盛烈非难嗣,燮鼎调羹望禹夔。

陈文騄

陈文騄,字仲英,晚号槁叟,大兴籍祁阳人。同治甲戌进士,改庶吉士,授编修, 历官安徽候补道。有《养福斋集》。

渐西观察提点山右中江父老咸怀怨思献诗三十韵以志惓怀

兰蕙与蓬蒿,同生不同类。庭芷共江蓠,隔山扇馨懿。植物有本性,斯人洽气谊。譬如浑与淄,源分味一致。方寸契合微,名言无可志。下走滞京洛,时俊红尘萃。尤推彦伯贤,一见惊小异。既入季野室,气概四时备。盎然饮太和,不醪亦自醉。何期后十年,移官戏下吏。文宴纵清谈,往往抒宏议。怀抱郁青霞,渊雅而纯粹。恍遇祖约谈,次日如失睡。有时涉文囿,洸洸罗满笥。河东记委箧,崇山识简坠。怜我呰窳才,赖公琢成器。明月照人影,高云讬广庇。不图好风吹,新纶忽迁地。休景知边情,盛绩御屏记。郑白千顷沃,欢呼迎新使。美意汉京洽,觖望鄣南怼。持鞾念旧恩,攀辕洒新泪。我心益戚戚,欲言无一字。公方鬯远猷,岂为私情累。惟祝蚩蚩心,上感羲轩意。牙纛锡专征,江海重膺寄。白发旧部僚,老马伤憔悴。草亭筑四休,轩盖行抛弃。傥报我公来,重理出山辔。短歌寄离愁,烟波荡淮泗。

乙亥元日庐州作

暖入东风冻乍开,人随梅柳渡江来。郡符恰共韶光换,凯唱频烦腊鼓催。吴楚河山 空故垒,赵张勋业数奇才。日边漫指长安近,昨夜觚棱有梦回。

義驭飚轮去似梭,五龙六甲眼前过。容添白发梅偷笑,官比黄州筍欠多。绕郭沟塍 知土辟,沿街烟火验时和。驽骀虽老雄心在,拔剑犹能斫地歌。

陈存懋

陈存懋,字竹香,赣县人。同治甲戌进士,改庶吉士,授检讨。历官浙江知府。有 《冬心斋诗稿》。

游盘山归路口占

暮春残雪点征衣,晓起冲寒下翠微。胜境难忘情脉脉,名山乍别意依依。岩前芝草 劳僧赠,洞口桃花笑客归。万壑松涛千尺雪,结庐何日学忘机。

卢生祠题壁

一枕黄粱梦太长,是因是想总荒唐。人生自有天伦乐,不作神仙也不妨。

车马劳劳送客程,邯郸道上尽卢生。若非生就神仙福,炊熟黄粱梦不成。

海上蓬山路杳然,目前困苦最堪怜。人人饱吃黄粱饭,一枕安眠便是仙。

荷风香送使臣车,江汉英才擅作家。圣主恩深难报称,昨宵有梦到京华。

横溪泛月歌

东山月上露气清,松杉夹道枝交横。榜人无声宿烟渚,水光荡漾摇空明。小舟泛月横溪曲,溪上微风动林薄。寂寥山馆夜沈沈,阶下流泉响琴筑。

七鲤镇河隄晚眺有感

客里光阴手一编,人生如寄剧堪怜。思量去日知来日,惆怅中年到晚年。涧水白拖 千尺雪,夕阳红漾半江天。长隄徙倚频回首,暮景桑榆好著鞭。

补和管士一同年使鄂之作

浩渺长江拍浪浮,江头黄鹤古时楼。一尊风月晴川夕,万顷烟波鄂渚秋。此日论文 仍接席,当年持节忝同舟。迢迢十载春明梦,独立苍茫感旧游。

秋夜忆弟

去岁南归日,孤舟潞水边。今年重到此,衰柳散疏烟。燕市吾将老,苏台子自怜。 悠悠分两地,明月几回圆。

未了向平愿,难谋阳羡田。联床曾有约,共被是何年。草色荣枯感,萍踪聚散缘。 南楼闻雁唳,倚枕不成眠。

游鸟门山偕陶心云

不必奇峰劈巨灵,天然苍翠耸围屏。悬岩溜滴龙潭黑,绝壑云迷鸟道青。祖逖渡江 怀击檝,屈原忧国且扬舲。稽山镜水春如许,聊共先生倒玉瓶。

丁善宝

丁善宝,字韫山,潍县人。举人,官内阁中书。有《六斋诗存》。

九日游程符山寺晚归

程符秋色好,杖策叩禅扉。不尽登高兴,无嫌傍晚归。石花明涧水,山月上**人**衣。 回首钟声起,泠泠下翠微。

对酒感怀

门前种柳绿成阴,门外波涛深复深。一念随分人物我,百年可有去来今。君平莫定 升沈数,伯起空辞暮夜金。壁上青萍缘底事,宵来风雨作龙吟。

许静

许静,字海楼,汝州人。举人,官开封府训导。

与张勺波游龙王山

一带长隄柳数行,两峰山色下河梁。画师最是碧翁巧,添个飞鸦趁夕阳。

题朱梓皋湘江红叶图

家山遥隔大江流,岸荻汀枫慰客愁。游子还乡争一问,扁舟满载洞庭秋。

阎南图

阎南图,字搏九,又字天池,号莼凫,榆次人。副贡。有《南村诗草》、《留影盦集》。

赠王居士

竹杖醉时携,萧条白发垂。高年须药健,野性学仙宜。江鲤迎潮钓,山花趁雨移。 时人笑樗散,多见葛巾欹。

【卷一百六十七】

金和

金和,字弓叔,一字亚匏,上元人。贡生。有《来云阁诗稿》。

避城

海上逃人言凿凿,夷于丁男不甚虐。惟与妇人作剧恶,比户由来皆大索。城中儿女齐悲啼,四乡一一谋枝栖。寻常家具邀人赍,腰缠浪掷轻如泥。谁谓乡农亦称霸,百金才许蜗庐借。瓢水束薪珠玉价,钗钿裙袜夺之诈。稍不如意便怒骂,抢地无言但拜谢。道来此间已被赦,不见邻妇头鬖鬖。无钱能赁香筍篮,膝前有女年十三。中夜急嫁西家男,身携布被居茅庵。

募兵

城中旧兵不如额,分守城头尚无策。何论城下诘暴客,市儿反侧颇接迹。一旦招之入军籍,朝来首裹青布帻。细襻革靴盈尺,黑衣蔽腹袖尤窄。堂下群鸦立无隙,或舞大刀或磔石。取其壮健汰老瘠,九城累累保卫册。昼坐当门怒眼赤,大声能作老枭吓。恶匄往往暗褫魄,夜出走巡街巷栅。火光烛天月不白,木梃竹鞭在肘腋。吠犬无声都辟易,一人日与钱一百。勤则有犒惰则革,借问谁司鼓与钲。居然高坐来谈兵,百夫长是迁书生。

扬州客邸作

不惯扬州住,芜城数暮鸦。世情原鲁酒,人意亦唐花。客路江难缩,秋林日易斜。 云边亲舍近,吾梦欲还家。

王嫱

红颜竟许到沙场,休抱琵琶意更伤。不是出宫时一拜,今生何处见君王。

西施咏

溪水溪花一样春,东施偏让入宫人。自家未必无颜色,错绝当年是效颦。

五月七日母命出城避贼

老母传示纸三寸, 欹侧澹墨十数言。谓闻尔日贼促战, 千家万家人出门。尔独何为恋虎口, 六世名族惟尔存。身是妇人当死耳, 此时言义休言恩。尔去将情告诸帅, 况尔有口兵能论。背人读罢火其纸, 才欲痛哭声先吞。中夜起坐不能寐, 十指尽秃余咬痕。在家何曾得见母, 母教诚是儿智昏。宿将南来过两月, 胡至今日军犹屯。或者条侯太持重, 不识此贼原游魂。傥以里言走相告, 未必幕府如帝阍。藉手庶几万分一, 还我甘旨鸡与豚。甘作罪人背母去, 廿金馈贼吾其奔。

初九日出城既至善桥作

出城二十里,世界顿清凉。不觉发将白,才知目尚黄。居人尽旗鼓,吾辈又冠裳。

重见圣朝诏, 羞挥泪数行。

自秣陵关买舟冒雨至七桥瓮马总戎营求见

早潮人说船行易,五十里路夕未至。夜深雷雨破空来,疑是城头战方利。小船漏水时欲沈,袴袜无乾不能睡。烧烛聊谈纸上兵,到晓刚成六千字。遥遥乍见当头旗,船得顺风桨生翅。须臾系缆营东头,万帐星罗真得地。此时雨猛更逐人,草滑泥深策无骑。束缚芒鞋侧足行,军前岂可轻儿戏。渐闻朝令许传呼,长揖扣门敬投刺。将军竟作阶下迎,才见逃人先进泪。敢谓此贼不难平,三月迁延自攻愧。张髯怒骂骄儿兵,如所云云颇非醉。坐来徐献袖中书,五策居然中三四。欲推欲挽忽沈吟,前席无声似酸鼻。但言大帅在锺山,到彼雄心傥一试。我闻未免中狐疑,于我何嫌若引避。归船听取道旁语,请战都非大帅意。将军近已病填膺,不是将军不了事。

初六日将辞诸营而去

旁观不觉举棋频,枭鸟声多渐惹瞋。吾舌能令金马泣,军心只似木鸡驯。侯嬴有剑 难从死,伍员无箫欲救贫。徒赚北堂占鹊报,猜儿已作后车人。

初七日去大营拟寄城中诸友

十万冤禽仗此行,谁知乞命事难成。包胥已尽滂沱泪,晋鄙惟闻嚄唶声。自古天心 慳悔祸,虽余人面错偷生。一身轻与全家别,何日残魂更入城。

闻落叶声有感

夜夜空阶落叶横,因风随处答虫鸣。纸窗如墨每疑雨,华发成丝是此声。兰芷江边 迁客泪,蘼芜山下故人情。飘零自分无归日,略向歧途诉不平。

还家

还家翻似客,儿女一时喧。乱阁囊常碍,新支榻不温。缝裳促冬线,翦烛恋宵尊。 几日听江雨,征帆又在门。

梦月夜游笔架山歌

我昔初游笔架山,重岩绝巘穷跻攀。夕阳满天下山去,山灵笑我真痴顽。梦中来呼 渴睡老,汝昨看山爱山好。好山不向月中看,谁识此山天下少。我欢跃起欢相迎,山灵挈我 随之行。腾地直上一千丈,此山屹立如在不夜城。九阍咫尺通帝京,四边寂静无人声。举头 不见团团月,却是广寒旧宫阙。万户千门无点尘,珠斗银潢共清绝。此时姮娥露真面,云锦 衣裳飏红电。须臾放出大光明,融结此山成一片。山耶月耶两不知,浩浩长空亘秋练。山灵 语我此奇景,除却此山无处见。此山南来第一真洞天,今作穷妻汤沐县。绕县遍种丹桂花,灵根来自海市鲛人槎。云是结璘使者手赠春风芽,此山樵童渔女一一皆以花为家。花开花落一十二万载,古树今树不断香横斜。偶然桂子月中堕,当作瑶池灵药可。白兔谁闻天上春,青鸾自寄山中果。人生得入此山游,仙箓何事更向佺铿求。此山一草一木一猿一鹤俱是不凡

品,而况餐烟吸露之灵修。我心默默方然疑,忽闻侍从传语山灵知。近来吴刚老病疲,其属 八万四千户,斤斧往往乖常仪。一去蓬莱十日不复返,闻其烂醉蒲桃新酒无醒时。顷间问游 下方客,落落冰玉无俗姿。吴刚修月不称职,今后其人客代之。山灵贺我促我顿首谢,我有 我志请毕今夕语。我之学儒仅仅知讴,我之学农仅仅习耕稼。其他一切愚过移山公,而况生 平懒同嵇叔夜。尘世不愿受羁勒,天府何堪任驱驾。幸为更乞恩外恩,曲恕草茅虮虱臣。七 宝楼台非我事,匠材别选宁无人。山灵对我长太息,叱咤一声如霹雳。惊回春梦落河海,依 旧青镫闪蓬壁。东窗指顾榑桑红,照见此山最上芙蓉峰。

登木末亭怀太白

碧萝祠宇袅茶烟,曾此行吟有谪仙。自著锦袍上天去,鸟啼花落一千年。

送曾袭侯出使

江上逢旌节,中朝第一流。时名谢安石,先德武乡侯。许国无回顾,弥天此壮游。 长风九万里,何止到瀛洲。

施山

施山,字寿伯,一字望云,会稽人。有《通雅堂诗钞》。

吾庐

万壑吾庐外,萧然一布衣。家贫亲老易,地僻客来稀。开卷前贤过,穷居世事违。 坐看小乌雀,街食向巢飞。

闻客话滇南

槟榔花发碧鸡山,昔有藩王镇百蛮。歌舞销沈宫殿废,乱云犹拥七星关。

庚午春日天门城边看灌麦

嶓冢东流日变迁,淤湖春麦绿成田。渐繁生齿兵戈后,试数儿童陇亩前。西顾犹愁 回纥马,南漕久废运河船。谈何容易匡时略,搔首斜阳古郭边。

咸丰三年冬贷粟钱江农人张国震馈钱以济是日暴风不止先王母倚闾忧甚距今十九岁矣感怀成诗

百历冰霜年少日,一钱生死感人恩。饥寒岁暮亲垂老,风浪江干日已昏。祷佛炉烟归未绝,极天坟树远无痕。天涯又怆清明近,麦饭何时拜墓门。

偶樵寄示旧作藤鼓行三章歌以和之

苍梧羊石端州门,以藤为鼓吾所闻。君于三鼓曾见一,作诗气压千人军。明臣灭贼

根株绝,更挽妖藤宝刀。团团冒以黄牛皮,罚令司更赎前孽。二百年来乱夷狄,腾腾击鼓鼓欲裂。大臣鞶带曾三锡,辱国丧师不可说。坐令米贼轻国宪,南纪滔滔日流血。即今鼙鼓中原息,西北萑苻未诛灭。安得拔钉褫牛皮,老藤十丈复联结。皇灵感物变顽性,飞渡黔山斩萌糵。归来作颂镌其功,藤皮坚滑刀如风。岐阳之石蛮溪铜,以比尔鼓将毋同。云台马武山林雄,中兴汉代声降降。谁知顺逆妖祥异,湖海犹忧伏莽戎。

蒲圻城头晚眺有怀仲丹都中

山山黄叶兼红叶,松竹萧森掩映之。云里谯楼双塔迥,鸟边暮雨片帆迟。风光绝妙 秋深后,客思苍然独立时。忽见洞庭霜橘至,故人京国最相思。

题赵州王节妇画水

赵州古寺嫠王氏,画壁流观吴道子。精魂白日游九泉,倒卷黄河入腕底。波澜于古真莫二,毫端潋滟涵元气。晴昼如闻风雨鸣,空堂疑有鱼龙至。鳞鳞闪动不敢扪。安得巨掌擘海门。飒然冥顼忽飞入,炎官赤帝皆惊奔。或愁异日冬寒恶,地冻天冰受椎凿。嶙峋纯是血点凝,百劫千灾岂销铄。高风萧萧环翠阁,海客南归袖云壑。秋成不劳忧旱乾,万棱农田绕山郭。田间寡妇拾穗同,怜渠耕石恒年丰。犹传黄鹄孤飞日,恶浪惊涛泪眼中。

刘履芬

刘履芬,字彦清,一字泖生,号沤梦,江山人。官户部主事,改江苏知县,署嘉定县事。有《古红梅阁遗集》。

岁晚述怀

吾无应物材,涉世诚大难。静默欲养心,触事多忧患。读书不致用,焉贵抱丛残。 愧此编氓徒,力食供晨餐。贫贱未为辱,亲密未知欢。芬馨湘南草,讵若庭户兰。俯思励至 行,束带怜朝寒。

二月三日放舟至木渎宿石心村居越日登灵岩山远眺循麓过披云庵看梅冒雨而归纪 游

薄雾恋山坳,日在征鸟背。出门一舸浮,峭碧点波碎。横空见塔尖,如佛影孤髻。 逾近烟水阔,舍舟见古寺。我友汪居士,避俗隐兹地。布被可留客,门巷不嫌隘。桧雨烧团 茶,饫口园官菜。卧听万壑风,足洗胸中秽。

微露濡行人,揽衣起破晓。一步一看山,翳丛惊宿鸟。风廊出溟渤,钟声散迟早。 松树千百盘,近觉青可拗。思夷勇孤往,步险怯始造。不知路所极,云起手能到。数数到阶级,落叶琴台扫。无与苎萝人,洞门閟春草。

上山复下山,僧庐三里余。无数梅花林,照水争清疏。禅宗息文字,掩关终岁居。 自惟种植缘,长笑溺与沮。结趺坐苔石,啄木下自如。众香了无际,安用悲莱芜。亚枝落横 玉,还读怯卢书。一瓯绿雪汤,自易情怀孤。 寄陈曼寿

短榻移镫客梦疑,萧萧残竹月明时。未愁僻地鉏茅始,颇悔携樽就鞠迟。人外孤鸿 无静境,酒边双燕有春痴。近来祇合关门住,卧诵江湖听雨诗。

舟中赠杨见山

停船看明月,夜永一镫虚。独往青山后,论心白首初。浣衣今一笑,食肉尔何如。 后约应期我,秋风江上书。

都门客思

浩想烟波采白蘋,开帘静对月如银。模糊云树三千里,抖擞衣裳十丈尘。处世正非 贫可了,还家只盼梦能真。曹司事简朋俦隔,自起烹茶析涧薪。

夜坐荷芳书院

秋声不在山,月色融于水。菊畦两三丛,烂漫炫金紫。净乡广作缘,池隙扶六枳。 霜重警林乌,波寒定潭鲤。岂惟荇藻流,镫影一船舣。旧游吴越交,十载五湖涘。清景对灵 抱,良宵数有几。

观姚少师录童中州后和陶诗书后

道衍未入燕,能诗乃名诗。偶写友朋作,命意殊冲夷。中州旧相识,寄远界乌丝。一卷《后和陶》,书以徇心知。繇靖不再睹,自洗软媚姿。足知才力强,所施无弗宜。和尚故不错,责之何苛为。吁嗟太孙帝,柔弱祚渐衰。文皇一振厉,遂廓二百基。此见和尚功,长育亦不赀。世俗恢奇策,传闻多可嗤。要之游佛门,固是英雄师。往昔见摹本,手迹今兹披。他年请刊石,用补集所遗。

吴园

拙政山怨老梅, 百年池榭几遗栽。碧桃临水才三足, 犹背东风滴泪开。

答潘麟生

阑风苦雨积莓苔,兼喜湖山绿酒杯。握手花丛人渐老,论心水会我重来。频年离绪桓三弄,遍地征尘杜《八哀》。短后儖儳落 + 马,公言龛乱正须材。

雷浚

雷浚,字深之,吴县人。诸生。有《道福堂集》。

自黄县至宁海州道中作

自离黄雕来,行行渐沙砾。不知身入山,山远青屴崱。雪压山气沈,透空转缥碧。 斜阳来照之,倏忽成霞赩。变幻不一时,陆离兼五色。是日行未远,鸡栖日将夕。疲投茅店 宿,山月店门白。

山行古乘樏,厥制似即屎。汉时始用轿,隃岭平妥帖。我行山海间,我车阻高冈。 无轿不得进,有木真豫章。似梯桄以绳,似网似箕张。用驾驴背行,云宜山路长。山辎名不俗,采之入诗囊。

四更山月落,星光淡原野。仆夫恃谙练,驱驴出道左。昏黑望前林,明白顾后火。 行行阻深涧,对岸高破硪。鸡鸣知逼村, 覛路无一可。路旁似有人,呼之乃树也。蹇驴啮径草,我稳山辎坐。此时脱遇盗,倾刻当无我。东岭透朝霞,西岭烟雾锁。四顾默无言,一身 万峰裹。

上山势似难,登顿从无失。下山势不留,往往多差跌。一跌幸无伤,雪后铺如茵。 人驴同扶起,扑雪如扑尘。

绝壁两崖分,中通路一线。人马鱼贯来,去来厄捘腕。捘腕犹可避,马碍岂容旋。 出门戒欲速,崖口伫少间。少间一仆下,疾行呼不来。徐徐山辎入,壁上绣古苔。

沈沈山中宅,未识何人居。历历山中村,绿窗俯通衢。岂不虞盗贼,世乱此晏如。 自入东莱境,道路无妇女。汲水临深涧,浣衣来楚楚。山僻偶一见,此风胜邹鲁。

皇天夜雨金,万夫朝死斗。牟平土不穀,民穷何述富。帝敕金星下,驽力试补救。 又恐逸则淫,金沙杂纷糅。拣之更链之,辛苦同芸耨。我行升高山,下视人辐辏。询云淘金户,蠕蠕聚万首。稍近皆败絮,腾趠如猿狖。此邦本不肥,尔生亦太瘦。

四月九日重赴白隄汪氏馆斋是夜月不甚皎徘徊清梦轩池上凄然有作

兵残剩得旧楼台,楼下池边半绿苔。几辈人如花骤落,今宵我与月偕来。不堪怀旧 刚闻笛,如此寻诗合举杯。昨日陇头书恰至,殷勤犹讯劫余灰。

贝子木明经半行庵遗集刻成题后用调生丈韵

生能草檄兼横槊,无命皇天底赋才。饱食太仓腾鼠子,饥驱歧路泣龙媒。祖鞭欲著似春梦,韩集谁编几劫灰。尚有定文同志在,招魂直欲上西台。

史兰

史兰,字双梧,嘉兴人。诸生。

过翠云精舍读液川上人观幻居诗留题

液川吟诗如画竹,修竿劲叶风生屋。有时作画复题诗,见诗不见画满幅。即今何处

留遗编,小桥流水南湖曲。大小乘参短长吟,禅林应当佛书读。

丁申

丁申,字竹舟,钱塘人。诸生,候选主事。

秋日严州城下用放翁初秋有感韵

萧萧落木下孤洲,叠叠穷山豁一州。枫叶江浔帆影碎,梅花城郭笛声愁。归耕游卒 争刑马,垦废贫黎合买牛。休养此邦诚不易,长官匪止俸钱筹。

丁丙

丁丙,字嘉鱼,号松生,晚号松存,钱塘人。诸生,江苏知县。有《松梦寮诗稿》。

送庄四归毗陵

离怀折赠柳毵毵,春到旗亭酒正酣。铁笛一枝催梦醒,梅花风雪满江南。

茶庵招游西谿答之即坚其约次韵

只消雨不恼黄昏,明发招邀出郭门。十八里中花更好,两三人约酒先温。水楼禅话 交芦偈,野寺诗寻宿藓痕。试与软红尘土客,清名持较果谁尊。

借竹轩

瑞隆院里翠黏天,看竹曾传北宋年。玉版禅赊烧筍客,金题赞乞散花仙。窗帘大好辉千个,风月何烦买一钱。登眺愿资双不借,最清凉处独高眠。

筠轩丈以雁山茶饷客

雁山色如古鼎彝,丹砂翡翠青瓜皮。四十九盘云合离,一百二峰烟芬菲。客儿游屐独见遗,诺讵那至开初基。沈记薛赋彰希微,閤南北兮谷东西。泉膏石髓蒸华滋,五珍之产茶尤奇。梅公诗句高品题,阮家仙种是也非。清明节过穀雨霏,新芽一枪还一旗。武火焙足文露晞,瓶盛箬裹致远宜。铁翁得之笑解颐,新年招集吟朋嬉。小小炉子涂红泥,雪余檐滴烹珠玑。蟹眼鱼眼声澌澌,恍疑瀑在龙湫飞。煎成浅琖浮琉璃,色香味与阳羡齐。座中二老先忘机,裹粮曾踏芙蓉溪。重圆茶梦疏朝衣,鲰生亦幸清诗脾。所嗟互市来西夷,茶纲岁入千朱提。可怜军火无穷期,不抵防海一日糜。兹茶隐秀与世违,解渴不屑沦鲸鲵。主人论敌有余凄,苦心茶味其庶几。更期八尺支杖藜,雁湖绝顶轻攀跻。春茶采采归来兮,延年益寿同丹荑。

黄浦道中

黄浦江头夜月明, 青龙桥外暮潮生。廿年重抚疏疏柳, 输与凉蝉自在鸣。

叶盘新摹丁敬身隐君像属题

砚林钱塘江上人,祖述龙泓丁隐君。负米踏麹供其亲,余力读书常龂龂。下数汉唐 上周秦,鼎彝碑碣通《说文》。篆刻绝艺无等伦,与诸鸿博张一军。词科掌录扬清芬,庭前 诸子皆有闻。张纱古弄屋荆榛,集庆寺后荒秋坟。独留遗像传风神,抱膝坐石全天真。叶子 好学忘清贫,暇操铁笔镌贞珉。私淑前哲香瓣薰,艺林名重同千春。

丁午

丁午,字颐生,钱塘人。诸生。

冒雨访盛凤翔城北寓居留饮春盘醉后有作

入春雨雪多,兼旬风簌簌。枯坐兀无聊,蜡屐访城北。登堂一笑迎,握手意可掬。 天寒泥留饮,是真来不速。嗟我生寡欢,性僻难谐俗。与君久缔交,淡然若兰菊。遇合彼此 同,牖下犹雌伏。瞻顾名利场,无能共角逐。笑彼冠盖多,其奈知食肉。不如咬菜根,静对 缥缃馥。优游寝馈中,万卷丹黄读。知足神自怡,朱颜为君祝。至乐颇耐寻,何必求多福。 冲寒梅信芳,同上孤山麓。

庄棫

庄棫,字仲白,丹徒人。候选主事。有《蒿庵集》。

秋怀杂诗

故乡不可见,仰视河汉流。肃杀亦岁功,动植宜虔刘。朝歌《思归引》,暮歌大刀头。茕独固增感,离思亦萦忧。房栊蜻蛚吟,原野狐狸游。蟋蟀仍在堂,相对乐未休。日月已云迈,良士慎自谋。

柳

东风吹百草,冉冉过柔条。依旧江潭路,其如陇水遥。高楼刀尺缓,古道马蹄骄。 莫问封侯婿,闺中泪未消。

芍药花初放,蘼芜叶复齐。栖鸟白门侧,落日大隄西。朝朝逐游子,暮暮隔空闺。 袅娜今如此,莫负晓莺啼。

王继穀

王继穀, 字子诒, 会稽人。有《听桐庐残草》。

九日登八咏楼同仲兄作

木落废城秋,关山一雁愁。大溪环屈曲,败叶舞飕飗。风雨重阳酒,巾裾八咏楼。 凭栏吹铁笛,万里湿云收。

舟中遣兴

霜雁一声唳,白云天际流。橹摇新涨软,江借晚枫秋。强酒为寻梦,围棋暂避愁。 前湾知泊处,落日破帆收。

萧山道中

大江日落暮烟凝,估舶家家欲上镫。残柳疏星帆影卸,乱鸦声里到西兴。

镜湖即目

故乡风景认依稀,曲曲陂塘雪鹭飞。万户稻蓬围蔀屋,半湖菘翠荡柴扉。黄花紫蟹 酒初熟,红树碧溪鲈正肥。津鼓一声星几点,卧吹铜笛夜船归。

感知一首酬李{无心}伯先生

乘槎欲访三神山,蓬莱咫尺风引还。炼石五色亦何有,谁信娲皇补天手。山林钟鼎两不成,何如独坐援孤琴。醉折幽兰弹古调,空山寂寞无知音。昨者别兄偶弄指,天风海涛入焦尾。余音袅袅千里闻,谁识天涯有锺子。先生当世推经神,主持坛坫三十春。忽听巴音和白雪,喜舞奚翅登龙门。中散许传《广陵散》,一洗俗耳筝琶新。瓦釜雷鸣奚足论,得一知己死何恨。一弹再鼓忘形骸,孤月寥天印方寸。

王诒寿

王诒寿,字眉叔,浙江山阴人。诸生。官金华训导。有《缦雅堂集》。

春暮

野桃无力点晴波,寒食清明次第过。酒价渐低春酿熟,筍船初到市声多。东风芳草 人盘马,小雨杨花客渡河。却忆江南好时节,画桡衫影水如罗。

铜鼓钗歌

银蘤一尺绀龙角,翠漫镂金钿萼。海南女儿颜如霞,不向东风曳珠索。玉螺花鼓青盘雷,碧璎鹅锦连臂来。钗光摇摇彭声起,手撒春星颤鸾尾。洞堂一曲蛮花香,犀床不动双鸳鸯。毡裘都老红酪浆,堕霞簇簇珊瑚囊。何年飞来逐龙子,古井沈沙土斑紫。芙蓉怯玉兰云垂,金虫欲缀愁蝉丝。且铺舞锦呼吴儿,娇鼍促叠催《柘枝》。

蒋节

蒋节,字幼节,上海人。诸生。有《闲侵斋诗集》。

古诗

穨阳散林薄,凉飙入我帏。孤鸿邈天末,客子寒无衣。手把鸣琴弹,弦急不成挥。 非关弦柱促,顾此心愿违。中情自难抒,无伤知者稀。

张明府招赏牡丹次韵

瓯碧鞓红遍草堂,为花耐得六时忙。眼根已眩曼陀雨,鼻观疑参笃耨香。愧我飧槃惊节物,看君健笔擅词场。绿章便奏通明殿,语尔封姨莫漫狂。

同时明府登鼓楼作

列戍悲笳咽,荒陵落日殷。眼中千里客,楼外六朝山。良会矧不易,清游那可删。 高吟聊复尔,莫使动江关。

赠刘明府用东坡喜刘景文至韵

应人一任牛马呼,学道于此窥其隅。平生未著《绝交论》,贫窭自觉交亲无。刘侯 肫挚独念旧,闻风已足敦薄夫。江淮相聚喜会合,期奋迅翮争抟扶。那堪飘泊感节物,又见 荍麦将生须。迩来闭置苦岑寂,似橐驼坐毋乃迂。昨者有约蜀冈去,欲酹卮酒怀欧苏。藉兹 眺远豁襟抱,隔江山色如彼姝。倒衣命驾堪从子,狂言屡发可容吾。知君有句证鸿雪,凭阑 定忆钱塘湖。

苏文忠公玉鼻骍券拓本为剑盟题

解骖为助久未闻,以马借人史阙文。古之佚事孰能继,杭州太守苏使君。使君有马出天厩,嘉名肇锡玉鼻骍。东斋却对李方叔,忽忽惜别情难分。忽推君恩及良友,三致其意殊殷勤。丈夫宁有恋栈志,勖哉蹴踏超风尘。当其要约书公据,一纸笔落生烟云。虾蟆压石信奇喻,字体出入从颜筋。更教涪翁定价直,又以长句烦颍滨。何年刻石石自裂,风雨剥蚀生苔纹。忆昔由拳遭兵火,不共珠玉摧妖氛。眼中旧迹喜重见,万生好古真不贫。晚香堂刻旧曾覯,问值乃索百廿缗。短长肥瘠各有态,秋高二华同嶙峋。迩来摹本苦杂出,东家难效西家颦。蜀中椎拓亦艰得,洋川数石犹堪珍。长公作字留戏语,跋待五百年后人。小生后公岁九百,高山徒自怀清芬。呜呼公之高谊今不作,翻覆之手何纷纷。万生万生善宝此,此券莫使冯暖焚。

病中别谭中丞

不缘多累肯依人,典尽琴书始出门。黄独有粮聊可煮,白云如褐恐难温。囊空易动 穷途感,剑在宁忘国士恩。记否木兰堂上别,今年此别倍销魂。

陈文驷

陈文驷,字季舫,大兴籍祁阳人。有《漱润庐诗存》。

雨中杂诗寄路访岩

春老余寒入被池,阴阴城阙曙钟迟。名心渐逼亲衰后,豪气难销酒熟时。避客性如 羞舞鹤,佣人味似已删诗。此怀祇取奇书遣,遮莫飞花下故枝。

读晋纪

盛誉由来易失真,深源起后转沈沦。江东一样苍生望,争及围棋赌墅人。

天家自给山林费, 高隐争谈著作郎。笑煞史臣难执笔, 荷衣墨绶费平章。

雨窗与个臣夜话

叱咤侯门热,孤吟夜漏残。豪情就束缚,余味耐寒酸。得失争鸡口,文章笑鼠肝。 此怀了无尽,付与酒杯宽。

马赓良

马赓良,字幼眉,号鸥堂,会稽人。有《鸥堂诗》、《鸥堂遗稿》。

偕文孺彦清游曹山寄剡中诸子

凿山采山石,采处名石宕。石尽山成蜕,因之得奇状。曹山最奇绝,覆石如连帐。 铲削知何年,形亏气益壮。一宕在山腹,水洞通咽吭。石岩争险峭,岌嶪不相让。山根走潭底,水石互摩荡。一宕山之背,可即不可望。缘崖入仄径,隘极忽平旷。石壁周四围,幅幅如列幢。其东云石庵,高踞层峦上。巨石千丈强,独立空依傍。下有涓滴泉,万古春盎盎。由来山水奇,造化运意匠。兹独出人工,魄力实雄创。混沌一剖判,青山成变相。我生与山邻,呼俦几跻降。棱棱踏山骨,曲曲入山脏。触目已嶙峋,极险穷幽况。今兹载酒来,岩花媚秋放。好山如佳文,百读终无妨。同游有孙曹,山贼名差当。辟路抉崩榛,登高破石浪。焉知筋力疲,但觉神情王。快哉一啸歌,群山齐和唱。回舟出曲渚,落日明残嶂。卢仝七碗茶,例得山灵贶。

明心寺

佛殿岚光积,山门树色埋。磬声争涧筑,幡影乱藤钗。看竹入莎径,踏花愁筍鞋。 山行逢息壤,游兴未应乖。

舟中不寐起视月色如昼

小艇落寒江,橹声摇梦醒。开篷正清夜,独坐揽幽景。月明万籁歇,山水气俱静。 兴来一扣舷,满江风露冷。

得子九丈闽中书

之子辞乡国,西风吹草黄。门前看流水,离思与之长。忽寄平安语,遥怜鬓发苍。 关山千里隔,有梦到蛮方。

春游仿剑南小体

野色曈曈日气清,短篷柔橹镜中行。山腰束雾初收雨,水面铺烟乍放晴。紫陌莺花催上巳,画船箫鼓送清明。春游到处饶诗思,断句推敲半未成。

焦桐篇寄李{无心}伯慈铭

焦桐慕素丝,明镜照芳姿。之子一相见,关山远别离。秋风动萧晨,早凉生绮阁。 不恨秋风凉,但恨罗袂薄。柔肌莹冰雪,美目耀春星。谢彼脂与粉,还吾婉娈形。秦女引凤 吹,蜀客求凰操。丝竹虽殊音,宫商本同调。焚香理瑶徽,对镜扫蛾眉。焦桐有时斫,明镜 无时疲。

偕丁雪塘任秋田孙彦清游柯岩

吾州山水奇,往往出残剩。曹山既著名,何岩复擅胜,遥望山破碎,近即石散迸。 嵌缀亭馆凉,割剥丘壑劲。繁林戴侧厂,修廊蟠曲磴。崖深闻石气,水清见鱼性。涧香渡幽 花,岩音孕清磬。洵足骋雅怀,况能逃暑病。当年采山石,顽劣遭排摈。岂知易世后,游屐 名山盛。乃知天地间,得失本无定。名理既彻悟,寸心亦明净。剧饮朋盍簪,陶然尽游兴。

入剡

清溪寒 ? 號 ? 號 , 孤艇上滩迟。入剡又今日,看山如旧时。岸崩村径换,涨落渚沙移。不见蓬莱浅,沧桑已可知。

偕谭仲修施均父黄元同潘仪甫张子虞孙子宜及皋社诸子宴集吴山道院

吴山郁岧峣,云物秀虚迥。群彦事幽讨,芒屩杂篮筍。层阴阁微雨,秋日瞢不醒。 历磴上高颠,城市气忽静。墟落点孤烟,江湖团双影。道士何潇洒,结屋桂花顶。登楼开清 宴,疏棂纳遐景。坐见胥涛来,微痕掠烟冷。平生几两屐,选胜苦难准。矧兹载酒游,美客 东南尽。一出恣剧谈,陶然共酩酊。谁能学古人,盛筵欢感并。

寒夜遣怀

孤镫照虚馆,静夜似僧房。煮雪验寒味,爇兰闻火香。明明空理见,历历苦缘长。 意识何由灭,檀心聊自强。

王柘

王柘,原名允中,字雪庵,一字颠枝,号拓园,大兴人。官辽阳州吏目。有《阅莒 草堂诗钞》。

古剑篇

土花绣涩血痕碧,中有英雄古魂魄。白日青天拔鞘看,毛发阴森起离席。昔时成此百炼钢,撼摇星斗批风霜。蛟螭胆落匿踪迹,䴙鹈膏淬生辉光。年湮代远连环坏,石上重磨锋尚快。世无薛烛双明瞳,又无郭振诗豪雄。剑乎剑乎汝不自言可以讬生死,安知人不视作钝铁与顽铜。报恩报仇随人意,何如去化延平龙。神龙首尾不可测,汝独胡为久在尘埃中。

闾山大松歌

盘古氏前生此松,栋材未入唐尧宫。孙枝早受大夫爵,祖幹自匿高人踪。太古甲子不记忆,曾见十二山初封。松高一层一千尺,五层已跨山尖峰。七层拔起势不歇,再长将与天门通。倒身不瞰根讬地,半截纯积烟重重。仙真来劚茯苓白,鬼物时守虎魄红。雨夜辄化老龙去,游戏飞到东海东。归来天晓鳞甲湿,尚带海气青冥濛。东丹王子藏书日,盘桓几度闲支筇。耶律相公吟诗处,歌声定杂寒涛中。医闾万古不改色,古人可惜今难逢。我今来此喜相值,见所未见惊双瞳。愿携枕簟卧朝夕,消受谡谡清凉风。从赤松游意已足,何必十八为三公。

驻跸山

万马簇龙旗,征辽此驻师。军中破阵乐,塞上纪功碑。兵力雄于昔,山名起自兹。 天威犹想见,弩火克城时。

落星石

古来名将相,天上应星辰。到地化为石,当时何许人。更无光采在,竟与碱砆邻。 五丈原头事,因之感汉臣。

海舶夜望

扬帆行浩浩,良夜净风霾。海月龙衔出,天霜雁负来。得偿宗悫愿,祇乏木华才。 叫绝三浮白,秋涛响若雷。

追和梅树君芦花原韵

隔岸分明积雪铺,伊人宛在望中孤。西风八月正萧瑟,渔火一星时有无。野色暗随烟共暝,秋痕淡到笔难图。雁声远向平沙起,寒梦苍茫落五湖。

竹外桃花事已非,斜阳淡沱满苔矶。独临野水和秋语,碎翦凉云作片飞。枫叶霜乾 同瑟瑟,藤萝月映最依依。江湖流落头俱白,不学杨花点客衣。

李龄寿

李龄寿, 字君锡, 号辛垞, 吴江人。诸生。有《匏斋遗稿》。

吊江君虎溪

风狂百岁中,起灭浮云变。往事足悲感,恻恻坠欢恋。茧园花乱飞,对语梁间燕。 青盖卧空阶,苔迹不可践。流落故人手,犹剩一枝楝。楝花风起时,杯酒冷难咽。诗人屑卑 官,敲扑尘埃贱。所慨卧治难,雨雪先集霰。魔女力欲降,浪蝶挟之战。水魅笑开口,土神 惊视面。日月大圆镜,百怪烛若电。真灵位业图,神仙固未谴。当其机■时,思之有余颤。 值此楝花开,目瞑竟若倦。人去楝犹花,忽忽六度见。丁令久已归,梅尉未成传。窈窕美人 心,清诗百洗炼。生自祷泰山,殁或祀小县。荔丹蕉黄辞,侑此寒泉荐。

十月十七放翁生日同人集具足庵西岩上人房用放翁长歌行韵

大星当空芒角生,誓扫欃枪屠鲵鲸。南渡诗人鸣不平,醉梦苦复思两京。年逾六百值今日,忧时感事犹此情。祖宗九庙思神灵,中天日月煌煌明。嗟翁间关梁益间,伏枥老骥余悲鸣。中原未复愤所切,焉能守口常如瓶。六十年中诗万首,肝胆欲向何人倾。昔读翁诗发长叹,况今烽火魂犹惊。北风萧萧来天际,空庭落叶寒有声。座上酒兵且指挥,相期一醉开愁城。

题钱松壶画

钱老骀荡人,游迹满万里。此幅自题滇南作,三尺剡藤赠黄子。黄子亦是江南人,归梦迢迢逐江水。如皋江村有故居,游钓敢忘林壑美。梧桐百尺天冥冥,秋烟在树月在棂。古槐浓绿净于拭,芭蕉叶大风翻屏。出门看流水,坐石濯足清。泠泠孤琴偶一弄,时有沙鸟飞来听。人生得此亦自足,何必局促奔走罗膻腥。钱老写此岂无意,倦游白发伤伶俜。呜呼松壶古狂士,画意萧然谢尘滓。正从精密得微澹,艺成非儒亦非技。江山万里盘心胸,能事不数文五峰。江关倦后家山好,何日能还独客踪。

送紫玖丈归里同子屏韵

身如辞树叶,风急各纷飞。客里还言别,君行我未归。井荒多冷灶,秋劲念单衣。 盗贼何时息,重来款故扉。

清明

禁烟时节野烟屯,恻恻寒多独掩门。入夜雨声偏破梦,一年花事暗惊魂。野坟处处 逢春祭,孤子年年有泪痕。去岁玉峰曾记住,干戈回首怕重论。

罗志让

罗志让,字耦廉,丹徒人。候选知县。有《亿堂诗钞》。

薄暮舟行白塔河

扁舟摇落日,极浦生明霞。垂杨阴杳霭,柔橹声咿哑。迢迢见归犊,隐隐闻啼鸦。

浣女缘曲岸, 钓叟当圆沙。溪风拂絺绤, 汀月横窗纱。吾羡张志和, 泛宅为生涯。

哀戴澧

岁在癸丑春二月,天狗堕地来朱方。卓然有士年八十,姓戴名澧颀而长。平生好学精篆隶,古文一册垂光芒。踽凉宜入独行传,耻与流俗相低昂。忽闻城陷泪横臆,灭寇无术心回遑。呜呼彭咸古来有,誓往从之归帝乡。招魂祭葬衣冠在,翩然披发下大荒。

阻风登燕子矶

大风掣水水尽飞,阳侯出波阻我归。况复远山衔落日,轻舟急系燕子矶。燕子矶前一片石,危亭下瞰江水白。神禹万古开洪荒,蛟龙千里藏窟宅。指点京口列三山,兀然可望不可攀。平沙直与青冥接,远树但在微茫间。我今攀萝恣吟望,匹练襟天使心壮。回思局促坐篷窗,敢向风姨拜佳贶。

行丹阳道中

岭上浮云湿,春寒昨夜知。水喧争涧急,钟远度村迟。短犊归前浦,栖霞绕暮枝。 重来经此地,定是杂花时。

秋感

秣陵今已撤重围,帐下偏裨著锦衣。鸿雁远传霜信至,鹭鸶低傍水田飞。渐看废垒 生秋草,何处寒碪捣夕晖。多少故人明月夜,相思相望未言归。

丁尧臣

丁尧臣, 字又香, 会稽人。有《蕉雨山房诗钞》。

题画

绿树簇浓阴,草亭结幽境。山隙补遥天,林杪露帆影。渡头落日闲,溪流一何迥。 云际忽钟声,野寺傍孤岭。地僻往还稀,市远鸡犬静。茅屋三两间,翛然篱落整。中有太古 人,独与尘市屏。名利两不知,心共白云冷。

高邮舟中

一水连吴楚,长天接海滨。湖浮城作岸,波涌月随人。寺壁谁留画,桃源莫问津。 中流频击檝,感慨百年身。

天连湖水碧,远树隔村微。征雁几行急,秋风何处归。波摇帆影活,云带夕阳飞。 多少间鸥鹭,应怜作客非。

赠隐居

四围岚翠锁烟萝,结得茅庐傍涧阿。地僻不嫌人迹少,树深祇觉雨声多。摘将松子 烹新茗,采取兰茎补绿蓑。几度光阴浑不记,窗前日月自经过。

阿房

百里骊山一炬焦,劫灰何处认前朝。诗书焚后今犹在,到底阿房不耐烧。

魏锡曾

魏锡曾,字稼孙,仁和人。贡生,福建候补盐大使。有《绩语堂诗存》。

弃妇吟

女子惮远適,临别常依依。忆昔妾来此,掩泪牵母衣。朝别父与母,夕见姑与舅。 区区一寸心,生死为君妇。采桑起执筐,洗手归作羹。三岁靡室劳,归宁且未遑。归宁且未 遑,嗣君適远道。晨昏贱妾侍,颇谓妇窈窕。吁嗟泰山阿,长松萦女萝。吁嗟彼何人,中乃 施斧柯。东家有贤女,鸳鸯新结侣。人生实有命,伤余何妒女。木落无还枝,妇弃无还期。 但祝舅姑寿,妾请从此辞。念君隔两地,思君落双泪。妾去君心伤,愿君遣情累。褰裳登长 途,回首见小姑。小姑哽不语,无力回嫂车。

徐杭舟中

朔风起林莽,凛冽吹人衣。归舟日将夕,但见黄叶飞。卧看水中影,绿树还依依。 波旋影零乱,荡漾烟痕微。遥天积层雪,远山衔落晖。寒鸦没平野,群鸭归村扉。寓目即成 趣,当此心忘机。有客荷樵立,吾为歌采薇。

瑞安道中

山椒聊税驾,竟日雾迷漫。我有穷途哭,人嗟行路难。叱牛怜子母,对竹觊平安。 苦羡庞眉叟,茅檐春酒欢。

叠韵柬赵捴叔

六旬阿母陷虎口,嗟我妇子日聚首。披缁耻就窣堵波,静俟鬼伯歌《薤歌》。鹃啼 血出不可拭,乌鲗遭风仍吐墨。横流何止叹王尼,楚词那敢希唐勒。昆仑琵琶俗学驯,更受 要道知无因。通儒愿勿作奇士,舌挢群惊秦越人。

再叠韵呈季贶

独立谁胜众嫮哗,壁弓真已动杯蛇。梦中识路一知己,海内藏书凡几家。岂有恩仇 连将相,苦教门第占清华。多君豪气犹畴昔,不似寒林瑟缩鸦。

鸣玉犹增坛坫哗,哲人处世玩龙蛇。顾厨俊及兹多口,粤宋燕秦岂一家。党籍无碑

刊茂叔、琅嬛有地辟张华。劝君勤校五千卷、遮莫秋林噪鹊鸦。

汪瑔

汪瑔, 字玉泉, 一字穀庵, 号芙生, 番禺籍山阴人。有《随山堂猥稿》。

拟出塞行

丈夫既许国,不复论死生。按剑出门去,万里如家庭。登高望山川,长啸天为青。安知百世下,史册书姓名。将军出马邑,校尉驰龙城。战苦戈戟残,道远霜雪清。野马嘶落日,哀笳动连营。此时不封侯,嗟哉李北平。

高州道中

飞蓬无定根,贫士多远游。一为劳者歌,千里来荒州。山深生奇寒,日落如深秋。往往遘奇险,心目不自谋。危途仅咫尺,下有急磵流。虎行密箐折,猿啸空林幽。行縢偶一解,凛然难久留。桑弧平居志,至此增烦忧。饥驱自古昔,戚戚将谁尤。

谿风飒然生,山雨急而至。此中秋未来,黄叶已满地。曲折山谿中,徒御行不易。 褰裳风复寒,下帷雨难蔽。稍稍出修途,愁破见崖寺。远岫青欲浮,平田绿无次。

急瀑飞高峰,其势必下注。谿涧一受之,众流悉奔赴。怪石生当中,冲激作奇怒。 淜湃方鼍鸣,岩崿犹虎踞。极力为争衡,其意若相妒。遂令白练飞,莽然四森布。殷雷鸣一山,喷雪溅百步。仆夫蹋波行,浅流仍屡渡。奇观既目眩,异响复心怖。山行无迟留,见此为少驻。高咏苍茫间,天风吹日暮。

粤秀山观晚霞歌

三庚朱陆颓骄阳,万里渤澥连荣光。日精水气荡摩久,倏忽霞采生西方。霓旌虹靷 纚连不可数,烛龙十二招我登崇冈。升高俯视奇景出,遂与昆仑九光相颉颃。初犹隐见限边幅,继乃澒洞连苍茫。法界金绳万条彻,炎官火伞六合张。威凤群飞过西岳,逴龙赩立移南荒。仙人佩裳纷五色,天孙奇锦开七襄。紫气函关孰来过,黄人日观争回翔。赤熛六月怒不已,《朱明》一曲歌未央。金支翠蕤忽变灭,珠光剑气犹辉煌。我昔吟诗爱余绮,亦思学道 霏丹裳。腾辉舒艳今一睹,看朱成碧心飞扬。赤城作赋慕孙绰,丹楼引喻思长康。流云洒液如可得,迟我十洲餐玉浆。

薛道衡逍遥台故址

刺史风流不可攀,高台遗迹已榛菅。可怜落日登临处,只在春风想像间。有客来寻 三月雨,隔江犹是六朝山。花前雁后终无赖,我亦离家且未还。

袁督师祠

大荒披发■重阍,功罪茫茫不可论。星夜勤王三辅急,烟尘转战九边昏。朝衣毕竟

悲东市,锁钥何曾重北门。今日故乡还立庙,当年穷塞孰招魂。

欧刀碧血恨漫漫,褒恤翻从异代看。事阅沧桑公论出,时当叔季将才难。谣言八合 怜明月,疑狱千秋误曲端。别有表忠碑记在,惜无元石与镌刊。

开矿行

虹光夜半冲南斗,陵石见荣神所守。镇州地接昌化军,谁向穷荒挟山走。风轮迅疾云帆开,径从溟渤嘘阴霾。碧眼贾能窥宝气,黄头郎待铸横财。何人竟把卢龙卖,黎婺峰前见光怪。任教铅水泣仙人,那识银官分地界。姎徒毳服红鬖髿,指麾徒众吹旋螺。摸金直用魏公注,得宝将为杨氏歌。谁知顿触山灵怒,鞭叱螣蛇作神雾。騕褭由来铸不成,狼毕竟寻无路。阿奴心计亦可怜,莫夜已费黄金千。宝山空手且休矣,碧嶂回头还俨然。离交万古金银气,今日珠崖安得弃。栖陆沈沙造物心,炎风朔雪天王地。玉斧威棱铜柱标,觊觎焉许小{大弓}夸骄。请看环宝留中国,应识神灵翊圣朝。

春日登粤秀山寻朝汉台故址

芜绝当年朝汉台,东风三月木棉开。祇今城郭余春色,如此江山称霸才。翠羽珠玑 曾北去,楼船戈戟竟西来。休论左纛无消息,沛邑歌风亦草莱。

感怀

患难饥寒后,艰虞性命存。劳生今白发,落日几朱门。思旧真疑梦,论交亦感恩。 茫茫知己泪,寥落故衫痕。

振策鸡栖倦,谈经马厩开。不知何事乐,偏向此中来。枚子飞书笔,宾王作奏才。 古今远相望,风雨满蒿菜。

拟唐人贫女诗

小箔红蚕亦耐饥,流黄辛苦复何辞。夜繙线帖镫无赖,晓谢铅华镜未知。告语几曾 烦鸩鸟,胜人翻自悔蛾眉。年年冷伴梅花住,谁见天寒倚竹时。

吴养原

吴养原,字思澂,仪徵人。荫生,官刑部主事。有《觚斋诗集》。

宝应道中

篷底推窗透夕晖,春寒草色滞芳菲。远疑翔鹭孤帆饱,浓爱堆鸦老树肥。驿路摧残 知贼退,湖波吞吐觉隄危。频年泽国悲鸿雁,上策治河自古稀。

鄭州扁鹊故里

奇缘水饮上池深,肺腑无劳按脉寻。垣一方人能洞见,不曾窥得李醯心。

谭锺钧

谭锺钧,字秉卿,号古谭,新化人。有《古谭诗录》。

秋感

资阳落拓赋闲居,万感苍茫夕照余。不信才华仇福命,敢因科第薄诗书。沧桑今古 残棋局,睥睨乾坤一草庐。烈士壮怀频起舞,《阴符》读罢夜窗虚。

九岗山色晓晴初,泉石闲云自卷舒。白板黄花家酿熟,药炉茶灶故人疏。身余傲骨惟嫌病,天纵奇穷独著书。年少贾生多痛哭,中原民命更何如。

长沙感事寄黄军门

遍上流民郑侠图,疮痍莫补叹迂儒。关中戎幕皆吟侣,海内诗才半酒徒。金粉红颜 牵傀儡,沙场碧血染珊瑚。缁衣一领尘汙厚,兀对残镫碎唾壶。

三千世界经三徙,四十年华历四朝。未必奇才天竟忌,果然清品贵何骄。达官厚禄皆缘定,处士虚声要福消。几度开函教殷浩,书空咄咄怪无聊。

边关行

边风吹沙沙半飞,营门栖鸦鸦乱啼。客子膏车酒泉北,将军驻马汉关西。将军揖客葡萄酒,耳热乌乌酣拊缶。老卒犹能舞佩刀,幼兵亦解鸣刁斗。晨昏训练气不骄,军中部伍各见招。始信今有定远侯,不尔便是霍嫖姚。天下雄关推第一,一将当关世无匹。北门锁钥君何如,况有生平万人敌。安得生擒吐谷浑,壮士长驱入玉门。狂飙催送关头立,浩浩无垠见戈壁。昆仓蜿蝘发河源,九曲狂流望不极。雪山璀璨冰梯高,一白遥含远天碧。俯瞰山城临九渊,宝石磥砢泉涓涓。兴来匹马万峰顶,浩火汲取衙斋煎。祁连葱岭渺天末,苍然大地浮云烟。我抚沧桑怀太古,一粟太仓渺何许。干戈漂泊寄孤踪,回首湘山泪如雨。为君楚舞歌楚歌,万里龙堆柰若何。昭代承平二百载,徒旅嬉嬉卸兵铠。一朝树纛张楚军,斥堠牙旗尽修改。身先士卒轰雷霆,翦锄荦确披榛荆。手皴足皲精力悴,周道碨如砥平。紫电青霜严武库,汉官仪重见军门。我乘高车叩关吏,寻诗塞外添诗意。天山皑皑衰草黄,一抹斜阳浩无际。胡笳羌笛声咿哑,匈奴未灭何为家。主人劝客且痛饮,插剑醉卧沙场沙。

沈銛

沈銛, 初名际昌, 字元咸, 号诚斋, 娄县人。诸生。

贫家行

贫家粮尽稗作粥,南箕不簸一粒穀。贫家酒瓮空床头,斗杓盛住天浆流。仰视苍苍 增百感,箕舌自张斗自转。诚斋老子常思量,人到饿死真自强。山中采薇谁再作,竿头晒裈 亦足乐。君不见明珠换得玉颜红,奴辈发难曲未终。又不见挂冠织帘不自耻,乃是吾家一奇士。

胡公寿

胡公寿, 初名远, 以字行, 江苏华亭人。

偶成

金紫何曾偶挂怀,石田茅舍自天开。丝竿钓月江头住,竹杖挑云岭外来。匏实晓收 栽菜圃,土花春长读书台。革除一点浮云虑,木笔题诗酒数杯。

蒋确

蒋确, 初名介, 字于石, 号石鹤, 江苏华亭人。诸生。

游善应禅院

萧寺最岑寂,寻幽兴独长。林疏寒鸟聚,竹密暮云藏。野殿丹青古,空庭草树荒。 徘徊人不见,楼外锁斜阳。

独坐

独坐空斋里,柴门镇日扃。径荒苔自绿,春近草重青。诗不缘贫辍,愁难与酒醒。 胡笳日暮发,哀怨不堪听。

沈祥龙

沈祥龙,字约斋,娄县人。诸生。有《乐志 集》。

观梅回汲细林山泉水

我昨探梅乱云窟,欲练梅花作诗骨。祇愁竟体尘氛多,脉脉芳馨苦汩没。愿汲泉水山之阴,未洗双眼先洗心。心清始觉吟梦稳,缟衣仙子来深林。斜阳半峰泉泻磴,手挈银瓶下幽径。归来分水呼煎茶,浣涤徐凝恶诗净。

次韵和贾云阶丈新居落成

水竹三分画不如,秋风新筑辋川庐。静观世态涵琴德,老賸诗心慰瑟居。饮续醉乡 王绩记,每披相地景纯书。轩窗明净宜幽隐,坐对黄花乐有余。

过萧尺木墓

家国沧桑一慨中,《离骚》图就思无穷。遗民老去诗心苦,古壁长留画本工。巷僻

难寻庐一角,冢荒重薙草千丛。春来樵采新申禁,宰木森森夕照红。

张定

张定,字叔木,娄县人。诸生。

日本刀为胡云起作

先生好剑更好刀,寒光上腾秋月高。昆吾之刀世难觏,大食之刀辉久韬。二者搜罗不可得,日本有刀求之亟。往时日本来观光,宝刀流传入中国。中国尚文不尚武,藏此刀者半伧父。有谁拂拭䴙鹈膏,素练横空下阶舞。先生得之喜欲狂,摩挲珍重如球琅。酒酣奋袂出示客,长虹三尺辉宝光。吾谓先生可一试,莫使毛锥误我事。挺身投笔学班超,塞外立功酬素志。先生一笑郁塞开,诸公狂饮歌莫哀。夜半此刀作龙吼,愿从先生登燕台。

葛其龙

葛其龙,字隐耕,上海人。诸生。有《寄庵诗钞》。

枯树

静耐冰霜历苦辛,回头风木倍伤神。啼乌落月浑如梦,古墓空山不再春。百尺尚存孤立意,千秋几见后凋身。兴嗟岂独桓司马,手泽摩挲感昔人。

独立苍茫阅古今,兴衰容易是园林。河阳春尽浮云散,金谷秋荒夕照沈。一局残棋 悲世事,百年浩劫悟禅心。窗前读罢兰成赋,落叶西风感不禁。

松江早春

一江晴暖涨红潮,遥望芦滩雪已消。正是鳜鱼初上候,钓船齐泊梦花桥。

黎承忠

黎承忠,字献臣,号喟园,长汀人。有《葵园诗草》。

偕秋原刺史游香岩寺晚宿李官桥

理屐趁兴晨,行舆向山路。石磴碍流泉,阴云翳深树。初历樵径纡,俄转奔崖露。 修藤蛇蝮蟠,长松猿猱附。势诡赏正延,步窘魂已怖。防仆前舁危,贾勇后从赴。险峭履渐 夷,风壑号犹怒。苍翠密竹交,向背列屋错。烟际遥闻钟,僧庐向何处。

丛篁蔽群木,万山围一寺。出险天忽开,入宇势顿异。朴野见雏僧,摩豁登初地。 开创肇有唐,兵气毁近代。缅维一行高,迥留千偈秘。乍炊松肪腴,旋饱香积饵。频眷顾客 偕,空啸叶鸾吹。回瞩展苍莽,云迷失丹翠。 虽探香岩奇,未历白崖妙。远瀑散惊响,长林霭余照。入冬石骨青,向晚江云烧。 人家背岭居,炊烟出屋篠。牛羊见墟里,鸡豚聚古庙。憩访野人名,归屏长官导。眷兹畎亩 间,慨予行役劳。沽酒慰尘踪,濯缨聊强笑。

马草行

荒城斗大山之陬,健儿十万横戈矛。三更传谕徵马草,里胥持符下乡堡。排户输草 行给钱,小民汗血官犹怜。眼看刍草如山积,城中载运夜不眠。谁知刍草散满野,竞刈新麦 来秣马。可怜麦熟未登场,马病肥死人逃亡。

初见燕

兵甲三春满,经年海上归。未依新画栋,还认旧柴扉。雨细窥帘入,泥融掠水飞。 营巢吾愧汝,飘泊寸心违。

大梁杂感

孤塔平悬郭,危楼上切云。谁过朱亥市,复祀信陵君。北檄传鸡羽,南天阻雁群。 杞忧吾曷敢,时事未应闻。

屡下勤王诏,诸军自养痈。犒师劫行旅,积庾困输供。张镐援何后,思明计已穷。 空传裘带略,息甲久山东。

将冗成名易,恩宽受病深。烟氛何莽苍,雾雨且浸淫。竖子忧方大,畸人迹漫寻。 何时开笑口,城郭避尘簪。

九日偕虞裳登吹台

岳气河声接槛来,遥凭秋色一衔杯。平台会散当年客,公䜩人思一代才。世治交游 名自贵,途穷怀抱向谁开。凭君莫洒登高泪,斯地重阳得几回。

酬镐仲比部

秋深数枉山中讯,劳汝殷勤问卜居。岂意尧年逢水患,独陈贾策著河渠。白龙上诉 愁穷羿,衰凤行歌比接舆。我自湛冥君矫翼,未妨同量测拘墟。

俞燿

俞燿,字雪岑,大兴籍德清人。有《雪岑残稿》。

登嘉定郡楼望峨眉山

西行未作峨眉游,舣棹独登江上楼。三峰两峰太古雪,千树万树孤云秋。寄书远近一青鸟,随艇浮沈双白鸥。安得芒鞋自来去,闲从绝顶凌嘉州。

糟丘歌寄东生弟

人间不筑黄金台,天上不修白玉楼。腹中文字半磨灭,化为酒气成糟丘。我欲死埋 其侧生与之游,不醉亦醉不愁亦愁。光阴一掷几千载,吾将老死无春秋。不知人间天上,何 处可以长居而久留。愿假东来鹤,为我西飞招子由。茫茫江汉表,荡月乘虚舟。江汉滔滔去 何驶,汝驾长风好来此。一杯涤尽胸中尘,共卧糟丘万古春。

塞上春感

城头觱栗响金飙,听说群羌更动摇。冻坼平冈饥牧马,阴沈大漠冷盘雕。花门祸肇 天俱惨,草碛营开土半焦。杨柳东风何处是,春来还忆灞陵桥。

岁暮高吟《宝剑篇》,短衣盘马忆当年。关中苍莽风云地,陇上飘飖雨雪天。羽箭 自传青海外,音书谁寄玉门前。敦煌此去皆烽火,仍是君王旧拓边。

短歌行

丈夫不能骑马挽强弓,飞身杀贼称豪雄。胡为翩翩乃学少年子,斗鸡走狗驰青。我 闻南北豺狼走平圹,霜戟森森列万帐。梦中忽割几人头,渴吞战血心犹壮。天子传呼赐宝刀, 殿上亲披金字袍。左插白羽右乌号,翻身仰射凌秋雕。一生龌龊非人豪,下视王侯将相如牛 毛。

贺菊人太史

蹀躞青骢下九垓,雕鞍香踏软红来。筵张玳瑁调金鼎,笔架珊瑚咏玉台。萱草岁寒凌雪健,杏花春暖向阳开。于今《雅》《颂》承平日,眠底纵横见此才。

题沈梦眉荆巫征帆集并送其还吴兴

春江澹沱风萧骚,故人揖我归蓬蒿。巫峡连云一千里,鱼龙出没冲波涛。上有猿猱啸饥虎,下有鼋鼍蟠冻蛟,滩石走雷声怒号。眼前突兀撑空更何有,丹岩翠壁高插万古出穹霄。扁舟东去远相望,峭帆疑出青天上。一峰欲雨一峰晴,阴阳翕辟穷殊状。瞿塘峡,滟滪堆,飞流动地争喧豗,篙师惊险颜如灰。中有豪吟客,啸咏沧江回。忆尔泊舟山月低,篷窗夜黑鸱鸢啼。投诗赠魍魉,举酒酹支祈。高歌放棹还苕溪,不与九十六峰相争奇。噫嘻乎!巴山楚水愁风雨,诗卷长留伴行旅。远涉荆巫怀故乡,未识故乡在何许。东风朝暮来,吹送章华台。举头见吴会,日出沧溟开,胸吞云梦洗尘埃。霸图今已矣,雄略安在哉,丈夫歧路休徘徊。沈郎沈郎尔携此卷游江东,勿惊海若而语鸿濛,但恐沈之水府藏蛟宫。不然破空飞去,化为亘古不磨双白虹。

【卷一百六十八】

曾纪泽

曾纪泽,字劼刚,湘乡人。袭一等毅勇侯,官至户部侍郎。谥惠敏。有《归朴斋诗 钞》。

山行

禹迹江河万古流,史详华夏略穷陬。秦皇无术求三岛,邹衍凭空撰九州。南北自教 鹏运海,古今非复貉同丘。望洋向若嗟何补,且遇青山汗漫游。

次韵答李六容

穷荒无雁只爱居,系帛遥传海上书。小隐知君非忘世,远游怜我似逃虚。梦魂楚水 吴山里,诗兴寒烟宿雨余。与子忽分蛮触角,人生何处问乘除。

寄怀李六容兼柬香岩

鸾皇戢羽豹藏文,剑阁山头湘水濆。两地酒尊同酩酊,十洲棋局任纷纭。乘槎误觅 支机石,杖策新成出岫云。妒杀蘧园高卧叟,何年水竹遣平分。

八月十五日夜森比德堡对月

祆庙园楼百仞高,梵钟清夜吼蒲牢。见闻是处驼生背,官职无名马有曹。明镜喜人增白发,奚囊搜句到红毛。冰轮何事摇沧海,去作长天万顷涛。

杂感

廿年稽古注虫鱼,搜括嬴秦劫火余。为考谐声类隔术,兼通画革傍行书。九千文字成嚆矢,十万程途骋传车。安得上林亲射雁,羝羊未乳返吾庐。

铜梁山麓涧之湄,山色苍茫云意奇。荷发双池香在叶,桐高百尺老无枝。未成避世谋中隐,正坐封侯怅数奇。寄语九峰山下士,汲泉应及在山时。

骥服盐车上太行,眼中驽蹇任超骧。九方皋死心先冷,八尺身存项总强。岂有蔷薇 颁皂枥,误寻苜蓿走沙场。何年外阪争途罢,一骋兰筋陟六方。

朝骖黄鹤上瀛洲,无数仙灵相酢酬。九转成丹无火气,三缄在口是清修。朝从叶县 飞双舄,睡倒华山合两眸。笑我未谙兜率例,绿章犹抱杞人忧。

作队长鲸集海东,怪云腥雾掩晴空。六弢金版都陈策,五楘梁辀备讨戎。但愿奇功 归谢傅,自甘无识似桓冲。澶洲一掷诚孤注,莫怪南箕荧帝聪。

无题

春尽寻芳自怨迟,故为骄蹇正情痴。瘦留丰态涡双颊,笑带啼容蹙两眉。琼拌脂缸 珠拌粉,金镶兰药玉镶芝。昌阳香溢盆池外,过院东风未尽知。

邂逅高唐日未曛,谁言暮雨又朝云。佩环留质亦何益,香火寻盟空复云。雁帛传书 询隐语,鲛绡织句拟《回文》。蓬山有客闻长恨,不怨君王怨六军。

周馥

周馥,字玉山,安徽建德人。官至两广总督。谥悫慎。有《玉山诗集》。

慈雀

天寒空林雀呼饥,老雀觅食归来迟。有蛇入巢吞其鷇,绕林哀噪不忍离。须臾忽引众雀至,群飞啄蛇蛇委地。蛇死顿供众雀饱,得丧循环报何异。我家江南尝苦兵,人啖人肉骨纵横。人心不古天降祸,至今父老犹吞声。我作此歌示人子,养育恩深同一理。区区口腹何多求,劝儿见猎休心喜。

秋日过桃花寺

落日苍黄野色昏,乱鸦声急赴前村。荒田退水鱼虾贱,秋稼登场鸟雀喧。萍梗自伤 天地窄,香烟徒见鬼神尊。湖波阅尽兴亡事,岁岁寒潮到旧痕。

出山海关

当年关外判山河,谁向横流挽逝波。朋党半从科第起,弹章繁比战书多。锦衣狱急官如草,皮岛人降士倒戈。却叹路旁望夫石,年年风雨泣烟萝。

读袁爽秋农部诗有感

红尘十丈人如海,展读新诗眼为明。江上钓丝牵客梦,酒边吟管带离声。车轮碌碌 青春老,案牍茫茫白发生。拟约丁沽看柳色,登楼恐惹故乡情。

闵农

麦欲老时雨如缕,冒雨腰镰裸两股。割来一束釜中煴,姑妇夜舂儿渴乳。人家麦熟忙上仓,侬家麦熟已断粮。半纳田租半偿债,耞板未停检衣卖。东家老农怜我饥,手分遗穗供作糜。夜深一饱枕蓑卧,蚊雷殷殷来嘬肌。

三更炊饭四更起,入山采樵二十里。樵归担向市中卖,杯盐升米养妻子。夜来西风透骨寒,一家喜跃忘衣单。橡林坠果纷满地,拾来可供三日餐。侬家无田分外苦,何用劝农动官府。山头垒石尚栽粮,贫人安得一亩土。

山居宜种淡巴菰,叶鲜味厚价自殊。可怜粪田无豆饼,典衣买饼培田腴。无衣或且借衣典,邻里痛痒关肌肤。六月炎风天忽雨,烟叶沾濡色如土。妇子收烟忙若奔,淋浪遍体

无乾缕。侬家无田无烟卖,忍饥不负三分债。

三月招得采茶娘,四月招得焙茶工。千箱捆载百舸送,红到汉口绿吴中。年年贩茶苦价贱,茶户艰难无人见。雪中芟草雨中摘,千团不值一疋绢。钱小秤大价半赊,口唤卖茶泪先咽。官家榷茶岁算缗,贾胡垄断术尤神。佣奴贩妇百苦辛,犹得食力饱其身,就中最苦种茶人。

种田莫种黄泥沟,嫁女莫嫁莲花洲。沟田年年发秋水,洲家顿顿餐穄子。结姻仍是旧姻家,但求佳婿足桑麻。朝出负薪暮汲水,日助锄苗夜纺纱。柳林霜重争收叶,菜圃天乾独灌瓜。渠侬不劳乏生路,但解治生劳不苦。祇恐青黄不接时,嫁衣典尽饥难度。幸免饥寒愿即伸,终身荆布敢辞贫。茫茫天道那堪问,此辈偏多孤寡人。

过枞阳

射蛟台畔系孤篷,入眼青山似梦中。牛卧秋场闲晒日,鸟栖荒垒自呼风。难将鸡酒招诗客,谁向虫沙问鬼雄。三十七年桑海变,争教两鬓不飘蓬。

潇洒

潇洒江湖又五年,天教闲处看云烟。捉鸥自信无渔父,驾鹤何妨学散仙。香草美人 残梦断,药炉经卷暮年缘。江天清旷堪娱老,祇恐风涛聒醉眠。

记五月十三日事

诏书午夜下天阍,父老惊疑破涕痕。何故夺门同景泰,有谁感泣似兴元。宗贤负扆 应艰选,旧制违时讵可援。自是老臣过忧虑,孤忠无路达修门。

林肇元

林肇元,字贞伯,贺县人。诸生,官至贵州巡抚。

甲申被放南归再游飞云洞

天地灵秀贵搜抉, 抉而得之在岩穴。云藏于山天意奇, 欲飞不飞殊骇谲。我再登云一凭眺, 山泉喷玉如腾笑。山僧留住情殷勤, 巢父行矣头频掉。吁嗟云兮且勿飞, 我欲乘尔湘南归。再出当为天下雨, 苍生属望功巍巍。

刘树堂

刘树堂,字景韩,保山人。官至浙江巡抚。有《师竹轩诗集》。

乞假省亲道中作

曜灵无停照,亲恩无尽期。罔极歌游子,游子同念之。太真忠谅士,绝裾将何为。

虽曰王室故,其如子道亏。緊予甫髫龄,绕膝时提携。趋庭秉彝训,圣贤以为师。澄清摅素抱,卓立树宏规。屡贻卞和叹,中途空徘徊。登高望四野,樵子采兰归。借问荷锄者,采之将遗谁。云是奉高堂,用以佐瓶罍。我闻樵子言,恻恻令心悲。关中变仓卒,路断音书稀。就徵参帷幄,刁斗靖京畿。运会无终极,寒暑有转移。桑榆荣晚岁,爱日贵及时。一官何所恋,去去安足辞。北临大行道,嵚巇险如夷。浮名不误己,眷顾在庭帏。岂复朝还暮,迹阻神先驰。回心消壮志,守拙罄乌私。宁与鸡雏偶,讵随鸿鹄飞。

宁郡未复大兵云集居民转徙悲不自胜

积雪连天白,重阴翳未光。边城飞羽檄,转徙泪成行。裋褐不完体,饥孩弃路旁。 宁无慈母意,待哺有高堂。昔也栖丹穴,俯仰乐未央。中途一失所,饮恨百年长。豺虎食当 道,白骨萎沙场。身死知何处,凄怆断衷肠。过者不忍闻,如渡深无梁。何时济舟楫,欢腾 齐万方。

石穴吟

陡绝羊肠道,崖居半壁悬。虹桥浮石磴,铁锁相勾连。仰观犹惴悚,凿险孰使然。征士视耽耽,悉索惫经年。居高宁不畏,失足坠重渊。水深陷犹后,火热避于前。烽烟何日靖,王道荡平平。闰闳安旧宅,稳步听流泉。

花朝雪霁出三峡

片帆来天上,猿声不住啼。云横千树短,雪压万山低。锦水腾龙甲,春花衬马蹄。 壮怀如可遂,定傍画桥栖。

初月

乍见疑非是, 哉生画阁东。不随银汉白, 翻对夕阳红。映水连成璧, 衔山曲挂弓。 邀来光一线, 照遍九垓中。

杨宗濂

杨宗濂,字艺芳,号潜斋,金匮人。历官长芦盐运使,候补三品京堂。有《聊自娱 斋集》。

天山雪歌寄张樵野

天山万古孤臣路,但有冰霜无雨露。瀚海茫茫百丈冰,崩崖裂石阴风怒。阳鸟惨戛玻璃声,素虬翻飞鳞甲舞。鸿濛凿破冰柱摧,流沙冻坼晶屏冱。堠亭百里断炊烟,多少征人从此去。玉关西出穹庐高,惊沙和雪飞战袍。要令边人识麟凤,暂离禁闼驰征轺。中途枉我瑶华什,坐令空谷闻虞《韶》。乃叹昔人处忧患,和平意旨无喧嚣。苏李论交记畴昔,汉南杨柳长安月。更忆鸠兹话雨时,风涛过眼成飘瞥。人海浮沈三十年,太息河梁垂老别。愿君郑重此须臾,西燕东劳两愁绝。吁嗟乎!我生局促如辕驹,有梦不到狼居胥。汉家三十六属国,昔日域外今中区。羡君乘槎历西海,双蛟夹檝趋天吴。重溟万里若咫尺,艮维况乃同车

书。罗胸浩荡星宿海,抚掌挥斥昆仑图。昆仑峨峨矗天表,寒门悲风何杳窱。烛龙垂头火鼠潜,羲君御日不能到。羌笛吹回大地春,春风先遍河湟道。乍闻塞外玉龙谣,待迎天上金鸡诏。

宗源瀚

宗源瀚, 字湘文, 上元人。历官浙江温处道。有《颐情馆诗钞》。

松林庵古柏歌

忆我六月浮海吴陵来,吴陵园社生荒苔。忽见招提古柏势天矫,疑是苍龙堕地迟风雷。铜柯铁幹老无匹,参差何祇百年物。胡不腰腹磐磐四十围,但见一枝一折争虬屈。咫尺之势远莫比,晴空似有天风起。胡不参天直扫浮云浮,至今低首檐前伍桃李。噫嘻此柏何好奇,好奇无乃非时宜。山僧老丑有微尚,摩挲枝幹前致辞。纷纷黛色诸侯墓,劫火烧残瞬非故。亦有霜皮古庙前,空嗟材大艰遭遇。此柏拳曲全其天,青葱万古浓阴圆。元精耿耿不可遏,拗金屈铁相回旋。夜夜空阶郁风雨,低徊似与山僧语。日日虚堂动钟鼓,婆娑更向山僧舞。只共苍官守岁寒,不须青帝私春煦。苍茫海气连岳墩,浮岚拥处思移根。天阴一作老蛟吼,灵旗飒飒烟云昏。留此三日不忍去,安得好手一写真。戴文节,汤将军,风流已矣今无存。不然图此槎桠崛强出腕底,日与忠魂毅魄摩荡空群伦。

都门答许海秋原韵

春明怀抱一为开,搔首南天拨马回。薄宦深惭投笔吏,忧时谁信出群才。高文京国 同声寡,怨笛山阳变徵哀。为报临江摧旧宅,寒云凄断凤凰台。

秦澹如都转尊人小岘侍郎道光中分巡杭嘉湖重建苏公祠有图有诗祠毁于兵图亦寻失今年湖上复建苏祠而都转適于兵燹后收得原图集同人湖舫出而徵题即用祠壁旧刻阮文达原韵

西湖狐火庚申年,精蓝仙宇隳堤壖。兵后数祠隆报祀,断碑零落残碍迁。苏公祠成 蒐故实,壁扪诗碣文犹全。使车凄然溯手泽,湖光渺渺湖波漩。盛衰回环六十载,祇今依旧 云霞嫣。拟收新景付藻绘,况见遗轴图清妍。江山不殊台榭异,尸祝重祠边船。苏公于杭遗 泽厚,功复六井驱葑田。翳蔽二十五万丈,一朝席卷如风烟。茅山盐桥通运道,六议合向桥 梁镌。今之湖淤已大治,内河疏濬犹缺焉。支分派别辨清浊,石礲图说思前贤。使君有志盍 任此,兴复水利筹宜专。圣朝轻帑重民命,不须减粜常平钱。家世此邦有遗爱,恤囚如种火 宅莲。云车风马吏已仙,双高峰色长娟娟。灵旗月映南屏圆,有时骑鹤来翩跹。感今讴昔播 管弦,诵芬述德倾言泉。展图如操左券然,惠风朗日图中天。

重修赵清献公祠诗以落成

衢山苍苍衢水碧,四千年中一瑰硕。东南已遍昆明灰,太末犹余丞相柏。赣州祀自咸淳始,莲花一祠傍珂里。血食当时已如此,况更百世月在水。拱辰门外瓴甓荒,入城两徙钟楼旁。先后郡守屡修葺,灵旗飒飒飘虚堂。我来肃拜值兵后,祠孙零落祠摧垢。丹雘群分清俸钱,蕉荔新酾石室酒。神之来兮风穆清,如听琴韵声和平。神之去兮动云幕,翩翩疑有

横江鹤。迎神送神我作歌,公傥被发来相过。思公治郡妙宽猛,古今相去何其多。三衢人士 汲修绠,标表从公发深省。爱直多应愧长官,孝弟真宜式乡井。仁言利溥章疏醇,宽全君子 排小人。力为朝廷惜元气,岂以铁面矜龂龂。十卷遗书后人守,梨枣修完垂不朽。墓门更拟 砻丰碑,重刻髯苏字如斗。

赴乡劝农

踯躅千山烂绮如,乌龙岭外劝耕初。遗民衰发胜锄耒,老树新阴覆里墟。陇麦翠生农妇鬘,野花红上长官舆。荒芜渐辟非难事,注水愁无郑白渠。

西湖退省庵谒彭雪琴尚书赋呈

功成长揖寸心丹,荡寇归来尚据鞍。九转荣名尽辞职,三公虚席辄除官。未须天上 星辰履,已作山中宰相看。南岳西湖识臣意,每依斗柄望长安。

长枪大戟映烟霄,寸管轩然压海潮。台阁千言淆众论,江湖一疏定群嚣。世间参簿 皆闲冘,庵里莺花未寂寥。昨夜诗肠起芒角,老梅香幹发生绡。

朱之榛

朱之榛,字仲蕃,号竹石,平湖人。荫生,历官江苏淮扬海道。

哭高伯平先生用文公挽籍溪胡先生韵

忆坐春风里, 匆匆二十年。诗文余子事, 道德几人全。调籍依韩韵, 传薪重许篇。 少时经患难, 两鬓早苍然。

先生和接物,妪煦到人深。座下探经义,帷空渺笛音。风云何变色,桃李为谁阴。 不意西州泪,伤心已满襟。

黎庶昌

黎庶昌,字莼斋,遵义人。诸生。历官四川川东道。有《拙尊园诗稿》。

东丘田家

川原尽坡陀, 历落不成井。人家占深曲, 林木互修永。或非西瀼居, 疑是愚谷境。 鸡犬会鸣吠, 烟火杂村岭。山深俗多醇, 地僻气逾静。秋清霜露饶, 稻获水云冷。残花倚空 篱,凉月照疏影。永念荷锄人, 宵綯惜光景。

吴南屏先生自岳阳泛舟金陵兼有苏浙之游次湘乡曾相国韵奉简

尺土欲作阿房簁,万夫撼山龙膊摧。黄金之埋地纪绝,破碎乃自秦以来。承平一瞬 阅三载,池有水竹庭有槐。丽佳未接冠盖盛,战斗喜无笳鼓豗。当时盗弄等蛮触,人事一生 何其乖。相公起试活国手,洗涤浩劫沙虫灰。遗民来归土渐辟,虽有旱潦不为灾。山川精神要湔祓,凭藉文字辉蓁莱。南屏老人今诗伯,豪气渐除心尚孩。九江楼头恣游宴,泽国那逢当路豺。君山如宾集户牖,一回一上真佳哉。天机浩荡物与狎,追逐鸥鹭无嫌猜。洞庭三月浪花下,桃杏已落青春隤。扁舟访古诣吴越,欲寻兴废生远哀。十年干戈沦战血,六代歌舞荒烟霾。霸图王业亦安在,白日但照须眉皑。新诗百篇易感激,把酒莫负千金杯。长江拍天际云海,万里孤帆应好开。胥台禹穴有余兴,东穷岭峤西岐邰。

金福曾

金福曾,字苕人,秀水人。历官直隶永定河道。赠内阁学士。

周富儿歌

黑蜧吼急魃舞狂,三年赤地无耕甿。男泉女布尽流散,幺凤乃逐哀鸿翔。嵩山之阳汝水曲,蓬门弱息颜如玉。不随越女斗铅华,已许梁鸿联眷属。饥驱各自走天涯,大地狂飙飏落花。万丈游丝牵不住,长淮呜咽渡香车。红颜自恨生无福,死别生离抛骨肉。城北徐偏晚问名,墙东宋又来窥目。琴心一曲卓姬奔,桃李无言息妫辱。儿女从来责备宽,何妨富贵藏金屋。吁嗟罗敷自有夫,莫将红豆误蘼芜。女贞之树倚天际,磊磊早具凌霜株。覆巢已分无完卵,合浦安知再返珠。有人太息发奇愿,欲与天公补离恨。万紫千红总护持,况是幽兰滋九畹。白璧求完漆室贞,黄金待赎文姬券。捐金屡赎屡不成,绿珠难与豪家争。谁欤高谊拯奇节,绣衣使者来彭城。若非铃阁官符力,难慰穷闺破镜情。千里明驼送故乡,不知夫婿在何方。临行别有心中事,欲言不言神转伤。儿生未识藁碪面,儿去先登阿母堂。迤逦关山行复止,停车为访长千里。阿兄则来婿未归,乍见牵衣集悲喜。掌上珠仍送入怀,奁中镜尚虚连理。人生离合最无端,荡子青春去不还。窦氏征袍苏氏锦,何时明月照团圞。云茶南下日纷纷,精卫难填海底魂。安得黄衫皆任侠,却教红粉尽衔恩。

何元普

何元普,字麓生,金堂人。诸生,历官甘肃安肃道。有《静斋新集》。

闻李湘石得广文志感

圣代即今开广厦,故人闻又进儒冠。秀才出处关风化,天下安危视校官。增益俸钱 资砥厉,培成国士济艰难。青毡一席裘千丈,谁道吾曹骨相寒。

寄怀王子寿比部

高卧辞恩诏,承欢奉母慈。湖山千古胜,忠孝四方知。悯世薖园老,骚情漆室诗。 枢言兼谕德,经术系人思。

边患

边患无今古,兵机有是非。课耕曹玮略,敢战狄青威。拓地先朝远,通经大将稀。 奇功收积石,沧海未全归。

胡凤丹

胡凤丹,字月樵,永康人。历官湖北候补道,署督粮道。有《退补斋诗存》。

荆州大隄行

城捍兵戈隄捍水,隄亘如城固如砥。隄防乃与城防同,能守则生不则死。荆州形胜雄崔嵬,川源远自岷峨来。喷雷滚雪日千里,齧噬隄岸愁倾颓。北岸之西四万九千丈,几费缗钱逾万帑。南岸之隄五万四千丈有余,滨江如带环田庐。自明迄今数百载,过眼沧桑几兴废。修举全资保障十,下隰高原供灌溉。我来鄂渚阅五秋,年年鼓浪腾洪流。潜沔江汉祸尤烈,天乎何酷民何尤。民不怨天咎在吏,吏视民命如儿戏。可怜吏饱民益饥,上干天谴降灾异。灾异先当防未然,力之所至人胜天。桃花春水寻常见,瓠子秋风捍卫坚。不然徒费黄金筑,旋筑旋决嗟颠覆。临变仓皇空补苴,百万生灵葬鱼腹。子寿比部贻我书,大隄岌岌成沮洳。恭陈二公勤守护,能救民患安民居。我识斯隄高且厚,百余年来未溃口。泰山远胜冰山坚,河伯波臣群退走。水利水害纷无常,要凭只手澜回狂。存亡呼吸一发系,危如累卵安苞桑。君不见鸱鸮鸱鸮彻桑土,牖户绸缪当未雨。愿祝澜安民举安,莫待羊亡牢始补。

余本愚

余本愚,字古香,休宁人。历官浙江候补道,署杭嘉湖道。有《十华小筑诗钞》。

昌化道中

流水忽然断,板桥何处寻。滩边觅渔艇,日午渡烟浔。芋叶有荷意,谿云无雨心。 桑塍行渐没,归路万山深。

施曜庚

施曜庚,字小普,号星衢,会稽人。官江苏候补道。

辛亥夏赴邳州桃源决事感作

入耳哀鸿遍野鸣,谁教胥吏复苛征。河流怒吼惊剽急,疑诉群黎疾怨声。

捧檄长征正麦秋,利民愧少郑陂谋。舟车往复三千里,明月清风伴我游。

宿迁舟中即景

下相劳行役,归舟趁晚风。橹摇蒙水碧,帆映夕阳红。隔浦炊烟起,沿隄麦穗丰。 篷窗相对饮,项井话英雄。

朱福清

朱福清,字修庭,归安人。江苏候补道。有《双清阁袖中诗》。

歇浦感旧

年华如水事如尘,道是寻春却送春。青雀划开波底月,黄金误尽画中人。落花无奈依芳草,飞絮多情肯化蘋。不许今年头不白,《懊侬词》稿又翻新。

读史有感用金粟子留别原韵

心甘纳履傲公卿,堪笑萧曹尽世情。命薄宫人求入道,时来竖子亦成名。海中风浪琴三叠,江左河山局一枰。试向太行峰顶立,举头见月十分明。

江文安

江文安, 字冠唐, 宜兴人。官湖南候补道。

次韵答安遇

无官有子足忘忧,勉为攀辕且暂留。吴下归期三径待,海东儒效十年收。相看我辈同霜鬓,应使公卿愧黑头。好与曲园谭佚事,铁瓶入地杳难求。

朱滋泽

朱滋泽,字晦子,崇庆人。官湖北候补道。有《晦子诗钞》。

金陵怀古

豫王天马奋南辕,四镇降旗昼夕翻。王气销沈歌《燕子》,阉群颠倒醉龙孙。衣冠已葬梅花冢,羽檄犹污粉黛痕。萧瑟孝陵秋草遍,西风日暮冷哀猿。

汪桐

汪桐, 字冠侯, 宜兴人。官浙江知府。有《静斋诗钞》。

感事

兵祸潢池弄, 啾啾鬼伯来。悲风生子夜, 劫火到泉台。汝辈奚堪惜, 苍生信可哀。 谁为司牧者, 慷慨济时才。

蠢尔当车怒,公然学跳梁。救民原有道,就死亦堪伤。令戒三驱失,罗休四面张。 温温天语厚,流涕念先皇。

题桃花扇乐府

昆老能歌柳善谭,九州铁错铸何堪。公然一疏清君侧,痛煞宁南与靖南。

大厦难凭一木支、汨罗同恨不同时。白头赞礼多情甚、洒向江天酹酒卮。

水天闲话付渔樵,一局残棋一曲箫。赢得美人千古泪,年年流恨送南朝。

周天麟

周天麟,字石君,丹徒人。历官泽州知府。有《水流云在馆诗钞》。

寒夜喜邓献臣明府见过用东坡聚星堂雪诗韵

宦海浮踪聚萍叶,与君同踏并门雪。未经识面心先倾,吏事诗才信双绝。忽闻剥啄喜过访,出晤那妨屐齿折。袖中示我诗一编,墨藻飞腾讵磨灭。韩苏大笔极奇矫,硬句盘空臂鹰掣。我诗肮脏百不工,十载愁吟鬓丝缬。围炉促膝谈夜深,万瓦霜华感骚屑。卷中风木吞声多,梦里梨云过眼瞥。平生甘苦应自知,除却高歌更何说。送君明日上长安,安有诗肠转轮铁。

人日寄怀王小汀邗江

何必梅花发,相思已不禁。每逢新岁浅,翻忆旧交深。腊酒瞢腾意,春盘冷淡心。 遥知草堂上,忍冻亦孤吟。

天宇

天宇真寥廓, 宁辞目送劳。风鸦争独戍, 霜隼下晴皋。远岫寒逾净, 孤云懒更高。 稻粱何处觅, 吾亦等鸿嗸。

舟晚书怀

苍茫云水欲何之,又到移舟晚泊时。冷淡心情斜照在,艰难身世逆风知。破除积闷 聊中酒,抒写离怀不废诗。却笑沙汀双白鹭,无愁胡亦满头丝。

白冠玉

白冠玉,字海仙,华容人。诸生,历官福建兴化知府。有《小香山房诗钞》。

临湘李藻亭茂才避寇来华容以诗见投和其韵

秋声如雨落空庭,忽动哀弦未忍听。短鬓应从今夜白,寒镫犹作故乡青。归心引梦 来还去,酒力输愁醉易醒。太息离踪无定所,江湖到处一浮萍。

张度

张度,字吉人,号叔宪,又号辟非,长兴人。历官河南候补知府。

登五峰山顶

苍龙作势从天来,近城忽尔围屏开。山回峰转缘城拱,清润直接庭阶苔。神游东海山,飘渺蓬壶仙。淜湃不可到,此得登层巅。陡然矗上三千丈,东西洞庭遥相向。跬步直欲叩天阙,金阙玉节云霞降。上望清溟何所有,猎猎罡风刮耳吼。回首尘寰势若走,大笑蝇声城一斗。广陵琴,渔阳鼓,金根赐,秘器腐。贵人名士皆黄土,沧桑有几时,蟪蛄苦不知。今人笑昔后笑今,孰为智慧孰为痴。江山若此,胡为不归?碧厓桃花落,画溪梅雪霏。日月如逝水,往者不可追。宁作信陵醉,无为阮籍悲。江山若此,胡为不归?安能俯首戢翼闭樊笼,使我不得翀霄飞。

马毓华

马毓华、字菉斐、上元人。诸生、官陕西知府。有《东斋就正诗草》。

寄和瞿京之

木石居游笑此身,偶因新岁庆芳辰。爱寻山水之间乐,自谓羲皇以上人。花径有时 延旧雨,桃源何处渡迷津。乐游原上韶光丽,可许平分百五春。

徐焕谟

徐焕谟、字绿沧、号叔雅、桐乡人。诸生、候选主事。有《风月庐剩稿》。

观获稻

昔日观插秧,移疏种密妇子忙。今日观获稻,连阡比陌稏老。凉飔瑟瑟天欲霜,高陇低陇秋云黄。腰镰随风疾如扫,家家禾稻尽登场。儿擎妇负日当户,西畴络绎奔走苦。见说多收十斛余,崇墉比栉对衡宇。回思六月火伞张,日中锄禾汗若浆。彼苍不负农夫力,今岁乃得盈仓箱。盈仓箱,如获宝,粒粒皆由辛苦造。新粳炊熟连村香,田家此日尝新早。秋郊一望暮云平,万井欢呼庆有成。神弦社鼓相喧逐,并作丰年击壤声。

苕溪道中

云拥峰峦水涨隄, 菰城南去绿杨齐。扁舟系缆目初堕, 坐听深林懊恼啼。

胡廷玨

胡廷珏,字涵卿,号问轩,祁门人。侯选光禄寺署正。有《春草堂诗稿》。

清明前二日作

轻风细柳暗纷霏, 节近清明踏翠微。村店家家新酒熟, 道途日日远人归。偶寻古寺

穿幽径,为爱春山坐夕晖。往岁游踪何处觅,溪边杨柳尚依依。

潘锺瑞

潘锺瑞,字麟生,长洲人。诸生,候选太常寺博士。有《香禅精舍集》。

汇上里

昨闻里巷言,异人世罕有。西山汇上里,蔡氏沈家妇。年逾一百岁,山中无其偶。今晨趋造之,村客导先走。门庭表肃清,竹木参左右。登堂识其子,疑是绛县叟。问年八十五,自云早衰朽。虽幸抱孙曾,康彊逊吾母。引我闚中闱,藜床坐而久。晬然盎于背,如丘秃其首。叩以长生诀,默默不开口。视我一转睫,遽起掩户牖。会兹掩户意,鐍钥贵能守。守之金石坚,可与彭佺友。我闻磅礴气,惟坤得其厚。阳动而阴静,静者每多寿。况锺山水灵,迥脱尘市垢。谁谓劳力身,蕉萃夭陇亩。人瑞锡自天,创见额加手。此境岂西池,有星灿南斗。归去夸眼福,游仙良不负。我亦癸未生,追逐周甲后。形癯鬓二毛,对母惭老丑。一百有六岁,知我能到否。

寻包山寺憩其下院遂访毛公坛

数里冲秋炎,投门释午倦。不知云岫深,来此下方院。偶逢真率僧,草履何轻便。 息阴竹柏间,刚及茶瓜荐。爽气来虚堂,雄势眄崇殿。小话废兴迹,恰未龙象变。仙坛古道 场,尘劫迅飙电。过墟天宇空,陟峻榛莽遍。波窥双井沈,丹想九成炼。错疑绿毛生,松针 落衣缘。

黄维煊

黄维煊,字子穆,鄞县人。官台湾海防同知,特用知府。赠太常寺卿。有《怡善堂 剩稿》。

同治癸酉台阳杂咏

万石楼船照海波,沈沙残铁试摩挲。春光渐泄春阴薄,莫放扶桑日影过。

顾济

顾济,字作舟,一字竹棷,金匮人。诸生,官安徽同知。有《青琅玕馆遗稿》。

赠廖再卿

一剑干戈里,书生气骨遒。湖山沦末劫,烽火黯沧洲。义动秦庭哭,身悲楚馆留。 苍烟沈白日,风雪暮江头。

毕醇斋示题秦淮夜泊图句有感旧游

水亭夹岸绝珑玲,绕遍青溪几曲棂。客思欲将红豆种,夜凉风影一镫青。

张家鼎

张家鼎,字燮盦,江苏华亭人。官浙江同知。有《铁华仙馆吟草》。

久雨

不断连朝雨,林霏昼未开。桥低流水涨,山断湿云堆。漫作寻春约,谁能著屐来。 鹊声空报喜,花外又轻雷。

萧雄

萧雄,字皋谟,益阳人。候选直隶州知州。有《西疆杂述诗》。

辟展

辟展城连小涧边,西来刚过黑风川。井疆蕞尔人声寂,沙草坡中数点烟。

奇台

西经谷壑出平芜, 城倚阴山俯壮图。隔浦沙陀余故垒, 月明风冷夜吹芦。

风洞

深谷崖边一窍开,汹汹橐籥走奔雷。呼号乱卷长川石,算是乾坤鼓荡才。

俞廷瑛

俞廷瑛,字筱甫,吴县人。官浙江通判。有《琼华集》。

拟左太冲咏史

长安多王侯,冠盖盈通衢。区宇值清晏,徵逐相欢娱。开尊揖上客,弹丝出名姝。 夜饮不知旦,此乐古所无。一朝匈奴入,失色同嗟吁。一谋迁货贿,再谋徙妻孥。

仗剑出门去,颇思立殊勋。十年不得志,归来事耕耘。祇为入口计,敢辞四体勤。 岁时斗酒会,即事多所欣。有客谈朝市,掩耳不欲闻。俯视清流水,仰看寥天云。

落叶

空枝无复见巢莺,一曲吹蓬听最清。绕径自寻秋外影,打窗犹怯梦中声。山林枯槁 曾何用,天地萧条太不情。独向琼台高处去,居然列子御风行。 春草池荒久未临,乱飘烟翠滴墙阴。去如浪子踪无定,盼得良媒信又沈。极浦秋残 红树老,空山路隔白云深。青青祇有闲松柏,未负栽培一片心。

葛士达

葛士达,字伯材,号子材,上海人。诸生,官平定知州。有《远志斋诗稿》。

登大峪雕窠寺

下骑还登百尺楼,烟云万象豁清眸。嵌空窗牖藏山隙,屈曲岩廊瞰涧流。怪石当阶惊卧虎,长松蔽日隐蟠虬。诗人到此应殊少,壁上曾无一字留。

杨葆光

杨葆光,字古醖,娄县人。诸生,官景宁知县。有《苏盦集》。

自四安返杭易车而舟对雪感赋

水居喜有舟,推篷见残雪。昨朝途遇雨,破被冷如铁。壮士不畏寒,腔中有热血。 嗟彼趋炎者,炙手可使热。暖酒拥肉屏,围炉据金穴。安知茅舍中,高卧有清节。况当频年 兵,骨肉动隔绝。军前战衣薄,坐使肌肤裂。忆昔李凉国,袭蔡亦人杰。江南带甲多,连兵 一何拙。将才良不易,世事那可说。鲰生虽无才,龊龊殊不屑。生与哙等伍,羞为论优劣。 班超非异人,燕然有铭碣。拔剑起雄心,摩崖纪余烈。但愿战功成,莫咏《新昏别》。

次韵答孙载之

我来海陵路,三月有飞尘。求友不易得,见君良独亲。豺狼苦盗贼,鸿雁惨流民。 世事一挥手,徜徉垫角巾。

南隶草堂同韩子玉茂才对雪效欧公禁体兼用其韵

窗前老树渐舒萼,旭日淡淡风来薄。铜钲已随鲁阳返,斛珠静待鲛人作。平野漫漫极炫晃,长天迥迥迷寥廓。阴寒内凝铁可铸,光华外耀金为烁。微冰倏已盖池沼,积霰俄然失篱落。邻家富翁烹羊羔,熟视美酒拥狐貉。祈于元冥方免猎,团成师子复纷攫。我当此境噤不语,构火自温拳冻雀。山居怅隔九斗尘,不然径去蹑烟屩。翦水作花助山色,岂必旗亭始行乐。况今晋豫犹阻饥,只可团茶试调瀹。随车逐马有故事,读书城南慰索漠。卿如欲问灞桥句,第一功名愧横槊。聚星堂事何敢比,聊破寒威资笑噱。

登巾子山

山背群松拱,楼台耸半空。鸟声深树里,人影夕阳中。远岫齐凝霭,轻帆乍稳风。 漉巾何处好,江水酒池同。

夏诒钰

夏诒钰,字范卿,号研斋,江阴人。官永年知县。有《十五研斋诗草》。

黄山晚步

随意此徐步,乡居一味闲。树回青嶂合,村尽碧谿湾。流水自成瀑,夕阳犹在山。 林泉且吟啸,烽火黯尘寰。

村居晓起

满地槐花白,荷锄人出门。云生山不断,雨过水犹浑。鸟语喧朝日,鸡声连远村。晴光开宿雾,叱犊满前原。

卫辉朝阳寺

城南古寺鹤守扉,西风飒飒吹我衣。横塘一径夹寒水,落叶与人争路飞。双桐拔地云千尺,老桧年深根化石。松寒竹瘦古僧癯,入门一笑斜阳白。石泉松火茶味清,秋花媚客深幽情。一房山翠可窗碧,幽禽古木鸣秋声。愿学无生求妙证,古佛垂眉僧入定。满天明月照禅心,赠我归途一声磬。

秋日有怀

一尺青琅玕,相思秋月寒。殷勤觅鸿雁,目断秋云端。云端隔烟雾,月照梧桐树。 不见素心人,当阶一叶度。

芜蒌亭

冰合滹沱水效灵,君臣麦饭感飘零。云台图画今何在,不及芜蒌尚有亭。

叶庆桪

叶庆桪、字诚斋、仁和人。官云阳知县。有《芦闻室诗稿》。

题画雁

更无残梦落池塘,乍可分翔逐稻粱。芦荻萧萧秋思迥,孤飞此夜宿唐昌。

翁寿麟

翁寿麟,字惠君,号米老,湘潭人。官江苏候补知州。有《杉荫桥边旧草堂诗集》。

行路难

行路难,空长叹。河北秋风八月寒。蓟门烟树何迷漫。征衣密缝慈母线,天涯鸿雁

孤飞倦。不见齐州九点烟痕青,但见济水七分清泠泠。凿石蓄潴济漕运,河为控制波为渟。 奈何水势建瓴下,淮黄交汇如沧溟。天吴夜舞老蛟泣,蜃楼杂沓飞涛腥。嗟余鼓枻苦行役, 长波乃遇石尤逆。金隄溃决若瓠子,八十三丈涛头碧。转篷捩舵舟不前,十里五里日向夕。 舟子饥呼邪许声,一唱百和凄以清。安得长房缩地术,过此八闸奔流疾。

湖边古寺

秋水倒浸湖云湿,秋林黯淡纤月入。行人系缆秋树根,井栏落叶无人拾。古庙萧然 佛不灵,老僧饥抱佛脚泣。蒲团坐见星斗光,狐狸夜夜学人立。

立秋前一日喜雨

黑云如磐低压楼,一雨作凉天欲秋。清淮倦客无一事,倒枕卧听檐瀑流。今春江南 苦不雨,行人道路面焦土。忽然淫雨四十日,屐齿滑滑泥没膝。远念家山纵豺虎,干戈满地 斯民苦。喜看早稻花满田,黄云压野期眼前。浮生飘泊亦何恨,年丰苦盼东南天。

立秋渡黄河

灵槎万里挟长风,浩荡何源不可穷。一脉混黄余太古,百川宗派亘天中。云开岱色 经秋碧,雨助涛声入夜雄。迳画乾坤限南北,乡关消息讬宾鸿。

高望曾

高望曾,字穉颜,号茶庵,仁和人。诸生,官将乐知县。有《茶梦庵诗稿》。

还乡杂诗

抚序感霜露,朝出城西门。湖山黯无色,不知天地春。官隄萦鸟道,夹路披烟榛。将军旧筑垒,乱石如云屯。孤往十余里,破屋知荒村。入山拜先陇,抔土犹如新。贫家少封树,杂卉纷尚存。前冈耸华表,郁郁谁家坟。石马半倾蹋,松柏摧为薪。败棺见残骼,拜扫嗟无人。我辈赖先泽,虎口留余身。惕惕冰渊戒,一线延千钧。祖德傥能述,愧无华亭文。

山行不逢人,尚余豺虎迹。下马读残碑,道旁小歇息。乡人荷担来,累累此何物。前肩挂髑髅,后担束骸骨。为言荒村中,狼藉无人血阝。官局论斤买,易米计亦得。败骼搀牛羊,真伪孰能别。山南净慈旁,山北栖霞侧。荒冢何纷纭,千魂共一穴。岂无忠与贞,岂无豪与杰。身后谁得丧,都付一丘貉。俯首念妻孥,泪下衣襟湿。

秋日湖隄晚眺

疏柳蝉声急,秋风几度过。此时残暑退,何处晚凉多。流水碧如泻,夕阳红渐趖。 吴娃荡舟出,采采听菱歌。

阚凤楼

阚凤楼,字仲韩,合肥人。贡生,官奉贤知县。有《六友山房诗集》。

今日何日行

今日何日江水长,波平溟渤山苍苍。黄云酿雨天欲霜,月躔箕毕星垂芒。青枫叶赤彫猗桑,群欣魄兔忘商羊。美人珠箔调青商,一弹两鼓仙灵翔。低集鹓鸾高凤凰,斗宫之侧薇垣傍。萝披荔拂骄虎伥,磨牙拇血思截舫。日测银汉排津梁,星君笑视狎且狂。疑通土伯幽都望,丛菅湿食如餦餭。颂则降福违不祥,横横太白精凝光。作彗西指纷旗枪,倒行不顾经躔伤。群仙嬉游旌麾飏,俯首杂沓逐队行。句陈奎璧圜徜徉,晖台黯黯豸化装。湔涤尘末倾杓浆,美人内顾依象床。白雪失和空云襄,朱弦胶柱殊笙簧。安得奔月亲天香,群真谐乐嘉清扬,履舄戋戋视八荒。

吴宝三

吴宝三,字康之,桐城人。官郓城知县。有《鞠隐山庄遗诗》。

秋色

秋色碧无际,离离禾黍香。马疲泥路滑,蝉咽晚风凉。云缺吐明月,山高拱夕阳。 豆棚与瓜蔓,点缀作村庄。

倪鸿

倪鸿,字延年,号耘劬,桂林人。官福建候补知县。有《退遂斋诗钞》。

春日郊行

红棉碧嶂挂斜晖,陌上谁歌缓缓归。二月杨花飞似雪,东风吹上酒人衣。

踏青步屟不辞劳,三月飞花点客袍。旧雨坟前多宿草,东风门外有夭桃。入春田水 潺湲急,负郭山家向背高。底事催人归去急,昏鸦啼近古城濠。

檀度庵观平南王第十三郡主自悟大师画像

结得团焦在穗城,头衔要署大师名。粉侯不嫁非无福,飘泊怜他孔四贞。

听松园瓦当

方寸团圞古镜形,飘零何止玉楼钉。上元绿字应相似,小篆荒苔一例青。

望云庵观明郡主出家画像

金山山畔筑精庐,日诵楞严闭户居。棕拂蒲团成结局,白头愁煞老尚书。

余云焕

余云焕,字凤笙,平江人。诸生,官四川知县。有《白雨湖庄诗钞》。

归州

万家碪响触羁愁,枕上滩声又换秋。绝好江村图画里,乱山斜照泊归州。

李丈次青方伯乞山中紫薇花将去数本媵之以诗

紫薇花发绕吾庐,艳雪晴云拥上车。将去宛如新嫁女,到时应识旧中书。前身或者 丝纶阁,夜梦因之水竹居。位置平泉庄上好,不教沦落在荒墟。

再抵成都

筹边依旧上高楼,内地河山壮益州。酋长西来通职贡,大江东去扼咽喉。书生不作 三刀梦,阃帅相持半壁秋。剑外烽烟沪海瘴,孤吟谁识杜陵愁。

李嘉绩

李嘉绩,字凝叔,号云生,直隶通州人。官陕西知县。有《代耕堂稿》。

宁羌州

行尽利州路,重关第一程。诗犹歌蜀道,人已变秦声。据水桥横出,黏天草乱生。 东山山翠重,愁压武都城。

彰德

楼阁立崔嵬,晴云四面开。路从天上至,人向邺中来。不睹建安笔,难逢河朔杯。 徒令千载客,驻马叹雄才。

送章硕卿之官武昌

送尔之官去,关山奈别何。千金垂橐尽,万卷载车多。酒待招黄鹤,书应换白鹅。 一函好相寄,珍重翦江波。

薛福保

薛福保,字季怀,无锡人。陕西试用知县。有《青萍轩诗录》。

九日登千佛山

嘉名古云爱,携手蹑巑岏。宁伤廪秋暮,惜此永日欢。斜日在郊坰,晴皋堕轻翰。

亭亭华不注,峭蒨不可餐。三周吊陈迹,百雉森雄蟠。酌彼在山泉,倚兹千丈磐。摩挲崖上佛,烟雨故不刓。俯窥小洞幽,笑叹黔生寒。不知镜梵夕,省想为盘桓。吾生几两屐,勤可亲烟峦。毋令岁华晏,庶以恣游观。

夜坐书怀示伟度穆庵

流泉》號》號轩窗隈,窾木屡击镫花摧。起看斗柄惜长夜,跬步佳客如瀛莱。窥编欲友千载士,灵意翻被陈人埋。卷书凝坐自怡適,忧端硉矹未可排。西溪故墟不可到,北堂已见霜鬓皑。曾参于外不一宿,肯以朝市荒南陔。尤嗟仲氏意独悴,一病两见钻冬槐。楚泽燕云各蓬散,书如束筍愁相催。各怀恳恳苦相忆,斐然诸弟孰与裁。径思鼓枻渡江去,松竹及此华年栽。踟蹰既乏卖药业,亦愧农圃能耘培。太行苍翠已满眼,东风吹我西去埃。秦关一入行自脱,长安虽好非吾怀。还须炙輠向稷下,桃梗聊避士偶咍。白鸥浩荡任去住,吾计于此良恢恢。偷闲息鞅暂为乐,登临幸有名池台。隆冬泄阳苦无雪,天心慳绝不可回。忧时活国岂我责,妍暖趁弄城西梅。百年鼎鼎若惊电,烦忧坐使流光隤。好作南烹共呼食,子有三径吾能来。

与同人游济南城西憩尚志堂归呈稚璜宫保

嬴秦燔诗书,云欲愚黔首。我今抱陈籍,兀兀亦何有。坐窗欲瘦听泉流。涓涓日夜 归沧洲。晴光妍暖意忽动,携手城西消百忧。城西之堂谁所考,我公造士歌芹藻。郁然揭出 邹鲁心,庶与髦士相雪澡。我惭学古迷津涯,飘摇坐惜去日赊。稍欲茂厥业,故当养其芽。 仁人贶我有高意,斯堂洵美其可瑕。竹林幽幽梅未花,泌流诘屈纡卧蛇。朱鱼游空斐而葩, 行吟坐笑妍曦斜。一丘一壑吾意得,古意冥冥还独嗟。

赠古狂

倾盖识君心,霏雪盈君首。肝胆久益炯,芬烈不可垢。缊袍忧苍生,有泪欲盈斗。 长啸六合间,忽落三季后。羲皇入梦想,婉娈相唯否。闻人纤毫善,若拜锡圭卣。春意溢座 隅,不啻自其口。卓哉元紫芝,堪使薄俗厚。我今请改事,谑侮安可久。惧干鬼神怒,于君 亦何有。

历落无町畦,猖狂蹈大方。时有蓬之心,咫尺迷所将。隤然得悬解,元珠坠其床。嫉邪素发指,干莫难为刚。低首奉蛾眉,奔命走欲僵。斯人故莫测,通蔽两不常。奈何堕神州,不产文身乡。卓为獉狉杰,鹿豕相翱翔。臃肿与鞅掌,尸祝事庚桑。一被周公服,八尺空昂藏。

息鸡图

蛰影山樊内,形神两不期。都忘芥距意,岂有稻粱思。画者通微悟,天倪妙独追。 己应知晦养,胜似午啼时。

正月五日出游作

圣伏神徂千载外, 鸾飘凤泊九州间。兼窥儒墨无门户, 行尽关山费岁年。尽日登临

携旧雨,他乡风物似斜川。玉杯繁露非吾事,炳烛欢游差似贤。

武侯祠堂

赤伏余光未肯颓,黄初雄视紫髯雌。一龙中道还寥廓,三马平原脱馽羁。陈迹总随 流水逝,空祠独与大名垂。悠悠已是嬴刘后,一羽云霄渺可思。

鄂生观察见示即事书怀诗次韵奉和

百战归来谤不訾,飘萧雪鬓与霜髭。晚途偶更师刘晏,绝漠犹堪斩郅支。填海移山 终不悔,吠声射影岂非痴。中朝垂意苞桑计,龙变云蒸会有期。

吴保清

吴保清, 字梓珊, 嘉兴人。官河南知县。

题李文石校经图小影

人生任天机,至理靡不通。静观群动息,冰雪澄其胸。读书观大略,精力穿苍穹。 久之神悟澈,运用嘻无穷。玉溪学獭祭,彭城工雕龙。挦撦章句间,毋乃愧称雄。君负奇特 才,矫若挺长松。弱龄破万卷,谈笑座生风。摇笔起山岳,突兀撑晴空。业邃勤自韬,随意 图其踪。有画不必展,有书姑弗攻。卷石可徙倚,草色方青葱。顺时適至性,怀抱方惺忪。 仿佛王逸少,啸傲会稽东。又如诸葛子,抱膝吟隆中。或方黄叔度,或拟郭林宗。我独摅臆 断,纯仁忠彦同。会心不在远,相对双梧桐。

谢绶名

谢绶名,字理斋,天台人。诸生,官安徽知县。有《云萍集》。

蟋蟀词

篱豆花开秋月出,月明疏篱闻蟋蟀。终宵唧唧诉苦愁,寄君篱下思君恤。餐风饮露 不辞辛,常怕金笼了时日。

奉和竹庄吴中丞夏涝叹

天外泻银涛,浑疑炼石破。昼黑云近头,龙逼蛟涎唾。才免庚癸呼,何期风水作。飞瀑落檐牙,雷鞭催雨大。忙停北海樽,惊起东山卧。波撼城欲倾,舟摇更箕簸。倏尔变沧桑,农不安床座。万顷香稻禾,崇朝收拾过。当春播种时,田畯尝考课。黍苗赋芄芄,把酒临风贺。不图灾患罹,末由分勤惰。自嗟命不辰,非关用力忄耎。秋荐乏糇粮,洁蠲愁无稬。鹦鹉罕啄余,豆刍称贷莝。狼狈穷无归,扶持伤鲜左。眼前皆鸿嗷,米珠尚有那。老羸疾易侵,忍饥备药锉。苟且延残生,糠秕杂土堁。枵腹嗟黔敖,蒙袂五中饿。与其靦墦间,盍去远方些。丈夫半无衣,遑恤妇人衤罗。茅茨已飞扬,涕泪交泥涴。中有小村娃,垢面减姿媠。中有素封家,钱未留一个。缺衣望生全,缺食难医瘅。燹劫继沦胥,皖民太坎坷。大地遍凶

殃,柱臣叹无奈。幸达九重知,发粟散财货。荒政在均平,帑金毋惜剉。观察首观风,查稽需僚佐。抚恤谨推诚,吏胥防欺{坐发}。勤慎吾侪分,清廉共切磋。仰体好生机,岂顾声华播。亿兆乐鸿施,或能弥小挫。赈济古所难,勉将精神驮。耳目虑不周,晡旦循环逻。群感怜悯情,好听绅耆譒。有司庶绩熙,开府南邦坐。盛德民弗谖,善气同转磨。寇君借一年,功参左右个。拜手读新诗,阳春愧难和。

王玮

王玮,字蕴斋,汾阳籍浙江山阴人。官草堰场盐大使。有《小兰亭诗稿》。

秋夜

耿耿星河见,长安横匹练。冷露湿罗裾,凉风捐纨扇。人生暮气防,天籁商音变。 遥思华屋中,丝竹开豪宴。

午倦

一饭寂无事,晴光上小楼。花枝媚秋色,云影逐江流。悟境静中得,诗情澹处求。 蘧蘧寻午梦,随遇即庄周。

夜读

虚室夜迟迟,孤镫静读诗。欲求开卷益,合以古人期。谏果回甘后,心花怒放时。 姮娥能解事,送影入深帷。

秋夜渡扬子江

人事不堪浊,江流万古情。峰峦新画稿,星斗旧棋枰。雁带秋声去,鱼惊月色明。 扁舟轻一叶,夜到绿杨城。

岁暮书怀

世事今难问,归心在水涯。官因慈母屈,意独逸妻知。风月无今古,江山有盛衰。 暮年年又暮,进退欲何之。

舟行书所见

明月照澄波,上下一轮映。邻舟小儿女,备作妆台镜。

西潭

西潭潭水净于揩,镫火楼台近市街。盐廪接天祈望守,布帆逐浪旅人怀。我忧斥卤桑田变,客誉芝兰玉树佳。明代防倭陈迹在,斗龙江外渺无涯。

王汝金

王汝金,字砺卿,号醉墨,钱塘人。监生,官掘港场盐大使。有《味谏果斋诗集》。

新得汪氏故居偶赋

扃钥何为者,幽居拟陆浑。烟霞藏道气,风雪炼诗魂。苍翠山排闼,澄鲜水抱门。 蘼芜如可采,惆怅赋王孙。

韩允西

韩允西,字竹樵,西平人。诸生,官无为州判,摄怀宁知县。有《海蠡斋诗钞》。

暮春道经舒城山谷

路转峰当户,林疏水绕村。鸡声流磵底,犬吠倚云根。地僻幽居乐,风醇古道存。 浑忘王事瘁,茅店醉清樽

秦敏树

秦敏树,号散之,吴县人。官浙江候补县丞。有《小睡足寮诗钞》。

江楼晚眺

小倚江楼晚,天空物外心。波摇孤塔动,云抱一峰沈。僵柳迎归艇,虚檐纳暮禽。 此时无限思,空复短长吟。

汪守愚

汪守愚,号虎谿,秀水人。官吴江县丞。有《虎谿诗存》。

石佛寺

怪峰如莲花,古佛坐其蒂。石室云为门,微风自开闭。昔年采石人,雕凿只随意。妙明出顽矿,是即最初地。千螺释迦髻,十丈修罗臂。石火诗中禅,斧劈画中诣。会从奇险间,拜佛问其谛。

辛酉九日示弟辈

多难登临易感伤,天教薄暝黯重阳。雁鸿零落犹成列,鸡犬平安岂待禳。小市祇工 桑醡酒,闲官久已枣为粮。折萸试问诸昆弟,犹胜登高各异乡。

陈伯铭

陈伯铭,字吉人,江宁人。官县丞。

题金山僧云峰卓锡图

手不持瓶头不笠,行李一肩松下息。既非竺道生,亦非鸠摩什。细摹面目揣精神,十年以前旧相识。忆我与君初见时,地棘天荆无所之。万里乡园那得返,一家生死不可知。君于此中悟真谛,人世须臾皆梦寐。果然打破利名关,一出危城便披剃。野鹤孤云自往来,到处名蓝商位置。金山殿宇纵成空,至竟江南名胜地。打包行脚尚嫌劳,欲结茅庵谋小憩。绘成一幅卓锡图,洒脱悠然见真意。愧我从军屡及瓜,江尘碌碌走天涯。会当料理芒鞋兼竹杖,从君妙高塔顶看烟霞。

沈琮宝

沈琮宝,字组斋,秀水人。诸生,官太平县训导。有《澹退斋诗》。

夜话

竹篱西畔豆棚东,竟夕盘桓兴自同。为爱清言时娓娓,翻疑夜漏太怱怱。几人留恋 三更后,千古兴亡一席中。月落参横催曙色,闲谈水乳喜交融。

高永畇

高永畇,字秀松,江苏华亭人。官亳州吏目。有《月桥诗稿》。

拟韩昌黎嗟哉董生行

淮水何滔滔,迢遥千里奔风涛。淝水清而泚,百里安流入淮水。安丰古县淝之壖,有唐贞元年董生生焉,儒宫一亩隐居于其间。朝徵府辟不之及,垂钓采樵以自给。嗟乎董生家贫已如洗,催租打门吏何悍。日出作,夜归读,无时休息常历碌。上堂脩定省,下堂具甘旨。二人顾之为色喜,举室俱熙熙,有道及妻子。嗟哉董生孝且慈,时之人,谁复知。家有狗,乳狗出未归,鸡来代之哺其雏。其雏不食且咨咨,以翼覆雏不肯离。乌虖!鸡何知?天鉴董生贤而祥降之。嗟哉董生贤若斯,时之人畴克如其孝且慈。

【卷一百六十九】

王荫祜

王荫祜,字子受,正定人。有《觉华龛诗存》。

枯树

浪说三株绕砌罗,连枝憔悴感寒柯。皴霜皮黯冬心在,媚雨条稀老幹多。至竟成材

关阅历,独怜生意渐婆娑。杜陵诗句兰成赋,一例霜毫忍泪呵。

读史

高文侈美新,何如赤伏符。投阁乃不死,咄咄莽大夫。

东聘联唇齿,南征固腹心。已成吞魏势,讵料大星沈。

同是中朝彦, 奚分蜀洛为。不须更相竞, 都在党人碑。

一出曲端死,再出郦琼叛。心学乃杀人,符离四十万。

梅宝璐

梅宝璐,字小树,天津人。诸生。有《闻妙香馆诗存》。

题费宫人遗像

青史模糊碧血新,千秋一剑气弥纶。同仇尚有秦良玉,杀贼勤王到美人。

贞心如鉴数难徵,遗恨空怜太液凝。应化西山万峰雪,寒光长照十三陵。

久雨喜晴秋凉夜坐有怀

积雨兼旬喜乍晴,碧天如洗透秋清。杜陵讬兴诗多感,宋玉增悲赋易成。红树青山 怀旧约,药炉经卷件余生。故人消息飞鸿远,兀坐中宵对月明。

张桐

张桐,字筱琴,天津人。有《秋园小诗》。

雨夜思家

咫尺成千里, 言归竟未归。遣怀亲笔砚, 别梦绕庭闱。旱潦天心见, 炎凉世事非。 曾经兵燹过, 况复遇年饥。

咏雪

天公戏玉太匆忙,顷刻朱楼换粉妆。终夜窗明如对月,满庭花落不闻香。烟沈野岸 鸿泥浅,云锁空山鹤梦凉。此夕烹茶添雅兴,一杯清味涤诗肠。

陈寅

陈寅,字紫岫,晚号铁如,武清人。有《兰雪斋诗钞》。

尹隐居鉴月亭

闲携玉川碗,来上尹公亭。一水寂然碧,万山相对青。诗心留月鉴,樵响隔云听。 澹极忘今古,茶烟萦翠屏。

辛巳重阳偕长彝亭少农过白云观早酌后独游陶然亭

偶出城闉访上清,黄花红叶绚秋晴。登高肯负重阳约,纵饮能消万古情。文䜩几年 陪谢傅,穷愁何计慰虞卿。纷纷眼底缁尘满,独对沧浪想濯缨。

客里佳辰几度过,看花聊以慰蹉跎。何尝富贵中年逼,已觉飞腾后辈多。秋水一方 淹日月,斜阳满地怆关河。孤亭独上肠堪断,戏马呼鹰奈若何。

沟壑行

暴雨下注湍飞山,众河上决涛连天。五月六月苗稼残,千顷万顷沟壑宽。民居荡析屋不完,釜突湿烂薪难然。高田浸巨蛙黾喧,长阡风腥鼋蛟蟠。天灾洊臻如竖缠,洪流降割同尧年。我困青毡无一钱,目击道殣忧百煎。八口尚难安饱温,千厦乌能庇饥寒。蔽日不散云冥顽,朝来又见东霞轩。

刘肇均

刘肇均,字伯洵,献县人。拔贡。有《撄宁斋诗草》。

寄张孝达

爱君因意气,岂独昵交亲。志略能匡世,文章不救贫。遥知鞍马上,应念药炉人。 欲寄无多语,时危慎笑颦。

董绍兰

董绍兰,字香谷,汉军旗人。有《丛菊轩吟草》。

秋柳

风里枝条弱,秋来雨露匀。可怜曾折处,应有未归人。莺语久岑寂,蝉声自苦辛。 谁家羌笛里,犹怨玉关春。

商廷焕

商廷焕, 字明章, 汉军旗人。有《味灵华馆诗》。

寄怀郑芝庭上舍

玉立仙才郑子真,王园曾与逐车尘。悬弧尚记同庚子,解剑恒思订甲寅。竞病每联 茅店雨,尖叉时煮瓮头春。西风昨夜敲檐马,坐对黄花似故人。

夏园晚坐

元蝉噪夕阳,绿重柳成行。有客当风坐,空庭过雨凉。日长青史伴,人静白莲香。 微露新眉月,林间澹澹光。

于昌寿

于昌寿,初名绍谦,字东皋,号子卿,江苏华亭人。诸生。有《东皋草堂剩稿》、 《苦心集》。

赵忠毅公铁如意歌

一枝青铁霜华皛,提携四顾乾坤小。在昔款署良工张,至今器重尚书赵。尚书名共三君隆,风骨铮铮与铁同。中宵起舞一击节,千锤百炼如其忠。独居深念意不乐,天际云阴起霜鹗。想当出手指挥时,委鬼茄花定惊愕。其如天不祚明何,钩党沈冤走荷戈。风声呜呜鬼神泣,拂拭囊底增悲歌。一身万里君门旷,汉关竟绝生还望。白骨埋处青山香,流传此铁未从葬。公身已去公物存,摩挲欲比钟彝尊。光芒上瞩寒星斗,崛强犹是凭忠魂。吁嗟铁兮尔何福,名传千载尔余馥。长尺四寸重二斤,上镌名字二十六。

庄元植

庄元植,字叔侯,震泽人。诸生。有《澂观斋诗》。

书斋

书斋客去倍萧然,坐对黄花瘦可怜。一种荒凉谁画得,乱鸦啼破夕阳天。

孙显

孙显,字勖三,无锡人。诸生。有《妙香居小草》。

花朝

空山生计太萧条,浊酒填胸气不骄。剩有残书如旧雨,那堪佳节又花朝。强扶游兴 穿松径,聊寄闲情劚药苗。解识升沈随大化,将军莫问霍嫖姚。

人目

客里逢人日,萧斋绝可怜。雪消檐上雨,冰隔渡头船。愁比春还早,宵来梦不全。 计寻方外去,儒服误多年。 姚承燕

姚承燕,字芑孙,青浦人。诸生。有《诗民漫咏》。

八月九日南郊闲步

出郭皆秋色,寻途荻苇边。晚潮寒带雨,孤塔迥凌烟。樵爨荒榛辟,犁锄废垒穿。 拟沽村店酒,生计足渔佃。

信见边防固,军资必豫储。荒滩屯士马,远海蹑龙鱼。机仿法郎造,民疑巢燧居。 侧闻消寇警,寰宇运舟车。

秦宝玑

秦宝玑,字潜叔,一字姚臣,金匮人。有《霜杰斋诗》。

过桃花坞

江湖放浪信全真,恸哭唐衢不可论。一坞桃花又零落,晓风孤棹过齐门。

小石洞

云扃终古闭,草色绿岩腰。鸣鸟不知处,游蜂如见招。洞天晴亦雨,花气午犹潮。 小坐无僧话,茶香破寂寥。

汪芑

汪芑,字燕庭,吴县人。诸生。有《茶磨山房诗集》。

渡太湖口占

天连云水荡胸开,自笑乘风破浪才。七十二峰青不断,片帆飞过太湖来。

访潘大出郭晚眺

言寻邠老去,临眺正苍然。树远疑浮水,山高不碍天。渔榔鸣浦急,牧笛出村圆。 薄暮桥头立,平林半没烟。

池上小集

病起好酬鸡黍约,崦西头是屋东头。豆棚瓜架偏宜雨,柳陌菱塘易得秋。鸥梦不离 湖上棹,蝉声多傍夕阳楼。市嚣输与柴门迥,无数溪山供卧游。 度峙崦岭至铜坑

漠漠云阴二月天,层冈复岭俯平田。杏花能白非关雨,杨柳初黄不受烟。幽境每从 迷路得,吟怀差喜入春妍。湖山旧侣销兵燹,寥落晨星感昔年。

题陈子弢孝廉诗文集

剑气珠光久郁埋,瑶华赠我眼惊开。身全浩劫庸非福,诗到名家始敛才。赵壹飘零囊底罄,杜陵辛苦贼中来。故人尚有王阳在,好对湖山劝一抔。

黄图成

黄图成,字伯西,江苏甘泉人。诸生。有《希陶轩诗钞》。

夜坐

寂坐浑无赖,天空黑气沈。残镫耿寒夜,疏雨碎愁心。懒与书相接,聊将酒半斟。 孤鸿云外响,凄切感人深。

舟返盐渎寄邗上诸子

还家八十日,浑似客中游。雁序倏离别,骊歌空唱酬。水天三百里,风雨一扁舟。 倚枕潮声急,乡心逐浪流。

王贞春

王贞春,字煦堂,句容人。有《侨隐集》。

越吟

东下钱江深复深,渡江一舸入山阴。天台此去无多路,流水桃花未易寻。

购得杨升菴先生雪韵楼画像敬赋此诗

万里君门远,投荒死未归。山花蛮女曲,椎髻汉臣衣。木落愁猿啸,仓空宿鸟饥。 思亲余涕泪,应逐白云飞。

徐宗亮

徐宗亮,字晦甫,号{世未}岑,桐城人。世袭骑都尉。有《善思斋诗钞》。

黄鹤楼望雨

黄鹤楼头鹤不归,隔江云气挟山飞。盘空急雨垂天下,入望长帆到岸稀。水鸟带烟

投别树,风豚吹浪撼危矶。道人移榻西窗近,爱听江声接卧帏。

赠赵新斋秀才

年少方多病,亲衰更患贫。长途怜作客,生计苦依人。有鹤形同瘦,如龙性未驯。 相逢悲握手,添与泪痕新。

晚过山寺看芍药

丈室花光照暮天, 色香空尽转生妍。青山何处容吾隐, 看到残春又一年。

洪山吊罗罗山布政兼感李迪庵旧帅

洪山一握征南节,并世孤忠叹百身。淮蔡专征谁继志,山河凭吊各伤神。多材自古 传三楚,儒将当时更几人。寂寞路旁祠庙在,尚闻风雨泣遗民。

夜饮示家人

闭门无事坐成晚,正是冬深欲雪天。乐趣恒妨儿辈觉,酒怀时愧古人贤。纸窗镫火 团圞夜,茅屋松杉八九椽。往事凄凉堪忆否,寒江短景望归船。

许惠

许惠,字慧轩,桐城人。诸生。有《择雅堂集》。

墩子湖

湖上荷花十万枝,夕阳如醉雨如丝。众香国里双栖稳,且为鸳鸯立少时。

板子矶

板子矶边江水深,青枫摇落气萧森。霜华暗染劳人鬓,帆影孤悬独客心。风定寺明 煨芋火,月斜港断捣衣碪。浮生片刻清凉境,试向中流鼓素琴。

寿春孙氏东园题壁

更寻幽僻处,秋气澹斜晖。藤曲不堪杖,荷枯谁制衣。鼪鼯下上跃,蝙蝠纵横飞。 予亦忘归客,怅然吟《式微》。

王映薇

王映薇,字紫垣,合肥人。有《自怡悦斋诗存》。

春雨夜坐

西风猎猎雨潇潇,冷焰无光夜寂寥。寸草报春心半死,残桐入爨尾全焦。旧诗已徇 秦灰劫,新鬼难凭楚些招。抚髀愁生推枕起,村醪味薄不能浇。

许斌

许斌,字芷江,桐城人。有《藕滨诗集》。

嫩凉

嫩凉初试雨余天,天际微云意淡然。刚到秋风已萧瑟,夕阳池馆一声蝉。

李西堂

李西堂,字春池,滋阳人。诸生。有《晚悔堂诗集》。

秋日历下晚咏

斜日冷残照,高城欲暮天。远山寒映郭,湖水暗生烟。慷慨翻诗卷,凄凉听管弦。 不须论出处,客里总堪怜。

与莫午桥梦槐旋自江南至济宁午桥北上占此话别

握手话途穷,乾坤饮泣中。饥寒千里共,辛苦两人同。愁说君游北,行看我欲东。 悠悠驱马去,怅望暮云空。

九日登少陵台

木落西风雁叫哀,黄花满地独登台。古人何往名犹在,佳节无端我又来。把酒欣逢 陶令醉,吟诗转忆少陵才。凭高几度栏频倚,寂寞斜阳冷碧苔。

雨后湖上

湖上东风雨乍晴,湖中画舫乱歌声。七桥柳色青摇水,千佛山光绿上城。名士今犹 传历下,尚书终是怨燕京。不堪往事重怀古,步向沧浪听濯缨。

秋日村居

荒村记树老破篱斜,就里炊烟住几家。一夜西风凉过雨,朝来开遍豆棚花。

陈世相

陈世相,字辅堂,号少航,信阳人。诸生。有《小茗山房诗草》。

山行

千山如拱立,邀我快攀跻。路险人踪少,峰高暮色低。水声悬峭壁,岩影落深溪。 小鸟窥予至,惊飞夕照西。

罗执桓

罗执桓,字树公,郑州人。诸生。有《蘖琴轩诗》。

梦中作

买得扁舟便是家,一竿一网寄生涯。晚来独醉西风里,卧看芙蓉两岸花。

胡友兰

胡友兰,字馨谷,庐陵人。诸生。有《蓼虫集》。

山行

晚烟一抹锁前峰,秋老丹枫带醉容。隔岭不知何处寺,西风送出数声钟。

己酉重阳后一日送家兄赴永丰时予亦重有楚南之行别后感赋

昨日同登高, 今朝竟离别。萍梗无定踪, 中肠九回结。执手临前浦, 欲语声不发。 翻恨长江水, 为我助呜咽。

秋风偏无情,远送片帆去。顷刻舟不见,两桨隔云树。含愁独自归,一步一回顾。 秋江今夜月,扁舟泊何处。

独行有感

萧条古道少人过,一径凉风动薜萝。黄叶下时秋色老,乱山高处夕阳多。半生寥落 英雄泪,万里飘零游子歌。渐觉年来霜满鬓,客中岁月又蹉跎。

乡思

窗外潇潇响, 孤镫淡五更。乡思如碧草, 一夜雨中生。

陪家兄游石屋岩

一石结为山,山空鬼斧劈。旷然启谽谺,堂庑净如拭。脉脉泉溜清,肃肃云气逼。 岩穴漏天光,虚白生四壁。何人偏多事,仙佛重装饰。纷纷罗拜勤,香烟不暂息。祇为求福 来,谁赏境幽僻。胜地俗所溷,应为山灵惜。我兄饶闲情,邀我著游屐。洞外霜叶红,洞中 莓苔碧。小坐布楸枰,衣袂岚翠滴。一局犹未终,夕阳已西匿。 孙垓

孙垓,字子九,号少楼,会稽人。诸生。有《退宜堂诗集》。

晚过鸡鸣寺

落日疲驴踏藓行,鸡笼山接古台城。门前远翠千层币,屋后湖光一片明。寸寸地荒皆古迹,迢迢风起作寒声。游人过此多凄感,况际萧寥客思生。

登亥元旦

白发苍颜五十三,韶华回首更何堪。中年逢乱垂垂老,琐事都亲渐渐谙。暖日鼠姑舒叶嫩,春江鱼婢佐餐甘。岁朝礼佛无多祝,愿遂山居一觉酣。

寄内

析桂炊珠颇不赀,衰年累尔苦支持。我家乞米寻常事,十万饥军待饷时。

读曾文正公集

挑镫对编简,仰止德愔愔。学术祛成见,勋名出小心。论文官烛灺,筹笔阵云深。 允矣读书法,千秋佩士林。

顾家树

顾家树,字介卿,会稽人。有《介卿遗草》。

塞上曲

衔枚度碛夜生寒,铁甲霜明北斗阑。边马远驰天未晓,提刀直欲靖楼兰。

秋日偕伯兄步鄠西郊外

雁影动高秋,飞云澹不收。相将问征羽,何日到南州。浅水波澜蹙,暮山烟雾稠。 天风吹百感,凄绝此淹留。

沈守正

沈守正, 字庄士, 号小楼, 仁和人。诸生。有《不远复斋集》。

高邮道中

浓淡云容顷刻非,雨丝丝里目光微。黏天甓社湖中水,坐看风帆叶叶飞。

偶成

望里平林高复低,征车兀兀走长隄。杨花似欲留人住,乱向东风裹马蹄。

叶德徵

叶德徵,字西楣,号又樵,钱塘人。有《香雪庵吟稿》。

村居即事

远岫平林小板桥,江乡僻处谢尘嚣。风侵谭氏村前树,月落孙家渡口潮。雨岸荻芦秋瑟瑟,一群凫雁夜萧萧。渔镫明灭沙洲外,箬笠棕蓑胜黑貂。

曹廉锷

曹廉锷,字菊辰,一字掬澄,嘉善人。贡生。有《双桥草堂诗稿》。

与杏林谈禅作禅语赠之

听人说真谛, 言下颇了了。然求上乘禅, 莫若无言好。有时笑口开, 我亦不自晓。 持定无无想, 此身亦可少。

汾源杂诗

道是山城却水乡,小桥略彴足徜徉。柳阴深处垂纶坐,钓得游鳞二寸长。

吴德纯

吴德纯,字雪溪,归安人。有《听蝉书屋诗录》。

春日至土桥过任处士庄

放眼郊原阔,清幽爱郭西。垂杨藏野店,春水涨前溪。兴惬忘途远,情欢怅日低。 穿林行几曲,遥指是高楼。

修竹围茅舍, 鸟声喜客来。居乡怜野逸, 煮酒乐追陪。子秀书能读, 童痴钓未回。 殷勤重惜别, 远寺暮钟催。

郭肇

郭肇,字怀初,一字复亭,诸暨人。诸生。有《东埭诗钞》。

别沈素庭

大雅久不作,风尘吾所怜。相思隔秋水,一别暗遥天。海上瑶琴感,人间宝剑篇。 漫游成底事,秦望正苍然。

剡溪道中

时清乏胜游,世乱辄高举。晨兴理清策,匍匐忘溽暑。剡中山水区,锺毓自太古。探奇兴偶逢,出险意自许。连峰有送迎,累时具仰俯。熊虎对踞蹲,龙鸾各骞舞。神工贵伏藏,到此气尽吐。度岭陂陀遮,回溪菪确聚。细路夹松篁,振袂惊飞雨。行行出木杪,下视见衡宇。夕霏起遥薄,回首忽无睹。林荒虎气遥,谷邃风力阻。缅彼巢居子,愿言讬启处。方壶不可即,日暮独延伫。

忆吉竹山房兼怀金氏诸旧好

岩卉林箊望不分,四山并作翠氤氲。临溪尽日常疑雨,闭户一身犹带云。新筍香时惟纵酒,好莺啼后又离群。年来频作还家梦,更为还家苦忆君。

宋泽元

宋泽元,字瀛士,浙江山阴人。有《忏花盦诗钞》。

军中曲

将军饮美酒,红炉锦绣围。士卒栖毳幕,寒霜拥铁衣。铁衣相对泪如雨,眼前哀乐 是谁主。将军二十便封侯,那识人间征战苦。

络纬

夜色阑珊月上迟, 半窗花影弄参差。镫前络纬声声急, 似为愁人织鬓丝。

董葆琛

董葆琛,字献臣,号啸兰,慈谿人。诸生。有《学易堂诗稿》。

雁门童子歌

古来奇迹那有此,有此奇迹出童子。不能刃贼亦杀贼,一十七贼同时死。童子随宦居天堂,仓卒贼势来披猖。尽掠孩提驱以走,日暮同次黄梅乡。飞龙药店暂安宿,一儿无言众儿哭。却喜群贼无我虞,逡巡谋贼进鸩毒。鸩毒一中群贼诛,众儿相向犹踌躇。此身自顾无生理,亦仰余药捐其躯。凄凉野寺江村畔,欲绝未绝神不涣。手作家书贻家人,其志已毕魂乃断。我闻此事心暗悲,五尺之童才智奇。自古无独却有偶,千载以上童汪锜。

金其恕

金其恕,字养斋,嘉善人。诸生。有《倚云楼古今体诗》。

倚楼

木叶萧萧下,西风人倚楼。亲朋隔生死,身世感沈浮。日落千家暮,天高一雁秋。 烽烟犹不息,凭吊古今愁。

吴忠诰

吴忠诰,字子猷,浙江石门人。有《遂思堂诗存》。

岁暮寄怀家兄子定临汝舍弟子益洪都

南服地气燠,十月霜始见。漫漫云色殊,槭槭风响变。池水收浩渺,庭柯改葱蒨。 宵征哀蟋蟀,来宾感鸿雁。繁华忆春阳,凋素迫岁晏。索居易永久,屡见时物换。客游何所 乐,况乃非仕宦。言诵鸣鸠诗,离忧耿申旦。

申旦不能寝,念我同气人。飘泊各异县,邈若胡与秦。百年复几何,一别三四春。 山川隔言笑,寤寐见精神。羁禽困罗绁,奋飞道无因。多忧捐心志,易与衰暮邻。怀哉保颜 色,堂上有老亲。

老亲年六旬,素发垂两耳。筋力已非昔,疴疾渐丛起。三时缺温情,百念交惧喜。 负米徒远游,岂尽奉甘旨。况念先世来,潜德久未启。显扬匪异人,凌替责难诿。《诗》《书》 笃遗训,家声庶有豸。相期各努力,黾勉自今始。

曹骏良

曹骏良,字驯夫,嘉善人。贡生。有《紫蕙山房诗钞》。

仲夏久雨初霁

到枕不成寐,连宵雨更风。晓烟笼半郭,新霁慰三农。庭藓浓含翠,池荷湿晕红。 高槐蝉始嘒,逸韵响晴空。

胡兆春

胡兆春,字东谷,汉阳人。有《尊闻堂诗集》。

旅怀

谁为苍生起,苍生望竟虚。未谙桑孔术,空上贾晁书。人重白头豕,余怜赪尾鱼。 无田归亦得,频问故山庐。

水鸟

万物各有话,所居云水乡。不随啼鸟逐,祇为得鱼忙。风影落孤艇,波声上夕阳。 白鸥自高洁,独立避渔庄。

闭关

岭上白云自往还,扶筇久立印苔斑。怜渠作赋终投阁,笑我无钱欲买山。阮籍何尝 真善醉,安仁可惜不能闲。头颅如此宜休去,松径萧疏日闭关。

李林芳

李林芳,字兰畦,嘉鱼人。诸生。有《养真山人遗草》。

东津湾

毕竟津何处,滔滔水自东。狂澜谁砥柱,失路几英雄。世已沈沦候,人还车马中。 古今同一辙,不必怨途穷。

徐道元庐墓吟

凉风撼树走轻萚,霜枝夜夜啼乌鹊。千秋遗恨几皋鱼,我思古人今不作。观山徐元人中豪,颓波滚滚能插脚。场室三载苦羁栖,谁与伴者陶公鹤。哀感地祇上升闻,帝谕观火须洞若。炎官衔旨来墓田,火伞高撑势煜烁。茅茨散作劫灰飞,元身翼主泪珠落。头额可焦肤可灼,赤子之心铁堪嚼。帝曰汝孝宜汝嘉,三日即瘳可勿药。精诚耿耿格彼苍,孝根天性岂外铄。喟余失怙守垩庐,三载视融两腷膊。朔雪压庐顿反风,此事追忆犹如昨。得毋有主相冥漠,令我对此滋惭怍。葛藟绵绵枝条弱,海上衔石空填雀。如君元精贯汤镬,坐火不死死亦乐。祇今尚余炮烙瘢,举似刲股旧痕无隔膜。

筑隄

潮退鼓声讙,潮来鼓声靡。一鼓遏洪流,鼓衰潮益驶。我家江南湄,卑湿那足齿。力田四十年,秋成未一纪。汩湮乃其常,不湮特偶耳。今夏势更恶,大工方未已。蛟鳄恋旧乡,仍欲窟其里。一跃水倒流,再跃涛四起。畚锸勤万夫,不供一掉尾。野老泣向天,帝阍安可启。归视索逋人,络绎如流水。

梦亡友彭可人

后死蓬飘甚,人间剧可哀。多君存友谊,一夕渡江来。妻子劳薪米,干戈逼草莱。 廿年艰苦事,知不到泉台。

陈戊

陈戉,字左卿,善化人。有《归朴堂诗存》。

六月十日偕竹虚过芥孙

近喜蛟螭迹已潜,相将访旧不辞炎。呕心诗稿探怀出,娱目图书信手拈。尽日清谈临水槛,有时散步立风檐。闲中分得幽人趣,点缀烟云上笔尖。

凌翱

凌翱,字翼云,善化人。有《焚余诗草》。

望君山

长鲸吞不得,爱此一拳青。巨浸还终古,孤根卫百灵。江深风雨冷,秋老杜蘅馨。欲驾鼋鼍往,题诗卅六亭。

匡南枝

匡南枝,字子庾,祁阳人。诸生。有《爱梧堂诗钞》。

游阳山庵赠宋禅师

犹记祇园九日游,寒山落叶几经秋。惭侬十载徒乌帽,输汝一庵到白头。贝叶飘残 来去劫,天花散尽古今愁。虎溪自此宜联社,为爱高人惠远俦。

游阳山庵次韵答李大

曾从春里踏残红,剥啄禅关一笛风。茶味恰添钟梵后,诗情遥在水声中。百年鹤径 老松树,三月莺花古佛宫。賸有苍凉数行字,拟参半偈万缘空。

七里滩阻风

一棹麋城下,风高浪拍天。滩头千橹避,沙尾万舟悬。余霭浮孤鸟,残阳曳暮蝉。 沧江虹贯月,谁问米家船。

李谟

李谟,字禹臣,善化人。有《寿梅山房诗存》。

奉母还长沙暮泊城外亲友枉问话至夜分慨然有赋

五日零丁离虎穴,一家生死此渔舟。已拌异地埋诗骨,竟有惊魂出逆流。兵火余生 成骇鹿,江湖何处著闲鸥。严城永夜催歌哭,刁斗声声无限愁。

乡关已近意还惊,五月危舟泊岸轻。六十衰亲归故国,一弯新月冷孤城。却怜弟妹尝辛苦,久累亲朋卜死生。百里烟尘竦长夜,艰难何以慰深情。

得汤臣弟书

小别又三月,乡心惨不舒。可怜五十日,才得一封书。丧乱思同气,艰难况索居。 烽烟方未已,生理复何如。

蒋本璋

蒋本璋,字少甫,湘乡人。有《少甫遗诗》。

汉口

江汉交流处,寒潮泻碧空。鼋鼍骄跋浪,雁鹜饱乘风。远树含烟绿,危樯挂日红。 一声长笛晚,岚气正濛濛。

娄妃墓

纣用妇言亡, 甯王竟反是。夜夜娄妃魂, 哀哀怨江水。

墓门秋风起,飒飒响空林。似鼓湘灵瑟,凄怆袅余音。

徐楫

徐楫,字秋湄,成都籍建德人。诸生。有《澹宜草》。

秋日谒贾阆仙墓

读遍残碑碣, 凭高坐石栏。山空秋气肃, 亭古日光寒。碧酒招魂易, 黄金铸像难。 九原风月夜, 雅调向谁弹。

老马

鼓鼙声久断疆场,伏枥何颜对紫缰。一顾几经逢伯乐,千金无复遇燕王。曾随射虎 嘶边月,且共疲驴卧夕阳。漫诩识途为绝诣,籋云终竟逊飞黄。

冉崇文

冉崇文, 字右之, 酉阳人。诸生。有《二酉山房诗钞》。

和秦乐山九日登高原韵

万里桥南我旧游,琳宫梵宇足清幽。寒鸦几点道旁树,清磬一声江上楼。访古先从 碑碣认,醉归偶为管弦留。惟余一事惭佳节,七度都逢毷氉秋。 张品桢

张品桢,字肖庐,南海人。诸生。有《清修阁稿》。

读白乐天诗书后

细玩乐天诗,情真语自挚。虽乏建安骨,要具风人致。颜谢穷幽深,雕刻非所志。陶公本性真,臭味原无二。纵非李杜匹,雅可张一帜。昌黎逞雄肆,所就各殊异。长吉苦呕心,奚如此乐易。微之夙并驰,恐或难联辔。中伦与中虑,逸情常远寄。时似天籁鸣,顾盼饶妩媚。不必斗奇险,切切含鼓吹。胸怀凛冰清,吐属绝尘累。如以佛法论,骚坛大自在。高吟《贺雨篇》,孰是音可嗣。

李绍宗

李绍宗,字子迪,贺县人。有《不求闻达斋诗钞》。

游石壁头广福庵

约伴清游上翠微,参天石壁隐禅扉。高吟人在千山上,长啸声从万壑归。怪石奇应 疑虎踞,苍松老欲化龙飞。旁人共指高僧墓,兰茝春来碧四围。

张人鉴

张人鉴,字镜蓉,贵筑人。有《钧珊遗草》。

咏史

鸿门宴罢约鸿沟,成败机关误项刘。百二河山秦苑火,八千子弟楚人羞。干戈赤县 驱亡鹿,冠盖乌江葬沐猴。闻到拔山歌一曲,凄凄垓下水东流。

陆叙卿

陆叙卿,字少葵,兰谿人。诸生。

忆剑歌效昌谷体

静吸西江斟北斗,鞭鸾笞凤星辰走。足蹑蓬莱顶上行,孤柱擎天凭只手。金人奉剑凌波迎,玉女投壶含笑久。王母晨参青鸟翔,冯夷昼舞灵鼍吼。骑鲸捉月吞入腹,绛官长使银蟾守。左挥神犀截一角,右拂奇鸧堕九首。网得珠渊五色虬,恢恢游刃当筵剖。湘妃鼓瑟夔拊琴,如山麟脯如河酒。娶妻不必阴丽华,独对嫦娥作佳偶。高宴昆仑掷浑花,三百玉龙偿博负。

【卷一百七十】

世续

世续,字伯轩,满洲旗人。光绪乙亥举人,官至文华殿大学士。谥文端。

定静堂秋雨

绿槐庭院最清寥,小卧诗床俗韵消。淅淅声喧惊午梦,隔窗冷雨打芭蕉。

郑文焯

郑文焯,字叔问,一字小坡,汉军旗人。光绪乙亥举人,官内阁中书。有《大鹤山 人诗集》。

园居早春寄山中客

林鸟春多声,池花落还见。连情美瞻听,逐物矜芳衍。盛往识来希,娱新增旧眷。佳人处帷屏,高制绝雕绚。碧云殊未期,瑶华独谁荐。欢怨隔岁年,宿心违缱绻。载枉《黄鹄》篇,感音发哀断。夕思初月盈,晨忧繁星散。良游信乖绝,念子长粲粲。鸣弹答幽素,撷馨讬柔翰。及时徵昔言,山阿遂嘉践。

寄幼兰兄潮州

秋馆奄夕阴,近霜桂始华。晚秀有新妍,胜赏无世哗。附物徇时美,切情寄幽遐。 渚鸿违北栖,江鱼泳南嘉。岭表迟高闻,吴趋独哀哇。苒苒年事别,苕苕旅望赊。念予同怀 暌,兴言行役嗟。

秋思引

秋风啸谷惊苍松,水帘悬雨千尺淙。坏衣老僧罢晨梵,空山落叶闻霜钟。飒然万籁 忽岑寂,孤鹤叫破青芙蓉。山虚水深白云远,嶕峣乱石无人踪。古来此意谁复会,新声憀亮 争蝉蛩。起拂朱弦三叹息,世无稽蔡吾何从。

九日泛舟枫桥

云鳞叠空生麹波,酒中倒卧秋山螺。蛾眉小绿破双萼,醉把茱萸劝残酌。兰风吹寒歌扇薄,水枕梦回怨萍泊。吴歈未终枫叶落,二十五声秋点索。

白雁歌

江城霜信初闻鸿,昨日登高来北风。菰芦萧萧野水阔,潇湘天尽秋云空。兰钗小妇 夜幽苦,残月楼中弦自语。盛年孤艳空闭帏,玉颜不及南飞羽。近闻湖海矰缴多,高飞冥冥 愁奈何。长林乔枝不可择,笑看燕雀纷投罗。

孛鹿谣

秋孛鹿,损万斛,东畦种禾西畦菽。禾头生耳菽生蠋,城中穰草千钱束。孛鹿谣,哀嗷嗷。昨日湖水平南壕,鹅鸭集庐鱼升桥。出无航,居无茅,荒荒饥色近在郊。四乡那不 愁漂摇,邻灾况闻江有蛟。

秋霖行

老农昨入城,为言道光季。淫雨昼成晦,野湟船入肆。倾畦连畛水没人,庐游鹅鸭田生鳞。强梁白梃走檐下,官符到乡还捉民。吴侬乐岁无余业,年灾一值如赤贫。公中岂无岁时蓄,南仓北仓雀噪困。昨闻诏恤宽租欠,计岁行恩到乡县。谁怜下户尾毕逋,不输官符输胥掾。今年秋霖积田水,视昔潦年差尺半。天时人事不可知,今朝雨雹昨雷电。我闻此语心忉切,隐几恍见波澜高。坐使愁心恋江海,武陵渔者傥可招。

闻雁

秋水渺无极, 愁尽送白云。西风何太急, 北客独先闻。旅梦苍烟寺, 樵歌黄叶坟。 江南鲜矰缴, 雨夜尚呼群。

读高陶堂志微录书后

梦落沧流此辍弦,一官滞调偪残年。振奇文字投珠晦,垂老功名误瓦全。宁惜清流 论党局,从教才思傲顽仙。荒荒西曜湛归翼,虚傍柴桑卜墓田。

旧婉

旧婉前华脉脉思,疏风闲雨阁兰期。湖山梦冷成诗瘦,弦管声繁易酒悲。襟上唾花空有恨,尊前梅柳为谁姿。柔肠苦被明眸割,彻骨风流鬓已丝。

壬老将去吴感赠长句

霜信初丹晚桂林,闭门秋思已深深。冥鸿遥带潇湘雨,樊鹤犹余江海心。云物空濛回北望,诗歌浩荡发南音。不辞更醉重阳酒,别后兰茳漫独吟。

元墓山楼重见旧题

空寒烟月五湖湾,经岁看花数往还。片石谁堪同日语,高云终是在山间。十年西崦 虚仙籍,几度东风破醉颜。欲采青芝徵旧梦,樵风长识郑家山。

杨柳

秋尽江干柳未黄, 官亭相送只斜阳。汉南何意先摇落, 枉及东风作絮狂。

绿尘帐殿晚阴移, 舞袖飘零怨楚姬。莫把长条赠歧路, 故宫犹得妒腰支。

灵岩

日暮谁闻小海歌, 胥屏东望五湖波。无多故国青山在, 枉费宫眉十斛螺。

夜雨有忆

花外疏疏暗雨过, 西园明日绿阴多。故人不寄潇湘梦, 一夜春魂泣女萝。

丁立诚

丁立诚,字修甫,钱塘人。光绪乙亥举人,官内阁中书。有《小槐 吟稿》。

角花笺歌

金花半角玉版方,曾沐纯庙题奎章。浙江疆臣拜手献,楮先生侍南书房。是时遭际重台阁,徵士联吟尽鸿博。吾杭杭厉本乡亲,如凤之翎麟之角。百四十年时不同,流落燕台花市中。世情莫叹薄如此,幸有同声片楮通。我昔相遇琉璃厂,短幅长笺两心赏。携归同社赠新诗,首唱铁花老词长。先生先世尤可详,晋有蚕茧唐硬黄。百金不许市一纸,江南供奉澄心堂。碧云春树好颜色,红染桃花艳芳泽。终古家声重洛阳,白州刺史高华职。有明繁盛宣德年,远族更有侧理笺。二林家宝不敢秘,亦拜天家赐锦鲜,先生之风无瑕净,老去红颜花掩映。愿花常好楮国春,我尚依依桑梓敬。清平四海万千秋,来助人修五凤楼。新翻花样马一角,快写吉语羊千头。

孙仁甫丈炳奎出观先世所藏温公澄泥砚李延平有题名南宋为魏鹤山得见真西山跋 明有文衡山观款

南唐澄泥第一品,北宋党碑第一人。匪砚之重,世自不敢轻。况其温温玉质,娟娟出水莲丰神。砚之方正见公德,砚之圭角表公节。公兮砚兮皆可述,独乐园中说《周易》。墨花濡染传家集,凤咮龙尾伯仲间。只许桥亭谢升堂,玉带文入室。前有观者李延平,后有观者文徵明,其中更有西山鹤山来同盟。八百载后归之乐安孙,可与宋雕《资治通鉴》称为两足尊。

元妙观石画拓本

墨云四壁石画张,玉丫叉展东书堂。坐论文物六朝古,晋太元迄隋开皇。是时苻坚败淝水,安石赌墅殊清狂。林邑范佛贡方物,金盘戴首珠腾光。长星一杯劝汝酒,昌明谶符晋不纲。虫沙猿鹤化异类,绕树乌鹊悲流亡。杨花落尽李花放,东海鲤鱼云中翔。凭阑默坐者谁子,知音或为万宝常。以古为鉴痛争战,刻石垂戒昭文章。昔我征车济甯驻,石室画像搜武梁。郭巨朱鲔墓题夥,黾池李颂夸祯祥。何若射阳谒尼圣,问礼雁贽周道旁。金石图史左右列,襄阳一舸游金阊。金阊玄妙古道观,为五都市百戏场。毡椎响拓蝉翼薄,琼玖珍贶投钱郎。廉石郁林访学舍,剑池虎阜摹山冈。纵有题字岁月近,媚俗书画开文唐。

易顺鼎

易顺鼎,字实甫,一字中实,龙阳人。光绪乙亥举人,历官广东钦廉道。有《琴志 楼集》。

入庐山

名山别经岁,见面恒苦疏。重寻意已欣,况有嘉客俱。二州连荆扬,三宿异舟车。 嚣尘背江郭,复睇凌霄隅。灵象纷在眼,造化为之枢。层阴漏云日,倏曶光景殊。仙人骑白 龙,游戏于空虚。峰峰各生烟,不辨谁香炉。天风入涧籁,万窍酣笙竽。灵雨木末来,萧疁 满人裾。岂敢怨霑湿,田歌欢有余。余亦自怡悦,兹游清可书。

濂溪墓

元公祠下望,不见莲花峰。指点读书处,白云生几重。断碑村竖画,高冢县官封。 一树霜皮老,还疑欲化龙。

雨中山行

连山塞鸿濛,万秀争一雨。杳冥阴阳中,青苍割吴楚。长飙吹玄云,散此鸦外缕。 村偏行人稀,草木接太古。酣叶摇天声,怪石挟溪怒。百霆与千雷,暝斗林壑语。喧笑杂蛙 黾,跬步窘蛟虎。凄籁孤襟寒,湿路一线取。佳游虽愉快,僮仆已劳苦。身穿云根幽,回首 迷处所。

山村雨夜送罗二还南昌

入门避雨屋打头,困眠一榻邻猪牛。雨脚遮檐万山黑,荒村四月寒如秋。瓦镫在壁坐摇影,兀兀欲照分襟愁。范陈对宇阻泥潦,一街似隔千神州。通家卅载未相遇,遇君武昌今两度。相携肝胆入名山,岂意山中送君去。别梦宵沈庐阜云,愁心晓挂章门树。渊明慧远不可逢,高人去后惟青峰。昨宵与君连榻处,三生同听东林钟。怜君病齿归思剧,试饮寒泉销内热。二轮风火足为灾,六凿根尘皆是贼。知君净业持已深,一心颇似维摩诘。养和学道与天游,他日见君当玉色。

雨行至通远驿

蛟龙徙窟穴,平地生湫渊。奔湍挟劲驽,倒射千山穿。玄云正朋兴,飞雨宙合悬。 下踏不测谿,上戴有漏天。行与雷电斗,万足莫敢前。霑涂蔽四体,耳目玩已偏。愧闻叱犊 声,力尽垅上田。一饱庶可冀,前村有炊烟。

雨霁隘口山行

云根吹阴晴,日脚递隐见。欲持并州刀,翦取丝雨断。风翻万叶背,雾走千峰面。 灵岳犹混茫,初烟与为冠。谁能扫氛霾,复此东南观。天开崖嶂古,愁破岚霞绚。仆夫指前 谿,石濑已可乱。杂花飘空林,客眼误霜霰。讵惜泥霑衣,徘徊为芳瓣。

青玉峡龙潭

苍崖天一围,径转吐雄瀑。灵山孕真源,金膏出其腹。奔云从空来,数里势屡曲。意嫌鸿濛隘,未肯受迫束。化工惜元气,万古与之蓄。跌为孤潭幽,神物有起伏。纡徐向平川,余响戛寒玉。谁云一泓窘,百宝可沐浴。倒穿大瀛底,日月入亦绿。地深云霞幽,自暮抵朝旭。如闻清猿啼,下饮涧水渌。兹区实琴德,幽接轩与顼。遂令遗世士,无言转温肃。镌痕洗春苔,万石尽可读。我游岂云多,终老难餍足。绵暖天地心,清寥在奇服。

归宗寺看月

碧空无云雨所洗,长风舒波一万里。大月入户天苍凉,幽人揽衣坐惊起。孤光远映金轮峰,唤取空山生海水。是时孟夏甫过望,太阴未觉亏全体。老蟾飞镜入匡庐,骊龙吐珠出彭蠡。一片愁心天地青,半空岛色星辰绮。法宫钟鼓宵沈沈,雄压天声万山趾。长廊可饭数百僧,浊酒相呼二三子。夜深人稀声籁绝,犬吠虫吟清可喜。诸天寂寂守龙象,下界纷纷斗牛蚁。诸僧鼾睡了不闻,佛亦无言垂两耳。绕庭千遍看未足,更欲开门觅山鬼。愁入天边坏塔孤,梦飞海外神州几。吾闻世界本沤浮,何况人身一稊米。百年易尽如风镫,聚散死生皆偶尔。要持屡劫妙明心,一学昭文绝成毁。君知今夕是何年,佛在虚堂正弹指。

喷雪亭瀑

惊雷破山龙衙衙,数里已闻飞瀑哗。隔山两重可望见,犹被青嶂微相遮。连冈叠岭起又伏,其径屈曲常山蛇。先闻绝境早神往,一旦得路如奔麚。適逢绝壁梯磴险,以手代足相钩爬。满山石镜亦可悦,日光照耀莹丹霞。三步回看五步坐,远衔鄱岭明金沙。力穷足茧瀑始出,两谷跌断中谽谺。观龙垂胡各叫绝,乃叹述者言非夸。泣珠恍探泉客窟,织绡疑入鲛人家。细如烟纨袭雾縠,危若冰柱转雪车。何年共工陷鳌极,海水倾向东南斜。九州天惊雨脚逗,袖手颇复哀神娲。青霄倒垂星宿海,客欲往泛愁无槎。力穿深潭九地破,对足或抵欧罗巴。横飞水气百步外,色有黛绿兼赪霞。凄寒惊成满肌粟,奇幻疑是双眼花。石梁界空何代造,我意未较天台差。其旁独树张大盖,太古冰霰融根芽。偶非神参茁五叶,否则奇卉开三桠。小僮相从颇解事,支炉煮瀑烹新茶。瀑似天龙下听讲,我如旉坐围袈裟。更从石屋访遗迹,残砖坏藓空盘蜗。士有山林往不返,问名与氏知谁耶。吾侪疏懒本天放,晚殉一壑非穷奢。奔腾不归少至老,人海一堕终无涯。诛茅枕流愿莫遂,相对惟有长咨嗟。

万杉寺五爪樟

万杉化去无一杉,惟有寺前老樟在。樟分五体同一本,身历百龄更千载。旁达涧壑根已深,直干霄空气不馁。云垂太阴逗雷霆,风翻白日动光彩。危柯半入烟冥冥,细叶还铺雪皠皠。化人伟奇丈六身,猛士雄健尺八骽。全张数爪鳞之而,俯视众木身傀儡。古来贤豪谁抚摩,其人已往不相待。惟有五老之奇峰,共对青天无倦怠。虽言乾坤要支拄,未免得罪庸与猥。下穿已愁伤地媪,上拏又恐妨真宰。独立无友大哉警,众人皆忌甚矣殆。自是刀斧莫能入,皮坚有类披铁铠。大材讵肯腐山林,神物犹思避菹醢。吾闻豫章生七年,便可与龙斗沧海。何况此树世希有,寿过凡樟逾百倍。愿为楼船击西夷,知君九死终不悔。

还琴志楼山居赠陈大范二罗二

昔行万里登峨眉,雪山挂眼穷坤维。神州积气不可辨,俯视下界心魂悲。周郎陆弟 共携手,看云听瀑贪恢奇。一别名山迹如埽,梦飞不度天彭道。同游数子各风烟,此意苍茫 令人老。前年投劾去大梁,尘土凝面须眉黄。不须物憎早自废,迳欲往诣无何乡。尚怜匡庐 在人境,手翦莱棘开山堂。昨依帅府客武昌,时复走入崔嵬藏。宗雷陶谢岂并世,令我望古 神惨伤。自分山中侣麋鹿,岂期世外同衣裳。陈兄高奇范兄伟,罗弟思心偏斐亹。揽珮褰裾 无旧新,顾我痴愚犹我韪。俱怀逸兴干烟霄,共走穷山触蛇虺。弥空际宙心期在,未觉乾坤 委荒隘。万壑天风答笑声,千林海月窥襟带。怜余鬓发久苍浪,提挈雄肝聊一快。默数欢游 已得双,休惊壮齿难成再。龙藏麟见圣无权,一壑悠悠自可专。我悟支离为道本,君知拥肿 得身全。酒乾烛烬无言说,五老同忘旦暮年。

栖贤涧石歌

栖贤涧谷有奇石,倒卧青冥神所擘。鳌背惊翻海水飞,龙髯陡接天云立。奔霆日夜摇撼之,万古空山皆霹雳。跌势纷如矢坠空,涓流巧作珠穿隙。其旁清稳百盘陀,倚涧临流可敷席。水石相遭岂不平,自从天籁发噌吰。道人两耳痴聋久,问是水鸣还石鸣。试抚孤琴动山响,方知水石两无声。

范二赋琴志楼诗并寄由甫感其相爱作此答之

走昔万事不挂眼,黄金散尽千无忧。西蹑峨眉眺雪岭,东登泰岱观瀛洲。途穷日暮一掉头,匡庐来弄松风秋。不能专城且专壑,有此木末三间楼。阿父悬车不出户,板舆自奉安仁母。杜陵弟妹黔娄妻,相携共入云深处。屏风宴坐百重霞,布水经行四时雨。此福差堪傲世人,全家冰雪清忘暑。名山重到忽经春,旧雨陈侯君雨新。忆弟每看三峡月,思亲常对五峰云。君家门外浮天水,门内三龙头腹尾。楼船过汝不相闻,握手神州几千里。两家兄弟感天末,嗟我与君皆仲子。我兄已殁十九年,惟余我弟私相怜。知君三人亦共命,梦飞海色迷吴燕。山楼十日共欢谑,阑干坐懒岩花落。屐齿千峰异笑啼,酒杯万古同哀乐。君言龙眠山水幽,意拟移家住灊霍。后者三茅前二匡,他年姓氏都成岳。

第六泉四绝句后二首忆南皮师义宁丈

太古云浆滴似珠,神功岂止涤膻腴。军持汲后猿窥影,留待他时碧海枯。

灵斟道溉得天全,那要供渠蟹眼煎。误识人间老桑苎,几回封寄九江船。

金山锡谷细评量,风味端宜老赞皇。四海一瓶休袖手,更持北斗酌天浆。

火宅惊看烈焰时,谁将清露洒杨枝。人天一勺皆功德,漫惜骊龙颔下髭。

三峡涧连理松歌

张公所佩双神龙,何年飞入匡庐峰。化为奇峰号双剑,复化山中连理松。元气为浆 相灌溉,欲呼五老论年辈。冰雪常含太古心,云雷自转诸天盖。话根磊砢幽涧边,听瀑看云 忘岁年。涧声万古入其腹,清籁时时还一宣。荆蛮采药苍茫意,伯仲同行因让季。后来高节 又夷齐,掉头不肯称周帝。匡君亦是伤心人,同气相携争避世。对松惆怅想千春,若见当时 好兄弟。我从前年辞大梁,织畚佣舂携孟光。偶来并立此松下,习习微风吹鬓凉。白首同归 约异日,青山信美真吾乡。至今有此数椽屋,为感此松幽意长。万物从来有龙蠖,名材且莫 憎岩壑。吾辈还期共死生,世人那得知哀乐。正直终蒙造化扶,孤高亦受神明话。请诵山中 《招隐》篇,海水天风一时作。

偕伯严云锦亭夜坐有怀梁节庵去夏同游

去年六月雨汗挥,君来款我山中扉。饭颗我如子美瘦,肉山君似文潜肥。遽偕陈子 褰裳返,颇慑炎官张伞威,溪亭今日对陈子,磅礴思君学解衣。

山中观物杂咏

细草昨争碧,疏荷今弄青。微波想鸥鹭,永夜乱蛙萤。明岁花应放,何时叶可听。 凭阑吾对汝,幽绝两忘形。

涧失女猿久,千钱新赎归。莫啼深峡树,防湿定僧衣。笼槛刑应免,山林事已非。 主人蔬果俭,恐尔亦难肥。

一尺仙人掌,残魂讵自嗟。荣华侪蟪菌,断烂委虫沙。大化原无联,微生共有涯。 支离吾欲忏,截臂问三车。

寒蝶不能去,相依认作仙。映镫飘雨坐,窥客枕书眠。栩栩寰中梦,沈沈槛外天。 荒山销彩翅,知否惜华年。

百草未成腐,流萤何遽多。隔阑吹不度,当涧坠如何。微物关秋气,空山映晚酡。 谁持白日照,仙魅在岩阿。

山僧强解事,为我慕陶公。学种先生柳,安知晋代风。客嘲应不免,吾意故难同。 且祝清阴长,他时酒盏中。

张知县凤冈相访赠诗走笔答和

众生何痴愚,造物真狡狯。投其所嗜好,相诱令破戒。世间耳目玩,山水尤称最。 此癖尚未除,难游天地外。应知种种相,即是种种碍。昔年官君乡,面目自憎怪。牵丝尘土 中,若逐傀儡赛。衣冠强束缚,四体无一快。嵩岳与太行,徒劳梦魂挂。自知猿鹤性,雅不 宜轩盖。浩然入匡庐,藉了名山债。泉石可枕漱,妻子相负戴。诛茅依甘棠,亦得勿翦拜。 至今屋数椽,留作樵牧话。岂期山亭幽,得与君晤对。足音破空谷,高咏喧奇籁。行当布霖 雪,沾润吴楚界。变化犹神龙,勿效鄙夫介。

和伯严留题•鼻功德辅

空山杳无人, 幽花吾媚汝。九州欲贻谁, 莫折一枝去。

和伯严留题•青松社

天地何清夷, 我歌君和之。大雪闭皋壤, 将子傥能来。

和伯严留题 • 粥饭寮

人生何营营, 百年事此腹, 惭愧山中人, 一月饭几熟。

和伯严留题•飞虹梁

伟哉祖龙鞭, 能叱鼋鼍起。我醉亦跨虹, 游戏四海水。

和伯严留题•鳌矶

龙伯与任公,三千六百钓。鳌乎勿吞饵,恐被五老笑。

和伯严留题 • 藏舟壑

藏山尚可负,何况藏此舟。愿乘六气辨,元化以为桴。

和范二雨登琴志楼

细雨濛濛似玉京,仙人咳唾接孤清。云浮车盖檐边色,浪鼓楼船槛底声。自倚烟霄 飞酒盏,欲回江海入帘旌。朱弦何处成连抚,五老苍茫喻此情。

和范三题云锦亭

渌水蜿虹影动摇,襟边冷籁散亭皋。诸天鬓色吹神雨,一壑琴声送海涛。仙梦影飘林外蝶,酒杯痕湿槛前鳌。飞龙石濑愁俱迥,忍和幽人廿五骚。

游栖贤寺

山响溪所为,兼以雨鸣叶。鬓外如已秋,凉痕在双颊。荦确石磴古,客步履蹀躞。 林随大壑转,径与奔湍接。澄潭绿涵空,俯视戏鱼妾。玉渊阻磐陀,草际成暗涉。栖贤昔雄 刹,佛力久疲茶。寺门虚无人,寒此松万鬣。啼树惊早蝉,依花感迟蝶。残僧三两辈,为我 启箱箧。画图天人师,龙象犹震响。更倾频伽瓶,舍利发可贴。想见毛孔中,四大海水摄。 试观起灭云,旋失屏风叠。幻幻真亦幻,屡劫同一霎。冥思触悲悟,广殿风猎猎。却寻前路 归,冲泥湿幽屟。

游卧龙冈访朱子筑庵处用朱子韵

老龙卧垂涎,成此千丈湫。力能沛甘霖,络绎金简投。过时若无用,委弃荒山陬。 神功不求试,又岂畏人求。我来访灵境,山路阻且修。双崖呀然开,始见风云幽。太古铁色 壁,倒挂三峡流。伟哉造化奇,神鬼莫能谋。哲人惬兹区,卜宅尝屡游。顾名缅英贤,溟漠神相酬。至今寻丈间,名与天地留。吾闻龙为德,出则被五洲。退藏一壑内,有若枯枝樛。 吾侪但饱噉,望古真堪愁。徘徊日将暮,烟霭何纷缪。回首望苍崖,寂寞飞龙秋。

谢王使君送匡山紫芝

匡山紫芝生绝巇,神物难致路幽远。樵人辛苦媚使君,持献公堂才一本。无德不能致此芝,惟有使君能致之。殊祥异瑞不自私,似可斋祓陈天墀。谁知使君用意别,聊赠山中麋鹿姿。紫云一朵忽飞下,满堂动色相嗟咨。真形轮囷根屈曲,古色斑駮光陆离。轩羲日月所沐浴,姚姒雨露所溉滋。中含元气犹淋漓,旁观但讶形模奇。有如肃穆陈鼎彝,奇古又若岣嵝碑。若驾鸾凤骖龙螭,羽葆幢节纷追随。真人无言坐华盖,王母欲下来金支。僮奴不解天然贵,疑是巧工雕镂为。使君怀抱何浩浩,鬓眉颇似商山皓。恺悌君子神所保,报之玉树兼瑶草。此芝亦是君精神,一茎草现金刚身。十年种遍匡山春,却把余春赠与人。吾家先世玉芝堂,人去堂空芝亦荒。拜君嘉惠不敢忘,如还旧物增休祥。归奉二亲进一觞,回首屏风南斗旁。

琴志楼诗

峨峨山高,洋洋水深。杂花照涧,幽柯蔽林。目送万化,手劳孤斟。危亭若笠,中 有一琴。

峨峨高山,洋洋流水。壑想藏舟,岩思避雨。太虚无垠,人浮其里。欲登高丘,以 望远海。

高山峨峨,流水洋洋。躬耕百年,奉我高堂。左列图书,右侍姬姜。寄形区中,若 存若亡。

流水洋洋,高山峨峨。八表非远,一云能多。攀我丛桂,赠之疏麻。何以相娱,弹 琴酒歌。

送南康王使君解官归里

使君十载南康城,抚摩一郡如孩婴。我来匡山狎猿鹤,满耳闻颂神君声。作公部民差可喜,一廛稳受千崖里。劳公白衣常送酒,念我黄冠似归里。命驾每从千里外,卜居已过三年矣。去年武昌来,闻公亦初还。公还旧郡我还山,山中猿鹤皆欢颜。今年武昌来,闻公又将去。公还故乡我流寓,山中猿鹤皆悲绪。我今年才三十强,怀抱冰雪无春阳。每逢热官辄走避,见公岂意温中肠。公年八十好神采,健若龙马驰康庄。至人养和驭造化,外物冰炭谁能伤。乃知蓬蒿与松柏,相见未可论短长。八百纵难企彭祖,九十已足凌张苍。何况治郡有阴德,于公子孙行更昌。官閤沈沈语忘倦,白头回忆江南战。酒酣耳热说曾侯,幕府英英盛群彦。郭冲五事犹能记,阮孚三语初为掾。同时得路俱腾骧,钟鼎山林两无算。转饷曾推萧相功,饮醇自学曹参办。寥落东南一老守,头童齿豁看云久。方今吏道颇衰微,莫使贤人厌升斗。安得皆如元道州,一时布列神州九。解组谁明陶令心,埋轮更惜张纲手。我尚思攀车上辕,公言且酌杯中酒。函楼老子六十余,挂冠七载神丰腴。今年有意探匡庐,乘兴一访茅君居。华阳句曲公乡里,洞天福地非虚诬。烦公更作东道主,却写交游两世图。

云雾茶歌

匡山云雾窟沈沈,闻有六朝僧未死。窟中产作云雾茶,灏气清英复无比。话根高接南斗旁,坐令涧壑流芬芳。三十六梯不可到,天风细细吹旗枪。幽香似酒忘年岁,仙蝶飞来心已醉。清閟宜教虎豹守,窈冥若见龙蛇避。鸿荒辟后留根荄,却是匡君手自栽。高空日月赠精髓,邃古冰霜成异胎。斡旋元气仙人掌,斟酌灵浆众帝台。蒙顶上清足相埒,宜供大祀陈天阶。辛苦山僧摘盈瓮,手皲足茧人间送。叶叶都含瀑水湿,枝枝尽带岚霞重。种少应知造物慳,摘多莫使山灵痛。螺春龙井徒芳腴,尚书道此清凉殊。中泠精鉴赞皇李,双井佳题玉局苏。袖里携将云雾去,欲倾江汉试跳珠。

登五老峰观三叠泉即送陈范罗三君别

天风怒挟楼船走,一夜吹人傍南斗。琴志楼头飞雨悬,日呼五老同杯酒。诘朝海色连屏风,初阳灿烂金芙蓉。白云散尽五峰出,一朵芙蓉为一峰。云霞精魂日月液,铸此空中数拳碧。斑駮疑经女娲炼,峥嵘想见灵胡擘。孤根下插溟渤深,倒涌奇云作潮汐。上窥造化无四邻,横绝东南惟一石。不知混沌未分前,此峰却倚何天立。乾坤崩坼海水翻,未倒鸿濛旧墙壁。杞人莫忧天柱倾,乾坤赖此还清贞。阳开阴阖苞万灵,砉然吐出如新硎。大鹏沸海擘金翅,孔雀摇天翻翠屏。江湖下通地道白,吴楚中断天门青。独斟元枢执大象,坐览八极神明庭。我疑一峰肖一岳,五岳何处藏真形。鸟道横空一万里,石梁卷尽昆仑水。龙愤雷霆斗穴骄,猿惊冰雪喷崖起。鬓边河汉似西流,脚底须弥欲东徙。误道天公大笑声,投壶玉女输骁矢。仙魅行霄瀑作梯,虹霓饮涧山如绮。匡君无言李白死,落落人寰初至此。未许残飙冷剑花,肯让幽菭埋屐齿。醉倚磐陀钓海还,神州正拂长竿底。酒尽千峰休怅然,与君便可挟飞仙。青天涕唾六鳌背,白日歌呼五老颠。君卧太虚犹衽席,我凭倒景作阑干。梦魂不逐斜阳去,相与提携十万年。

海会寺

中峰如法王,师子据其右。老僧初开堂,辛苦此结构。欲令震旦国,举首眺灵鹫。天高龙象雄,地迥猿鸟瘦。钟鼓运风涛,楼台出云岫。我来访五老,逮此成三宿。沈沈青莲地,可踏不可漱。禅人数十辈,梵诵宵达昼。为喜观威仪,频来听经咒。弥天左蠡浸,收取作阶霤。风帆散万叶,沙鸟飘千豆。禅心止水定,客面观河皴。闻僧昔面壁,绝粒坐岩窦。今年八十余,爽健神所祐。其徒勇写经,坚苦本师授。周身万毛孔,一孔一针漏。华严几万字,一字一血透。吾闻兼爱术,不惜顶与脰。儒家好批根,所见无乃囿。孔墨何龂龂,仰窥大圜覆。

重五前一日出山作

四年此地两重五,前度入山今出山。荆楚岁时徒衮衮,匡庐云物自閒閒。每逢令节 浑无奈,欲买扁舟且未还。回首楼台淹日月,惟余涕泪照苔斑。

吴章岭出庐山是李白别内处

长飙吹散五峰云,化作群龙到东海。我亦乘风下九江,青天俯视楼船在,寰中冰炭

煮日月,物外沧桑幻烟霭。吴章岭上看云还,夕阳明灭千万山。谁倚山堂映酒看,镜边五老回朱颜。半角楼台自朝暮,梦飞不到阑干殷。忽惊脚踏天梯古,李白精魂在何许。当日绸缪为别离,人生跬步多歧路。赠此悲酸千载心,涕泪因风洒吴楚。玉杖西还黄鹤楼,潇湘南去更悠悠。明朝回首一千里,瀑布残阳天际流。

黎汝谦

黎汝谦,字受生,遵义人。光绪乙亥举人,官日本横滨领事,广东候补知府。有《夷牢溪庐诗钞》。

过平彝所

忽堕南滇月四圆,蛮花犵鸟剧堪怜。恰才去国一千里,已胜投荒十九年。励治正羞 张赵酷,安危未信孔桑贤。平生结习狂游在,北固西湖订夙缘。

陈书

陈书,字伯初,晚号木庵,侯官人。光绪乙亥举人,官博野知县。有《木庵居士诗》。

弢庵招游听雨斋未果用昌黎炭谷湫祠堂韵寄题

先生游物外,贱子困尘寰。水声常激激,穿我枕函间。梦中从之游,起来仍闭关。 旸谷閟太阳,居山不见山。东南石鼓矗,一缺如留环。下窥洞地底,窅缒穷天慳。禹功蔑以 售,皇然念神奸。危坐鄙禅悦,辟易山僧顽。不祈炭谷雨,坐弄白日閒。行厨进杂沓,所阙 惟妍鬟。山鬼导客至,抽豪貌孱颜。松岚下拂拂,落纸无由还。我昔见二图,开幽惮前艰。 萝篠施葳蕤,野英垂朱殷。常呼鹘巢守,肯使鱼钥鳏。诗料付叶適,清便富难删。我曾尽读 之,何止窥豹斑。美哉东野龙,停云思追攀。人生少壮怀,倏忽头已颁。谁能羡勤王,郑师 犹在菅。

肖韩贻诗兼送叔伊之行又次韵纪梦诣幼点村居依韵奉答

果能诗神交,幽访以梦到。涉江净澄思,语俊失鲍照。山楼赴吟集,苦涩臂难掉。 不嘲饭颗瘦,幸恕酒户小。吾髯非绝伦,只可诧便了。苍黄持斧柯,播弄对目巧。合观五七字,忭舞欬且笑。昔时酩酊游,接 花下倒。今来送家弟,紫荆迹如扫。高轩或见过,倾耳鸡树噪。

晓起思家作书用东坡百步洪韵寄仲叔二弟

津亭东望生风波,隤阳西下无停梭。几回思归归不得,日手短墨窗中磨。偶逐闲游访水利,六井塞断亡东坡。凉风八月兼夜至,一洗花港稀留荷。句留为此直无益,顾恋岂复缘黎涡。平生出门罕穷独,豪气画壁歌黄河。此行有若随嫁媵,诗谶恰应乌投罗。三楹楼下鼠窥殡,夜见漆色黄成驼。严官之途始畏绝,缩足退食甘委蛇。著书未半忽昏卧,仰见梁燕先辞窠。起来绕屋唤佣仆,立意作达徵亡何。苍苔泠泠秋雨下,不饮恐被少陵呵。

寄芸敏京师

北雁不来秋雨稀,湖云衔日游人归。轩窗卧愁诗又瘦,稻粱晚熟鳌难肥。去年花黄蝴蝶飞,登堂别君觞交挥。诗书制序石林至,丰采暎壁如云翚。我今不乐辞庭闱,君复流连淹帝畿。僧房独榻亦何有,垂稿忽怨缁沾衣。春来补被还相依,西山日落烟霏霏。骖鸾夜静呼灵妃,诗成且复忘朝饥。人生何处更称意,看取沧桑日夜非。

呈弢庵

元祐诸公天人姿,庆历圣德天所毗。既清海甸卷怀已,不殚厥锷焉施为。乡党流风要人纪,文献晻昧烦探披。泉虚石伫盖可负,况咏华黍赓参差。青春登朝强仕归,猿鹤欢喜迎龙夔。摩崖浯溪兴不衰,老于文学今其谁。温良颜色入座有,时以句法相质疑。龙章凤姿爱鳖跛,乱头粗服参旄氂。东屯西瀼隔还往,岁四五至穷昏曦。坐公听水之斋思,松篁琴筑弹流澌。山举踏月夜半至,挟卷报道诗寻医。

小除夕

海棠能作檐下花,梅叶先占旧年绿。吾庐春尚不欺人,到眼风光如转烛。去年还家 万事足,岂料今年脱床褥。悠悠往事不堪思,鼎鼎征装宜结束。习勤运甓吾岂敢,独立庭前 驱雀浴。

本意

蜜蜂无花祇趁人,春融滟滟天光新。庭阶燕坐听鸟语,何用身世愁无垠。官厨生菜源源至,天意可转哀吾民。尺泽何妨旬日匀,官身既老宁思莼。但憙子妇能和亲,此岂分外天无嗔。

寸晷

晴日暂可惜, 杪春行复阑。童心如有话, 老境足能安。小室净洒扫, 古诗知肺肝。 百年长役役, 寸晷独磐磐。

三月八日自正阳登舟晚宿乔家渡口

髡柳饶生意,沿淮似送行。别怀思事遣,老境转身轻。出处何心决,窊隆此念平。 维舟天色早,料理旧诗情。

沧海

叔伊将归上海

聚己无端别可疑,春镫对案费寻思。赏诗迳尔论千载,浪迹行将挟二弥。邓尉相须情欲动,皖公未到竟先疲。看云自是平生惯,病臂无眠奈此时。

示暾谷

枣下虽垂非纂纂,花前屡舞更仙仙。岂尝老我愁何逊,颇为旁人笑泰颠。卧酒频移 花近榻,忍寒还听坐专毡。句成自取挑镫看,不似诚斋定不然。

枕上

凉飔穿帐夜真良,巷出居人语未央。客思移镫转深窅,虫声在壁极微茫。河星渐淡 月知上,瓶水初冰花弄香。开著西窗苏病息,不应遽唤墨甜乡。

归计将成怯情转甚

极望山梁振羽翰,巢林栖舍意难安。三年城郭迷华表,再过园林冷食单。出口暄寒 愁问答,刺心慰藉甚嘲姗。支离骨态新来倍,饶与旁人注目看。

病卧抒思

吴楚相望老弟兄,家林仲子独孤行。信知聚散期前定,止博艰虞练后生。燕垒春寒 忘近社,雁程霄迥恋残更。已拌断绝吟哦事,本色还缘小病萌。

题淮雨集

淮雨声声岁又阑,儿嬉造物太无端。读书种断真堪惜,慰友词穷有至难。他日水沈忆西阁,一时元鬓殉南冠。怀王觉寤嗟何及,岂信兴亡属子兰。

除夕用东坡常州夜宿韵

不饮何因得酒悲,乡心于我直几微。非缘儿女能相慰,正恐田园未算归。老去论兵空气壮,闷来发难亦知稀。脩蛇赴壑年年事,南斗而今止暂依。

零雨东山岂我徂,许多柳雪尚征涂。祭诗此夜新为客,爆竹何妨辟画符。写意频添 古商陆,争新惟斗白髭须。谁知酒渴思逃席,多谢殷勤为点酥。

与弢庵夜谈

贪凉初夜垂帘坐,新月辞人早上楼。斜汉渐中秋指顾,空阶如扫露沈浮。咫闻乍爱 贞元士,癖好谁甄雅故流。落与閒中商句法,定交京兆马笼头。

读温岐诗感事

明月扬州属狭邪,太牢狱省惜才华。飞卿流落樊川贵,宫体居然为杏花。

听水居士贻诗画扇即次其绝句天字韵

诗沾沧趣益逌然,画貌龙身与榻悬。想叩岩扃了无分,蹉过百八暮钟天。

徐世勋

徐世勋,字藻函,号钓叟,震泽人。光绪乙亥举人,官镇江教授。有《枫江渔唱删 存》。

寄费安槎

垂虹归去已无家,席帽飘零水一涯。岁岁依人春燕子,年年入梦故园花。耐寒和靖 诗应瘦,卧病相如赋不华。遥想故人当此日,定搜险韵斗尖叉。

冬至日约汤伯繁游观音山风雨不果

避俗约游山,一勺清泉冷。蜡屐已安排,风雨勿交并。卧听淋浪声,寒镫澹孤影。 胶胶荒鸡鸣,怀人发深省。

何家琪

何家琪,字吟秋,号天根,封丘人。光绪乙亥举人,历官汝宁教授。有《天根诗钞》。

读顾亭林先生书感而作

寸心天万世,六合清明开。风云积时代,日月相往来。地维隆西北,万里山横排。中突一华起,浑抱洪濛胎。河水昆仑顶,毕气吞江淮。方海司出纳,全脉为之回。士不遇三代,贤愚齐尘埃。反望古制复,假手凡庸才。清时召不起,老病完形骸。冬青屡相识,夜哭臣麻鞋。凄凄春雨苑,猎猎秋风台。匹马倦天下,著书空余哀。

浣花草堂

草堂岁月犹开宝,万里旌旗落眼前。何用丈夫身许国,祇凭野老哭回天。死生亲见 收京日,今古同悲《出塞》篇。满地江湖问归路,百花潭水梦无边。

太白酒楼

云中携到惊人句,千载风流第一楼。白日长安全在眼,青天蜀道独昂头。后来狂客 才谁敌,生不同时我独愁。当世骑鲸仙再返,洛阳无路问糟丘。

过管敬伯司马大梁

奇才一表动长安, 更走边关气郁盘。百战余勋付奴辈, 中兴大笔出衙官。沙驱地转

河声疾,日射天孤塔影寒。自古中州云物盛,与君同上吹台看。

陈作霖

陈作霖,字雨生,号伯雨,晚号可园,江宁人。光绪乙亥举人,就职教谕。有《可园》、《寿藻堂》等集。

放歌

寒风飒飒吹屋破,明星挂檐如月大。中夜忧思不能卧,披衣独起挑镫坐。丈夫岂合常穷饿,牢落风尘偏轗轲,跼天蹐地愁无那。愁无那,心忉忉。夜欲曙,鸡三号,拔剑斫地歌声高。

走虽不能及奔马,力虽不能挽强弓。平生揣摩五千卷,略则黄石韬太公。料天下事屡奇中,视贼伎俩掌上同。傥使参谋向帷幄,未必不成分寸功。况兼一枝琳瑀笔,飞书草檄颇自雄。岂若谈空说有辈,只合束之高阁中。茫茫宇宙无知己,仰天吐气成白虹。侧闻江淮诸元戎,延揽似有名将风。我欲仗策相追从,短后袴褶骑黄骢,军门长揖谁为通。

水涌必由泉源注,木茂必由根本固。我家百口渺何处,吴越晋秦各异路。吴越烽烟高接天,死生消息都茫然。晋秦山川复险峻,脂车秣马愁难进,每一念之心烦懑。安得聚居安乐乡,土地膏腴田亩良。种以黍稷杂稻粱,上为祖宗供烝尝,下为宗族给衣粮。其余亲友来我旁,尽情施予慨以慷。不愁挥尽黄金黄,呜呼此愿何时偿。

读书不能救奇穷,旁人劝我学老农。识字不能免愁苦,旁人劝我学良贾。秉耒不知 耘与耕,据算不知亏与盈,学农学贾皆无成。如此迂腐君莫笑,富贵从来难逆料。力田农, 虽可为,水旱毕竟随天时。居奇贾,虽可作,慢藏亦恐遭奇祸。不如潜心经济与文章,始则 困兮终则昌。

丁丑正月赠刘恭甫即以留别

六经厄秦火,汉儒勤考稽。司农集大成,胸次无町畦。后人训诂学,于兹得阶梯。 君家富经术,世业承青藜。逮子复博洽,笺疏穷端倪。染翰为文章,笔力追昌黎。余事及诗赋,摆脱寻常蹊。鸾皇发清啸,不作寒蛩啼。我初识子时,介绍由璜溪。龙门同御李,一见深交缔。每当肄业顷,扃门发新题。俭腹无可搜,音屡误雌霓。赖子行秘书,三箧指我迷。行随千里足。驽马亦駃騠。名高旁人妒,往往俱遭诋。岂无赏识者,刮目资金篦。邑志重纂修,局开鹭坊西。子首应徵聘,笔砚随身赍。滥竽更及我,左右劳挈提。体例互参酌,嘉味调盐醯。疵颣互抉摘,良药进刀圭。悔翁今作家,烛理如然犀。谓我大事记,与子蓺文齐。泰山高且峻,肯为培塿低。既惭复以幸,黾勉事攀跻。况此十年中,佳日常招携。挑菜莫愁榭,采菱元武隄。飞霞及灵谷,穷探仙佛栖。觞咏乐复乐,唱和赋萚兮。他时寻爪印,历历皆鸿泥。阳和催淑景,雪释冰流澌。计偕期在迩,门外车驾輗。行当与子别,一曲听歌骊。功名亦何物,得失争虫鸡。感子缠绵意,酒酌金玻璃。祝我赴长安,春风健马蹄。自分骨相寒,不称居金闺。江南夏四月,芳草碧以萋。会当返故里,暂离非久暌。游览与著述,愿子其少溪。

周忠毅公墨迹卷送藏焦山诗为赵季梅中翰作

我昔泛棹游焦山,曾见杨公所遗之玉带。文襄谋略海内传,能途逆瑾功尤大。又尝驱车上春明,得向椒山杨公祠堂亲展拜。平生胆不借蚺蛇,尚留谏草壁间发光怪。胜朝气节无与俦,正嘉诸臣通沆瀣。下逮天启昏乱朝,西台謇谔洵为最。御史周公铁作肝,立朝慷慨称匪懈。对仗弹章劾厂公,不惮五虎十彪逞毒害。朝归乡里暮圜扉,击佞未成甘首碎。遗文零落不可知,傥获缣缃生敬爱。吴江地僻公故乡,梅叟来居学官廨。耆文好古擅风雅,休沐余闲阅书画。贾人不识公手书,捆束牛腰市中卖。百钱买得喜欲颠,细字联珠大编贝。装池釐订具苦心,伏暑阑时勤晾晒。移官携向金陵来,箧笥深藏防破坏。因思名臣墨迹以人重,片纸俱堪阅时代。何况草书神妙走龙蛇,居然争坐位帖同一派。天留神物不敢私,广大流传推法界。何妨施向枯木堂,解脱因缘两无碍。遍徵题咏为证盟,欲令海天佛国添佳话。永嘉方伯本通儒,护法宰官拥冠盖。巧偷豪夺防未然,印钤朱纽篆垂薤。从兹人胜坊间定慧寺,常同杨公玉带山门挂。我今对此转踌蹰,绢素多年无不败。何当镌石嵌壁间,得与松筠庵中谏草之堂遥作配。

胭脂井吊张丽华

春江花月南朝冷,床下军书报边警。狎客欢筵未及终,镜明照彻山河影。台城古井 苔花红,临春结绮楼皆空。君王妃子甘同梦,尘飞不到潜龙宫。国亡难备牵羊礼,碧血凝膏 谁为洗。美人至竟不负君,未共宣华人晋邸。

春夜寒甚怀凤生

三月将半春未归,海棠冻僵红不肥。满天密云慳作雨,朔风料峭寒砭肌。此时摊书 拥裘坐,微吟肯辍镫前课。漏滴铜壶宵已深,淡月窥帘趁窗破。北乡飞鸿逐去尘,谁怜怀远 意逡巡。深居斗室犹嫌冷,况尔风檐对策人。

可园对雨

新晴无几时, 东风又作雨。清明节已过, 春色在何许。摇绿竹相戛, 湿红花欲吐。 胡蜨弱还飞, 流莺涩亦语。造化暗推移, 峭寒曾莫阻。不息即天机, 吾悟养生主。

鸳鸯湖边望烟雨楼

风起鸳鸯湖上秋,临流欲渡苦无舟。我来竟未逢烟雨,红出斜阳画里楼。

感述效涪翁体

少时好博情不专,晚年学道忘蹄筌。日长掩书不复读,森然万象来我前。后生问我何宗旨,笑而不答坐隐几。秋深闻得木樨香,乃知吾无隐乎尔。

我今衰朽百无用,一枝老笔犹飞动。建康嘉瑞颂赤乌,《太玄》终篇吐白凤。尚忆 嬉游科举场,后来声望重江乡。他时人傥传遗稿,莫误虞山拂水庄。 蒋萼

蒋萼,字跗棠,宜兴人。光绪乙亥举人,官丹徒教谕。有《醉园诗存》。

摇落

摇落天涯暮,羁栖感不胜。无家遂耕隐,有妇作吟朋。多病风怀减,悲秋客思增。 吾生安守拙,与世敢模棱。

旧业荒三径,严亲滞一官。十年遭丧乱,万状忍饥寒。作客曾何补,依人总觉难。 愁多怯霜鬓,引镜几回看。

蒋师轼

蒋师轼,字幼瞻,上元人。光绪乙亥举人。有《三径草堂诗钞》。

秋夕

木末秋云飞,晚霞不成霁。凉风动虚幌,杂卉媚幽砌。坐对日西匿,遥空但阴翳。 向夕蛩声来,秋心忽满地。焚膏手残帙,万籁感情思。羡他邻妇织,已为岁寒计。

秋晴游妙相庵同周二守卿周大凤笙筱园绍由弟

生公性疏旷,相与坐忘机。水木通禅意,烟云浸客衣。清谈听落叶,散步入林霏。 为问随园胜,苍山夕照微。

四壁藓花滋,清华壁上诗。可怜湘水恨,如诵楚骚词。泉石宜清供,兰荪讬远思。 高风安可仰,庭木蔚寒姿。

晓过扬州

潮声风力一帆道,午夜霜花冷舵楼。幽梦初醒江海曙,人携残月到扬州。

立秋夕

今夜三更月,梧桐一叶秋。搴帏望河汉,清影下西楼。蛩语尔何意,露华凉不收。 惊心岁华晚,风色动吴钩。

奔牛雨泊

云波瑟瑟夜迢迢,偪仄篷窗酒力消。短笛声中风又雨,残镫和梦落寒潮。

绝句

茅茨俯流水,寒篠摇烟霏。牧笛下前径,一双鱼翠飞。

吴塔夜发

三更月满船,载梦溯前浦。天水夜寥寂,微风数声橹。尘事忽萧然,秋心入虫语。

送汪宝素之武昌

汉广通三湘, 兰芷多于草。春风一以至, 舒华媚清晓。遥遥屈宋艳, 落英嗟已槁。 愿君搴孤芳, 缠绵发天藻。相逢江上人, 遗之寄东道。

朱贻泰

朱贻泰,字后成,号少卿,宝山人。光绪乙亥举人。有《秋涛阁吟草》。

登吴山

簇簇芙蓉雨后青,峰危嶂叠斗珑玲。人来绝顶消尘梦,晴送虚岚作画屏。雪浪万层 摇石壁,琳宫千佛镇山灵。振衣直欲凌云去,野鹤盘空健拂翎。

张仁黼

张仁黼,字劭予,固始人。光绪丙子进士,改庶吉士,授编修,官至吏部侍郎。

胡寅谷内弟善饮赠以酒券以诗见报即和原韵

东京擅风节,俊及与顾厨。降而毕阮辈,烂醉卧酒垆。文藻奚足贵,彩禽尾毕逋。尔我道义治,促膝爱蘧庐。高谭揖管葛,论文薄三苏。精研治民术,平衡披王符。嬉今而骂古,腐儒有何辜。华颠嫚如昨,霜雪洒头颅。君方谢秉铎,我久滞瀛壶。君文涵万有,我智辨之无。性只分狂狷,才亦判腴枯。君抚宓子琴,我啖乐正餔。我歌君且舞,轩乎其鼚乎。楚些慨以慷,妃豨和噫恶。

发介休县过义棠宿灵石途中即事

古镇义棠过,故关冷泉摩。两山争壁立,湍悍夹汾河。

松檞蔚青葱, 山花瀰岭红。梯田绿万顷, 灌溉一渠通。

冠爵通津古, 谷寒雀鼠空。前山绝顶处, 危塔矗云中。

野舟不系缆, 疏柳覆清津。穴处人家惯, 宛然葛天民。

急湍颓岸,峭壁冱寒云。径仄予怀坦,王尊志不纷。

灵石浮水上, 扣之出金声。虫篆谁能识, 苍茫吊古情。

感事述怀步漫堂韵

乳哺请看檞上鸦,萧然两鬓雪霜加。展书心似盈蹊草,作字瞳如隔镜花。身世冥冥 纷去雁,官私苦苦辨鸣蛙。闲窗搓手浑忙甚,不是诗筒是画叉。

顾璜

顾璜,字渔溪,祥符人。光绪丙子进士,改庶吉士,历官通政使,改镶白旗汉军副 都统。

至苏门山下百泉静乐园

岁岁乡园惭阔别,今朝旧地访苏门。四围山色松边路,百道泉声竹里村。胜会厨刚 荐樱筍,丰年社喜足鸡豚。嗟予又逐红尘去,安得坡翁钓石温。

游石屋洞

筍與度城阴, 地逦南屏麓。村溪时映带, 陂陀半起伏。远翠九里松,浓碧万竿竹。梯云捷飞猱,登顿舆夫熟。危磴红泉泻,泠泠奏笙筑。异境忽天开,高洞得石屋。状若敞轩槛,筵任肆水陆。环壁镌罗汉,数五百十六。巍然坐释迦,诸佛周其足。旁列石枰枕,朝暮閒云宿。神工与鬼斧,驱使殆阿育。两窟尤深邃,欲控终瑟缩。冰楼寒凿齿,浮螺字横读。后洞深复深,异产飞白蝠。大仁寺犹在,齐树楼谁筑。杖藜一舒啸,俗尘吐几斛。锦屏叠环抱,绣岭互回复。芳鲜积阶平,仙风吹谡谡。似有鸾凤音,佳人老空谷。流连宁忍去,将行更返瞩。归路下苍烟,湖光荡新绿。

高康恩

高赓恩,字曦亭,宁河人。光绪丙子进士,改庶吉士,授编修,历官太常寺卿。谥 文通。有《思贻堂诗集》。

何润夫招集云山别墅次韵

九陌尘嚣此境閒,楼台图画胜荆关。日边金掌明华表,雪后白头逢远山。天近吾曹 试一问,春寒高处不胜攀。暮鸦残照催归客,青琐来朝点旧班。

辛丑春乞身东归过太原赠张愚生

细草青回辇路春,舞雩今见咏归人。寒镫夜话西山雨,匹马朝飞朔陌尘。海内论交 几师友,秦中播越旧君臣。丈夫不为穷途哭,万感苍凉泪满巾。

拟宫人入道诗

然镫绣佛衣, 偶制万年字。停针梦九霄, 枕上铜驼泪。

紫霄朝玉真, 花龛荐荃蕙。为感昭阳恩, 炉香祝千岁。

庞鸿文

庞鸿文,字絅堂,常熟人。光绪丙子进士,改庶吉士,授编修,历官通政司副使。

江亭春望

觚棱佳气捧去来,辉映昭王旧日台。黍谷几吹邹律暖,析津频泛汉槎回。山连榆塞 形原壮,水咽桑乾冻未开。为望蓟门烟树里,此中应有栋梁才。

题张雨生橅黄小松坡公石铫图

小聚城南尺五天,六街腊鼓又催年。一瓯苦茗饶乡味,却忆家山玉蟹泉。

肯向卢沟策蹇无, 龙潭佳处拟蓬壶。歇心亭上烹茶坐, 好写奇峰散绮图。

黄潆之

黄潆之,字杭荪,善化人。光绪丙子进士,官吏部主事。有《贞复堂集》。

春日闻雁

才见南飞又北飞,征途万里影依依。斜阳满地人何处,芳草连天汝独归。杨柳春风 声下上,梧桐秋雨梦依稀。雪泥旧事浑如昨,回首前尘迹已非。

陶锐

陶锐,字辛垣,黄冈人。光绪丙子进士,官吏部主事。有《玉香斋诗草》。

鹰山

连山姿飞腾,万状纷罗萃。其中踞苍鹰,森然欲离地。石骨露细筋,峰铓磨利翅。狐兔失窟穴,鸠鹊凛然退。我来及早春,飒飒高秋气。乱流走白沙,寒草少青翠。侧足不敢扪,摘绦疑可试。化工妙写生,肖物神奸备。舆图考未详,支筇聊適意。他时风雨来,毋令鞲脱臂。

紫云宫题壁

水落滩声走怒雷,僧楼门面峡江开。山云忽起天乍暝,一十二峰飞雨来。

江上

秋雨秋风客棹迟,放船好趁晚晴时。青山断处见僧寺,红树丛中出酒旗。刈稻人归 携稏,卖鱼船去载鸬鹚。明霞点缀澄江景,欲和当年小谢诗。

闻福增

闻福增,字眉川,号退庵,太仓人。光绪丙子进士,改庶吉士,授庆符知县。有《退 庵诗稿》。

临江寺

临江古寺接层穹,浩荡川原入望空。驿路高悬飞鸟外,涛声直走乱山中。人生到处 鸿留雪,我意浑如鹢退风。羸马敝裘游欲倦,一鞭回指海云红。

葛之覃

葛之覃,字子周,南皮人。光绪丙子进士,官高密知县。有《种蕉听雨轩诗钞》。

秋夕后园散步

闲阶新雨霁,小坐扫莓苔。花影月扶出,雁声风勒回。湿薪双犬藉,枯叶一萤偎。 到此成幽赏,孤吟孰与陪。

刘曾騄

刘曾騄,字骧臣,祥符人。光绪丙子进士,官茌平知县。有《梦园诗集》。

七月二十九日得秦中赵岳生司马书知女弟于去岁四月朔日殂谢诗以哭之

离家一别十年余,噩耗传来泪袭裾。谢女空留残雪咏,鲍兄偏少大雷书。真成踽踽孤行客,尚想亭亭问字初。孰使才人悲远嫁,秦关西望雁行疏。

十一月二十八日移入任城梦园是日为王宜人忌日感而有作

辛苦买山钱,山居亦自怜。《大招》曾此夕,小别动经年。翠被生寒夜,麻衣扫雪天。芦帘兼纸阁,镫烬不成眠。

章丘清明

东风吹暖一身轻,人似浮云自在行。好是绿杨红杏里,女郎山下过清明。

【卷一百七十一】

袁昶

袁昶,字重黎,号爽秋,桐庐人。光绪丙子进士,历官太常寺卿。谥忠节。有《渐 西村人集》、《袁忠节遗诗》。

游灵隐次日作诗记之

少耽名山游,欲乘龙蹻去。昨游灵鹫岭,异状难名数。日行阎浮岚气殷,绿萝上覆云根孱。洞中瘖虎伏何处,洞外老藓缘梯斑。世上炎歊峡中冷,寒碧一勺牙生鋋。峰峰石壁面势异,大似伊阙雕孱颜。梁穿唐凿不暇诘,神工鬼斧搜天关。辟支弟子已伟绝,况有七佛难跻攀。韬光苦县篇第几,缥缈湿翠浮云间。余杭之胜天目最,灵脉奔渟此山会。绝顶传闻宵见日,海门遥望涛如带。忽忽兴尽未果游,径坏奔泉鸣石濑。山僧劫后梵筵空,惟有危楼卧古钟。事往何人留镂壁,时清无钵可降龙。逃空早晚重来此,待取秋山霜叶红。

飞来峰一线天

南戒何缘觅祖峰,山脉潜移天不动。毗沙夜半斮龙耳,掷下西方一礨空。我行逢秋日,林赤霜垂实。胡僧何年卜居此,天扉微开一线出。削崖仰刮青颇黎,佛光瞥见还易失。奇石粗沙足下生,岩腹疑有山灵撑。山囚铁锁木石精,风出空穴时一鸣。坤乾雷硠刬复成,千年崩石藤为縆。赤箭青芝不可名,蝯呼游人谷自应。偃松往往盖一亩,老父夜系青羊行。日欲落兮山罅合,天光佛{髟介}交冥冥。

圣因寺行宫前铜鹿行

古稀天子六省方,帐殿金扉照水黄。当年故物独铜鹿,口衔芝菌望幸长。与二仙禽列为四,旧存其一今亡矣。玉狮盗去田蟛郎,承露金仙应堕泪。眼见阳和八八春,铸始乾隆金几斤。更溯景陵遗老尽,上方龙象空烟云。摧牙落角苔花绿,乱领妖要应怒触。时来被锦孤山阳,乱定淈泥湖水曲。枯枝犹讶长生牌,苍鼠啼向空坛荄。精蓝一炬守吏去,賸有残僧拾堕柴。文澜阁圮穨梁在,书付秦灰谁续采。睿思亲解尘角讹,文物当年盛渊海。宫前老翁曝背言,今是乾隆几叶孙。先皇不宝四白鹿,再拜溪毛荐水温。

望岳

何年涌地出龍嵸,散作浮青数点峰。一气空濛走溟渤,双丸隐见宿长松。谁探玉检 千盘顶,试觅金仙九节筇。云欲出溪还隐去,紫烟待叩灌坛踪。

敬题朱竹垞毛西河两先生合像

康熙鸿儒传者几,卓荦二万毛胡朱。词科布衣数己未,萧山秀水夹江居。颇闻漆书 讼今古,桁头佚字疑有无。冤词差不敌疏证,经义一卷存圆柧。初晴八十犹甚口,瓜皮竹杖 同浮湖。吴兴郑生阿堵笔,或腴而短颀而臞。公寮从祀究应罢,郊配西向良非诬。儒家得失 每参半,谁其剖柝鹤与凫。汪君手摹罗聘画,野服奇古形模殊。东南之美两竹箭,元气寿与湖山俱。

送施均父落第后之肃州从军

远树相迎意黯然,轻装短制别华筵。欲探鸟鼠同巢野,定访崆峒问道山。禄利何堪 受鸱吓,高才莫漫遗鱼筌。湟中战伐含飞动,幕下陈琳正待贤。

河西自古雄文物,漆简东京出杜林。殊俗即看剺面化,经生要蓄济时心。徙戎江统 曾闳议,对策刘蕡暂陆沈。好去晋公持节地,朝正重入五云深。

竟陵

竟陵玉节拥朱舆,涉历艰难委佩余。西邸谁陈因果论,东平难乞短长书。幅巾傥幸 传归第,华屋何人为曳裾。割肉汙貂终得释,风雷揃爪事何如。

送陶子缜归越

森沈石篑倚金支,翠栝阴中读《楚辞》。旧注好纂《鸿烈》解,穹碑为访禹陵祠。 枝言何用夸三耳,飞遁终期法九师。压担奇书燕市去,参差笑谢市中儿。

涵秋阁诗为严居士作

灵境含众妙,意林凭象构。况联吾子贤,端居类岩岫。回回凌飙空,槭槭翳永昼。 飞槛纳浮阴,暗泉挹丹溜。疑非王城栖,风物濯颖秀。下寻丛荻尽,忽拓遥岑覯。兀然坐忘 客,万有俱色授。讲解吾友于,瓦樽偶相就。大地运一舟,弥缝无罅漏。即此明远心,何殊 食气寿。

南城有佳处,潢水深几曲。乍断游人至,何殊郑君谷。烟中人语静,微霜渍松竹。时得刘龚来,三径放远目。朝听东林梵,暝还西斋宿。犹怜江上居,荒池蔓寒菊。我亦离乡客,社燕思旧屋。相期脱世议,澹与返初服。岁寒非峻节,纯懿天所福。

桐君孤屿

危峰崒起削青成,似有群仙抗手迎。日出常疑塔光现,云来时挟溪声行。窗中一水 浮衣带,洞里三生访石枰。我欲山中听斋鼓,安心未肯学屠鲸。

怀瓶公

曾斥邪蒿直讲筵,急难谋国匪身便。谴何终抱此纯白,揵户独草吾《太玄》。老鹤 冲霄砦空在,一龟支榻气犹全。平泉无数髯谏议,岁晏直并松心坚。

樊佥事家新作临河小台

寇巴东古英雄人,樊渭南今文章伯。用时腹中兵甲森欲动,寂时专气致柔了无迹。 萧然隐几人海里,游戏筑台聊尔早。手治磴道洞扉开,云影花光天在水。枕簟江湖步屟间, 餐嘘日月扶栏起。凌空东接属玉观,响闸西连尚冠里。中有据梧澹荡人,国论膏肓箴炙竢。 得道长生方两瞳,松标婉娈柔童子。日草边琐百函书,捻斥令仆海沤如。薄晚相从曲江曲, 约我登顿飞霞裾。森森侠侍台边树,育育同观濠上鱼。自是澶渊却敌手,岂但骑鲸跨碧虚。

哭黄漱老

人物方眇然,耆旧日彫谢。东瓯箭竹尽,孤屿鸿钟嗄。风摧长松标,冰裂山木稼。节操奄云徂,国瘁运可诧。忆昨接轨仪,培塿附嵩华。交在方群间,披豁绝娿假。斜篸丹沜曲,广宴西林下。击强秋鹰豪,鉏奸夏日炙。孤标朱游俦,直声李邕亚。晚敏浊世屯,去辞京洛舍。萧然大梁游,复税锺阜驾。挂席丹山阳,开樽翠滴榭。崖林陪逸兴,筇竹侍清暇。欣披卧游图,会合双星乍。星移不可论,电泡俄观化。哭既不冯棺,奠复不亲斝。浩然返太虚,驭气白霓跨。国失一蓍龟,遑言支漏罅。臣今悼质亡,里应为社罢。南冥剑弢铓,有泪浩如泻。

南园钱公画马歌为榕全尚书作

相马如相士,权奇常在骨。国马饥食玉山禾,国士衣寒直庐宿。南国岳岳天人姿,来自碧鸡金马池。神凝气敛风趣逸,铁汉端如刘器之。帝有诤臣烛奸欺,义所未安昌其词。宁肯媕婴作仗马,食三品料侍赤墀。平生师友罕同调,落落倾襟姚与邵。故其退食燕闲时,落笔解衣滂礴为。偶写渥洼天马姿,风鬃雾鬛不可鞿。双瞳夹镜尾卓锥,散放烟莎丹棱陂。不待刷燕而秣楚,精爽方圆中矩规。旁有小驹相因依,碨礌痒摩枯树枝。有如养到木鸡候,正容悟物砭火驰。一洗凡马簸万古,云烟过眼传妙楮。何书物色偶得之,长风飒沓生廊庑。扈从木兰油幕睹,酹以法酒挏马乳。榕公相士如相马,刮弃骈阗擢娴雅。今之相者何举肥,南园写真知者寡。家世中朝第一人,锁闱校士觅骐驎。时危正杖异材出,事往犹留翠墨新。再持惜抱人伦鉴,网得渥洼真绝尘。

和何尹忆云林寺泉

蜆罗跂谛水,神力移在兹。何以西方空,东方经蠹缁。末法三千年,东西两陵夷。惟有万古泉,水碧温流澌。春深构飞槛,奇石乳岩垂。定心足垂外,不畏虎迹欺。我曾木癭瓢,蒸以丹房芝。君亦汲烹之,容颜发华滋。闲云不济物,何似在山仪。

我曩入飞峰,心迹双萧寂。微言证璨可,倦枕苍石壁。希微九天籁,汗漫三世隔。 瘴海今横流,何者为我宅。将毋归稽留,不然栖大涤。洗耳听韶濩,妍朱校仙册。夜汲一军 持,玉水方流液。虽落尘网中,金骨炼营魄。试招何尹俱,割半垂龙席。各据一洞天,袖方 聊煮石。

和友人吴山水仙王祠

巫史传芭进酒卮,长筵吹彻玉参差。千年薶碧终难化,八月怒涛空尔为。配以逋仙 荐秋菊,从骖水伯闪朱旗。江流不尽兴亡恨,抉眼苏台鹿上时。

幽愤

朝与蝮蛇游,暮与豺虎居。劫掠长安中,官军不留余。黄巾势合离,朝市成荒墟。 燔烧及城阙,阊阖震绮疏。九陌夜无人,出则防击狙。念我平生友,换酒脱金鱼。途穷各窜 逸,蒺藜塞中衢。阿谁裹饭问,跰趾鲜困子与。独有于侍御,再顾荜门庐。壮我猛将援,饴 我行胥疏。患难情倍亲,促坐愿须臾。皇天况甘雨,洒我园中蔬。忧虫日以甦,槁苗日以苏。 摘蔬更沽酒,留公解饥劬。

月晕知将风,碍润知雨至。及彼未雨时,绸缪桑土悴。倾桡易新栋,败甓圬早治。何以危堂下,鱼龙陈百戏。在位姑谋乐,栖苕无远志。不知火将燃,不预庀戎器。一朝青犊群,盗弄禁壖地。鬼兵请助我,藉歼翎候使。岂有垂天翼,资彼群蝗翅。岂有神武朝,惜力五斗米。名言失正顺,敌衅挑携贰。瓜剖而豆分,危亡运自致。

泰伯为让王,采药適蛮乡。开国称至德,周道日以昌。礼烈贝勒长,让位有耿光。 奉曼珠应身,神武天称扬。故鞭苔四裔,探筴卜世长。不敢先天下,老子三宝章。何尤扫氛 祲,枉矢贯天狼。天眷有让德,艮维降之祥。三陵望郁葱,佳气方未央。柹附誓翊戴,巩卫 于苞桑。齐心奉圣主,长御万年觞。兵气繇政秕,乱萌繇志荒。叛氓治昌披,胡兵惩陆梁。 立国自有本,济时岂无方。尼父曰正名,圣者道其常。立石与僵柳,先诛眭议郎。

缪荃孙

缪荃孙,字炎之,号筱珊,晚号艺风,江阴人。光绪丙子进士,改庶吉士。授编修, 历官学部候补参议。有《辛壬稿》、《癸甲稿》。

题全谢山先生像

梨洲授四明, 史学冠当代。先生尤卓荦, 识见越流辈。微言兼大义, 抗论必千载。 事迹辨是非, 人材儗进退。上可继毛朱, 下足开钱戴。走也私淑殷, 遗书颇津逮。祠堂拜公 像, 静挹温和态。梁君再示我, 又若聆謦欬。句余搜土音, 端谿有遗爱。我愿摹万本, 瞻仰 同泰岱。

游上方山

石梯三百级,梯尽即茅庵。蹋壁身攀树,窥窗影落潭。声闻停梵呗,呼吸尽烟岚。 七二枯寮在,何人十日探。

古树绿成海,前山复后山。参天多磊落,拔地少弯环。落叶荒途里,空腔断壁间。 婆娑生意好,点缀碧孱颜。

西涯

涓涓细濑胜尘沙,路转城阴水两叉。虾菜亭空荒渚卸,藜光桥古御街斜。长空叆叇 天如墨,老树蒙茸雪作花。今古诗人多聚此,玉延亭外即西涯。

题竹垞图

舍南舍北尽牙签,万竹阴阴绿到檐。欲望九峰山色好,小楼一角几时添。

后人慕古屡增修, 故址流传二百秋。刘井柯亭俱蔓草, 何人道古访瀛洲。

簪笔曾经侍玉銮,承恩毕竟少孤寒。著书翻是还家乐,我亦归田七品官。

陶方琦

陶方琦,字子缜,会稽人。光绪丙子进士,改庶吉士,授编修。有《湘麋阁遗集》。

云门自夷陵以诗相讯依韵答之

迩来风致日萧疏,还忆禾城判襼初。料理吴绵秋作客,消磨官烛夜仇书。有时晒箧 留花腊,何处看山假筍舆。欲拟荡云好胸次,恐余牢落总难如。

寄怀彦清中州时将有金陵之役

莫谓天涯远,而令问讯疏。易成三载别,难得一行书。爱我容兄事,论文感索居。 暮云千里合,雕眼倦应舒。

嵩少名山胜,君今杖策游。纪程诗卷富,题字古崖秋。风月梁园美,关河越客愁。 垂虹秋色好,我亦旅人俦。

寄呈李越缦先生

思随杖履集都门,花外琴书笑语温。卜宅湖塘分柘柳,采风潇水长兰荪。千秋中垒 传经业,一曲震川数醉痕。见说春城桃李艳,薰风何处不开尊。

春暮登快阁与姚海槎亲家茗话

师山相狋觺, 矗矗镜深沼。雨气破蘋光, 玲珑走飞瀑。廊垣积春阴, 邃绿互回绕。 此心炁澄静, 聊以畅襟眺。幽觅余绮, 园林窎然辟。寒风上春衣, 迟花媚霁夕。南窗瞰池水, 清光异金碧。旁入栖烟亭,闲云一为集。游踪喜邃密,登阁启窗阑。天光接远水,绿尽见诸 山。林壑互应接,知我数往还。放翁虽千古,逸唱同追攀。

牛善祥

牛善祥,字咏裳,秀水人。光绪丙子进士,改庶吉士,授编修。有《红藤馆诗》。

宿武夷冲佑观

移舟近仙观, 散步值初冬。落叶溪前路, 浮云天外峰。叩门惟见月, 入院不闻钟。

欲问升真诀,何人是赤松。

路朝霖

路朝霖,字访岩,毕节人。光绪丙子进士,改庶吉士,授东乡知县,历官河南候补道。有《红鹅馆诗集》。

万岁峰

汉皇辇跸事东封,玉检金泥饰几重。雄略能徕青海马,长生欲系鼎湖龙。竹宫光照求灵药,椒室神来驻丽容。登礼嵩呼闻吏卒,不曾流响茂陵松。

早春有怀燕京

细雨霏微洒路尘,客怀镇日对松筠。少年哀乐难为别,乱世科名不救贫。草色绿回 江渚暖,溪声喧带石滩春。东风又到千门里,独倚阑干望紫宸。

巴东

竹枝声苦夕阳红,大舸轻帆趁晚风。满树猿啼江草绿,行人四月过巴东。

阵图聚石空陈迹, 秋兴歌诗足感伤。词客英雄两销歇, 江声和月下瞿唐。

八月廿三日偕徐性臣重游慈仁寺

七年不到双松下,胜地经过感慨重。扫叶僧开明月径,浇花人打夕阳钟。苔封古殿 栖驯鸽,雨湿空廊损画龙。犹剩太平丞相碣,白头作记叹疏慵。

又听经声到上方,长明镫下礼空王。书摊漫说前朝市,窑变争看古佛妆。杰阁花深留美荫,小池荷老剩余香。卢沟行骑登高见,怕动轮蹄断客肠。

范忠贞公铜印歌和黄再同

红螺山高郁灵秀,太傅勋名在宇宙。入关一书赞皇图,功比萧何出其右。令子起家甲乙科,循声两浙腾讴歌。闽疆建节澄吏治,猰貐磨牙生风波。羁囚暗屋陷罗网,尽室岂有污奸党。同时更有锡山嵇,慷慨捐躯世无两。佩印流传历有年,觐公款识刀法全。莫问秦镌与汉制,铜章夜夜光烛天。呜呼!信国砚,苏卿节,木魅山精不敢齧。不然印何累累绶若若,一寸顽铜乌足说。去岁探奇在洛阳,克绅方印曾评量。今春拜识范公印,忠义千秋相颉颃。黄君嗜古得精意,吾庐碧血存天地。辟邪作纽光斓斑,上有忠臣姓名字。君不见商银涂金剧有情,摩挲朱记到儒生。三藩事往二百载,至今人说范忠贞。

黄遵宪

黄遵宪,字公度,嘉应人。光绪丙子举人,历官湖南按察使,候补三品京堂。有《人

境庐诗草》。

寓汕头旅馆寄怀梁诗五

策策秋声木叶乾,百端萧瑟入心肝。颠风断渡铃能语,古月悬天镜独看。未到中年 哀乐备,无多同调别离难。巡檐绕室行千遍,刚对孤镫又倚阑。

海行杂感

稗瀛大海善谈天,丱女童男远学仙。傥遂乘桴更东去,地球早辟二千年。

青李黄甘烂漫堆,蒲桃浓绿泼新醅。怪他一白清如许,水亦轮回变化来。

中年岁月苦风飘,强半光阴客里抛。今日破愁编日记,一年却得两花朝。

星星世界遍诸天,不计三千与大千。傥亦乘槎中有客,回头望我地球圆。

家书琐屑写从头,身在茫茫一叶舟。纸尾只填某日发,计程难说到何州。

温则宫朝会

万镫悬耀夜光珠,绣缕黄金匝地铺。一柱通天铭武后,三山绝岛胜方壶。如闻广乐钧天奏,想见重华盖地图。五十余年功德盛,女娲以后世应无。

寄怀左子兴领事

古人材艺今俱有,却是今人古不如。十载勋名辅英簜,一家安乐寄华胥。头衔南岛 蛮夷长,手笔西方象寄书。闻说狂歌敲铁板,大声往往骇龙鱼。

登巴黎铁塔

拔地崛然起,崚嶒矗百丈。自非假羽翼,孰能蹑履上。高标悬金针,四维挂铁网。下竖五丈旗,可容千人帐。石础森开张,露阙屹相向。游人企足看,已惊眼界创。悬车倏上腾,乍闻辘轳响。人已不翼飞,迥出空虚上。并世无二尊,独立绝依傍。即居最下层,高已莫能抗。苍苍覆大圜,森芒列万象。呼吸通帝座,疑可通肸蚃。自天下至地,俯察不复仰。但恨目力穷,更无外物障。离离画方罫,万顷开沃壤。微茫一线遥,千里走河广。宫阙与城垒,一气作苍莽。不辨牛马人,沙虫纷扰攘。我从下界来,小大顿变相。未知天眼闚,幺麽作何状。北风冰海来,秋气何飒爽。海西数点烟,英伦郁相望。缅昔百年役,裂地争霸王。驱民入锋镝,倾国竭府帑。其后拿破仑,盖世气无两。胜尊天单于,败作降王长。欧洲古战场,好胜不相让。即今正六帝,各负天下壮。等是蛮触争,纷纷校得丧。嗟我稊米身,尫弱不自量。一览小天下,五洲如在掌。既登绝顶高,更作凌风想。何时御气游,乘球恣来往。扶摇九万里,一笑我其傥。

孙诒燕

孙诒燕,字叔芑,瑞安人。光绪丙子举人,官内阁中书。有《望益斋诗存》。

随侍止叟伯父谒孝陵和作

紫金山势郁崔巍,胜国幽宫冷翠微。石兽宵寒颓阙在,铜驼草长故宫非。江东无复锺王气,泗上由来有布衣。麦饭一盂何处觅,西风落日怅魂归。

何廷俊

何廷俊,字少仙,号潜园,昆明人。光绪丙子举人,历官河南彰卫怀道。有《潜园诗草》。

丁巳正月二十日香山生日集十发盦用香山喜入新年韵分赋

摇落关河几旧臣,新年诗酒过中旬。移情海水曲中趣,照眼花枝劫外身。洛社衣冠 追往事,长沙风景聚骚人。斋名天鹿瓶梅吐,好访桃源洞口春。

任锡汾

任锡汾,字逢辛,晚号拙叟,宜兴人。光绪丙子举人,历官四川川东道。有《拙叟 诗存》。

宜兴西北郭先彦升公钓台遗迹

文章江左溯萧梁,负郭长流五马芳。虾虎旧城曾保障,蛟龙潜迹此贤良。遗徽远接 袁公社,余荫遥攀召伯棠。终是南洲风俗美,永留故址历沧桑。

李作霖

李作霖,字雨人,上元人。光绪丙子举人,直隶候补道。

旅感

鸡胶胶,秋风长。鸡喈喈,天欲霜。机声轧轧篝火光,跂愁织女星窥窗。弄寒芒,明河耿耿夜未央,锦衾角枕横空床。空床徬徨,风凄夜凉。双心一袜,妾心君裳。

王仁东

王仁东,字刚侯,号旭庄,闽县人。光绪丙子举人,历官江苏候补道。有《完巢剩稿》。

春意

逝水韶光盛会难,乍晴乍雨意阑珊。篱边堆雪梅初落,墙外余霞杏又残。社酒可赊 思共醉,春衣欲试怯轻寒。胜游已爽郊坰约,万紫千红眼倦看。

愚园过洪鹭汀故居感赋

凄凉重过故人庐,苦茗浇胸郁不舒。昼静名园游客少,天寒老树著花疏。别来君竟 长眼去,乱后吾犹短发梳。旧雨晨星寥落甚,凭阑春色满庭除。

佚题

胡汉恩知自浅深,莒敖往事久沈吟。钱王独义罗昭谏,不以唐亡有怨心。

书怀寄伯姊

少年已去老今来,一事无成亦可哀。客里更逢寒食节,八年不见墓门梅。

李恩祥

李恩祥,字吉珊,河内人。光绪丙子举人,官济宁知州,署莱州知府。有《宜庐诗草》。

观海

到此我方信,江河一勺多。楼通三岛路,日浴五更波。风雨孤帆远,乾坤万象罗。 侧闻天使下,且住问鼋鼍。

乙春大侄来济感赋

池草尚生春,行吟梦不真。空教予有泪,转望汝成人。乡里能安分,亲朋不笑贫。 西畴将有事,行矣莫因循。

红豆

小雨霏霏种未迟,春风门外易成枝。祇嫌坐少江南客,惹起相思合寄谁。

夏槐

夏槐,字廷弼,号午庭,广济人。光绪丙子举人,官金山知县。有《绿隐堂诗钞》。

有怀

料峭北风劲,烟尘殷远天。长亭斜日路,残垒暮山边。季子裘原敝,相如病可痊。 有怀占梦数,心共客旌悬。

柯培鼎

柯培鼎,字岐甫,平湖人。光绪丙子举人,官福建盐大使。有《榕游草》。

舫庐

妙趣闲从物外寻, 舫庐幽寂傍寒浔。桂移新种含生意, 兰蕴孤芳待赏音。楼角远山都到眼, 枝头好鸟亦知心。年来诗力惭消退, 敢效南阳《梁父吟》。

何之鼎

何之鼎,字咏华,平湖人。光绪丙子举人,官乐清训导。有《青琅玕馆诗钞》。

幽居

露冷虫声急,风高雁影微。江淹空有恨,王粲竟无依。枯树淡诗思,寒潮流夕晖。 篱边开野菊,晚节著芳菲。

李辅燿

李辅燿,字幼梅,号定叟,湘阴人。光绪丙子副贡,浙江候补道。有《玩止水斋遗稿》。

晚兴

高阁凭临久,残阳度树西。绿涵池水定,红压野云低。鸟为投林乱,蝉因惮暑嘶。 夕凉招未得,散发卧兰畦。

子玖斋中夜话

璋分玦判各天涯,又踏长安道上花。可奈流年惊逝水,偶然小聚笑搏沙。深谈覆手 难为别,凉漏催人转忆家。剩有多情明月在,照侬归路影横斜。

徐敦仁

徐敦仁,字爱杉,吴县人。光绪丙子优贡,官贵谿知县。有《日损斋集》。

游废寺

草长数丈高于人,病僧如丐出应门。金刚身坏树生腹,蝙蝠乱飞疑黄昏。浮云盛衰 爽若失,散愁惟有杯中物。醉后狂歌声如龙,吓倒门前米汁佛。

苦热

火龙赩赫蟠晴穹,煎万类薰爞々。我时惮暑不敢出,终日枯坐如痴聋。解衣盘礴成裸国,束发髻紒犹儿童。屋中灼烁尚有然,何况陇畔耕田农。昔我绝塞居蠮螉,号寒所苦惟隆冬。盛夏无事竹簟展,卓午尚可绉絺蒙。颇笑南北殊气候,赤帝怕度关山重。今来此地作热客,逭暑无术增烦衷。因思世事有反覆,盈虚消长情难同。昔如文物聚上国,被服儒雅多雍容。今如扰攘值摽季,戈戟驰突相撞冲。秦法烦苛汉宽大,如环无端相始终。物理乘除类如此,胸中冰炭终无庸。

经沙陀作

一旅勤王卷甲趋,竟能杀贼入冤句。李花又结他家子,蒲草重生只眼苻。徐勣有功 还赐姓,孙坚生子实开吴。摇鞭閒向沙陀过,犹见鸦军日暮呼。

过峡

奔流直下下牢关,峡束重重探百蛮。峰峻石穿天上路,滩高浪滚雪中山。人同虎豹 分崖住,身与蛟龙夺命还。深夜一镫照孤睡,瓮头人鲊梦刀环。

峡中当无滩处舟行亦平喜作

漫言三峡皆奇险,亦有平漪百里余。沙软客行江底路,日斜人钓石中鱼。酒斟琥珀 浇愁垒,窗拓琉璃读异书。一样客怀差可喜,小诗自写滴蟾蜍。

谢章铤

谢章铤,字枚如,福建长乐人。光绪丁丑进士,官内阁中书。有《赌棋山庄集》。

宿小金山塔院

夜气当楼白,高天易得秋。星争渔火出,风挟海云流。军府方多事,烟波有古愁。 应怜一樽酒,抚髀欲何求。

自题听泉图

潺潺一片去何之,此意苍茫独坐知。至竟清流成底事,在山遥想出山时。

感怀漫书

山阳宿草怨飘蓬,瘦日无光泣雁鸿。九死人间惟我在,万夫意气为谁雄。岂知刘向 还青眼,更觉黄滔有古风。遂使西州门外路,铜弦重唱大江东。

鸾鹤无声天际来,海边骏风久蒿菜。郑虔苜蓿嗟何极,杨仆戈船事愈哀。宫府谁关 天下计,山川苦忆古今才。飘零文字犹如许,崔蔡应知泣夜台。

许米友墨迹

紫藤庵中紫藤花,中有仙人凌紫霞。桑海归来散白发,瓣香遥礼玉皇家。九州破碎 无完土,夜夜菴前急风雨。何处高歌不鬼神,暮年噩梦犹龙虎。一纸盘拏泪滂沱,似此人间 可奈何。青山大是无情物,金陵王气惊销磨。独立掉头不得意,槎桠肝肺凄凉字。九死终归 平远台,才名三绝成何事。箕尾无光风萧萧,想君掷笔吟《大招》。我读君诗青衫湿,石头 又报烽烟急。

悲秋吟

天地忽而变态兮,日月黯春无色。登高望远而踌躇兮,哀百年于顷刻。山川既以破碎兮,路迢迢而莫能止。风何为而狂吹兮,云阴阴其屡起。乔松憔悴而竟折兮,嗟兰桂其将谁恃。凤凰逝而千里兮,怆燕雀之相视。九疑惝怳其何处兮,吾将企苍梧而望之。斮斑竹而不使生兮,祝二妃之长无恙也。

孤花

一点芳心尚未残,亭亭独立俯雕阑。金铃十万春如海,忽觉人间位置难。

题黄九烟集后

兰芷不芳已千载,九疑云雨悲真宰。黄公崛起读《离骚》,把臂灵均出桑海。烈皇被发上钧天,辛苦宵衣十七年。几辈榜花书淡墨,何人大树画凌烟。黄巾白棓纷流涕,苦李枝高压门第。钜镇告身归命侯,孱王闰位奈何帝。银鱼金碗委山丘,汗漫安能更九州。阆风殿下万言策,白玉楼中五月秋。飘零且看扬州月,燕子春镫梦瑶阙。法曲犹弹得宝歌,新诗久痛《无家别》。神仙才子半荒唐,万事苍天付渺茫。牛马随人充下走,芙蓉无地礼东皇。青蝇作客供凭吊,黄鹤相逢莫嘲笑。偶传六义向秋波,可有一戈挥夕照。南国是时总可哀,群公声价凤凰台。谯周家世修降表,庾信关山逞赋才。白下登高独回首,斑斑竹子湘江口。三户销沈博浪椎,一痴烂醉兰陵酒。萧疏华发忽心惊,老死何颜入北京。愿从陈继称同调,不逐归庄浪得名。墓铭手写归何处,解脱应骑箕尾去。北渚风凄吊屈辰,西堂梦冷伤嵇句。平生嫚骂眼谁青,刍狗幽斋一客星。且署头衔前进士,忍抛脚色小朝廷。素冠永谢流离子,七十二湖清若此。宋玉重来赋《大招》,彭咸相见应狂喜。崛健人间略似人,百年养士有孤臣。骚魂呜咽指薇蕨,话罢庚寅话甲申。

过谏草堂怀张亨甫年丈

生前挥泪吊金台,何处青山骏骨埋。赍志功名中寿过,病谭利病一尊开。九州无敌吟诗手,异代相怜抗疏才。寂寞骚魂依谏草,茫茫今昔总堪哀。

叠韵答荫庐

何时理薄装,归家种杞菊。飘零向万里,顾影偏愁独。接坐得清交,措辞不忍俗。 高情兼古今,说士甘于肉。盖棺朱伯韩,投簪郑小谷。嗟嗟桂林山,郁此孤香簇。勿艳诗家 名,应造苍生福。世棘思传人,感慨流光促。凤凰志千仞,篱鷃何足辱。愿君袭幽兰,树德 置邮速。回首培远堂,肯负著书屋。六翮风暂羁,三年艾须足。素心讬黄花,耿耿双明烛。

由东峰至落雁峰

忽逐飞雁同高举,眼底何曾有险阻。诸峰俯首一峰尊,清渭浊河渺何许。金银宫殿接上方,空中偶坠仙人语。不知前身果何属,笑折莲花问玉女。洗头盆小天池枯,但见危梁窜苍鼠。礼官威仪有盛衰,神灵真气无消沮。小草都因雨露奇,野人辄觉须眉古。吁嗟我本谢家孙,到处能为青山主。如何作诗不惊人,欲追李白寻初祖。

招炯甫颖叔张听菴观察饮杜少陵祠

杜老祠堂清净地,狂谈无碍古人闻。好山尚有浓青在,枯树曾经劫火焚。将相致身 真不早,干戈满目更何云。长安酒价君休问,几处终南日暮云。

叠韵和霞举并视颖叔

野草撑白骨,悲风送寒花。天意贱刍狗,物变催虫沙。谁怜孤凤骞,翻为二鸟嗟。 扪心兀自热,揽发惊已华。哆口说名山,千秋能几家。路鬼或揶揄,村童方咿哑。劳筋积尘 土,槃涧愧烟霞。

劣性少面交,歧途任腹笑。龙伯不量力,六鳌引巨钓。觥觥嵇吕徒,惨惨苍蝇吊。 快彼汗漫游,塞我混沌窍。新觞续古欢,虚困望义粜。离合家国心,对镜懔孤照。同为关山 客,忽骇东门啸。

正月十六日杜茶村先生生日同炯甫雪沧集颖叔欧斋以目辟町畦分韵得畦字

残山不成壁,荒园不留畦。朝出唱迷阳,暮归闻子巂。卓哉茶村叟,郁为周遗黎。 心肝自倔强,须发任排挤。精魂恋文字,千秋首肯低。庶骑黄鹤来,念往意怆凄。盖棺欲作 诔,旁无黔娄妻。有子归异教,麦饭绝幽栖。酸吟出苦口,不饱如寒齑。佳日非汝有,独夜 知天倪。孟陬月初阙,词客开高斋。四壁罗古献,斗山相与齐。鲁酒非盗泉,允宜先生哜。 颓唐亦老手,刻意辟恒蹊。一歌秦淮曲,百金贱如泥。

将之鹿洞主讲留别陈伯潜同年

纪群交谊在,设醴及迂疏。附汝青云后,嗟予白首初。求才期报国,立论可成书。 方寸严泾渭,灵光不碍虚。

平生吴季子,捷径畏泥涂。每笑羊头烂,还怜虎气粗。论交谁似此,薄俗更何如。 四海方多事,黄垆永恸余。

向日崇微尚,消磨百不如。艰难走牛马,琐屑误虫鱼。益友存无几,虚生愧有余。 知君行役处,离梦到匡庐。

龙文彬

龙文彬,字筠圃,永新人。光绪丁丑进士,官吏部主事。有《永怀堂集》。

偶书

古有李道士,相传八百岁。功业杳无闻,徒将甲子记。深山有木石,历久或不敝。 毕竟块然存,淡漠亦无味。好学推颜子,治安策贾谊。其道不能死,生气满天地。

舟泊茶陵

一水孤城抱,微风漾夕波。梦摇双桨碎,愁比乱山多。笳鼓鸦声急,云天雁影过。欲倾贾生泪,拔剑不能歌。

鄱阳湖棹歌

白幡黄屋战当年,彻夜鱼龙不敢眠。万顷波澜犹壮阔,萧萧枫荻琐寒烟。

大舟泛入碧琉璃,小艇摇摇夕照西。一曲渔歌秋色晚,赊将明月唱铜鞮。

康山庙祀开平王, 五老峰高太白堂。才子英雄浑不记, 高低酒价问都昌。

何福堃

何福堃,字受轩,灵石人。光绪丁丑进士,改庶吉士,授编修,历官甘肃布政使。 有《午阴清舍诗草》。

过卢生祠

不入黄粱梦,曾如梦里看。本来空色相,何处著悲欢。得地栖鸿爪,随天付鼠肝。 笑他题壁客,饶舌向邯郸。

明远楼晚眺

风雨西来疾似梭,霎时秋色满关河。蒲桃旧醉沙场酒,勒勒新翻壮士歌。远水白随 平野尽,夕阳红到半山多。此心颇涉凌云想,曾记霓裳咏大罗。

翁斌孙

翁斌孙,字弢甫,常熟人。光绪丁丑进士,改庶吉士,授检讨,历官直隶提法使。 有《笏斋覆瓿集》。

赠王耜云中丞

汾水秋风梦影非,不堪血泪渍臣衣。靴刀空效李光弼,华表还惊丁令威。东海扬尘 行复见,西山采蕨分长饥。避秦何处桃花水,漫说江南一棹归。 孔祥霖

孔祥霖,字少霑,曲阜人。光绪丁丑进士,改庶吉士,授编修,历官河南提学使, 兼署布政使。有《强自宽斋遗稿》。

济南道中

背指斜阳暮,长途觅短吟。树闻蝉韵急,泥没马蹄深。烟暝团遥野,磷青认远林。 新秋凉一味,罗袖未能禁。

宋廷梁

宋廷梁,字子材,晋宁人。光绪丁丑进士,署建昌知府。有《赋梅书屋诗集》。

偕朝鲜贡使赵荆峰游望湖亭荆峰赋诗次韵酬之

长笛声中共倚楼,重湖风景一亭收。周郎旧迹阅终古,苏子豪吟题上头。极目关河归塞雁,忘机主客对沙鸥。不辞胜地亲相引,贪看纱笼妙句留。

董沛

董沛,字孟如,号觉轩,鄞县人。光绪丁丑进士,官建昌知县。有《六一山房诗集》。

示舍弟

寒雨潇潇对短檠,高楼永夜读书声。一门与尔兼师友,四海何人更弟兄。谁信牛车传异事,几闻马磨讬营生。德星堂外花无恙,愿祝春风护紫荆。

施均父孝廉从军河陇追赠以诗

高秋匹马赋西征,万里关河壮此行。长揖军门称上客,乱题诗壁有边声。料量星海番戎界,变置天山郡县城。期尔凌烟书姓氏,他年谁识鲁诸生。

褚成亮

褚成亮,字叔寅,余杭人。光绪丁丑贡士。有《校经室遗集》。

海上秋感

乡关何处断蜚鸿,江上行吟叹绪风。玉井银床怜宛转,碧梧翠竹动高空。已闻瀚海吹羌笛,谁向昆明问汉宫。苦忆南溪云物好,十千沽酒慰飘蓬。

【卷一百七十二】

盛昱

宗室盛昱,字伯羲,肃武亲王豪格六世孙。光绪丁丑进士,改庶吉士,授编修,历官祭酒。有《郁华阁集》。

题所得黄小松历下日记册子

平生五岳志,跼迹一閧内。西履{草心}题颠,东至田盘背。纵横四百里,牛转蚁附蚁。最录天下碑,一一识所在。脱鞿事幽访,寰宇先嵩岱。黄翁《历下记》,真迹杂图绘。今年落吾手,敝帚百朋贵。乘轺来此邦,得兆若灵蔡。泰山不北移,黄河忽南迈。落落山水缘,坐令俊观隘。明湖晚揩镜,鹊华秋拥黛。譬彼人士佳,不在声名大。愿为十日留,芒鞋易冠盖。千佛手拓新,万纸归装载。斥鷃笑鹍鹏,天地本一芥。

题廉孝廉小万柳堂图同凤孙作

北人入中土,始自黄炎战。营卫无常处,行国俗未变。淳维王故地,不同不窋窜。长城绝来往,哑哑南北雁。耕牧风俗殊,壤地咫尺判。李唐一代贤,代北殷士裸。辽金干戈兴,岛索主奴怨。真人铁木真,一怒九州奠。畏吾廉孟子,秀出中州彦。烟波万柳堂,裙屐新荷宴。《诗》《书》泽最长,胡越形无间。色目多贤才,耦俱散州县。汴上石田集,淮南廷心传。终怜右榜人,不敌怯薛健。台阁无仁贤,天下遂畔乱。沙顿亦名家,凄凉归旧院。文正孔子戒,哲人有先见。至今食旧德,士族江南冠。孝廉尤绝特,翩翩富文翰。薄宦住京师,故国乔木恋。堂移柳尚存,憔悴草桥畔。当年歌骤雨,今日车飞电。绘图属我题,铺卷泪凝霰。我朝起东方,出震日方旦。同此神州民,昏姻柯叶遍。小哉洪南安,强分满蒙汉。闤阓生齿滋,农猎本业断。计臣折扣余,一兵钱一串。饮泣持还家,当差赎弓箭。乞食不宿饱,敝衣那蔽骭。壮夫犹可说,市门娇女叹。奴才恣挥霍,一筵金大万。从龙百战余,幽絷同此难。异学既公言,邪会真隐患。兴凯入彼界,铁轨松花岸。北归与南渡,故事皆虚愿。圣人方在御,草茅谁大谏。起我黄帝胄,驱彼白种贱。大破旗民界,谋生皆任便。能使手足宽,转可头目捍。易世不敢言,当时亦清晏。武肃坟上松,百亩垂条幹。万柳补成阴,春城绿一片。载酒诗人游,嘉树两家擅。

捉御史

车如鸡栖马如狗,绣衣使者蹒跚走。车如流水马如龙,四姓小侯行斗风。黄尘薄日长安路,玉勒珊鞭竞驰骛。驺唱之仪不听前,纷纷旗校影缨怒。乱箠挝马马横触,进退仓皇真击毂。旋抽左右又参差,我未断鞅君脱辐。大珰喊怒坌来前,一僮一仆絷送官。触忤纷侯罪当死,又向车中捉御史。御史觥觥立殿中,南台况复称端公。翁主犹须避赤棒,贵游孰敢干青骢。千步清道九华盖,王公皆当顿轭待。奈何翻欲截角来,凭藉张皇毋乃太。圣明四海方照临,强宗乃尔相凌侵。朝廷不惜赫赫法,御史偏有休休心。挥鼠辈窜等闲耳,细事何须告天子。旁观父老亦咨嗟,还是大臣知大体。峨冠怒马犹龂龂,暂从亭长赦宪臣。亭长叩头还告语,今朝姑纵御史去。

九日与杏侪登塔冈

象教已无力,巍然塔尚存。登高酬令节,落日满荒原。未藉扶筇健,无妨坐石温。 江村老博士,相对澹忘言。

失题

欲遣天骄识汉官,词臣仗节亦登坛,颇闻塞上收千落,已信军中有一韩。从古河源归部下,同时人望惜朝端。圣明恩德遐方被,莫便氐羌一例看。

近日秋声不可闻,岐亭难制泪纷纷。中朝谁决澶渊策,诸将仍屯灞上军。一障何时能畀我,九边今日或须君。玉河衰柳休攀折,留著长条绾夕曛。

和凤孙韵兼呈云门同年并寄鉴堂督部

长安尘士马如飞, 兀坐敲诗我辈稀。幸有文章通性命, 不缘离乱得因依。排除党论 粗闻道, 报答君恩祇有归。间架未兴人税缓, 糁盆松火乐柴扉。

杨文莹

杨文莹,字雪渔,钱塘人。光绪丁丑进士,改庶吉士,授编修。有《幸草亭诗》。

涧石

天生涧底石,头角何觺然。久久与水斗,不转亦已圆。

石资水磨磋,锋敛无外炫。水东石向西,虽圆誓不转。

重宿江郎山下逆旅

千里归丧行路难,天涯涕泪一身单。树经久雨尽情碧,月照愁人特地寒。多故长途 恒失睡,大难来日强加餐。江郎壁立空依倚,山色回头不厌看。

信阳道中

水田碧气溢四围,白鸟得意双双飞。我今驱车渡淮水,风物顿触江南思。丁戊之灾 一何酷,天公幸锡年来熟。猪鸡肥大稻头粗,黄茅矮屋儿呱呱。

片云挟雨火急行,南村忽阴北村晴。百里外见黾阨山,峰尖正与吾眉平。沙石荦确 路纡仄,投驿停车日已匿。仆夫争饼饥火煎,驱蚊马粪烧青烟。

杨晨

杨晨,字定夫,黄岩人。光绪丁丑进士,改庶吉士,授编修,历官给事中。有《崇

雅堂集》。

石梁古松歌用洪右臣前辈古槐韵

金枝翠羽摇晴空,神仙出没明光宫。忽遘罡风坠灵杖,苍髯拂拂如虬龙。骑龙仙人入云去,老向空山饱霜露。上枝盘郁纷攫拏,下枝化石形杈桠。山深无人万籁静,独鹤归来月斜影。一声清唳立霜梢,唤起人间尘梦醒。老僧披衣出茅堂,手攀古藤渡石梁。下观飞瀑亦长啸,为我说偈三千章。华顶峰高断樵路,片片白云从此度。祇愁夜半风雷鸣,飞作神龙不知处。

湖墅

扁舟散发欲何之,早向烟波理钓丝。一曲鉴湖双桨入,四明狂客几人知。桃花水暖 鱼初上,芦苇霜清蟹共持。拟傍水仙祠结屋,棹歌归趁夕阳时。

登丰山有感

丰山东走势蜿蜒,海月江风入暮天。剩有孱王传逸史,几经名士结吟缘。洞中蝙蝠 多栖壁,峡口盘螭欲喷泉。太息沧桑真一瞬,后人谁念郓讙田。

漱岩归示忆鉴湖诗次韵奉答兼订后约

谁言河广不容舠,草草归人未觉劳。恰值一湖秋水满,同看万丈月轮高。先生亦自 耽诗癖,今世何曾罢议曹。肯许重阳共登眺,莫嫌落叶受风饕。

王仁堪

王仁堪,字可庄,闽县人。光绪丁丑一甲一名进士,授修撰,历官苏州知府。

乙酉使黔与杨雪渔学使同年游甲秀楼扶风寺瞻阳明先生像赋诗志别

万里事行役,健仆犹骨肉。况我金石交,三年手重握。握手各一笑,感物翻万触。 秋气互泬寥,天宇晶于玉。如何太清表,时有微云属。霜高鹰隼尽,木脱川原肃。薄寒阴始 凝,秋士欢易促。契阔能几时,须眉见老宿。仰瞩北斗光,空庭夜踯躅。

马首骎骎来,随山西入黔。山气上眉宇,地杰云崎嵚。君来振宗风,辛苦储楩柟。 芳晖灼幽谷,偃曝无寒林。我来述祖德,横舍称犹今。遗研泽未艾,冰鉴怀难谌。《风》《雅》 别伪体,慄慄维初心。细甚愧篎管,大哉君离琴。协律苟不忤,谁日非同音。

山阴七里泷,幔亭九曲溪。乡帮盛文藻,楼观金碧辉。人巧天乃夺,无此形模奇。 罗施山水窟,造化浑{厂垂}{厂义}。将毋太古璞,遗置西南陲。想见山阿人,美质昭无亏。 家丞落秋实,季女愁輖饥。菑畲秉经训,诲育畴兼施。高山仰文成,吾道人天师。

清晨撤舆盖,对雨登山楼。危阑闤阓外,森爽凌高秋。便坐画图出,回漪风叶流。

带郭千万家,茨屋犹牵舟。为忆全盛时,生烟城树稠。万方感一慨,蹀危支黔中尤。振民首士气,何以纾烦忧。苍苍远色至,离思飞光遒。将子翘秀心,归慰云霞俦。

答弢甫同年

矫若金羁脱玉骢,惊人还我气如虹。谁知旌旆悠扬意,转在车箱闭置中。肺渴更无 千丈露,步虚饶有五更风。玉梅不道过三九,一夕清尊未许同。

行县观稼

生小恃游宦,耗粟蠹天庾。家无一尺田,岂识农田苦。赐牒领江郡,搴帷课晴雨。 我来四月中,烈日龟坼土。新秧寸黄萎,渴比婴失乳。天不绝吾民,解悬赐甘醽。桔槔声渐和,钱镈效微睹。如何桀桀苗,生此多辛々羽。捕蝗如捕盗,连乡整囊鼓。惟螟独阴贼,潜据心自腐。剔之不可尽,祈佑神所主。盼到禾豆花,欢若珠玑吐。一夕起阴霾,彼苍胡啴怒。忍令蔀屋丰,坐听山风蛊。存者盖已仅,登场日可数。夏旱秋转阴,榖烂芽先弩。哀哉一粒粟,受此百摧侮。长官料榖数,还曰十得五。舟行见炊烟,嗟我民力普。瓯窭祝未央,鸠扈职何补。三复《伐檀》篇,改空对农圃。

毓俊

毓俊,字赞臣,满洲旗人。光绪己卯举人,陕西候补道。有《友松吟馆诗钞》。

拟韩昌黎山石

山石嵂崒横翠微,瀑布洒落银虬飞。银虬喷水洗石磴,山草浓绿莓苔肥。我生酷有山水癖,但恐人世知音稀。手拨烟雾入古寺,僧具蔬筍疗我饥。借宿短榻不知晓,杲杲初日光照扉。上穷峭壁下阴谷,幽篁古木烟霏霏。山禽绕树老猿啸,阴崖森森松四围。白云相逐登绝顶,千仞高冈振我衣。一丘一壑自行乐,何必如马常衔鞿。山岳竦诮陇腾笑,撄情好爵胡不归。

宝珠洞晚眺

清秋曳杖登翠微,野客闲逐孤云飞。绝顶古寺磬声寂,夕阳在山僧未归。

顾印愚

顾印愚, 字印伯, 号所持, 华阳人。光绪己卯兴人, 官湖北知县。

题程穆庵石巢读书图

带草萦书石听诗,旧安巢处凤栖枝。颖居叔党能为赋,籀注游秦早决疑。佳日林亭 良不负,清秋篇什最相思。打钟扫地寻常事,过客光阴读画时。

病中岳二兄朝夕临过兼闻乡讯感赋

病榻来过风雨交,应时不已自喈嘐。万竿恶竹谁从斫,一曲清江莫定巢。天上虚传 清暑殿,人间宁有孟城坳。侧身四望归无所,联句城南岂愈郊。

答洛生七弟见怀之作次韵

当年大母煦诸孙,今我生孙解候门。无以为家行未已,不遑将母疚难言。梦中俯仰何身世,病里扶携倚弟昆。还见新诗献康乐,鸣翁春草得重论。

辛亥岁长至小寒节间罗四峰兄每从汉皋还菱湖楼居辄过敝寓留连置酒不减杜甫之于苏端也

寄愁埋照月三弦,过隙沈沈井底天。谁道梦中犹识路,剧怜寒尽不知年。渡江名士 仍流寓,飞矢行人未解悬。枉爱苏端能数过,鸡鸣风雨浊醪前。

岷江

觞滥鹅村注脉摇,西波东渐画南条。海门组练楼船入,蜀阵风云石蕝标。郭赋臣唐 人代改,禹书汇漾地形遥。巴流学字邮无字,望尽吴船万里桥。

得节盦海上书却寄

代不数人能几见,去去江空岁年晚。闭门一字不堪煮,无补费神诗作蹇。西风尽夕城满尘,带水沸潮消息断。十七柳凋十桂爨,更问菱湖与桐馆。风花一瞥旋成毁,那及黄楼 丑魏衍。书来海上如说梦,自在人间已枯菀。断云含雨向何许,泪眼不晴天不管。布衣许身老转拙,失计残年难饱饭。履綦故蹊绿苔满,子宁不来梦当返,小别千年万山远。

晚眺明月桥南石步间偶题

沙坪残草伏雏双,明月杯湖带石矼。我酌长瓢从漫叟,天然秘色旧鸡缸。

过景桓楼故址感赋

景桓楼角织乌寒,钟漏音沈壁画残。宁省独来迷处所,记从高处凭阑干。

重到京师感赋寄程穆庵

凤城平日萃公车,回首芦沟岁月赊。退谷尽容孙北海,麓堂莫问李西涯。价留镫市前朝扇,香散斜街晓担花。剩与放翁评世味,白头骑马客京华。

吴受福

吴受福,字介兹,号琎仙,嘉兴人。光绪己卯举人。有《小种字林诗稿》。

明姜给谏宣州老兵砚为阳湖左祉文孝廉题

昔也居谏官,起草曾侍惠文冠。今也为戍卒,枕戈待焚君苗笔。不以瞩蛟龙,不以锄榛莽。毡裘毳幕溷厮养,此石遭际抑何枉。遐想当年党祸侵,乌台风骨争森森。役车苍皇犹未赴,神州胡乃先陆沈。吁嗟乎!石齐断碑谁所守,邝生天风汝其友。一抔荒土敬亭右,砚兮终古与之长不朽。

胡匊邻晚翠亭图

林木似名节, 斯言契道真。清芬觇厚泽, 小筑绝嚣尘。杨子草玄处, 吾丘学古伦。 杜门忘世味, 珍此岁寒身。

酬刘语石明经

我厌四民穷,天荒地亦老。沟壑未填委,乾坤倏颠倒。世变何仓皇,氓蚩迷昏晓。 窃慕邵平瓜,不求安期枣。班荆逢故交,袖诗惠我稿。相见如虚页希页,岂复矜词藻。春波 起歌声,高情抗云表。任运劝委心,静观袪烦恼。明哲古训导,桑榆蕲共保。

郭曾炘

郭曾炘,号春榆,一号匏庵,侯官人。光绪庚辰进士,改庶吉士,授礼部主事,官 至典礼院掌院学士。谥文安。有《匏庐诗存》。

和畏庐梦谒梁格庄梓宫作

爝火星星遽燎原,酸心板荡此乾坤。苞桑痛念先皇计,因果终疑佛氏言。黄发不遗虚顾命,苍生何罪剧烦冤。杜鹃再拜千行泪,沦落诗人自感恩。

检藏书感赋

人生贵適情,长物皆为累。读书不在多,安用罗箧笥。长安号人海,自昔居不易。 矧经丧乱余,岂有立锥地。馈贫亦虚言,腹枵难煮字。饥驱匪自由,顾此焉舍置。一身已赘 疣,四海方糜沸。复壁无深藏,兼两重劳费。儿曹惜手泽,甲乙为标识。谁知丹墨痕,中有 沧桑泪。

吾家黄璞里,通德存赐书。远宦偶归来,什九饱蠹鱼。先畴无一亩,安得带经锄。 春曹三十载,退食鸡栖车。阅肆掠剩残,累积寸与铢。一日未释卷,寝馈与之俱。亦知玩物 戒,聊胜博弈娱。甬东天一阁,吴下士礼居。小大相挈较,潢潦于江湖。万钱愁塞屋,措大 真穷途。

延秋夜啼乌, 达官尽避走。栖栖复皇皇, 可笑丧家狗。妻孥亦何知, 作计随人后。旅琐悲焚巢, 自贻复谁咎。失火贺参元, 吾思柳子厚。区区保丛残, 无异千金帚。长恩独何事, 殷勤为我守。炳烛念余光, 雅意宁忍负。岁除修阙典, 会当酬杯酒。泊宅无安居, 此愿竟偿否。

欧风日东渐,学说竞趋新。莘莘黉舍子,六籍谁复亲。《法言》久覆瓿,《论语》可代薪。迂儒不解事,矩薙守先民。庄生尝窃笑,章甫適文身。徒然抱残缺,终恐委灰尘。祖龙恣焚坑,孔壁未尽湮。吾观今日事,酷烈甚暴秦。浮生无百年,遘此大化沦。成毁何足道,掩卷潜悲辛。

题芦台聂忠节祠

尚有荒江庙貌留,同时淮将已无俦。鼓鼙今日思应晚,萋菲盈庭死亦休。朝士可怜 黄菜叶,路人犹唱白符鸠。英灵不泯知遗恨,坐看支祈鼓浊流。

愧室丁未试御史报罢余赠别有当代南雷人不识之句子益方裒集其生前酬唱之作书 来属补录附此追挽

易箦丁宁愿竟虚,横流一决遂沦胥。南雷若使生今日,应废《明夷待访》书。

新亭举座皆周顗,鲁国当年一孔融。留得题襟诗卷在,九原家祭有余恫。

长少白制府见访话旧

三十六城老都护,倾盖初逢讶如故。生刍一束见君情,候尉相望断书素。皋兰玉节 控万里,谁知海内风尘起。赢得筹边双鬓霜,恨不臧洪同日死。建威销萌岂无策,老谋不用 长太息。汉家九鼎重如山,夜壑移舟一夫力。三径就荒归去来,大弨挂壁生尘埃。海滨不遇 田横客,独礼文殊上五台。

自题集遗山律句百首后

曹毗一片光明锦,白地裁为负贩衣。偶借酒杯浇磊块,九原可作幸无讥。

转喉易触当途讳, 学步但增余子着。尽把精神费无益, 东涂西抹几时休。

杏城侍郎以次韵樊山秋柳诗见示仍次原韵奉和

柔条岂耐雪霜侵,忍见飘零万缕金。攀折行人朝复暮,蹉跎芳序昨成今。江潭何限 悲摇落,海水分明阅浅深。回望扶桑丽朝旭,菀枯难与问天心。

乌桕丹枫满目秋,伤时王粲怕登楼。尚余舞态临风见,何似浮踪逐水流。大树功名虚玉帐,剧棋光景变金沟。亦知代谢寻常事,不奈言愁我欲愁。

晓风残月唱屯田,争及城南尺五天。阁道添星深得地,羲和敲日不停鞭。前途黯惨 仍愁暮,旧梦迷离尽化烟。休说十围亲手植,也应憔悴异当年。

陶令门前尽日垂,阑珊情绪有谁知。流红得句聊题恨,傅粉何心学弄姿。一曲秋娘歌独绝,十年春梦觉应迟。上林故事浑疑信,犹盼回黄转绿时。

旧政务处海棠花下追怀寿州长沙二老

二老风流不可亲, 庭隅负手独逡巡。青油日看宣明面, 知有花枝解笑人。

酹酒难忘手植辰, 名花也是劫余身。东风嫁尽新桃李, 未恨无香媚路人。

雨后与熙民过榆园

一雨何当为洗兵,帘栊相对不胜清。昙花偶现犹疑梦,杯酒重拈且压惊。幕燕翻飞 浑未定,池蛙怒聒底难平。晚晴景色无多子,愁听斜阳鼓角声。

书钞本杜诗后

杜陵际丧乱,每饭不忘君。许身稷与契,世尤骇其言。岂知此老胸,固生忧黎元。 稷契佐唐虞,得以康斯民。君民实一体,君仁莫不仁。所以企中兴,恋阙心拳拳。肃代虽孱 主,西极犹自存。陵夷逮懿昭,读史足辛酸。岂惟冻雀悲,清流亦投渊。群盗起如毛,什百 巢与温。所过恣屠掠,千里无人烟。五季递兴仆,十国更剖分。回思天宝日,何思羲皇前。 九州戴共主,继体岂皆贤。神器要有属,自然息闇干。《风》《骚》本忠爱,千载思灵均。杨 墨无君父,率兽终食人。民彝既泯乱,天道无幸全。此语非臆造,吾闻自船山。

杜公称诗圣,众体无不备。大云赞公房,乃与选诗类。向来信口读,未测意所谓。 近览杜园说,乃知豁蒙翳。当年陷贼中,此为窜匿地。去来与信宿,踪迹皆可识。复壁藏赵 岐,北海侔高谊。巾履及醍醐,衣食兼赒济。脱身有天幸,麻鞋达行在。右丞与司户,误被 罗网致。讬疾以自全,亦未伪职试。台州竟死谪,辋川亦作废。少陵屡赠诗,湔祓至一再。 后儒顾不谅,执此为訾议。往者粤寇乱,名臣若汤戴。皆无效死责,慷慨轻就义。承平重气 节,清议犹可畏。道咸去岂远,风尚乃大异。纷然鸟兽散,咄咄真怪事。

虞山笺杜诗,毕生萃心力。以视訔鹤辈,较然分黑白。稼堂与义门,纠缪纷指摘。 芟薙其榛芜,十犹八九得。独解勃律章,乃援奘师说。衣毛讥鸟言,比类强区别。书生守兔 园,繁徵疑奥僻。龙门谤史心,狡狯故难测。我因读此笺,重感世变亟。通市逾百年,蕃舶 来如织。邹衍所常谈,甘英未尽历。条支西海头,环峙皆勍敌。连鸡斗爪觜,未易雌雄决。 马主虽中微,宝乡益繁殖。盛衰初无常,谁能外夷狄。震旦号昭明,文物迥非昔。仁义苟不 存,政恐难立国。即叙徵夏书,大言得无怍。牧翁岂及料,澜翻恣笔舌。

先中永公癸酉鄂闱拟墨原稿沄儿装潢成册敬题其后

三度文衡总向隅,九重温语念寒儒。传家别有燕支笔,手泽犹堪一集都。

点铁成金有化工,敢将小技薄雕虫。当时曾感孤寒泣,一念怜才出至公。

模楷非徒多士资,公忠默与古人期。一朝功令兴亡系,剧忆中书抗议时。

乞骸疏草背人挥,莼菜秋风早见几。一疏回天私自庆,惊闻哀诏倍歔欷。

秋柳明湖记梦痕,都堂镫烛不堪论。文身章甫知无用,且宝先芬付后昆。

秋暑索居案头惟亭林南雷两家诗时复展玩各题一章

桑海多传变徵音,钜篇谁解读亭林。依然清庙明堂体,未肯亡明一寸心。

忠孝艰屯萃一身,梨洲世不数诗人。刊余华藻无宁拙,掬尽衷肠只是真。

翁文恭公生日师郑吏部邀同人陶然亭为瓶社第一集并出遗墨传观敬赋长句

神龙反正语多秘,元祐改子亦称制。梁公温公时不同,苦心要为宗社计。公傅冲主 历两朝,遭际之隆古莫媲。中书当笔无所让,安知身与危机会。温树不言心自悲,文采风流 特余事。郑斋晚得衣钵传,遗书缀辑笃风义。远溯鸥苏近顾王,生朝补祝举成例。城南乱后 车马稀,惟有西山犹故态。暂借团蒲缔古欢,自循汉腊修私祭。流传翰墨已豪芒,尚与平原 堪作替。我亦春风座下人,云台夙昔聆高议。陆氏旧庄久就荒,冬郎敝箧空留记。载酒难寻 门外踪,抚筝重感筵间涕。宫邻金虎竟始终,空山枉唤奈何帝。有人唳鹤痛华亭,几辈牵黄 忆上蔡。窜身犹得老江湖,坏事何须嗔鬼怪。忠佞于今已昭昭,挥戈不挽虞渊逝。吾侪苟活 真幸民,莫厌相从饮文字。魂兮大鸟傥归来,此举年年宜勿废。

题徐晴圃中丞从军图

睿皇初政诛骧共,谅阴不言言乃雍。川湖逋寇犹隳突,障日修罗坐养痈。诏遣重臣 提禁旅,铁骑三千尽貔虎。亲承天语授机宜,妙选军谘开幕府。舍人早直承明庐,于时读礼 亦家居。金革无避古有训,起应徵辟从驰驱。往来黍雪冬徂夏,跃马横戈不遑舍。转战曾过 陇阪西,捷书频奏甘泉夜。唾手方看扫穴巢,含香鸡舌还趋朝。几载回翔依省闼,重来开府 拥旌旄。枢垣始因西师设,颇牧时闻禁中出。平台筹策出耘菘,征缅邮程纪蒲褐。紫光图画 比云台,拓地开疆逾九垓。潢池盗弄小丑尔,昔何其胜今何衰。我亦簪毫旧从事,每读题名 想前辈。属车豹尾屡追从,行在麻鞋余涕泪。开元生晚羡承平,百二奏关尚苦兵。渭水终南 如在眼,暮年萧瑟庾兰成。此图写真近神品,况复名贤富题咏。神武犹堪想庙谟,流传岂但 光家乘。玉轴装池手泽新,时艰未放退耕身。陆沈重挽神州起,整顿乾坤匪异人。

与枢直旧友追话诸老轶事因志其语

图谶说淳风,祸唐知不免。乡曲老书生,乃亦妖梦践。前生故渺茫,置身忽鼎铉。 私印默自镌,画禅且游衍。

南厓非奸相,门下乞削籍。谬种孰流传,亦被春秋责。和战处两难,群矢期中的。 智哉卫足葵,急流能勇决。

少年冯涿州,晚慕傅春和。推贤亦下士,赡智犹足多。调护骨肉间,披诚无媕阿。 咄咄双桂轩,退食谁见过。

烽火照甘泉, 宫车急西迈。七十秃老翁, 抱印趋行在。八议首懿亲, 青蒲偶独对。

吕端不糊涂, 沈默姑养晦。

藏地连西南,全蜀藉屏蔽。维州已归顺,庙谟忍轻弃。桑榆犹及收,荐贤亟自代。 碧血埋苌弘,谁理西康议。

杂诗

蛣蜣工转丸,寒蝉但饮露。匪惟所性殊,能事亦天赋。寿陵学邯郸,乃反失其故。 弈棋志鸿鹄,兼营终两误。八极何茫茫,出门即歧路。瓮中有天地,章亥不能步。

利欲中人心,若火始焰焰。福善祸淫理,衰时或不验。君子道其常,束身懔圭玷。 父师所提诏,旦明俨昭鉴。谨微犹恐忽,纵暴安有餍。彼昏坐不知,吾侪惧天厌。三复望谿 言,顽躯足针砭。

《国风》终《曹》《桧》,战国遂无诗。汉魏稍萌芽,齐梁益卑卑。治少乱日多,《雅》 《颂》亦已微。千载一诗王,牛酒不饫饥。后人论皮骨,流派弥纷歧。无病而呻吟,世犹疑 继之。白贲本无色,大乐贵声希。寂寞谁与娱,谷音或庶几。

春服亦既成,舞雩偕童冠。及门各言志,圣有与点叹。古来贤豪士,出身当世难。 晚节尤难持,百里九十半。幼安老依辽,孔明卒扶汉。泉石岂本怀,风云要长算。商歌望南 山,长夜何时旦。宁诮狂夫狂,毋为漫叟漫。

分利日以众,生利口以微。往在承平日,已有人满疑。客从故乡来,欲语先涕洟。 小民勤四体,未赡八口饥。兵火所摧残,敲剥及膏脂。重以灾疫继,道路皆积尸。回视显宦 辈,累累拥金赀。富者力兼并,贫者无立锥。物穷有必反,勿谓彼蚩蚩。吾亦游食徒,内愧 当语谁。一饭无兼味,一缊无余衣。且办一身瘠,敢问天下肥。

弢斋主人出示其先王父九九消寒图手迹属题

十日一水五日石,昆仑方壶侈真迹。不如渲染没骨图,装堂铺殿精楷模。怒气作竹喜气兰,风枝雨叶来无端。不如流传喜神谱,小蕊大开足意趣。九九谚出田家志,翦纸调脂近游戏。谁欤运腕妙写生,展卷雅人见深致。一阳来复天地心,次第春光静可寻。瑶草琪花石供古,重茵复幕画堂深。东南半壁烽烟靖,荣光出河通瑞应。云台上将数高勋,官阁水曹自清兴。五十年来手泽存,摩挲故物重瑶琨。曾供乙览睿思殿,好伴新图水竹村。灿烂云章亲弁首,子子孙孙当世守。渡江又见岁华新,珍重亭前旧垂柳。

钞吴野人陋轩诗一册书后

陶杜而还有此诗,渔洋确士未真知。苦吟落得身贫贱,残烬应关鬼护持。上座敝衣 名士会,荒丘宿草故交悲。篝镫录罢重寻讽,益信潘翁不我欺。

弢斋见示所橅王廉州烟树晴峦横卷属题

老生有常谈,无欲观其妙。覃谿借评画,下士皆大笑。岂知至人心,如镜常皎皎。

燕处谢荣观,超然尘壒表。四王擅名家,古逸惟元照。晴窗偶展卷,借题抒腹稿。疏林带茅屋,风帆逐飞鸟。一重一掩间,烟云互萦绕。直与造化游,匪矜神貌肖。旷林日干戈,庸流空自扰。扁舟者谁子,危坐方持钓。

客有询近作者书此示之

唐宋藩篱略未窥,狂歌自写此心悲。吾生不幸多言中,天意终无厌乱期。临水登山 行已老,吟风弄月复偕谁。思量何物供诗料,还学毗耶杜口宜。

德宗景皇帝实录尊藏皇史宬礼成恭纪

衣冠拜表上彤墀,九庙神灵鉴在兹。伏案头童才蒇役,攀弓泪尽总衔悲。金銮故事空留记,玉几群公孰受遗。虮虱微臣惭报称,剩从家乘纪恩私。

御河路转小南城,典守犹余老禁兵。两翼分排金鐀灿,九霄上烛玉虹明。检书供奉 长歌壮,受印亲藩异数荣。欲证旧闻遗老尽,文谟武烈想承平。

题第四女葆薏遗画

生小深闺薄绮罗,长年几席苦研摩。清才赋与天何意,玉陨兰摧一刹那。

老翁百念俱灰槁,不作人间无益悲。结习但思文字话,偶传遗语念渠痴。

雨夜不寐杂取案头书读之

万感何来迸似潮,披衣强起亦无聊。古人传者皆糟粕,独夜凄然此晦潇。永忆对床 隔黄壤,犹疑听漏近丹霄。耳根彻夕琅琅响,知碎庭隅几叶蕉。

惺吾以新刊勤恪公政书见贻敬题奉简

勤恪督楚时,吾祖同疆寄。大难適初夷,急在培元气。抚臣职治民,地与益阳异。 推贤本公忠,刚柔亦互济。不争赫赫名,岂恤悠悠议。奏牍兹具存,经画皆至计。国家建行 省,命官有深意。元丰议省并,祇以便专恣。荆襄据上流,承平慎择帅。奈何任无赖,轻举 江东弃。始信古人言,将亡必多制。与君籍金闺,通家逮四世。白首役汗青,同舟话故事。 连楹赐书在,骏烈惭弗嗣。倾阳一寸心,何补东隅逝。万方困虐政,生民日憔悴。岂独岘山 碑,过者为堕泪。

幽居遺怀

萧然丈室老瞿昙,嵇嫩非徒七不堪。祇合当门书差患字,有时隔牖觅鸡谈。人情但 自看云习,世味都输食蓼甘。强把一樽排万虑,乍欣卯饮得微酣。

百劫茫茫剩此躯,镜中那复识今吾。科头晏起真供状,挑耳勘书古画图。日历久忘 新晦朔,烟蓑长忆旧江湖。小车洛下无人问,牛马相遭总任呼。 山经海录尽无稽, 遣闷时还一卷携。渐爱负暄知老境, 稍从习静见天倪。秋花自妩 供凭槛, 寒菜能香促灌畦。未必墙东容避世, 扁舟何处武陵溪。

已分高轩绝往还,深居何事复相关。打门诗债从人索,倚壁筇枝对我闲。谏草糊窗 经断烂,诰绫装帖喜斓斑。卧游恣看蓬壶景,一角犹余马远山。

乙丑二月出都车中口占

西笑真成梦,东流未有垠。偷生余故我,触处感前尘。卉木犹含冻,风沙苦趁人。 此身安住著,满目足悲辛。

静听车轮转,吾肠与万周。把书姑引睡,呼酒不浇愁。促坐知谁某,微吟自唱酬。 平生江海兴,左计负扁舟。

美服人争指,空名盗亦憎。当关多猛虎,掠野尽饥鹰。衰朽惭筋力,承平想股肱。 悠悠青史事,神理久无凭。

于式枚

于式枚,字晦若,贺县人。光绪庚辰进士,改庶吉士,授礼部主事。官至吏部侍郎。 谥文和。

李宝臣纪功碑歌

恒阳古郡行署旁,一碑屹立支风霜。纪年建中记永泰,文词渐泐犹能详。云我亚相 秉王命,世有勋禄兼忠刚。铺敦四凶翊三主,瞿惕威惠怀瀛沧。千二百言自赡密,謏词曲笔 难具量。渔阳丧乱起安史,夹河州郡沈戎羌。旄头堕地胡焰尽,余星四散还披猖。阳和鹰眼 偶一化,神狐得夜为妖祥。淄青魏博洎幽冀,各拥旄盖凭岩疆。成德一军最悍突,明光十万 罗成行。控弦饮马正南下,百缣一掷催归装。射堂竟馘朱司徒,此功信可铭旂常。同功石谶 恨不应,幽燕二帝遥相望。归来据险阻兵甲,蟠屈薛李连田梁。辅车势成窟宅定,谓可高卧 常山冈。岂知凶德不再世,貙罴生不如封狼。徒资部曲取旌节,同开大镇康王张。蛟龙匣毁 奸骨朽,巍然片石经沧桑。独留一事证史阙,题衔特志清河王。摩挲苔碣百感集,蹉跎国步 哀中唐。代德以还那可道,风尘澒洞昏东方。威弧不弦斧钺钝,徒恃文物縻豪强。凌烟图画 紫薇券,一一狎视争腾骧。更勒丰碑纪勋绩,追逐方召参翱翔。峨峨西平与义阳,庶几无愧 桓文襄。华州曾颂李全谅,成都复纪韦南康。此外文字仅罗列,何啻中国纷蜩螗。八纮一裂 不可止,颠倒功罪由文章。陆萧正色拒赵魏,几人岳峙中书堂。鄦公之铭出吏部,无乃少损 日月光。矧兹幕府颂功德,岂容著手为低昂。百年运会一分合,燕将语在非微茫。章武昭肃 恢大纲,手持魁柄临八荒。蔡齐并潞齿神剑,河朔猘子眠如羊。《淮西碑》付段文昌,《卢龙 铭》敕李赞皇。英卫之勋燕许笔,两朝将相何堂堂。文石无言任雕刻,谁留秽恶传芬芳。从 来上策在自治,罪言盍忆司勋郎。

成都浣花草堂杜少陵祠

大雅千秋在,遗祠倚近坰。苍茫中兴日,寥落少微星。故宅空文藻,斯人具典型。 池台换尘劫,无恙竹林青。

地旧华阳县,基仍宝应朝。元猿愁落日,孔雀望凌霄。何处千间厦,当年万里桥。 空庭荡春色,独立黯魂销。

海内兵戈满,天涯岁月孤。西来严仆射,北望李司徒。寄兴聊题壁,忧时独论都。 蓬莱何可到,冷梦逐青梧。

江上三年病,人间万事非。魂随星使节,血惨汉臣衣。桂岭谁通问,松州正合围。 秦川秋信早,乱定几曾归。

杖策知何適,抽簪此暂留。白杨多废垒,青草又扁舟。将帅还燕蓟,风骚失应刘。 无端人世感,江水日悠悠。

等是三川客,飘零滞一乡。死生房太尉,羁旅汉中王。江汉堪终老,彭嘉各异方。 白鸥如可狎,真欲赋沧浪。

云影琴台暮,溪流剑阁春。变衰余草木,澒洞莽风尘。涕泪宣光事,江湖稷契身。 汉南连灞上,极目正愁人。

未许驰千里,还期赋五车。寒归华表鹤,晚钓锦江鱼。军府凭看画,中朝久绝书。 平生江海志,吾道有樵渔。

不唾青城地,何来碧玉京。残年思杜曲,故国忆兰成。天地独怀古,君臣方论兵。 短衣抚长剑,狂顾意纵横。

落拓瞻鸿碣,羁孤念鹤林。野亭劳望眼,水槛遣闲心。寂寞扬雄宅,栖迟《梁父吟》。 涪翁瓣香远,旷代结知音。

秦中怀古

六国楼台一炬连,美人钟鼓散如烟。十年运尽初逢鬼,百战功成又学仙。鹑首关河 天一梦,龙髯弓剑地三泉。青梧观冷麒麟折,剩有苔花渍血鲜。

浮云白日莽秦关,如梦兴亡去不还。金虎宫邻唐北寺,玉鱼陵墓汉南山。丛台露冷铜仙别,野殿风高石马閒。杜老哀吟沈郎表,无端幽怨道途间。

东井西河辟上都,文谟武烈递乘除。云霓赤帝三章法,日月苍姬六典书。栖凤何年 来白虏,伏龙从古护皇图。金戈铁马纵横地,放眼千秋几丈夫。

天府名区百二雄,上游陆海控寰中。灵潭犀象连樯密,大漠牛羊逐帐空。竟说河流 关利济,几闻陇坻隔华戎。平蛮得宝翻新曲,又见飞尘卷朔风。 猎猎牙旗出苑墙,十千组练试明光。一鸾未卵叚灾先伏,九虎凭威势可常。塞北风云朝白帝,关东烽火殉黄皇。银筝呜咽楼头语,可忆金鞭下未央。

旧曲淋铃乐府传,仓琅驿骑望秦川。江花江草愁无极,秋雨秋风梦悄然。青琐华年怀鄠杜,白头遗事说开天。红楼珠箔遥相忆,摧断青春蜀国弦。

燕齐迂怪逐波澜,张赵名豪竞射弹。几见神仙返东海,真成盗贼阻西山。丹砂不救 苍黄劫,白日凭探赤黑丸。一代乱源何处问,好迁豪杰实长安。

草檄题诗意若何,百年心事足悲歌。新书甲乙编南部,奇策纵横画北河。宣室鬼神原恍惚,梁园宾客竟蹉跎。何从更觅封侯印,付与温岐哭逝波。

徐琪

徐琪,字花农,仁和人。光绪庚辰进士,改庶吉士,授编修,历官内阁学士,署兵部侍郎。有《日边酬唱集》、《粤轺集》。

十月十七日桐城道中口占

野草芟余岭壑明, 穉松都似盎中生。天然棐几宜清供, 高处云涛作雨声。时有真香通妙趣, 偶留勺水助躬耕。吾家南北双峰顶, 一样凌霄积翠横。

连州钟乳石歌

连州钟乳天下奇,阴崖千尺俱倒垂。苔须藓发界飞瀑,如鸟浴羽毵褵穲。星精月魄互激射,露华雨液融胎胚。琅玕束笥箨悬处,瞿昙闭目香定时。饥鹰渴骥不一致,蜂房燕垒相偎依。蛟潭旧友颇识面,绉瘦亦觉殊端倪。菖蒲紫茸缀瑶草,岁久石骨同拄支。叩之清声夺琴筑,雁柱欲合银笙吹。乃知珊瑚出海底,亦似荇藻纷涟漪。年深宝气自吞吐,遂与玉色争琼瑰。瀛台旧有木变石,褒咏曾贲天章诗。小臣侍从讬史馆,至妙每觉难管窥。观此始信造物巧,意匠不到皆天机。比来高谈侈格物,烹炼霜霰如饧饴。五金八石别寒燠,黄埃青澒衡铢锱。岂知大地不爱宝,信手结撰凭取携。巨灵太华拟议耳,女娲戏补谁见之。我今一拳置碧盎,十洲三岛含须弥。放颠几欲傲海岳,秀采亦复争仇池。殷雷前山乍振响,呼吸如有烟雾随。夜深蜗篆竞出没,科斗如黍皆文螭。子厚欲乞定不与,稚川相访或见贻。莫教煮食同芝蕤,雪窦中有颔下骊。采之欲佐轩辕玑,万国土照红尘微。心情当与成连移,水仙一曲波湿衣。

韩江赤鲤歌

鳄鱼已去金鳞生,水晶宫阙皆通明。连蜷雌蜺夺奇采,伛偻南极排天星。如钩新蟾不可钓,五色晃漾交辉莹。葛陂秃杖几时化,琴高只手凌空擎。岂如鲦鲿入网罟,竟与图画争丹青。怀川宝气久必泄,欲起五岳窥真形。巨鳌戴山涌之出,冯夷击鼓喧而登。斯邦太守凤池客,与我俱挹蓬壶清。晚来喜共尺书至,欲助吟韵添茶笙。双瞳看朱屡成碧,得此朗澈臣心冰。咏莪幼感学诗对,鲁藻正发东风馨。泳游顿思乐在泮,天鸢梁雉相时行。岂如校人属子产,要为大造培蓍英。龙门起跃尽变化,鲲鹏瞬息随飞腾。广文更为进一解,尺水虑勿

容长鲸。奇姿必非池中物,盍纵巨壑归沧溟。我壮斯言夜起舞,一掷乱跳波涛腥。群灵趋拥入水府,老渔束手抛霜罾。生机何止濠濮畅,士气直共风云兴。明年画舰临江城,扬鬐或导双前旌。旁人认是海霞曙,我知卅六来相迎。

晓起

建瓴舴艋溯奔湍,图画应知俗手难。烟带春痕上山翠,晴烘水气破江寒。津亭花绕朱幡队,野寺松藏白玉坛。欲向云崖刻诗句,他时留与扫苔看。

何乃莹

何乃莹,字润夫,一字梅叟,灵石人。光绪庚辰进士,改庶吉士,历官左副都御史。 有《灵樵仙馆诗草》。

双白莲歌题长女兆英画

银河倒泻三峡泉,粉笔划破秋空烟。临风悄对光莹然,意态绰约花开先。晓月欲坠凉娟娟,露华皎洁珍珠圆。乍如宓妃来洛川,凌波微步交回旋。又如佛子临九天,芬陀利花在眼前。瑶池昨夜开华筵,空中掷下双玉盘。素女醉舞青娥颠,六月霜雪霏琼田。我持杯酒凭雕阑,俯视秋水清且涟。中央宛在疑飞仙,神游江潭周湘沅。灵均素质同昭宣,兰汤沐浴清白全。琼枝玉华成班联,移家宛住西湖边。两峰凝雪生朝寒,我欲从之劳跻攀。清晨坐对佳赏延,溪山尺咫精神传。愿花常好花无言,为花写图徵吟笺,常使香色留千年。

手植盆蕉经冬犹绿晨雪静对赋诗记之

翡翠新鲜玉莹洁,天然图画自清绝。满园寒色透重帏,窗里芭蕉窗外雪。

入吉林城见松花江

三面城垣一面江,入城瞥见浪花撞。市声近杂潮声起,帆影低随树影降。千叠峰峦横远岸,半街楼阁启虚窗。惭余策马匆匆过,孤负人家春酒缸。

秋边感兴

铜柱峥嵘马伏波,特林碑碣近如何。海天望断虾夷岛,雪地魂销虎蹐河。岂有安边 轻用战,断无柔远不言和。升平铙吹凌秋起,莫误西风《敕勒歌》。

偶成

抛书午梦凉, 竹翠侵纱幕。深院悄无声, 白莲自开落。

朱福诜

朱福诜,字叔基,号桂卿,海盐人。光绪庚辰进士,改庶吉士,授编修,历官侍读

学士。有《复安室诗文集》。

雪后望富春山吊伊孝廉用老杜冬到金华山观因得故拾遗陈公学堂遗迹韵

日出富春江,连山暎崔嵬。孤云识归路,往栖子陵台。积雪浩漠漠,飞鸟去不回。 清光转林麓,豁达户牖开。回峰抱春阴,虚壑松声哀。恸哭志士尽,飒沓西风来。尚怜伊孝 廉,白骨埋苍苔。赍志就埋没,何地无贤才。

和匡伯用山谷次晁补之廖正一赠答诗韵

齐虏得官乃以口,臣朔长饥索升斗。朱鸟归肆行翾翾,我春辞家秋未还。读书佳句坐叹息,诗梦已落吴淞间。旗亭一曲黄河上,四座无言独心赏。天街夜凉如水明,阑干曲录环碧城。愿接云軿与天语,美人颜色苕之荣。眼中少年今老矣,安陵昔日繁华子。前鱼已自为人怜,蛛丝还能助我喜。万古牢愁未入弦,欲竟此曲无人弹。丈夫意气属有在,挂席千里难追攀。我欲随君且入剡中去,李白一生自爱游名山。

潞河舟次叠前韵柬花农同年

少傅勋庸在天口,尚知喉舌犹北斗。仍晜文采何斑斑,早朝携得香烟还。蓬莱清邃足官府,风月不到非人间。蔡侯并掉词坛鞅,偶出城南事游赏。嘤鸣相召笔再赓,佳句往往夸连城。诗家自有麟阁在,未知浮世谁枯荣。即今京国号多士,我归去访鸱夷子。游客方深鲈脍思,慈母已占鹊声喜。潞河新月蛾眉云,南飞有雁君莫弹。西风残叶埽不尽,晚烟疏柳犹堪攀。但愿儒馆献歌戎堠息,看君玉堂昼掩吟春山。

苦热

我昔三年客幽冀,穷庐畏寒缩如猬。秋非我秋冬非冬,独喜炎天有爽致。今年江南苦溽暑,草木无端被熏煮。书生偃蹇体肤漫,默塞低头汗注雨。微风不起焦烟红,块若鱼置枯池中。穷鳞何惜升斗水,径欲上诉烦天公。人生动觉故乡好,我居南方恨郁燠。万事转移有如此,世间初念那可保。跰趾鲜安识造物意,且展琉璃倒身睡。会著一啸清风来,净洗千里无纤埃。

容城杨忠愍公墓

常傍松筠想故居,白杨墓道更萧疏。埋轮事忆张文纪,下马坟寻董仲舒。大鸟能来 知不忝,蚺蛇有胆定何如。奸谀骨朽知何处,十载钤山笑读书。

王懿荣

王懿荣,字正孺,一字廉生,福山人。光绪庚辰进士,改庶吉士,授编修,官祭酒。 殉难,赠侍郎衔,谥文敏。有遗集。

潘伯寅侍郎滂喜斋拓先秦彝器歌

司农堂前百宝罗,乙爵辛卣相击摩。周季保彝季悆鼎,郘钟鲁{将鼎}■王盉。更有召中生姒鬲,世间此物存岂多。鲰生登堂拓百本,青毡翠墨亲摩挲。考文释器徵所出,长安易水太山阿。卣曰父辛爵曰乙,先后毫社追猗那。爵上土花没瑶饰,一文当柱形如禾。中流及缘作亚字,朝饯馈献应同科。乙辛柔日皆内事,古义简所无枝柯。更有一器特精好,是名曰盉读如和。从禾得声非后起,我于音学无偏颇。世人争訽歌麻部,尽随娑媻改娑婆。尤附会者周黍昀,宁知两罍释非讹。此文唯■不可读,姬殊之夫名孰何。一鼎一彝皆季氏,悆也保也字未磨。作鬲召中君奭裔,旧姻生姒茑与萝。奇者鲁内小臣{将鼎},陪臣助祭锵鸣珂。侯生作器登明堂,骏奔欲奏清庙歌。更从郘钟识郘后,共公庚舆谥靡陀。郘子公族美田事,不须赤芾兼雕戈。作钟八肆{宀县}四堵,革亦曰■鼓则鼍。传闻此钟出岸曲,当随沂泗入黄河。司农读书天禄阁,古文奇字共切磋。从兹蒐采富藏弆,大收仓籀穷羲娥。愧余装治止墨本,{匚夹}笥渗漯生青螺。是日拓者人尽酒,吴孙二胡颜已酡。

戚武毅公宝刀歌谢莱阳徐明府桂宝同年

昔年曾刻《南塘集》,今朝喜得戚家刀。刀轻如纸光如水,两行款识秋芒豪。上镌万历十年字,是时公居蓟镇地。登州戚氏岳家军,铸刀初成姓为记。忆昔浙闽与三边,公所到处皆凌烟。虏酒朔风不成醉,精神炯炯三百年。几经流传济南驿,徐侯得之若拱壁。银函未改明时装,䴙鹈血染苔花碧。我今持节过莱阳,下马直上徐侯堂。徐侯宝刀举相赠,知余团练兼御防。千金挂树生不疑,楚弓楚得千古奇。即今防边无二义,关东诸将何离披。北洋舟师更无论,一掷二千六百万。遂令穷岛逞天骄,海夹虾夷任滋蔓。朝廷命我治乡兵,徐侯与我同岁生。俯仰东南天半壁,酒酣斫地泪纵横。

左绍佐

左绍佐,字笏卿,应山人。光绪庚辰进士,改庶吉士,授刑部主事,历官广东南韶 连兵备道。有《竹勿生诗钞》。

送张次珊通政归湖北

己听斯人去,时危当奈何。三年同白社,六月渡黄河。匹马关程远,惊蝉驿路多。 我魂招不得,合眼是兵戈。

南韶使者歌

填词作诗亦不恶,焉用聚铁铸大错。南韶使者旧台臣,迂性与时常枘凿。旅食京华三十年,鹓鸾队底藏孤鹤。踪迹看如水上萍,交游半似风中萚。而今已是白头翁,坐对疲氓意萧索。眼前书卷一秋檠,梦里溪山几芒屩。高谈欲吐觉心慵,良法思行苦才薄。皎皎圆蟾竹映窗,沈沈苦雨苔欺阁。生涯醉醒自无聊,世事苍黄吁可愕。鹿门深处近吾家,归与庞公行采药。

和江杏村侍御都门留别诗

闽粤东南地接连,写情还讬衍波笺。贾生毕竟能忧汉,乐毅何曾欲去燕。世事浮云 聊送眼,吾侪何日更随肩。都门帐饮车如水,脱手新诗万口传。

沪上晤朱古微侍郎张次珊通参

白社凋零老若何,贞元朝士更无多。五更残梦余疏点,一局枯棋值烂柯。怀药有人 居月殿,乘槎无路向天河。兰成萧瑟还词赋,百丈山头日已矬。

题翁文恭公家书遗札为孙师郑吏部作

韦平家世燕许笔,文采风流俱第一。临池洒翰自天性,精能上与颜杨匹。水镜衡才玉尺量,阴阴桃李在门墙。君称提瑟升堂者,我亦追随弟子行。蓬莱浪高引舟处,何期海畔生童桑。家书乃在岁丁丑,旧学甘盘资启牖。湖山收身早在念,淡泊岂落疏傅后。处人骨肉良大难,升沈有数非偶然。身后易名无溢美,此心皓月当中天。平生一掬羊昙泪,东城寂寞回车地。泰山流落只毫芒,后五百年弥珍贵。

安维峻

安维峻,字晓峰,秦安人。光绪庚辰进士,历官福建道监察御史。有《望云山房诗集》。

出大境门沿西沟行观元宝山用陶公还旧居韵

关柳已春色,出门何所归。行行见流水,呜咽鸣声悲。涓流岂无补,江河日以非。 愿言激清波,顾影亦孑遗。柳腰风前折,妩媚空依依。培塿无松柏,此理宜穷推。华风渐夷俗,吾道何其衰。知音念锺子,援琴为汝挥。

夕阳下山去,缓缓踏春归。欲赋王孙草,恐增游子悲。草亦报春晖,柰何人独非。 顾惟苍苍者,弃我竟如遗。霄汉不得上,一枝聊可依。器之真铁汉,谬为世所推。浮云蔽白 日,扫除力未衰。誓将缚大帚,为天效一挥。

次韵答锺愚公

兀自伤秋计已痴,百年世事一枰棋。祇应梅福称仙尉,谁道王敦是可儿。梦里狂言 犹草疏,春来转瞬即瓜时。天涯亦有濠梁客,话到忘机两不知。

王颂蔚

王颂蔚,号芾卿,又号蒿隐,长洲人。光绪庚辰进士,改庶吉士,历官户部郎中。 有《写礼庼遗著》。

病中蒙潘伯寅少宰饷群籍并示消夏六咏率成长歌跋于纸尾

长安六月积淫潦,键关卧病车罕过。欲藉古人起废疾,随身书卷携无多。伻来陈讯 走流汗,瑶华循诵颜先和。发函突兀见精椠,如遇卢扁疗沈疴。诸公衮衮富述作,津逮末学 犹江河。《消夏六咏》最奇崛,知君饕古穷羲娲。南皮张饮自矜许,邺中七子真幺麽。何如 锐精究篆古,取证经义功不磨。少宰斋中富藏弆,商周典物如星罗。抉扬土花发奇字,粟雨鬼哭群灵呵。吉金摹据良不易,康成误解凤尾娑。盉煮荐体本非镬,孙陆瞽说殊沿讹。希冯迺以盉为味,《玉篇》传后将谁詑。颉诵不作古文晦, 弫释为张池为沱。京洛冠盖掩群雅,崡穆虽博难同科。沙南片石释者鲜,安世默识论不颇。获奋字谊本洨长,钩据脱尽前人窠。隐侯见之必狂喜,可惜宿草归山阿。古印累累亦典贵,嬴刘爵号能缕覼。持此上补百官表,淹贯岂让扶风娥。咄哉彦远不识字,胡言斫玉藐毋驮。石斋遗砚失复得,流传墨妙由东坡。群儿但宝香姜瓦,狗脚邺焉足诃。世间神物各有数,汉百碑砚归烟萝。吴会藏书甲天下,绛云传是扬其波。佞宋主人最后起,爱书成癖犹金陀。一廛百宋悉善本,况有涧翁相切劘。越来溪边石鼓吼,南中旧椠灰兵戈。君家赐书本充栋,一朝化去如龙梭。方今粲晏右文学,明堂黼黻登雅歌。少宰遍窥中秘籍,论思扃禁吟羔紽。月廪悉以置篇简,古绨鼊首熏沈螺。推扬文史盍朋哉,躧履蹋残厅事莎。孤寒三百尽頫首,搜扬潜逸来槃邁。男儿性命在文字,一卷能寿非坎轲。牟首尽载士安序,传播奚止一刹那。走也浅学本肤受,石墨金薤空摩挲。观碑太学但自恨,鱮柳不辨成蹉跎。君今赠我宛委秘,贫儿暴富惭颜酡。惜我不寻比邻住,假观宝墨穷籀蝌。会当归去访林屋,禹书窃读惊蛟鼍。

东坡生日高碧湄刺史刘泖生司马招集傅星槎太守寓斋同杨见山丈叶鞠裳同年赋

风雪十日不放晴,城南裹迹年峥嵘。胜流走简辱蓬荜,招我来莅新诗盟。今年太岁建丙子,支干正协眉山生。酌取寒泉设嘉祀,选胜近就糜都兵。是时园中梅破萼,玉龙起舞笛吹落。主客忘形倒浊醪,酒香花气侵帘幕。恍疑身在小罗浮,醉起折枝酬玉局。公昔信宿来吴中,实惟甲寅之春癸丑冬。观镫曾和王规父,饮酒还过闾邱公。三瑞堂与虎邱寺,城西往往留雪鸿。可怜命宫坐磨蝎,九死孤臣海南谪。蛮唱黎歌客倦听,吴天回首渺何极。契顺远来询起居,十颂寒山慰岑寂。当年置酒赤壁矶,江上献寿豪情飞。紫裘王郎奏新弄,惊起乌鹊无枝依。八百卅年一弹指,笠屐丰神尚如此。泂酌亭上识遗像,须眉雅与陶庐似。清都道士径幽琳,与公生年同丙子。更有幕府老沈逵,飘泊广南穷不死。三人踪迹渺难详,皆以生年显骥尾。先辈风流赋乐神,良会自昔推绵津。后来冶城更继起,孙郎才调高绝伦。我吴坛坫久无主,题襟谁复联今雨。家家膢腊祀黄羊,不为髯翁荐芳醴。风雅主持赖寓贤,玉梅花下分朋笺。醉写松鹤为公寿,南飞一曲娱神弦。若准贾岛祭诗例,迟鸿最是呕心篇。下走深惭与雅集,围炉欢笑驱烟黑。但愿朋好不分张,白发年年作生日。

挽高碧湄刺史

逝水不亭壑,賈槁无还枝。年命嗒然谢,颜跖同所归。独兹赫赫名,不随秋草萎。翰墨有勋绩,政化有去思。硁硁高使君,挺秀西江麋。宅性固英亮,蕴才特环奇。豫章魁垒薮,易堂扬其蕤。近稍骛空诞,倜说无垠涯。系君媚古学,众籍勤讨治。故训师洨长,靡绮斥总持。钻玩日以久,下笔言纚纚。江山发奇藻,金石助伟辞。上者排屈宋,次亦体陶韦。斯道久堙暖,颠倒造化儿。高才坐磨蝎,殽讹黑与雌。谓当掞天庭,激昂青云姿。威凤一振翰,乃堕枳棘卑。文章满人口,焉救臣朔饥。故乡正沦莽,鼙鼓天南陲。归耕守妻子,荒山蕨不肥。长揖就幕府,感此国士知。决胜千里外,石画洞险夷。倚马文立就,辈流交嗟咨。晁采不终閟,神骏无久羁。遂以令仆才,枉屈理茧丝。随车澍甘雨,吴侬春熙熙。拔薤亿彊衙,破柱禽奸私。亮哉神明吏,诸曹不敢欺。敝俗假神鬼,荆巫而越禨。青溪蒋侯庙,云阳卯占襄阝祠。自从潜庵后,光景仍闪尸。君独奋廉■,秘祝殴妖尼。沈履与灶髻,山娶立时堕。汪汪太湖水,灌我千顷陂。葑茭渐堙塞,撩浅伊谁施。吴西十万井,叹暵惊坼龟。惟君 轸民隐,沟洫书勤披。露冕涉坰晦,纡筹疏瀹宜。周览地形势,脱略官威仪。畚臿及时奋,

双流酾以厮。郑白永利赖,甿衣之食之。功德在苍赤,岂少遗爱碑。独不悦大姓,彊项难逶迤。修篠有劲节,幽兰无俗辉。退食理琴啸,倒著白接。二三岁寒友,步犀相追随。闭关或颂酒,联辔惟为诗。浮云空得失,众煦徒尔为。嗟君不偶俗,过严渑与淄。平生青白眼,何能悦蚩蚩。天亦忌才隽,张角丛嵚巘。一官且未达,胡乃朝露晞。伊余江上,舟行彭郎矶。远眺双石钟,孤烟入翠微。羡君家山好,只合卧荆扉。岂料黄独在,杜陵归无期。今夏予遄返,尝一过君。手摇蒲葵扇,剧谈风生颐。座有傅鹑觚,合并喜一时。何图素心契,从此长别离。天涯传噩耗,闻之骇且疑。卧病阅几日,服药凡几剂。奄忽如此遽,是否误庸医。君负七尺表,落落长松搘。赋质极纯固,理当登梨眉。云何不半百,中道崇虚鬼夔。君弟吏秦陇,能声隆隆驰。惊闻鄂跗折,能勿摧心脾。君有二藐孤,少者才胜衣。父书信能读,门户未易支。想君属纩辰,神识亮勿衰。兴言念贻厥,泪下当如縻。一廛寄吾吴,鹪鹩枝可依。曾楼高切云,中庋千书瓻。日夕板床坐,渊渊闻唔咿。君委恒幹去,魂魄当乐斯。蛹死有遗茧,龙化仍留漦。一编《志微录》。香草规湘累。风旨极深隐,字字吟《五噫》。畴昔孝标逝,君为理箧遗。礼堂幸未轶,古谊良所稀。今君甫写定,后死更责谁。贱子困行役,侧身涕涟洏。年年赋《伤逝》,奚止黄垆悲。恨无拚飞翼,絮酒荐君帷。远念腹痛语,泚笔哀江蓠。

书伯兰员外诗集后

才身然天乐韵韶茎,威凤丹山羽夙成。帝室雅才刘子政,郎宫俊望柳耆卿。江山奇 气归吟笔,丝竹中年写至情。话到东阿旧俦侣,端居每感绿苔生。

袁磢秋主政枉诗见赠次韵答之并效其体

高三十五今宿草,畴昔屡道袁生奇。薢茩学人適我愿,俶傥诗史非君谁。抢枋奚恤 鸴鸠笑,栖棘祇怜鸾凤姿。正赖使图订方国,漫将海枣斥安期。

题徐昭法山水

乙酉春阅海王肆,此帧弃置墙壁间。蠹蝇玷识者少,购之三百青铜钱。拂拭锦贉露奇秀,平远如见江南山。昭法先生昔飞遯,弱冠早赋《招隐》篇。布衣草履绝城市,涧上上沙诛一廛。终身不受安邑馈,日高往往无{炊鬲}烟。潜庵慕道屏车骑,末由一睹园绮颜。俗流好事幻赝鼎,谓曾造厀相周旋。骨董之羹不足道,独惜轻石为贞玉坚。作此画时岁癸酉,是为康熙卅二年。不署元号题甲子,柴桑思晋心皦然。先生时年七十二,慭遗一老应华颠。越岁甲戌便委蜕,遗人间世登上仙。我因重续图经记,十年前曾寓渎川。闲随巾拂拜祠下,寒泉秋菊歌神弦。涧户无人夕阳静,时有白鹤飞上天。水流绕屋岩花笑,但闻琴筑鸣涓涓。于今聊浪万人海,青山不到轩窗前。芝讪鹤怨良自愧,衣化为缁何能湔。秋风起兮我当去,扁舟采莼西磵边。

丁松生文澜归书图

孝惠始除挟书律,屋壁山岩稍稍出。是时篇牍极重大,联以缥绳书以漆。《孝经》行疏策谦半,《酒诰》文繁简脱一。蜀客奏赋铅须怀,吴人炙字青乃杀。代以缣素便赍持,书之赫蹄致缜密。自是篇卷鲜沦芜,荀经阮录代增益。观文实储五十副,江陵尚存七万帙。长兴雕印既弓藿舆,孟蜀书林更牣溢。官本监本绣梓精,晁氏陈氏簿录悉。勤有堂惟仁仲遗,睦亲铺乃道人设。金于平水置书肆,元之兴文务雕刷。有明一代鲜善本,嘉隆以后椠尤劣。

秦晋赵藩皆刻书,不及会通与兰雪。姚赵吴沈好遂写,叶顾钱毛善鉴别。宋元旧本什湮九,赖有诸贤订坠缺。我朝稽古轶汉唐,延阁尊藏切云楶。纯庙特开献书路,谒者求遍东西浙。大舟行刬除方兴伪,汲冢捃护师春逸。序录校上义放刘,活版排成制沿毕。草茅未窥中秘书,三阁储珍逮英哲。家家乐献鸡次典,人人许入龙威穴。然脂怀饼土腐来,从此儒风振扬越。上者古训钩郑服,次亦骚情掩贾屈。余子龂龂讲版本,元钞宋椠森罗列。振绮汪暨拜经吴,百宋一廛最奇崛。云何菑晚极庚辛,焚如毒甚滈池厄。岂独缣素充帷囊,直以经典代薪爇。湘乡相公老开府,手扫凶欃扶日月。郘亭厄厄求遗书,四部先刊甲与乙。同时爰有丁龙泓,秘阁篇亡心菀结。抱持愈比杜林艰,蒐集无逾任昉切。礼典往往出秦余,目录一一订魏阙。珪零锦断好护持,剑合珠还渐充实。其功不在陈农下,此事留待程俱说。永嘉旧本世尚多,安得先生尽搴撷。迩来横海肆楼船,汉廷未暇修儒术。颇闻守藏史不慎,文德官书半放失。子云老作輶轩语,素赍归致并精绝。海外不乏歆向流,赤轴青纸肆钩抉。我思拄杖医无闾,一探东丹读书室。

送黄公度随使欧洲

广南古奥区,魁奇所丛育。我友黄长睿,负才尤绝俗。劬古得谟觞,讨今图畿服。十上不得志,神驹耻{走录}{走足}。爰作汗漫游,西行指柳縠。在昔辽大石,曾收印都族。元祖见角端,亦著《亲征录》。两朝逞兵棱,皆至海西曲。沈何号方闻,迄未定员幅。烦君亟考实,归来共扬推。大典图书渊,渔猎资来学。岁久渐沦芜,往往山岩伏。颇闻伦敦城,稿尚盈两屋。愿君勤搜访,寄我采遗目。宣庙昔季年,海氛始渐张。烟禁既大弛,五口遂通商。埔头日以辟,遍地班兰裳。迩来设海部,相率谈自彊。既购克虏炮,复置毛瑟枪。峨峨钢铁甲,靡千亿佛郎。利器不善用,適以赍盗粮。金钱日外溢,卮漏未渠央。生民剥膏血,坐是羸且尫。小夫骛执利,狗态而憋肠。器必尚服匿,食以罗湩浆。舌人语粗解,著论已汪洋。邹衍书未读,便欲非三王。藉此弋声誉,取爵如烂羊。可怜好家居,都被纤儿撞。望君作砥柱,努力事修攘。管子权轻重,商务即滥觞。墨子著经说,起重理已详。礼失求诸野,制夷师夷长。要令重九译,事我皇哉唐。

王兰

王兰,字醉香,归安人。光绪庚辰进士,官户部主事。

过东塾陈先生故居

百年不可待,当代失人师。检点遗书在,徒令从死悲。式闾应有礼,讲学可无祠。 宗派殊纷纠,中流更付谁。

庞鸿书

庞鸿书,字劬庵,号郦亭,常熟人。光绪庚辰进士,改庶吉士,授编修,官至贵州 巡抚。有《归田吟稿》。

双银杏歌

霜林脱尽长风劲,老幹凌空势特横。从祠野岸俯寒潮,对立隐然君子正。或云平仲

乃古名,叶如鸭脚森高擎。肌理细密类文木,雕镌裁制最中程。仰观有如双阙列,巨可蔽牛坚多节。肤皴石骨旁生瘦,枝蟠篆势力屈铁。千年灵根逃斧柯,盘郁不啻藏岩阿。若非里社耆年慎护惜,定烦双忠灵爽为捴呵。松禅作图下笔迅,咫尺俨如耸百仞。寒林讵必仿李成,枯树应知伤庾信。我来摩挲坐树侧,重披斯图三叹息。图今兴树屹相向,乔木依然令人轼。君不见梁时七桧析作薪,星坛荒秽丛荆榛。又不见红豆山庄化尘坌,野田孤榦无人问。独留此树依寒塘,两虬挺角立不僵。栎社未邀匠石顾,岂有黄鹄来翱翔。亦知材大古难用,磊砢犹应为世重。小山之招在何许,更拟作亭效楚颂。举杯相酹仍留连,回看林杪生暮烟。息盦髯叟诗在手,我欲和之写向石之右。

周梦坡得贝叶梵文无量寿经将施诸西湖灵峰寺法藏书来徵诗

兰台漆书成劫烬,竹简徒闻发汲郡。大秦羊皮韧而泽,海外流传亦已仅。祇园之树森贝多,诸佛成道尝摩挲。异种来从阿耨达,高柯不减必钵罗。写经功德虔释子,彼方初未有侧理。传橅梵本礼牟尼,芦为不律叶为纸。华严字母义蕴深,宛转能该一切音。写成诵习话忒语,海潮音遍旃檀林。灵文次第来中土,繙经台开互编组。流支罗什各润色,诸家定本或异诂。初祖西来辟上乘,埽除文字说传镫。竞依高座证密谛,谁向珠林溯结绳。梦坡居士今摩诘,雅爱聪琴与殊蜜。驻足时闻檐葡香,宝盖飞来照丈室。忽从异域得元殊,不啻汉史藏壶卢。秘箧携来有耶舍,真诠译出须昙谟。灵峰连麓呼猿洞,梅花弹彻听三弄。护持大藏庋高阁,珍斯梵夹荐法供。金牛湖上参金仙,宝光应烛兜率天。山中老宿慎保守,好与龙泓补旧缘。

和城南渔隐送春诗

陈宫玉树倏歌残,怕见飞花阵作团。满院阴浓谁是主,一池波皱讵无干。频将风信 从头数,漫与星娥冷眼看。稚筍篱根勤护惜,犹应日日报平安。

吴兴刘翰贻以新刊雪桥诗话寄赠作此答谢

《河岳英灵》炳日星,百年坛坫有遗型。鸡林声价谁重问,收拾都归野史亭。

黄绍箕

黄绍箕,字仲弢,号鲜菴,瑞安人。光绪庚辰进士,改庶吉士,授编修,历官湖北 提学使。有《鲜菴遗稿》。

题王幼霞秋暮怀人图图为某君寄江总栖霞寺断碑作

凉蟾窥户天雨霜,草木黄落雁南翔。所思远道不可见,何以遗我球琳琅。南朝令仆 儿戏耳,文字翩翩差可喜。缺碑盘木昔所嗟,丹青不渝今复尔。忆昨将车锺阜侧,过江名士 多于鲫。酒酣说剑无留行,念君纵横埽破墨。严飙飒飒违清尊,芰荷落尽风漪痕。青山一发 江南路,我亦凄神虞道园。

题黄山谷三游洞题名

涪翁西行五十一, 我今五十学随缘。风中鸿雁重来集, 过眼江山九百年。

万镞离弦韵有余,鹤铭雁塔势萦纡。此行人与书俱老,悟入长年打桨初。

岩岫新奇未赋诗,重扃秉烛有微思。散花一著终成累,寄语人天共护持。

题欧阳公三游洞题名

彝陵山水奇,入峡此东道。千峰缭翠壁,划然发天巧。元白苏黄陆,行旅有述造。 千载山主人,卓荦余文藻。放翁昔搜寻,泐缺知已早。拂尘惊乍见,欢若墨未燥。石粗故易 剥,穴黑得常保。公昔奉母来,江乡足鱼稻。县楼日对山,覃揅职方考。嘲弄时间作,吏牍 杂诗稿。想当清秋初,溯川消积潦。石乳凝云扁,岩蔬照晴昊。判官夙同调,缘险恣幽讨。 淋漓修史笔,悬壁偶一埽。引绳无欹斜,濡豪绝瘠槁。乃知大贤心,精气常在抱。令君无结 衔,庭趋宁足恼。公视官如家,视民如襁褓。追俗玩岁月,自分桐乡老。岂知屡起蹶,入汴 鬓已皓。梦中渡横查,苦忆山县好。东山有题咏,汉庙闻祈祷。遗文犹在诵,贞石翳荒草。 寥寥残字在,永为兹山宝。

缦庵合装欧黄题名悬斋壁并题一诗即以为别

庐陵少孤贫不忧,登朝一节论千秋。波中金石仰看物,著书不足来寻幽。维摩老子稍后进,文章不同有心印。书骨权奇如其人,未得书碑聊自运。二公气立万物表,白傅西来恨太早。中间题壁有苏公,作诗父子三人同。苏公兄弟晚飘泊,壁诗磨灭无由踪。尹余继去众已骇,元祐党碑满天下。平生师友如云龙,万事升沈付埃马。欧公有母黄有兄,至乐天与谁能伤。但说山川蒙藻缋,岂知点画含风霜。缦庵缦庵来惜别,吾家风义足可惜。公家事了栽红梨,烹茶读书且面壁。

题林文忠日记

撮土湮河计已疏, 邵阳平议意何如。玉堂风日清闲甚, 颇擅当时院体书。

题陶斋所藏秦权

秦廿六年并天下,刻辞金石壹华夏。万事如画明无疑,咸阳宫中鹿化马。百斤量衡书中程,千石铸锯金销兵。此权当时在何许,玉府和钧傥有名。尚书耆奇勤考释,藏权凡七此盈石。隗林隗状知谁何,太息摩挲相斯迹。

题李文石太守明湖秋泛图

岱阴逶迤截济渎,骨走鹊华才一束。涌泉望海无由趋,万斛珠玑落鼎腹。大明寺杳 楸桐高,历下亭存荷蓼馥。我侍轺传三春风,坐卧湖漘饮山渌。晴岚摩空起南障,时木翟波心拾苍玉。远怀济南名士多,于鳞贻上不可复。柳零一遂寒燕归,憔悴烟条为君绿。红螺公子昔妙年,天藻秀出乾嘉前。暂依芙蓉泛绿水,繁会竽瑟张琼筵。青帘白舫到秋晚,往往醉笔同春妍。海棠泮边旧埽石,牛铎安得黄钟联。不惜我归遽,不惜君来暮,但惜湖山明丽无处无,倏忽转蓬云何住。廿年交臂鬓头霜,同照黄河浊流处。披寻游迹堕渺茫,何况白雪夫

于翳荒树。我家瓯海君辽河,风云变态朝昏多。巫闾雁荡倚天望,念此坐损朱颜酡。即看图中歌舞意,绛唇玉貌今柰何。但说净地如明镜,焉知新水非故波。波流自转心自定,人浊何由我独净。要回众生大海光,与君共適濠梁性。浩然东顾发长讴,他日临流须一证。

留别编书局同人

少作雕虫悔已多,九流晚出各殊科。微言大义愁乖绝,旧学新知赖切磋。黄帝教来 乌拉岭,素王书过斡难河。镕模采算劳甄录,江上精卢眼细摩。

留别译学馆同事诸君

结想无穷力不任,住思避席去沾襟。倚兰傍玉愁非质,叩角鸣宫感合音。风暖渐扶 荷出水,露浓刚护柳成阴。汉江夜夜婵娟月,长照佳人万里心。

留别译学馆诸生

仍岁公宫左,相将望玉绳。范金空有愿,攻错愧无能。浩劫三弹指,良医九折肱。 忧时与惜别,此意泪难胜。

象胥周谕说, 輶使汉方言。官失才难就, 时穷学愈尊。崚嶒怜岁月, 辛苦拄乾坤。 老病沧江去, 相期答圣恩。

迁居学署答梁节庵同年

一笑相逢念九春,惊看万事逐年新。定巢画阁分邻燕,入梦香炉识殿麟。岁月峥嵘容暂合,乾坤荡莽老逾亲。病中种树从君学,留待成阴付后人。

过卢生祠作

河朔英宗妙少年,津梁未倦遂超然。《霓裳》法曲《升仙颂》,虚拟《凌云》亦可怜。

王咏霓

王咏霓, 字子裳, 黄岩人。光绪庚辰进士, 历官凤阳知府。有《函雅堂集》。

会向

会向湖山走马来,侧身高望一衔杯。销沈龙虎余王气,莽荡乾坤忆霸才。百代衣冠空梓橡,千春金■出蒿莱。昨宵倚枕秋风急,梦入华胥又放回。

送高仪卿广文归海昌

广文先生老讲画,白首翻然怀故乡。书学逼真韩礼器,清时无恙鲁灵光。吟鞭稳遣 儿曹执,饯榼犹多弟子行。向后支筇畅游览,盐官春发万花塘。 邓嘉纯

邓嘉纯,字笏臣,江宁人。光绪庚辰进士,历官处州知府。

山行即事

洒镫吟鞭及早秋,山中景物剧清幽。沤麻村落水当户,种菊人家霜满楼。崖树倒悬 牛砺角,溪鳞潜动鹭低头。据鞍顾盼忘饥渴,一味清凉散客愁。

西师

陇右仍烽燧,关中倏犬羊。颇思萧相国,愿觀郭汾阳。道远军储竭,风颠大树僵。 愁看日落处,尘雾混微茫。

题画

瓜皮艇子系江干,江水茫茫江月寒。人与沙鸥齐睡熟,芦花偷上钓鱼竿。

袁鹏图

袁鹏图,字海帆,天台人。光绪庚辰进士,改庶吉士,授建安知县。有《袁太史遗诗》。

送友人南旋

数然声价出江东,力守经师继汉风。香国奇才如子少,天涯涕泪几人同。自惭待诏金门侧,常共深谈漆室中。朝野恬熙吾辈老,凭谁上策定和戎。

毛澂

毛澂,字叔云,仁寿人。光绪庚辰进士,改庶吉士,授滕县知县。有《稚澥诗集》。

扬州文汇阁四库全书残叶歌

纯皇郅治深宫闲,羽陵蠹简高于山。飞仙卷幔帐殿启,衮衣步坐开天颜。亲御丹毫加点勘,漏箭将终月西暗。翻然{世梨}火照人间,欲网珊瑚归铁缆。荒林破冢夜有光,东壁射地寒生芒。大开虎观购遗佚,九州岳牧皆奔忙。诸儒校纂目睛丧,直拓殿庭排缥缃。侍书内史跪进膳,玉觥满饫蒲萄浆。序录初成屡召见,跽聆褒贬提宏纲。字字曾过圣人手,每逢子午生天香。更怜禁篽人罕至,特贮行宫及山寺。此事古无今始闻,万手丛钞衍巾笥。老龙借读亦解嘲,五更攫取乘风涛。苍崖很石爪痕裂,琅函半惹腥涎胶。转眼邗沟烽火急,按籍徵名百亡十。金山楼阁烧成灰,西湖弃纸无人拾。一编乍展先呜悒,段段银光布纹涩。摩挲想见乾隆日,《崇文总目》那能及。墙隈短檠秋雨湿,空山回首飞云立。腐儒寒饿何能为,独抱残经草间泣。

万寿阁对月望岳

春月升首阳,照见希夷宅。清光满关中,不与大河隔。三峰吐灵气,缥缈越终夕。仙掌金风寒,凉露下流腋。谁倾东海水,洗此月上石。竹柏茎稀微,淡墨绘虚白。丹房发椒光,岩畔大星赤。短松如老翁,散发苍龙脊。仿佛玉女鬟,香云起盆坼。欲归顾我影,我影布瑶席。钟声忽飘堕,无人半天碧。

渡海

夜上碣石门,青气如{^一登}悬。扬舲出浦口,沙草黄无边。鬲曾山望孤峤,歧海侵秋田耎。朱*火敛烛锦汭,绿烟冒盐田。地高树犹见,*阝 厓隐波始圆。去鸟识辽水,落日知吴天。冶冰紫琼冷,阴火丹渠然。文螺化鹦鹉,彩蚌嫣蝉蜎。拾月恶溪咏,阻风春草篇。无为效安石,酣畅催言旋。

簸却蓬莱山,填取碧圆海。玉沙清浅流,种桑应好在。传闻祖洲上,琼田收十倍。 菰苗如翠眉,旭露发红彩。褰裳不肯去,祖龙老应悔。苍苔鞭石桥,沈波卧千载。白日那可驻,青春向谁买。壶顶芝正肥,迟回欲何待。

舟轧水底天,笑指石上月。玉珧照珠池,虫去华被银阙。鹏骞四溟翻,鳌抃五岳没。 纵任无远近,凭虚得超越。傥遂凌朱崖,何由炼金骨。甘英度西海,终童下南粤。壮游恐不 遂,江晚蕙芳歇。峨眉归读书,青山未华发。

轩辕

轩辕宫殿玉山西,瑶水曾巡八马蹄。万国爻闾王会少,七雄裨海霸图低。从知斗蚌 无生鹬,须识连鸡有骇犀。日入虞渊天所覆,不应空恃一丸泥。

泊宜昌

江上荒城长绿苔,二千年事去难回。风前楚火兼星乱,云外巴船带月来。乡信更无 寒雁寄,吟声空和暮猿哀。洛阳才子头今白,不到长沙意已灰。

四时主祠望海

阿房宫殿久成灰,犹剩沧溟百尺台。立石可能天作柱,凭栏方信海如杯。烟云忽拥 秦桥出,风雨愁移越冢来。杨仆楼船无一在,九重空想伏波才。

穆屯将歌

将军养士如养獒,发纵指嗾追烟{风寿}。鱼肠刷土松纹膏,白羽朱肉啼哀猱。石头城下跳重濠,黔西猛兽纷腾逃。红勒盘雕蕃锦袍,团花渍血铁不挠。凭轼大呼风怒号,竖发上指星生毛。腰间淡淡流秋涛,马蹄四举空中高。近不见人惟见刀,磨盾刮甲声嗷嘈。冤霜一夜零蓬蒿,旂常日月无勋劳。国士坐法缘连敖,符鸠哑哑悲云旄。陆剸犀兕水断鳌,兜鍪

貂蝉荣汝曹。

峨眉县

古槐夹道小邮亭,蜡树平田岁暮青。水色过清知雪化,土膏微冷带云腥。农分供石 争山界,僧送春茶入县庭。只有中峨看不足,乍如眉影乍如屏。

登峨眉

岷南土色赤,返照万峰濯。金焰出火出,槎桠歧鹿角。今夕尚在平,不寐听仙乐。 山影墨头上,天倒压屋桷。推窗看西岭,林木远如幄。月落未落时,紫翠眩斑剥。三峨荡云 海,波心一锥卓。光怪悸我魂,夜寒梦游岳。

斜径出林薄,弯弓彀飞桥。黑白二蛟舞,对戏千珠跳。风漪细皮皱,触首朱栏摇。 迅雷转万壑,乱石鸣《箫韶》。楚狂洗耳听,五夜回松涛。凤兮作歌去,华严山月高。

独行天门口,手掠太白脚。山下暝已深,山上日犹落。何时辟空境,凭虚造楼阁。俯视不见地,积气浩漠漠。人语烟中流,头上孰骑鹤。雾消瞰葱岭,青天插霜锷。昆仑伏槛外,墨浪尽东跃。兹游冠平生,论功策芒屩。

振衣蹑金顶, 扪天陷深碧。独寻黄帝炉, 烂醉五色石。知与人境隔, 今夕识何夕。 夜半误打钟, 惊落星满席。下床踏珠斗, 拾得半规壁。梦中游化城, 醒后了无迹。他日乘云 来, 谁此网乔舄。

趋下大峨石,再过桫椤坪。来时险绝处,重到路欲平。风泉洒珠玉,就枕神魂清。 孙翁古铜罐,量药手自烹。涧篠及崖杉,火发寒琴鸣。雷威披褐裘,雪中听松声。空山灭人 迹,知君何处行。

蓐食访九老,直入地底天。秉烛暗有声,策策霜叶燃。竹下见虎迹,苔上闻龙涎。 白云涨幽谷,小语万窍传。老僧不识日,黑影坐一砖。琼户莫敢撞,或恐惊诸仙。阴河沧海 通,何年撑铁船。鸡鸣化为石,洞口迷寒烟。

石上看日落,赤盆烂诡晖。檐前抚冰柱,白玉大十围。著屐草际路,荷杖林中扉。 露下鹊初警,月明僧正归。天风翦鲛绡,瀑挂织玉机。银汉水气凉,暑月侵我衣。想像凤鸾 舞,鹅笙吹翠微。仙童化青鸟,飘然云际飞。

澄碧古潭渺,落木号西崖。龙子三寸余,头角藏风雷。海水缩归钵,养此千岁孩。 铁销南极垂,石扇中天开。琼楼十日出,花发金银台。玉女千余人,飘飖凌九垓。云璈辍灵 响,贻我镂霞杯。蹑烟笑相语,汉武非仙才。

石景山有感

昆明湖上晚烟苍,讲武当年此校场。霜叶高翻黄屋纛,雨莎平卧绿沈枪。蜺旌不复 从天下,虎帐谁亲近日旁。六十年间秋草净,臂鹰老校晒斜阳。 舟晓

孤舟寒雨泊荒城,风定滩低报远更。二十五声秋点尽,沙头人语未天明。

季澥专使回卻寄

与尔当时事醉翁,岂知今日独飘蓬。柴关听雪三年后,石壁看云九月中。鱼洞水来山更绿,龟亭岚破菊初红。扁舟不得同游赏,肠断江楼一笛风。

梦归

羽衣飞过大河流,下瞰陈仓旧酒楼。华岳空青钟半夜,剑门深碧月中秋。峡雪香散 三千里,峨雪光寒四百州。鹤背何人坐吹笛,相逢笑语锦城头。

日观峰

封中玉暖日生烟,缥缈无双拄杖前。远翠数峰三岛出,空青一气九州圆。何当过海 云如地,径欲乘风石作船。虮虱小臣头已白,夜坛枣脯学祈年。

超然台独饮

我官于东不记岁,胸中蟠郁生之而。幸辞奔走得闲旷,如脱桎梏离鞭笞。入境喜见 麦苗秀,春风先已苏疮痍。书声遍野讼牍少,天哀老拙真相宜。郑淇城郭好图画,门阑处处 苏家诗。山堂怪石散民舍,西园马厩颓无遗。超然高台独无恙,海山万叠青须眉。厨传虽空 似当日,亦有杞菊疗吾饥。况闻市舶百里外,吴莼越酱香流匙。鼠姑茧栗石首上,桃花红落 银刀肥。沙中笔管岩下月,清腴不减西家施。先生旧云本为口,摸金校尉宁非痴。无毁无誉 我所愿,不烹不封聊尔为。且学杜门饮美酒,醉后登台来读碑。

顾莲

顾莲,字香远,号复斋,江苏华亭人。光绪庚辰进士,改庶吉士,授梁山知县。有《素心 集》。

醉后述怀

露冷霜高起暮碪,六张五角费沈吟。春蚕自缚全身茧,秋雁终存万里心。可奈红墙凉汉迥,谁怜翠袖晓寒侵。年来亦有消愁处,镫在檠时酒乍斟。

杨依斗

杨依斗,字晓亭,衡山人。光绪庚辰进士,官兰山知县。有《晓亭集》。

慰子捷时主讲琅琊书院

杯水消容横海鳞, 牢愁强半付诗人。东风枉屈金闺彦, 皓雪宜烧石冻春。明复声名 从此大, 文中生计未全贫。岁华好在天犹近, 且向寰中著此身。

【卷一百七十三】

李慈铭

李慈铭,原名模,字{无心}伯,一字莼客,晚号越缦,会稽人。光绪庚辰进士,历官山西道监察御史。有《白华绛柎阁诗集》。

癸丑除夕

元化日流行,人事迺尘积。得失随鸡虫,一瞬判今昔。芳华转诘朝,岁事谢兹夕。 万物欣怀新,残年孰知惜。睒睒东方明,移眴便陈迹。老尽今古人,悚念百灵集。

人生会有极, 抗志希古贤。道高玩其迹, 文字堪钻研。兀坐叩真得, 百家一无专。薄植仰乔木, 弱羽委逝川。岂不慕崇远, 颓废难自坚。弹指积前日, 强半成愒延。且作堕地思, 学语始明年。

堂前陈枣栗,焚香展先容。坠霜无返晨,惊水无回风。孤露遘家酷,一星将告终。 《诗》《书》藐先训,尤悔丛厥躬。今辰拜阶下,胜衣异儿童。仿佛趋庭时,惧责心忡忡。 仰首见遗挂,欲就将何从。烛花散影堂,还照莱衣红。

欢笑启家宴,明镫亦煌煌。中闱坐慈母,弟妹侍两旁。两弟亦娶妇,侧坐竞奉觞。 甘旨未取办,屠苏且分尝。家人如列星,熠燿粲成行。我母有如月,团栾罗众芒。人生重侍 奉,此乐殊未央。愿唱百年歌,四海常安康。

爆竹声咽阗,念我平生友。祭诗孰狂歌,避债孰低首。推解乏货财,事畜迫奔走。 凤凰下觅食,琅玕实无有。麒麟代车牛,牧竖{厂干}其丑。自好物所憎,时艰道堪守。及兹 岁寒时,寸阴各毋负。读书在固穷,作事必要久。素心怀好音,立言务忠厚。

薄海苦多事,连年勤师征。渔阳国根本,贱骑犹纵横。杀气连晋齐,重阴薄日精。 江淮迫岁暮,萧条无人行。君王正宵旰,我忧耿难平。流民鲜伏腊,何以纾皇情。日夕望星 次,行当扫欃枪。旭旦启阊阖,万户皆春声。

早至平水谿口登岸意行三四里至显圣寺不入

清梦忽然碎,溪喧满孤枕。推篷绿打头,乱堕松竹影。及兹朝气爽,行渡石桥近。湿雾吹濛濛,山意犹未醒。细路春泥明,密篝曙烟隐。莺啼茅屋幽,犊卧露花冷。缘钟时见僧,到寺一水静。

潘星斋丈为予缋湖塘村居图用晓游天王寺韵题诗见赠叠韵奉谢

结念栖隐乡,环流面寒麓。凌晨理幽榜,人语出清旭。群鬟互湿翠,临谿各为沐。 钓竿带烟萝,茶臼答风竹。卷帘交清晖,书帙映人绿。烦公营粉本,茅堂启湖渌。画图幸取 办,鱼鸟先约束。相期采金英,鹿蹊踏松粟。

初冬携舟至平水谿口由望仙桥入宝严寺夜宿澄公房

扁舟出东郭,沿缘耶谿间。水尽白云起,遂入云门山。红树叠青嶂,明妆耀螺鬟。远近含层霞,深浅分寒烟。峰陡势欲落,飞翠忽复连。曲涧荫幽篠,鱼鸟媚我前。时逢采樵侣,踏叶相往还。山回寺门出,夕阳终古间。

云门外六院,兹地据丹麓。入门仍见山,古藓一庭绿。松阴飐双幡,经坛散炉馥。 龛石栖寒花,厨烟出深竹。颇忆湛然师,尘锡参道俗。先贤习元悟,往往寄高躅。禅房留定 云,蒲褐此间宿。茶火伴夜深,山志静可读。天风摇殿铃,时闻暗泉续。

京邸冬夜读书

昨日中旨下,率钱修离宫。读诏私太息,此举宜从容。圣人秉纯孝,不暇权始终。 长乐楼百尺,积庆花千重。取足天下养,承欢良无穷。四海幸平台,物力犹未充。岛夷怙群 丑,鼾睡长安中。诚宜法文景,励治威诸戎。安可舍禁钥,危照甘泉烽。台疏閒一上,未得 回宸衷。贤傅造辟言,主德本至聪。岂不念民瘼,何难罢新丰。事关国根本,连章期诸公。 冗官未食禄,涕泪徒沾胸。伏阙讵可效,草奏谁为通。负此读书力,仅争章句功。漆室夜深 讥,四顾无予同。

夜梦归故园作

夜来何所梦,梦归故山庐。山阴西郭外,聚族横河居。宅后十顷地,旁临官渎湖。 竹圃各自辟,袤延半里余。家家有高楼,朱翠相萦纡。吾宅割半亩,面城开里闾。后有楼五 间,青苔黯金铺。时节偶一登,凭阑俯佃渔。湖光收不尽,平野连茭蒲。乱帆过如叶,鼓枻 时相呼。鸬鹚排艇列,惊飞趁鸥凫。柴罧忽中断,间以红芙蕖。此境常在目,久旅徒长吁。 一旦落吾手,指点真画图。青山列眉际,天光在衣裾。左右挹明镜,琉璃纳窗虚。七日傥不 醒,何必游华胥。

读明史卢象升传

有明季年党祸亟,朝廷甚于河北贼。国有贤者孙与卢,权奸所忌陷之敌。忠定勤劳擅边事,忠烈桓桓众尤恃。书生三十临元戎,文武七州得专制。雷公白骑一蹶僵,掎隅逸贼贼复张。骁将横刀跃马返,头颅一颗高迎祥。彼哉亨九亦持戉,公伟常为义真屈。指踪狝薙清中原,边吹神兵蹋墙入。十烽连报阴山破,急移韦虎当关卧。宣云屹屹长城孤,东南群盗酌酒贺。黄麾下瞰甘泉宫,墨绖仓皇对殿中。九重不怿要人怨,尽收貔虎归军容。五千见卒奋弮出,大评决战贾庄驿。铁骠四蹙烟尘昏,槊折尸僵满袍血。縗麻衬甲靴藏刀,舐面风前恸故僚。一死君亲名义尽,两河人鬼哭声高。百计诬降结中竖,部曲伤残责对簿。戴就烧鋘

狱不移,马严连索君犹怒。枢臣亦是功名流,争功乃与公为仇。上方赐剑不汝齿,明年送汝 襄王头。呜呼高阳继死漳州虏,城社凄凉散狐鼠。谁遣中流自坏船,至今泪湿思陵土。

寓山四负堂谒祁忠惠公像

鸣呼忠惠天人姿,门第高华文采奇。二十登科作司李,蛮陬猾吏无能欺。报最俄膺谏垣擢,惠文脑后尤岳岳。鸳湖选郎手障天,一疏披云折其角。三吴地大多彊家,白昼击鼓惊吏衙。绣衣少年美如玉,骢马一出人无哗。中台入长十三道,逆党汗流观谏草。仓皇请急归倚庐,四负名堂待终老。南都草创吴民骄,公还持斧锄其豪。三弊上言仅报可,擢公开府苏台高。扬州镇帅本名贼,花门大纵南塘出。骎骎略地窥丹杨,公檄要盟克以日。大江鼓浪高崔嵬,传呼单舸中丞来。通侯跽接健儿拜,辕门酾酒讙如雷。奄儿翻案水火急,副相出都国人泣。弹章并列三贤名,师弟相随返乡邑。同文狱起城社倾,兴朝帝子安车迎。殉国义同高刘死,观时耻逐姜商生。一泓清绝寓园水,角巾屹然水中止。讲学同源幸得人,柳桥携手王元趾。画江犹子更从戎,巢覆狐儿缧绁同。故宅幸留施舍后,藏书散尽乱离中。承平回首闲居福,月榭风亭看不足。夫妇清闺品画诗,弟兄别墅从丝竹。梦醒人世已沧桑,终古山川对影堂。青袍尚志孤臣痛,黄帛长分攵御府香。园名记在谁能续,平泉花石邻家鬻。客过还凭础认亭,僧贫只缚篱为屋。野菊寒泉荐一尊,魏庄耕稼几人存。当筵莫奏湘累曲,我亦公家七叶孙。

会龙桥歌

慧日阁深抚帝坐,相公馆客访奇货。两龙浴水来夹舟,保长惊呼贵人卧。雷奔电睒导客行,仙源庆牒稽图名。帖报新恩得龙子,万岁巷里愁琴声。一龙飞腾上天去,烛影赭袍挟临御。可怜折断双晶莲,墀下殿岩捽头舞。一龙朱邸开会稽,投怀再见雏龙飞。嗣皇庆寿分攵金扇,隆国承封曳玉衣。五十年来六更毕,大龙枯颅琢饕餮。白头青盖牵羊行,绕柱龙孙拜番佛。镂簟珠襦散不收,霅川碧血几经秋。谁知龙輴千官卫,不及西谿土一抔。当时戚里承恩泽,卫王鲁国同朝列。不堪潜邸问虹桥,留与桓谿夸昔隹楔。迎恩门外夕阳斜,终古桥痕漾采霞。渔童打桨入东浦,指点荒村保长家。

柯山红树行

故人家在柯山曲,门外谿流转寒绿。板桥一抹长林西,尽日烟霞看不足。山深几日生秋风,树色尽作胭脂红。斜阳隔山渲金碧,画屏惨淡开天工。平昔看山爱秋晏,写入吴纨白团扇。画中佳赏谁最同,浊酒扁舟载王翰。寻君摇指松扉开,破帽风前笑相见。第五桥边诗思多,林阴席地共婆娑。年年好景常如此,放眼湖山一醉歌。远水遥山入秋暮,多少征途此中去。渔舍多依薜荔湾,估船偏问鸳鸯渡。王郎去客嵩汝间,余亦劳劳别故山。江路雁来知有梦,白云秋尽几时还。燕云越树动成忆,把臂王郎忽长别。黄沙落叶满长安,寒日萧萧素车出。著屐平生定几回,遗诗读罢更堪哀。分明洛水疲驴道,曾得家山一面来。遥怜瘦沈依山住,红到山中几千树。已是题诗失酒徒,扇底风光更何处。何日僧庐返病身,绿萝禅榻结比邻。西头更触浮生恸,满目山阳笛里人。

题岘樵枌东老屋校韵图

古人取韵缓,清浊限方域。世儒泥章句,音义遂烦数。长短齐人言,轻重汉儒读。

后出益纷拏,圈发逞私欲。梁陈讲声病,强以四声束。高贵暨梁武,卓识独破俗。奈此风会趋,浮华斫其朴。值倒言下上,虚实昧秀宿。鮦乃切纣红,顼改翻许绿。燕说谁为刊,天籁返遭梏。北宋家法存,近守唐代躅。丁贾皆经儒,同志有洙淑。十卷十二凡,部别慎通独。性缪偶貤孙,典刑未祧陆。字不取类隔,文亦参篇玉。别体务薈萃,一音自联属。虽病雅俗般,尤多形体复。观过宜知仁,多文在富蓄。谁欤妄兼并,画部成百六。疵议丛刘渊,创始实文郁。国朝勇复古,亭林首张目。十部至廿一,研析递繁缛。经子务博证,集矢遍吴棫。入声互割配,头脯强接续。其意或过通,往往见违触。之脂支必分,元魂痕当副。无锡与仪徵,雅冀古骚复。昌言终未行,习非徒娽々。蒙尝发狂论,吹万贵抱蜀。双声本天机,造化具宫龣。六书半形声,偏旁不相黩。持此两大端,如宗合其族。一扫尘径芜,兼通绝津轴,霓蜺枉分别,颇陂免点辱。屡欲勒一书,私以诏家塾,病懒辍觚翰,家贫艰毕牍。羡君勤著述,榆阴掩深屋。朝夕罗丹铅,雅话尽籑录。简炼比治兵,爬梳类折狱。即觇经济优,岂为盘错衄。此图便千秋,雕虫等奴仆。

盂鼎铭拓本为伯寅侍郎赋

聚聚孟鼎铭,吴陈考已备。侍郎精古籀,抉摘无遗义。我所三摩挲,尤在玟珷字。于古无可徵,请更对以意。吕伋谥丁公,《说文》作玎谊。丁癸本殷号,周人始制谥。偏旁随事增,古盖有斯例。唐虞及三代,以玉供神事。大夫有石宝,郊宗详其制。王公当用玉,疑非起后世。谥为作主用,加玉所以志。此乃真古文,千钧一发系。寄语一孔儒,挢舌莫诧异。

所贵金石文,为可证故书。佚事或创获,小学犹其余。兹鼎郑重言,宗周王命盂。 锡以鬯一卣,黻冕车旗俱。邦司四百人,仆驭至庶夫。是当为重臣,何以名泯如。成王廿三 祀,警酒资訏谟。初疑武之穆,盂本可通邘。然此述王命,岂容以国呼。又疑盂于借,唐叔 字子于。然曰祖南公,世系难强诬。班表有邗叔,时地亦未殊。其人又无考,傅会滋成愚。 祝雍与陶叔,一例同嗟吁。仰屋徒自笑,秋风在庭梧。

潘伯寅光卿属题小像

走也四载客京邑,短箠不到公卿门。光禄清流世眉目,独念僵卧时相存。早年文采动天下,性分夙契忘寒暄。握手数人足隐蔽,神明霞举何轩轩。咸丰季年国事亟,共鲧得政刑狱繁。百司汗缩奉教令,四夷抵衅窥畿藩。佥壬决策下殿走,六龙已驾谁扳援。君当车辙读弹事,请斩二竖竿其元。朱游未得上方剑,楚玮已出驺虞幡。退焚谏草泪沾月し,苍梧莫诉心烦冤。柳伉疏传翰林重,汲黯身在朝廷尊。乃知法从有真职,非徒簪笔檷玙璠。昔者宣宗治仁厚,大臣敬礼如友昆。太傅卅年长揆席,君臣一德情尤敦。世家乔木国所恃,相门之庆锺文孙。神羊触邪岂轻出,鸣凤应律无凡喧。梁洋不闻召陆贽,保全终始先皇恩。方今天日正开霁,朝局奠定无翳昏。君居九列更慷慨,白简上殿多危言。澄清斯世自君责,愿蓄光采培根源。吴生写真有神致,寒冬四坐回春温。侍中风貌玉界尺,可知峰距侔昆仑。自惟历落笑桓茂,更揣骨相愁虞翻。麒麟阁上速起稿,犊辕画我归邱樊。

自题霞川老屋图

我家世在城西居,翰林吴君为缋图。长安尘沙正眯眼,突兀忽见先人庐。二百年来 有此屋,东南斜抱两河曲。城边绿树万家烟,桥畔朱楼百竿竹。横河北绝官渎流,烟波浩淼 无春秋。鸥凫四散不知处,鸣榔往往闻渔舟。直河西接钱青水,迤逦长流百余里。估帆日夜排樯来,艳说霞川一湾绮。蓬莱驿路清风多,连云绰楔垂女萝。会龙尚记前朝事,卧虹不绝行人歌。先人辛苦一廛寄,旧德清门子孙庇。规制朴陋无敢增,宗族环居莫轻弃。幼骑竹马携短童,东眷西眷随所从。鹅鸭时闹比邻塾,纸鸢闲趁陂塘风。最忆读书一弓地,杨柳临池滴窗翠。拥卷随时倚树吟,洗研呼俦捉鱼戏。我生二十行適燕,沧海横溢无愚贤。马蕃亦逐贾区尽,桑柘一例随飞烟。归来城郭都非旧,到岸牵船暂相就。新丰门巷何处寻,安仁故第从谁售。海燕年年绕屋飞,梦中图画是耶非。多情惟有霞川水,日望行人万里归。

苦雨谣

秋霖积日惨不开,太行黯黯愁西穨。农夫九死补田作,坐看辛苦成汙莱。黍子垂头 万黄粒,丈半红竿飐秫秫。方觊暂饱偿积饥,讵料垂成委枯铚。天公爱物称无私,朝廷旰食 施淖麋。天心君心本一体,始知灾沴民自为。我釜无鱼瓿无粟,谒鬼不通日炊玉。饱看两脚 愁向天,岂惟野老吞声哭。

桑乾水自楼烦来,挟沙横决如奔雷。缗钱告绌外繇困,危隄々常奔摧。神畿南北一河绕,南岸{一桀}危北岸倒。积年{艹俶}々眄雨工,十室一归复逃涝。我乏羡卒半晦田,太仓斗食饕无缘。蜚鸿满野心悄然,岂但墨突无炊烟。

顽云缺兑现雌霓,雨势骑月夜益急。东荣震裂西梠倾,昏巷沈沈万忧集。盖头未得三重茅,泷泷檐霤百窍号。四壁股栗撼床动,一镫危与神魂摇。佣书力赁三间屋,流潦满庭带沟豄。何事复取造物嗔,童仆愁冤爨婢哭。人生呼吸皆由天,几家高枕能安眠。排墙死亦等化耳,蘧蘧安必非真仙。君不见东华门外火城湿,千官陛楯雨中立。马蹄腾踔绝淖行,漆室遑知有人泣。

晚步门外风浪浩然临流独立颇有江湖之思成五言一章

长风吹独立,苍莽堕边愁。山压孤村暝,城掀浊浪秋。奇贫逢患难,多病误恩仇。 满目关河思,平分浩荡鸥。

闻故园近日消息伤乱忧家杂成五首

百战桃州地,烽烟亦仅存。军声桐汭乱,杀气滆湖昏。遂失三吴险,空传万骑屯。 专征周奉叔,薄议尚君恩。

大府传飞檄,乡关乍被兵。愁云盘故障,妖彗扫长城。戎马莺花地,江湖战伐声。 越山东望近,莫使鼓鼙惊。

駴绝姚江秏,谁详倡乱因。赤丸斫文吏,白榛聚州民。世变无完土,家危有老亲。 谁令轻远役,日夕泪沾巾。

未奏清淮捷,天涯阻贼烽。雪深三月暮,路绝一身穷。国事嗟何及,家书杳莫通。 何时能奉母,避地乱山中。 细弱全家累,辛勤仰母慈。梦中怜病弟,乱里念孤儿。多难惊心惯,穷居得信迟。 侧身无处所,流涕太平时。

村居杂感

感念今皇建极初,纶言迭下免征输。民顽尚忍连群盗,廷议还闻{厂干}重租。穷海 波涛艰挽运,诸方草木缺储胥。司农可更无刘晏,宵旰何时得少纾。

桂岭千盘毒雾多,养痈从此溃山河。岂真小丑关妖谶,谁使中军祇雅歌。宗泽尚存 宁至是,重湘虽险待如何。督师忍召乡邦祸,身后还应誓枕戈。

洞庭千里气萧森,杀伐愁连大地阴。上相徒闻驰传出,全军已报凿舟沈。蛮氛日夜蒸江汉,鄂渚风烟阅古今。一片涂膏问谁致,祇应猿啸答枫林。

仓皇直下豫章城,江上闻风溃列营。沔口三旬余劫火,浔阳九派汇军声。元戎已见 奔单舰,都护空劳集守兵。约略诸君功罪际,陷疆事重陷身轻。

侧身天地一登台,极望东南事可哀。流水自将遗恨下,夕阳无数乱山来。我生不幸值多故,平世犹难容废材。许国谁能信年少,千秋人惜贾生才。

庚申八月感事

海国虫沙忽刺天,妖氛直射五云边。万金缇库方悬赏,一骑皮冠竟执鞭。下殿已符南斗谶,行围重话北征年。累朝神武声灵在,谁继《车攻》《六月》篇。

名王铁骑镇沽中,太息藩篱指顾空。孤注何曾谋寇准,吁留几见约陈东。绝怜沧海横流速,尚想神京拱卫雄。东望翠华应下泪,昭陵松柏起西风。

五朝神篽翼皇州,纵火连宵烛九幽。法物尽随群盗去,仙山真见万灵愁。不须华发摩铜狄,空使孤魂泣水囚。羯焰滔天古无此,凭谁海上搏长虬。

卧病危城日百惊,剧怜身死太无名。焦头讵解中朝祸,泣血徒伤下士情。九庙鉴观 应不远,诸君功罪岂难明。上方有剑无人请,惭愧平陵折角生。

和珊士送春诗心字韵

异国春归客感深,烽烟满目罢登临。茂宏到处能胡语,庄舄无人和越吟。四海仓黄 留此日,十年闲散负初心。草驴秃尾天街侧,吹笛纤儿莫见侵。

雨夜戏效义山无题

画帘疏雨隔微尘,独夜房栊易怆神。淡墨罗巾镫畔字,小风铃佩梦中人。难销碧玉 当年恨,留得文箫旧日贫。除却小敷山下路,天涯何处更寻春。 潭水闲门倒影斜,金铺深掩玉窗纱。骄骢日夕偏知路,乱燕春深未定家。银烛惯侵 三五月,铜壶低隔一分花。江湖侧帽填词客,长与年年减鬓华。

小别东风不自由,香车油壁几句留。难忘玉手搴帘笑,谁遣蛾眉满镜愁。莺语画屏 人倚瑟,蛛丝小幔月当楼。银河不信谁相待,泻作潇潇暮雨秋。

咫尺青鸾便断闻,漫书花叶寄朝云。镫前秋扇留残滴,雨后春衫发故熏。杨柳长为牵恨物,蘼芜新著忏愁文。多应终古沅湘水,翠被兰舟怨鄂君。

夜过皖城作

天涯倦鸟几时还,千里江程未得闲。瓶里茶香秋浦水,枕边镫影皖公山。烽烟淮甸 犹传檄,鼓角严城早掩关。为想十年征战苦,至今猿鹤怨刀环。

送子缜南还

玉河秋色蓟门烟,翠黛离愁咽管弦。羁旅中年难作别,文章孤唱更谁怜。西风村笛旗亭酒,凉月夷花海国船。料得故园重九会,登高相忆有新篇。

乐毅墓和郑盦

生合奇兵五国来,死犹埋骨傍金台。能军世尽推骑劫,爱士人惟礼郭隗。终使客卿 沦异地,空传书语感奇才。望诸莫表将军墓,知为昭王首重回。

闰秋饮集嵩云草堂池北精舍河南士大夫新筑宴赏处也

胜地招邀萃羽觞,丽{广娄}阑槛带虚堂。清池水影先浮磴,高柳秋声欲满廊。云物略存嵩少意,钟鱼犹接梵龛香。双藤宰相风流歇,尚有寒松翠过墙。

湖南山寺门望雨

烟波杳霭接层岚,远近行舟尽卸帆。日暮湖南山下路,满天风雨落松杉。

传镫寺观章皇御绘宏觉禅师像敬赋

开国当年气象新,补天笔落自通神。鸠摩合为真王出,俯视凌烟阁上人。

沈曾植

沈曾植,字子培,号乙盦,嘉兴人。光绪庚辰进士,历官安徽布政使,署巡抚。

晓禽

朝气动众禽、檐端语喈喈。我心感明发、起坐与之偕。万籁战清秋、意车轶埏垓。

吁嗟敝老人,蹩躄行何阶。徙倚就南荣,陈编强差排。古人终已矣,来世诚难裁。喉舌讵有殊,欣憎邈相乖。近前姑婉娈,视远皆奇侅。故纸谅难综,故言复何谐。冥冥独归卧,飒飒 严霜来。

日入

日入烛代明, 轩窗映琉璃。交光罗幻影, 镜镜无成亏。背舍有闇虚, 众芳敛暝姿。 微风定香过, 未见心先知。视听各有程, 晦明亦有宜。喟然念蘧生, 过阙停车时。负杖立广阶, 西南望参旗。出门视路人, 各有幽求思。摸象盲女愁, 煎膏智者悲。清钟铿寺远, 悟了终何之。

寒雨积闷杂书遣怀襞积成篇为石遗居士一笑

寒云如覆盂,漏天不可补。曜灵避面久,畏客牢键户。黵江海蒸,綫纙霰雪聚。闭 关且何事, 卧听檐溜汿。断续缀残更, 啐嘡轹虚鬴。失行雁濡翼, 噤晓鸡上歫。水官厉威严, 雨师从吕钜。尽收天一气,并作银潢抒。代云不成马,卫蝀空饮甒。河亡九里润,海溢万家 沪。南朔相倚伏,亢霪不均普。物物固难量,笺天奈何许。雌风四维来,龙具不能御。了无 智,装棉剂吴楚。藏妣燕赵产,缩朒甚饥鼠。固知广川谷,实有异寒暑。荆南五月来,炙热 剧烹煮。伏金骨俱烁,秋暴背其腐。商飙一泠汰,暂得宽肠肚。宁复此愁霖,而兼湿寒茹。 不忧灶生 重,将恐血为蛊。橘枳改柯实,蜃爵纷介羽。嗟惟人不化,何用適风土。孤裘故黄 黄,掩形不如褚。清川浴垢疥,焉事资章甫。西园蕃草木,花叶故举举。蜡花实非梅,滇茶 讵能苦。瑳々老槠树,占地冻不{疗鼠}。旁有南烛实,浪称仙饭糈。名虽疏药录,味不厕菱 蒟。鲜鲜若新沐,风槛群媚妩。兹族畏霜乾,徼幸且濡湑。宁知膏泽羸,蠋蝎益孳乳。穷阴 未肯释,蹙頞唏老圃。陈君泥滑滑,税舆践今雨。幽室共槃辟,高吟忽扬诩。长舒汲古绠, 高礦克敌弩。相君笔削资,谈笑九流叙。吾思古时人,心斗日迎拒。程马蜕形骸,杯盘代尊 俎。莫随气化运,孰自喙鸣主。开天启疆域,元和判州部。奇出日恢今,高攀不输古。韩白 柳刘骞,郊岛驾籍仵。四河导昆极,万派播溟渚。唐余逮宋兴,师说一香炷。勃兴元祐贤, 夺嫡西江祖。寻视薪火传,皙如斜上谱。中州苏黄余,江湖张贾绪。譬彼鄱阳孙,七世肖王 父。中泠一勺泉,味自岷觞取。沿元虞范唱,涉明李何数。强欲判唐宋,坚城捍楼橹。咄嗞 盛中晚,帜自闽严树。氏昧荀中行,谓句弦偭矩。持兹不根说,一眇引群瞽。丛棘限墙闱, 通涂成岨峿。谁开人天眼,玉振待君拊。啁嘻寄杨榷,名相递参伍。零星寒具油,沾渍落毛 尘。奈何细字札,衔袖忽持去。坐令诵苕人,倍文失言诂。郑侯凌江来,高论天尺五。画地 说三关,撰策筹九府。癯颜载火色,烈胆执彫虎。荡胸万千字,得句故难住。梁鸿瓜庐身, 礼殿击鼍鼓。沧海浩横流,中潬屹砥柱。可怜灌灌口,味肉失腒脯。那复问尖叉,秋虫振翅 股。怀哉海陵生,江草罥柔橹。{广官}々济阳跛,海燕对胥宇。季子踏京华,尺书重圭珇。 太阴沈暮节,病叟侷寒女。出户等夜行,焉将燎庭炬。百忧中缴缭,四望眩方所。赖君排偪 侧,冰窟日謰謱。消此雨森森,蠲彼愁处处。天门开詄荡,曷月日加午。城隅卓刀泉,中有 铁花黑主。杉栝百千株,夹道俨围篽。樊口渺东望,松风冷相语。千载漫郎游,招招若呼侣。 东坡眼食地, 固是余所伫。郁没老涪皤, 赭山畴踵武。兴来舴艋艇, 径欲掠江浒。 政恐回颿 挝, 商羊复跳舞。

廉家荆浩画松峦山水障子樊山作长歌余亦继和

画中看画画非画,高堂飒沓风云开。九百年前冥漠人,鸦叉招得精魂来。建标峰如巨灵擘,直幹松自秦时栽。天绅大瀑透空下,彼岂胸臆填风雷。磥々礚々崒中怒,耳鸣怳忽惊涛催。悬知松根攫危石,石下定有龙湫洄。满盈之动岂无日,骊珠夜窃何为哉。荆浩北人山北性,清秀不与王维侪。亦掀思训拨昭道,忍将金碧汙巅崖。纯全山水大冬气,闭隐道与希夷偕。汹汹五季人相食,厉有怜王僧话灰。战尘飞不到萧寺,吴笔项墨随涂揩。真形太行接恒岳,冥寄桃源及天台。风云所通径路绝,若有人兮宅崔嵬。固知图画意未尽,上方气已通蓬莱。十年江湖困卑湿,董生平远非余怀。长安岂知日同远,岱宗政恐山其颓。乾坤干戈身老病,青鞋布袜行靡阶。投林甘寝幻思梦,梦身化作松根苔。

郑所南画兰卷樊山所藏元明题者三十余人末有张文襄题诗樊山自题七言长篇一绝 句八皆丁未都中作也

極光闇脱由拳纸,小字凋残丁子尾。尖豪破墨不破水,元是孤臣泪铅泚。昔为王者 九畹香,今扫僧残一锥矣。图中两花间九叶,左方长短参差七。六陵云黯一星移,白雁声催 北风急。右方二叶短复短,心在零丁海洋畔。可知正统远仍存,块肉犹延丙丁算。国香零落 天之涯,国殇毅魄怀王知。南翁傥有南公语,本穴嗟当木坏时。呕血总为天水碧,啼魂常抱 冻青枝。当门翻恨无摧折,祭鬼何妨入炼持。遗事郑陈韩各写,精爽何分在朝墅。刳心史已 瘗承天,代舞灵应依亳社。沧桑几度红羊换,长卷珍留清閟玩。题诗原是太平年,黄閤紫枢 眉寿愿。十年我辈草间存,一老不遗箕尾远。酒阑坐客重披看,若有人兮泪如霰。呜呼舜禹 之事盗跖章,昔为狄灭今梁亡。西州华屋渺龙荒,马策余泪秋淋浪。我无桥亭之砚端筴知阴 阳,亦无西台竹如意。朱鸟有噣空彷徨,《春秋》不作《骚》不光。萧艾变化兰无芳,提笔 掷笔歌慨慷。人间谁要埋忧地,一往牢愁天上寄。

题所居曰海日楼终日盘桓不出一室每诵陶公云鹤有奇翼八表须臾还之句千载同情有如接席意之所会即事为诗

我性好楼居,东窗著匡床。未明得朝气,出地星煌煌。坐作岱顶观,海波浩沧凉。 真形见旸谷,嘉实餐榑桑。稽首摩利支,大悲遍诸方。鸾驾先日驭,鬘云摄欃枪。密语千万 周,四施极羝羊。福严普沙界,兵气为慈光。

迎日起何为,长生资沐浴。霏霏流霞润,饮我初生犊。协气外蒸濡,奇温中馥郁。 子珠抱灵根,灿灿金华簇。裸国薄何嫌,胎儿洗宜育。咸池甘石经,占此新阳复。

安期尔何人,得非鲁连徒。却秦入东海,传为列仙儒。朝与青童游,暮归紫府居。 锵锵白凤皇,侍从随仙舆。辟穀亦何为,食薇不愿余。披发下大荒,冥搜宛委书。云气閟徐 市,岳图付仲舒。谁言齐士怪,正笑田横愚。南史简不存,长怀一嗟吁。

仁先自杭归贻龙井泉一瓶

西施本是臣里女,我与西湖久睽阻。半生长作越流人,想见澹妆浓抹妩。狗儿年冬勇探陟,始踏冷泉泉畔路。张家祠楼十日留,看尽重湖雪月雨。当时奢愿游五岳,踏破芒鞋返胥宇。稽留山下挂瓢人,许我烂柯偕赌墅。岂知乾坤一反覆,孰两东门遽如许。有眼忍见林希碑,有足谁蹠相柳土。年年穀雨荐新茶,空说石泉槐火煮。陈无已自山中来,贻我龙泓白牛乳。山里依然竹笕清,世上谁知蓼虫苦。松垆匏尊聊一举,藜藿肠鸣甘尔汝。老夫呤呓

故难醒,五碗通灵空计数。樊侯示我列仙诗,我自幽篁山鬼处。傥骑赤豹从文貍,梦见冬青 不凋树。

止盦相国觞同社诸公于敝斋相国与庸盦尚书诗先成曾植继作

春风骀荡来,朝气在巾屦。川上逝不留,吾生渺焉住。平生五岳愿,跛者不忘步。 屏迹土室中,万象入伛偻。身是古莽民,甘寝世无曙。群公排闼入,有酒忽成醧。有俎鸡骛兼,有笾肴核旅。衣冠今四皓,朋辈昔三署。或拍洪崖肩,恣浮魏王瓠。青冥驰野马,迅辔不容驭。竹素傥相招,焉能閟情语。录公喟遐想,题目此欣遇。《字说》一掀髯。析言劳介甫。

逸礼不台记,遗书不师传。逸品画不圣,逸曲琴无弦。天壤廓无际,逸者象其先。 古今邈无朕,逸者游其玄。坐作鲲溟运,立当鳌极掀。神依少广母,室在昆仑巅。焉识麽虫聚,中有雷阗阗。焉识须罗孔,目有刀轮旋。埋照不忘照,镜空群动前。吾方耽逸病,放意怀与安。凿齿人且半,壶邱鲵有潘。新阳感积悴,哀乐环无端。庶以长者言,将持日车迁。酒阑积绛算,嗳唈吾生观。

霁雪照江邑,不能濡海漘。余寒犹渗骨,袭我羊裘人。秀树回含绿,鸣禽亦怀新。 天光延午景,草色晞遥圳。花事可蜡屐,雨行随垫巾。岂无填海石,噫此无怀民。夕照散车 辙,长烟凌塞氛。还将洛生咏,付与临川论。

答若海病起之作

吹尽东风江上村,刹幡心动不堪论。宵行齐鼠貍难捕,怪事巴蛇象可吞。憔悴诗人 依病榻,微茫《易》意筮归魂。无穷天地长勤客,目断秦东碣石门。

还家杂诗

九服蹙靡骋,我怀良郁陶。憧憧野马尘,送我乘轮飙。脩车丸一超忽,春光满江皋。 黄花菜根味,紫花地丁膏。五色蚕豆花,如鸣茧丝劳。农宗生民始,《击壤》成《咸》《韶》。 谁与饬五材,禾边倚之力。遂使糜烂战,不恤乾坤焦。吾里绾吴越,风雨忧飘摇。有粟无金 汤,慢藏盗之招。经行揆形要,日暮玄云高。二妃洞庭宅,三姑泖湖居。娥娥天帝女,应化 为女嬴姝。秦帝吞八极,游观戾海隅。东南天子气,刘项先徵欤。如何汙长水,株累千囚徒。 二妃风湘山,三姑沈柘湖。波涛秦簿令,角戢々头为鱼。吴楚亡国悲,灵威为宣抒。邢系出 元公,神实周黎余。泽国春水生,传芭会吴歈。千秋通肸蚃,三户同喑呜。我代博士对,用 裨枕中书。

水竹交蓊蔚, 柁移入支泾。春阴澹原隰,遥见孤花明。蚕候百室静,阡陌希人行。 林阴见犬卧,日午闻鸡鸣。妇智敬无旷,田更勤得生。幸无街弹室,不解闾师争。淳俗偶存 在,儿童乐柴荆。即此是瀼滨,潺潺水乐声。

魏塘迤以北,汉塘迤以东。海防来自古,内庳外差隆。吾郡南江委,谷水蟠其中。 津渠交地泐,隄堰争人工。颇疑马塘筑,实绝分江通。从兹南纪绝,桑郦言皆穷。燕齐填九 河,嬴氏湮三江。所以山海间,处处留秦踪。毋以仲初记,上揆神禹功。吾将咨海若,一往 皆畾石空。

荒草春茫茫,言寻大夫墓。两海风马牛,魂归自何所。散民怯公战,矫以鹤轩拒。 懿公死社稷,玦矢志先谕。伤哉空国走,不见舆尸旅。刲腹作黄肠,呼天心独苦。有臣乃若 此,足以知其主。卫国君臣乖,十世余殃注。亡虏幸偷生,有言皆粪土。苌弘血在蜀,精卫 翔漳渚。神化妙难量,吾言公傥许。

元季九州沸,吾州独安宁。濮川丛桂枝,雅咏琴清英。景德录僧卷,金兰有友声。顾徐孙卓陈,卜宅皆宾萌。山纪贝家宅,谿环仲孚庭。淮张死不怨,谣谚观人情。地理有变易,径涂入夷庚。战士负羽守,兵家扼吭争。嵬峨细柳营,月波夜凄清。昔者乐郊语,今兹劫綦征。鯈乐岂无恋,鹊枝依复惊。愧无孙叔智,甘寝息郢兵。长为越流人,跼顾重行行。

汝南鸡初鸣,危栖俯平野。夜气静濛濛,潜阳伏其下。纤阿西未没,曜灵东将贺。 晦朝苟非会,易象安从写。稽首观世音,将无金母假。阴阳即空有,一异焉存者。吾老学弇 州,文身久当舍。宝华有天女,愿炙昙阳輠。

来躅循未遍,去斡展方遒。居家翻若客,儿去翁难留。顷刻蔷薇花,舒英送行舟。 杜鹃如惜别,一雨皆垂头。后阁待支楹,前园计开畴。贻书慰老友,来月煎茶谋。即事有增益,随缘共绸缪。吾生讬性海,安往非虚舟。

乙卯五月重至西湖口号

来趁西湖五月凉,凭阑尽日醉湖光。圣因寺古佛无语,一杵残钟摇夕阳。

聚散由知有定缘,故人重见各凄然。观河莫话波斯面,已隔风轮五百年。

苎萝人作拂菻妆,为借昙云掩泪光。解道夜山元胜昼,不须懞懂怪襄阳。

老人济胜已无具,客子登楼还有情。寄语葛仙休怅望,骑牛或恐有来生。

简西岩老人

海日楼头倚夕阳,春秋直为蟪蛄忙。远人如杌忽移树,深草隐花微度香。水位星摇 占害气,金神气伏避炎方。奇胲刑德非无意,会与闾昭一审详。

炎宵无寐梦无家,强倚棂轩待曙霞。病眼观空增目党*目莽,文心失侣不雄夸。飞来白鹄传书简,想见苍龙泼茗花。独乐襟期随地在,吟怀应为晚凉加。

再叠前韵

寥天一去入寥阳,翻觉云居数劫忙。法乐静时常在耳,鬘花萎后别生香。仙家上法 通三世,月地中庭可一方。晚岁王官无个事,合将诗品更斟详。

断虹下饮川中水, 高壁明翻波底霞。散卓笔书毫最適, 吉祥车挽稳相夸。心镫电续

光明线, 意树诗催顷刻花。今夜月圆谁与望, 影池荇藻想交加。

一山过谈

刚肠薄俗两回潏,天与诗人铅汞牙。坚垒书城剧攻守,撼风大树增盘拏。争枝俄然 坠啅鹊,高枕不闻啼曙鸦。道人心是不灰木,活火与泼阴林茶。

日日

日日阑干望,寥寥节序违。雨林沈鹳井,潮步涨電衣。乐府刘生咏,《春秋》铎氏 微。余年更无梦,万事不如归。

芳草

芳草萎已尽,王孙归若何。梦天宁有使,槁叶尚怜柯。水相观浮世,虫声咽挽歌。 桥边摇落树,祇是白杨多。

闲阶成踯躅,晓坐一嚬申。寒日光明薄,颓波变转新。参方称幻寄,啸侣得畸人。 芋栗秋当熟,阶除鸟省驯。

老友马季立孝廉挽诗

故旧随流水,山川黯夕阳。儒风于世尽,经苑喟人亡。懿子姱修素,翻来讲肆翔。高斋凭楚望,笃论警梁亡。大义甄刘贾,前闻总赵汪。情能综五例,询或迨三商。荀况居齐久,颜先愍楚伤。飘零仍祭酒,孤愤郁中肠。一纸传邮寄,千言砭俗刚。白头逢异俗,素愿■同方。岂意晨星散,俄然宿草长。赴来邻笛断,哭罢寝门凉。庾令江楼换,文翁石室荒。虫沙时共化,麟角学谁昌。纪叟聋焉在,曹褒视益茫。悲来偕《五噫》,怨极怼双王。浑沌无愚智,乾坤积痏疮。一哀回白首,来世更何彰。

梁鼎芬

梁鼎芬,字星海,号节庵,番禺人。光绪庚辰进士,改庶吉士,授编修,历官湖北按察使。谥文忠。有《节庵遗诗》。

斋中读书

圣人去我远,存者六籍纷。遗迹非口授,从生观甚勤。往往一师说,反复万口云。 吾闻《易》蛊象,育德而振民。苟徇所不屑,戈矛已相因。前有千年书,后有万载人。何以 立天地,上答君与亲。愿持白日心,光明照星辰。

为学如登山,来万陟者仅。徐行必无踬,阔步不到峻。所蔽有厚薄,开塞岂田刃。 荀卿善言解,性恶惜未慎。刚决与果敢,道乃日月进。仁义奉孔孟,耿介尊尧舜。悠悠总不济,百年亦何迅。

赠徐赓陛

足茧风尘鬓有丝,政行井邑口成碑。众人欲杀我何忍,作吏能狂斯已奇。枉使郅都 称酷吏,愧推王弼作经师。驱谗雪谤终何补,不待他年负子期。

出都留别往还

凄然诸子赋临歧, 折尽秋亭杨柳枝。此日觚棱犹在眼, 今生犬马竟无期。白云迢递心先往, 黄鹄飞骞世岂知。兰佩荷衣好将息, 思量正是负恩时。

佳人

阆风緤马竟何年,吹彻参差下众仙。公子归期春水后,佳人情绪夕阳前。碧芳倾尽 痕犹湿,经焰飘残梦尚牵。渺渺天河几回顾,自搴帘箔数星躔。

桃弓射鸭尽萧闲,缥缈仙居紫翠间。不尽情怀随逝水,更无谣诼到深山。夕张瑶瑟 凭招月,朝索琼茅自闭关。蕉萃沈郎初病起,肉芝应为驻年颜。

同徐铸访七星岩石罅祖龙学题名作长歌

秋风动地潭水枯,清游载酒子与吾。笑谈已过芡塘外,回见村屋皆画图。纷纷姓氏满岩洞,周书宽博包书癯。范阳择之亦至此,博陵崔子相驰驱。更闻石罅字未灭,苏斋有纸不得摹。春洲畸人始寻见,著书且补仪徵无。我今粗猛仗心胆,子复英特少髭须。巉岩共向仄径入,鞠躬恍若公门趋。余生世途每宽坦,到此真觉形体拘。手扪苔壁引蛇沫,以火斜烛相叫呼。分明七字鲁公体,银钩洒落琼枝腴。回身小立若有会,追忆史乘微叹吁。公昔从游泰山下,要埒守道兼宽夫。抗言衍圣定百世,袁州启学繁生徒。临川柄国枉人罪,酒瓶三百轻召辜。惜哉不遇张子厚,流窜德庆成冤诬。《遗文焕斗》穆修派,手力傥可分开洙。此官虽鄙奚足贵,方寸萧散谁能逾。题名山涧知几处,大云铜石罗浮俱。他年同著几緉屐,尽收宝刻当瑶瑜。

端居赋兴

闲庭雨过昼添寒,柳竹青葱俯一栏。渐与世疏文笔放,偶缘春好酒杯宽。石唇苔润初安臼,水面萍分独下竿。惟有佳禽笑多事,中年心意未阑珊。

重至长沙写哀

浮世蓬根不道怜,秋怀到此更追牵。再寻旧巷悲回辙,独泫愁春泪彻泉。报国未能伸志事,沈湘空自梦婵娟。翦镫暗记当时话,身是孤儿十九年。

寒夜独谣

写入幽通黯一镫,神人仿佛事何曾。月明深巷疑闻豹,风肃清帘不到蝇。久别花枝 凭梦折,无多酒力带愁胜。年来莫溯心中语,何止篱间懒嫚藤。

读韩致尧诗感题

晓来微雨较春寒,诗爱冬郎尽日看。乱世峥嵘词反艳,暮年萧瑟事初完。莺啼幽独 看看尽,马走烟尘寸寸啴。凤烛百条同一泪,今疑纸上未曾乾。

谁识天心久废商,殿前执手暗沾裳。从亡卢植曾河上,和韵吴融竟异乡。花好似忘春已去,尘飞真恐日无光。由来宦者倾入国,错怪唐家白面郎。

同张琳论事谈诗有赠并送归省沅江

微雨洒清昼,闲芳照孤馆。平子实通士,兀特又夷坦。暂亲冰雪寒,久坐布帛暖。 竦身顺所止,纗兰坚不损。追陪有几日,舍我一棹返。千里庭闱心,此官亦闲散。余情似飞 絮,共汝江海远。勿须怨桃花,贫女嫁常晚。

樊川龙豹姿,不偶温李冶。扶持万代人,吐词最英雅。吾生胶夙好,岂惜谐者寡。 昨宵论诗派,同志无{厂乍}{厂牙}。罪言虚上策,空有泪盈把。世味区兰莸,人才见玉瓦。 苍茫百年事,恨怅不能写。

得伯严书

千年浩不属,君乃沈痛之。神思可到处,缱绻通其词。穷山何所乐,予心忽然疑。 试君置我处,魂梦当自知。把书阖且开,情语生微漪。出见东流水,汤汤将待谁。

江船遇长沙曹刑部赠诗

昨舍故人归山庵,路逢曹子披尘函。欲浇江水泻智慧,一雨飘落舟中岚。手持贤兄好文字,辨章学术穷其探。湔除回穴启真秘,使我有舌不敢参。论仁特采东塾说,薪火何止传湘潭。菊坡精舍别来久,梦中杨柳空鬖鬖。大师不再下元学,妖狐昼出言二三。后生少年嗜鬼怪,经义新说青于蓝。本心已昧非可惧,乱流既甚谁能戡。我惟造圣祇一轨,不到真处皆空谈。李固可冤季长讇,弥远不罪西山贪。时危致君竟无术,便有书论徒面惭。千年耿耿挂心目,自恨霜泺旋羸骖。江山大好正堪隐,谁与百战湘人男。时平豪杰不足数,勖哉吾子视所担。

赠侯官沈瑜庆

沈郎都市初相识,不待文章发英直。虎豹斑斑风矩存,有才独俊无渝则。乃翁知国 出威名,旌旗不动羌胡惊。异时霜鬓四海见,独瘗幽恨谁能明。生时未接春风坐,神仪想象 君其颇。江南百姓最知恩,今见行骢泪犹堕。直须清节表时流,莫令人世说兰莸。君不见龙 图文武心铁石,万口争传范庆州。

光绪三十三年十二月乞病纪恩

多病光阴负罪身, 天恩今许作闲人。堂堂千载蹉跎去, 了了余生涕泪新。草木力微

安得疗,江湖心远更相亲。衰年那有酬知日,归种山田算一民。

半山故宅

题诗武库至豪雄,变法君臣意所同。琴瑟不调原可换,兰莸未别自难终。推公贤愎惟迁叟,叹世因循有晦翁。遗宅荒凉共追吊,纷纷儿女闹村丛。

壬子春怨

禾兆花避世认前身,谁谓寻芳是路人。撩乱林亭门外骑,清寥池馆雨余春。华年倏 去琼箫恨,冷月空来宝镜尘。独抱素琴宫漏歇,凄凉凤翮共龙唇。

红梅何事有双身, 永夜孤心不寐人。病马雪寒犹恋月, 流莺天暖即争春。情中剑首轻吹映, 劫后琴心忍作尘。玉女邅回还在侧, 云璈奏罢惨赪唇。

露滴鸾衣窈窕身,香成终有返魂人。微蔫花色频看日,将尽钟声不贷春。玉合收时 存梦影,瑶笙散后怆音尘。天荒地老相思泪,化作春潮啮石唇。

暗雨残镫共此身,深闺微叹更无人。野塘芳杜先侵水,市窖唐花竟夺春。电火乍飞 鸾坠影,林风忽过燕惊尘。玉骢一去归期杳,匝月兰醪未染唇。

树老园荒藤绕身,双扉今启久无人。咬花错引金铃犬,窃药争寻玉洞春。草际鹿踪知暗路,雪时鸿爪惹纤尘。题红自笑谁曾见,多事琴僮一展唇。

王检讨回湘赋别

为忆江南乱后山,飘然巾笠往仍还。百年心事看残照,一代文章有要删。杜本谷音 吾所属,黄衷海语若相关。崇陵片石归装稳,头白临分泪对潸。

寄怀王祭酒师平江经舍

书副传闻在岳阳,黄巾尚爱郑公乡。闭门得祸知将乱,辟地全躯祇自伤。玉石焚余 还有火,衣冠气索恐无阳。门生垂尽从沟壑,执管何时上礼堂。

【卷一百七十四】

端方

端方,字午桥,号 高斋,满洲旗人。光绪壬午举人,官至直隶总督,罢,再起,候补侍郎,署四川总督。殉难,谥忠敏。

游莫愁湖

五月湖楼趁夕凉,重来祠树饫新霜。秋风莫续箜篌引,春梦谁寻玳瑁梁。孙楚酒楼 馀蔓草,丽华宫井剩枯杨。佳人底是生南园,家世分明系洛阳。

顾翰

顾翰,字孟平,江苏华亭人。光绪壬午举人,官户部主事。有《宜雅堂集》。

新秋

尽是萧疏意,云山入望赊。凉蝉惊落叶,孤蝶抱秋花。寒听山中雨,明飞江上霞。 村边吹牧笛,绝胜往年笳。

陈炽

陈炽,原名家瑶,字次亮,瑞金人。光绪壬午举人,官户部主事。有《春林屋诗》。

微雨坐池上作

雨气倏无际,翛然生夕阴。春萍缘水碧,城树得烟深。偶会濠濮意,非无江海心。 方舟何处所,愁绝坐难任。

偶作呈元侠

远忆将何益,孤飞病未能。诗心缘事减,酒过逐年增。未老已如此,长贫自可憎。 生平知己泪,凄绝夜窗镫。

感事

河伯笑海若,小大固殊料。杂县眩钟鼓,雅音岂不和。性质阂闻见,俯仰成山河。深识迈当世,薄俗常见呵。遐哉怀古心,太息竟何如。徙薪不及早,爝火能燎原。羝羊亦解触,乃自撤其藩。族类既以殊,祸害安忍言。饥蛟宅深浦,水族无安澜。猛虎在灌林,百兽多忧患。前谋已无及,后虑宁复论。当断不能断,揖盗徒开门。

食货生之源,易穷久乃变。金玉炫耳目,始觉菽粟贱。逐末竞锥刀,举世互相煽。 海客多奇淫,大利遂私擅。桑孔术亦工,何由救瞑眩。节流岂无策,睫远谁能见。哀哉涸辙 鱼,恻矣巢堂燕。

乾坤讬大义,振古匪自今。谁欤戴发齿,而忍怀佗心。黄金尔何物,能使听者瘖。 胡越殊风会,欢爱同裳衾。祸机伏肘腋,一发谁可禁。人心逐如面,咫尺成商参。好音伊可 怀,亨鱼溉釜鬻。恻恻匪风诗,寄慨一何深。

湘江春望。

麦风凄切子规声,僻县繁花眼暂明。留滞河缘识天意,飘零今已悔狂名。春寒十日 仍披裌,夜雨双流半入城。谁踵嘉名旧湘水,芙蓉愁煞涉江情。

许玕

许玨,字静山,晚号复庵,无锡人。光绪壬午举人,历官出使义国大臣。有《复庵 先生集》。

谒范文正公祠

贫儒困韦布,郁郁不可居。所见祇利名,得志将何如。人生发未燥,入塾诵诗书。 道通天地人,识岂囿一隅。举世病饥溺,拯之在吾徒。伟哉文正公,志量世所无。伏处怀庙 堂,宦达忧江湖。立朝三十年,寒素如其初。禄入赡同宗,身外无赢馀。世儒不自奋,观之 徒嗟吁。我来谒公祠,再拜立斯须。愿言式高风,永为学士模。

清江道中

静居忽不乐,揽辔出风尘。生世逢明圣,安閒愧此身。请缨行有日,橐笔且依人。 四海男儿志,驰驱岂为贫。

春宵苦不寐,破晓上征车。野旷天垂幕,河乾地卷沙。绯桃十数树,绿柳两三家。 何必江南好,天涯揽物华。

早行有感

生年三十四,未尝离庭闱。四年游虞山,间月辄一归。我母生我晚,拊我如婴儿。饮食必加询,冷暖为护持。一从出门来,水陆疲奔驰。水行畏风波,陆行苦崎岖。夜半坐车辕,冷露湿衣裾。驱蹇入水中,月黑流声嘶。深浅不可辨,呼吸蹈危机。日午行未息,面汗皆尘缁。欲饮不得饮,忍饥不言饥。傥体慈亲心,见此将何如。日暮暂解装,挑镫作家书。儿行皆坦途,儿安母勿虞。

汾州道中

劫后哀鸿瘖不鸣,天涯极目泪纵横。山经积旱春无色,河咽残冰夜有声。万里轮蹄消白日,几人肝胆为苍生。蹉跎未遂澄清志,何日驰驱报圣明?

何维棣

何维棣,字棠孙,道州人。光绪壬午举人,四川候补道。有《潜颖诗》。

孤舟吟

倦马嘶旧都,宾鸿归故林。念我远游客,恒年滞江浔。登楼眺南天,家园晻云岑。 矧兹秋气凉,关河红叶深。严霜肃大野,宵风吹我襟。荣利讵不羡,羁思固难任。既触梁鸿 悲, 谁怜庄舄吟。

麓山怀古

谕苗台下雨如烟,天马浮岚落眼前。往日旌旗馀杀气,至今桴鼓出群贤。橘洲屡阻 和夷策,西屿争传檄蜀篇。寄语防边诸将吏,异时灵麓即燕然。

游鹿鸣山歌

仙都昂首标孤青,谁与抗者惟鹿鸣。仙人遗鹿说悠渺,东坡有诗山乃名。以人传物物传地,胜游文藻垂千龄。长公龛侧岩花馨,曲廊下俯南宾城。左枕青牛右白马,波光云气纷阴晴。古窦纬藤萝,流泉甘且清。炎天日方午,累榭风泠泠。绿阴为海不知暑,岷水西来如带萦。地属公家百不禁,往往呼卢远心无杂迹,随在得真还。阅世摩孤剑,围书坐万山。雪天生气出,人海寄身閒。愧少匡时略,梅花且闭关。

游峨眉归偶成

海南笠屐遍经过,咫尺仙乡不到何?未倚青冥追太白,空谈翠埽笑东坡。心知吾道高深在,身入名山福寿多。宝瑟琼箫殊好事,一筇五日踏三峨。

感怀

肯信村廛有是非,年来阅世学忘机。枕中车毂难妨梦,画里江船且当归。北地有人 耕陆海,西山终古送斜晖。惊心寒雁程三万,似避刀弦并力飞。

柯逢时

柯逢时,字逊庵,武昌人。光绪癸未进士,改庶吉士,授编修,官至江西巡抚。

顾晴谷大令饯别牛头山杜子祠即席赋二律

城南山势郁崔鬼,工部祠堂亦壮哉。词赋纵横开世界,川原高下护楼台。尘封石篆 青麐麟隐,酒泛金尊白雁来。蕃虏正骄群盗剧,当时涕泪满蒿菜。

差村小别无多日,杜曲重来定几时。风雨尊前人老大,关山笛里道倭迟。朝班渐喜 长安近,归计惟应襄水知。为谢殷勤杯酒意,少陵原上一题诗。

张预

张预,字子虞,钱塘人。光绪癸未进士,改庶吉士,授编修,历官江苏候补道。有《崇兰堂诗存》。

登燕子矶

观音门外江风颠,惊涛断渡无行船。船头燕子何翩翾,谽谺下啄蛟鼍渊。空江无巢飞不前,回翔招我登其颠。十盘九曲如蚁缘,磴道一线开何年。忽然绝顶浮岚妍,孤亭岌岌撑如拳。荒坪草没层厓偏,断碑欲堕藤萝牵。亢石无阶谢雕镌,侧身俯江江浴天。天风狂吹山孤悬,我欲跨燕凌飞仙。燕兮敛翼不可鞭,但看鹳鹤横江骞。须臾返照来澂鲜,紫翠千里流无边。江南江北纷山川,冥冥闪闪沈苍烟。罗胸气象收万千,目力虽竭情流连。岩扃欲暝云帷褰,夕霏四敛天容蔫。下山皓月忽已圆,江光山气争回旋。兹游奇绝吾当传,归舟汲汲书长篇。诗成推篷歌叩舷,烟中燕尾犹涎涎。

马穀山督部师挽诗

初闻生社祝封疆,忽听哀歌动路傍。旧部有情思寇借,神君无譣谶彭亡。黄埃散漫 祆氛恶,碧血模糊古恨长。吴越遗黎同一哭,看公浩气互天阊。

迷茫天意镇如斯,岂独沦亡事可悲。遗爱在人谁食报,狱辞书盗恐成疑。归心未怯 飞鸢堕,家法犹闻突骑驰。寂寞丹轝临发处,神鸦啼血绕灵旗。

人日渡瓜洲

鳞鳞轻绿满瓜洲,人日征帆逐去鸥。山引舟程初北向,水迎春色自东流。回风雷岸闻歌吹,积雪銮江感客裘。携得新年京口酒,晚灯试醉竹西头。

慈母堂前月一首宿晏城作

慈母堂前月,远照关山程。关山远复远,迢迢晏子城。登城一以望,白云千里横。 清辉出云际,知共故乡明。安得平安字,一一月中呈。仰镜慈母颜,俯瞰游子行。朗鉴及发 肤,危哉慎亏盈。月近慈母远,悠悠游子情。坐爱床前光,无促晨鸡鸣。

大风泊朱泾书以遣闷

昨夜月轮晕如磨,破晓颠风断帆路。平时软媚浅泾流,得势轩然能作怒。篙师系缆纵复横,断桥仆柳相支撑。忽闻急响堕船尾,惊禽跕跕冲波倾。我闻禽言行不得,去路关河 莽难极。却怪长年利客行,盼断前头市烟直。日斜潮上云垂天,夕沽百钱醉且眠。来朝风色 更谁料,不如挝鼓牵归船。

张僖

张僖,字韵舫,潍县人。光绪癸未进士,历官兴化知府。有《别画湖庄诗草》。

春日偶成

一夜东风柳梦苏,榕阴芳草绿平铺。不知帘外春深浅,细雨梅花听鹧鸪。

春晴

积雨新晴好,春深爱景光。茶宜泉味淡,琴就竹阴凉。一鸟下寒碧,孤花明夕阳。 诗成耽久坐,渐喜日初长。

十月袁浦道中

晓来霜气扑征骖,买醉旗亭酒半酣。斜月五更催上马,又驮残梦入江南。

廨西厅事三楹杂莳花竹颇饶幽胜藤阴有亭余榜曰诗境夏日晚坐用黄鹄山人鉴亭韵

绿阴幂小亭,地僻不知暑。石几坐晚凉,夕阳淡遥屿。呼童拨松炉,乳茶活火煮。 泉味辨淄渑,瓷品杂哥汝。藤阴悄无人,幽鸟答诗语。盆兰发疏花,细香散成缕。微风飒然 来,竹气凉似雨。静对欲忘言,新蟾已当户。

郭幼安广文好学工书尤精篆刻为余作印甚夥诗以酬之

杨履晋

杨履晋,字康侯,忻州人。光绪癸未进士,由刑部主事历官宝庆知府。

宣统己酉十月同何梅叟游明陵用东坡石鼓歌韵

纪元阳月日丁丑,陟览明陵偕梅叟。昌平山水形家言,龙虎环抱群奔走。旧闻日下稽遗编,胜国桥山系众口。一代姓易王气销,三恪封视神明后。故人导我康家庄。寂寞黄华过重九。犹存郁郁山上松,不见依依殿前柳。昭穆相向繁众星,长陵独运中央斗。龙飞北道思雄奇,燕子南来清腋肘。零雨师岂应风雷,瓜蔓抄乃连禾莠。御制文字讳尊亲,圣德神功纪孝友。不闻诗作侔鸱鸮,鬻子恩勤念卵壳。诸陵屹立没字碑,遑问鸟篆与虫蚪。朱明极盛称洪、宣,擢用儒臣半黄耇。后来政事归貂珰,豹房鹰犬乐指嗾。永、定陵工糜帑金,委鬼刑馀赐彝卣。闯入仓皇悲月游,大乐不奏瞽宗瞍。呀庨御殿生荆榛,瀍邙霸杜等山咅嵝。最痛思陵附妃园,帝虽渴葬妃犹厚。石人十二文武臣,从此不迓天王某。燕山沙河有废兴,珠邱尺寸仍明有。我思炎汉逮天水,雠及枯骨遭鞭杻。明季流寇横神京,雷声堕地见天狗。免攫玉匣与珠襦,幸脱灰烟及土偶。严禁樵苏尧舜朝,不使神宫同丘首。天书大书不一书,黄瓦且修门敢掊。传闻禁旅入关日,颇思修怨亦自取。岂知圣言万世法,鼎迁明德无尘垢。朱侯致祭虔春秋,作宾王家世世守。读书雅慕蒋山佣,展谒诗篇永不朽。寒鸦落木无古今,明陵十三在天寿。

徐定超

徐定超,字班侯,永嘉人。光绪癸未进士,历官御史。

谢客

我居城西隅,河水门前绕。浮沚追芳踪,游钓具台沼。自入武林城,人事何扰扰。 干谒客日过,杜门难却扫。我亦求诸人,主客须分晓。人人而悦之,广厦万犹少。譬如一枝 栖,木亦欲择鸟。岂不悯饥驱,妻孥犹未饱。齿牙能奖成,馀论何足较。施济尧舜病,浮沈 洪乔矫。求吾心所安,何如避嚣好。云关不可扃,宏愿殊难了。惟有羡冥鸿,高飞在云表。

【卷一百七十五】

沈瑜庆

沈瑜庆,字爱苍,号涛园,侯官人。光绪乙酉举人,官至贵州巡抚。谥敬裕。有《涛园集》。

纪朱总兵洪章事

每饭意不忘钜鹿,眼前魏尚翻为戮。少年不自惜功勋,垂老对人羡蒲穀。苍头特色 黔中黔,太守益阳与薰沐。颍川骂坐雄万夫,酒失岂真弃心腹。一为楚将亦冠军,迁地为良 敢雌伏。屯兵坚城势欲绌,连营百里气转蹙。忽惊地道隳垂成,四百儿郎糜血肉。即今丰碑 龙脖子,空使诗人叹同谷。破敌收京谁第一,再接再厉疮痍复。冲锋让前受赏同,公等因人 何碌碌。当时大树耻言功,今夕灞陵还止宿。文吏刀笔错铸铁,幕府文书罪罄竹。谁知东海 又传箭,矍铄据鞍更蹋踘。不侯枉自矜长臂,再植何堪拟群木。飘零草疏讼陈汤,鼙鼓闻声 思李牧。白首忘年怅较迟,奋笔成诗助张目。行空甲马如有闻,我有长歌方当哭。

淮北行

汉安县官擅煮海,牢盆计臣持国宪。关中豪姓皆素封,强幹弱枝谋岂远。江淮自昔拥盐利,乱后公私叹重困。建瓴蜀船势莫御,齐豫捆输亦殊健。翳我追维陵替由,商面改票票改贩。长沙经济世无匹,救弊权宜暂相遁。湘乡戡乱务宽大,一时纲举从谦逊。正阳五河假苗李,反侧羁縻难具论。承平官吏病因陋,比量淮南更滋蔓。载盐即以船守轮,盐难周转船久顿。劳则思善逸则淫,盗卖夤缘毋乃溷。积重忍隐戒铤走,剜肉补疮亏巨万。典鬻俱尽且兔脱,始知水懦为民恨。当时亦有经营议,斤斧未终梗初愿。美意中隳悔莫追,穨波日靡谁当輓。变迟祸大古有训,民难图始谋方寸。改张安得尽人意,苟利君民敢辞怨。古者商与国有盟,庸次比耦终无懑。周卫肇牵重服贾,讵狃积习昧言巽。三占从二弗汝狥,千仓万箱正营建。通均合作仿彻田,本末相维若徵券。众擎易举始无亟,众志成城畴敢恩。观成为报老尚书,日影量砖料健饭。众商乐业官课最,明年我亦占肥遯。

哀馀皇

城濮之兆报在郊,会稽已作姑苏地。或思或纵势则悬,后事之师宜可记。昔年东渡主伐谋,严部高垒穷措置。情见势绌不战屈,转以持重腾清议。铁船横海不敢忘,明耻教战陈六事。军储四百饷南北,并力无功感尽瘁。宋人告急譬鞭长,白面书生臣请试。欲矫因循病卤莽,易箦谏书今在笥。蓄文遗言动九重,因以为功宜可嗣。谁知一举罢珠崖,东败造舟无噍类。行人之利致连樯,将作大匠成虚位。子弟河山尽国殇,帅也不才以师弃。即今淮楚尚冰炭,公卿有党终儿戏。水犀谁与张吾军,馀皇未还晨不寐。州来在吴犹在楚,寝苫勿忘告军吏。

雪后过滁州朱虎臣大令邀看丰乐亭醉翁亭并拓碑见赠

昔人四十便称翁,今我早衰将毋同。我来作客翁作主,惭无健笔追宗工。文章偶然作游戏,宾客可欺宁儿童。如何一代论风雅,门生乃尔相推崇。故人途遇朱公叔,邀我来看西南峰。丰碑屹立恣摹拓,老梅媚妩藏深丛。群山奔赴雪初霁,涧泉一夜添清潀。亭前置酒当日暮,山僧秉烛头如蓬。诗人循吏自有在,盛名饮啄皆为功。官长今无醉翁醉,岁事不见丰乐丰。时晴仆夫促更发,盐官行李殊怱怱。

答冯梦华太守次冯庵原韵

天道宁教裨灶知,忧时未用苦吟诗。一官江海归何日,满目流亡念在兹。竹木劳人 怜我拙,斗锺为德恐君疲。长隄障水无穷利,远迹涂山问导师。

大沽舟中闻友人谈都下近事

事亦有至难,百为无一可。千钧系一发,狂澜欲转柁。濯濯少年锐,侧眼自颐朵。 出门占同人,立谈侈负荷。江湖望南斗,中夜重起坐。之子亦可念,世路殊测叵。痴儿已见 几,谓迟恐不果。我倦答痴儿,月固不胜火。

灵苗与毒草,辨别几微间。可怜采药人,荷锄入名山。众中野狐禅,说法亦点顽。 白日真飞昇,何须论九还。群生无主宰,天实假神奸。我独念王子,仙骨非等閒。速化尔何 心,辛苦方跻攀。既茹不可吐,哽喉难驻颜。

百花洲楼成赠伯严

鱼鳞万灶俯蘋洲,突兀人间百尺楼。悬榻有心孰冠冕,撰碑无愧已山丘。欲东栾伯终吾师,豪举平原岂壮游。赋罢青蝇退无闷,料量诗卷载清秋。

同橘叟江亭看雪兼柬陶庵默园

西山寒色侵窗櫺,觑眼浩浩重关扃。并载耸肩冲冻出,尖叉冷峭谁当听。旧题年月暗尘壁,劫后好事如晨星。昨者旌旆照原隰,珠襦玉匣藏神灵。彤帷雨泪洒阳燠,光景似塞衔悲人。痛定亻区偻拨灰话,过市对酌倾空瓶。二客后至赴盛集,遥想宣劝杯无停。禁体号令严白战,主人拥被君当醒。当时入地报分寸,关心丰歉烦明廷。梦寐恍惚那忍说,瑞应屏绝还讲经。高寒天上试回望,玉戏切莫忘江亭。侔色揣称隔梅讯,故乡花事谈伶俜。

李经述

李经述,字仲彭,合肥人。光绪乙酉举人,袭一等肃毅侯,官四品京堂。有《李袭侯遗集》。

秋怀用昌黎韵

研精虑贵深,进学力务猛。涌地百斛泉,穷源必巨绠。造之为人功,得之为天幸。首基伊维何,纷华悉除屏。日月双轮奔,倏忽已灭景。抚躬益精进,灵台光冏冏。情田长良苗,心地锄荒梗。培养期中实,省察防外骋。贯通於一旦,奚事更端请。

吾宗长爪生,七龄赋《高轩》。云梦吞八九,气势黄河奔。神工运鬼斧,输般噤不言。虬龙喷墨雨,洒落砚池前。逸韵可以佩,奇气可以餐。㧐身摘屈艳,薈为昌谷编,编中惊人语,一可抵百千。始为奉礼郎,索米怜寒酸。玉楼召作记,长向冢中眠。乃知卓荦士,以才夭其年。

山谷诗横绝,一吸西江乾。拗节含古姿,球琳与琅玕。语语见佛性,以笔为蒲团。 造句若天成,韵险体自安。伤哉涪州谪,旁观泪泛澜。鼾睡不自戚,行囊一诗丸。放归鬓发 苍,吟声动征鞍。

感兴

凉飙振四壁,啾啾鹤鸣悲。宵长不能寐,百绪纷中驰。披帷览明月,夜气清明时。 逐往事已误,警来心孰知。空寒出古虑,懔默以自持。

结交竟何为,太息难复言。云雨互翻覆,变态日万千。今人非古人,话意徒缠绵。 神女游汉皋,珮解双珠圆。洛川步罗袜,朝霞映日妍。精诚偶一合,奚啻千百年。

岁华水流速,忧心石壁仄。抱疴医无人,知非救有术。纷驰十馀年,敛退始今日。 世人乐外营,达士惧中忒。虽勉勖前修,神明冀充实。

昔有素心子,抱袂时相随。今昔既殊势,恻恻令心悲。荃兰变萧{世攵},灌溉无能为。此地非京洛,素衣胡乃缁。古人乞食者,问君君岂知。

夏日即事

阅尽人情真常希,疏慵合饱故园薇。陈编尽有益师友,俗论原无真是非。性僻拚遭 河曲笑,心閒久息汉阴机。呼童抱瓮浇花径,一角西檐落晚晖。

顾此头颅百念灰,又看日影过庭槐。倦凭木榻学僧定,静掩蓬门为客开。兰有幽香时一至,蝶无宿约忽双来。眼前逸趣何曾少,不待山中更翦菜。

接屋疑牵岸上舟,此中偃仰百无忧。人生原自多磨蝎,野处何妨学饭牛。苍白惯看片云幻,输赢又报一枰收。冰丸风鲊无庸设,胸次萧然本似秋。

杨锐

杨锐,字叔峤,绵竹人。光绪乙酉举人,官内阁中书,加四品卿衔。有《说经堂诗草》。

院中秋暝

日夕天气凉,飒然秋已深。虚檐切穹霄,广院下层阴。浮云颓高望,荒飙寒远音。 冥坐易为感,孤怀下岖崟。南雁肃哀唳,弭棹清川浔。所思谅多阻,皋兰绚幽森。愿移淮南 调,且辍湘潭吟。无因盥尘虑,凄其江海心。

定远道中晓行

岩高石齿排云树,東火起寻江上路。岭头煜煜见明星,襟上涓涓泻凉露。露冷空山栖鸟惊,幽兰被径香风迎。道旁秃树似人立,林间飞瀑疑松声。石磴高巉碧峰顶,云气入窗行簥冷。木鱼晓动僧呗开,叫起西谿老翁醒。

过太原作歌

太原公子虬髯客,笑指并州作王迹。龙起虚传晋水清,至今犹见汾云白。此地从来 王者都,百年腥秽经胡雏。三河节概向谁是,段千田子今时无。摧轮倏登太行道,黄沙屯云 没青草。往者灾荒连四年,饱闻白骨高於田。古堠离离识官路,颓垣漠漠寻炊烟。朅来风尘 厌辛苦,鸣铗宵深代人语。只为肝肠报信陵,肯令口舌夸齐虏。莫辞且坐燕蓟游,有梦早到 金台土。固关东连人去稀,山川霸气两依微。晋阳莫问前朝事,惟有秋风数雁飞。

和南皮师除夕大雪原韵

腊酒嘘冻得软饱,年丰乐事快自了。冬雪再餍春犹封,霁色模糊垩林表。堆琼仍看 万瓦白,烛照不待三更晓。市人屡洴不龟手,天公惯戏玉龙爪。士如楚纩恒得挟,我愧袁门 独不扫。迎年爆竹讙岁除,家家仓庾登万宝。要丰餈饵馈邻里,更洁笥臛荐潢潦。尚书元精 耿虹贯,昭苏万汇古来少。驱蝗肯师梁公智,雨麦未神岐山祷。默知桃汛回百日,茭薪驿骆 催县道。九穴恐滋藕池讼,万城倚是荆郡保。今年大雪三袤丈,异事还谂百岁老。梅苞噤寒 不须吐,麰根呴温未应槁。瓶盘破裂惊粤洲,琼玉挥斥散台岛。造物无心无乃谲,行子归计 定愈好。春风入律释土膏,积润回栝被荑草。百滩若失去檝轻,绮岸馀花照苍昊。

闻官军收复准部四城

见说龟兹国,河源更尽头。羯胡终伏命,龙额会封侯。贰负尸仍梏,休屠像早收。 昭陵大小白,连日汗长流。

绝域通西极,平时万里疆。天徕汗血马,国集大头羊。水草千夫帐,旌旗六月霜。 似闻陈校尉,亲斩郅支王。 自拓伊犁地,频年费转输。先朝有深意,北徼绝强胡。异域归盟长,安边想庙谟。 明明四夷守,经国意何如。

瀚海封疆重,将军号令轻。准回初有议,中外本同情。贵胄仍专阃,獯戎屡畔盟。 终朝立行省,藩部比陪京。

甲子江南定,西征系圣颜。至今尧典在,回忆禹谟艰。王者真无战,中原不复关。 凄凉告庙日,云气满桥山。

过芦沟

柳色关河早带霜,危楼画角倚斜阳。天边候骑穹庐白,云外行人袴褶黄。水过田园同雁鹜,风来草木见牛羊。芦沟此处频回首,犹望西山气莽苍。

南苑

大红门外接郊坰,南苑秋风禁树零。被酒日斜桥上立,无人教放海东青。黄沙望尽草连云,芦管声高海户闻。射虎归来人不识,马前平揖故将军。

西海子

方丈蓬壶到眼前,团城雨过亦翛然。夕阳欲下觚稜去,遥见晴空水碧天。碧波黄瓦接瀛台,秋色芙蓉镜殿开。十刹海边人散尽,水禽飞过苑墙来。

关棠

关棠,字季华,汉阳人。光绪乙酉举人。官罗田教谕,改浙江知县。有《师二宗斋 遗集》。

送别余次襄太守

金飙一以动,行子趣南车。耿耿别所亲,悒悒过吾庐。秋阳惨将夕,词殚意不舒。 控驰马盘桓,忧来不可驱。喟兹叱清寐,奄忽终旬馀。性情失其宝,岂曰身暌孤。

峄桐无低枝,江鳇无细鳞。周镛无匿响,秦鉴无留尘。浩气匝圜低,杰士茹其真。 跌宕卑九阊,浪莽隘八垠。阴雨交所仇,世疏君乃亲。黄金众所锢,虏富君乃贫。大巧纳群 拙,誉善逾等伦。敦信变众诡,践诺无逡巡。志投岑范辙,或疑聂豫邻。黄唐慨予怀,俯首 一为君。

弱龄思绮合,才高致誉早。伯玉一匣书,雷动长安道。文章造平淡,斯人亦已老。 达者安坎坷,志士耻枯槁。归云载奋飞,他山覆瑶草。荆阳古炎隈,希霖一洒宝。

我拙不可药,卓立甘墨守。文家瘗残篇,入世羞覆瓿。穷窦暖清辉,劬书翳柽柳。

治乱究古今,持此永皓首。高情抒阮啸,对客箝在口。弱女等疗饥,羲皇遇尊酒。故人深忧余,歧路自分剖。励学惧无成,忳郁胡敢有。

过黄州

舟过浔阳后,江流第一湾。塔高千树月,草补半城山。野屋罗星宿,低滩剖玦环。 髯苏久不作,赤壁自萧閒。

去年小除夕邓献之先生自黄州来视予疾谈宴欢甚别后以诗见慰次韵奉答

先生一笑春如海,唤起寒梅病里魂。卒岁温燅消雨雪,新诗蕃衍长儿孙。胜游归后 久悬榻,僵卧别来今闭门。愿挟高情越溟渤,吟边独与太冲论。

己丑十九日由吴淞北行海中遇风雪二十四日大沽候潮用东坡出峡韵同伯晋苏生作

千花滞春江,遵海得清旷。十日溷芳尘,登舟寄孤畅。僬僬仆走下,床床客分上。乘桴九夷俱,望友三益访。旧雨新喜见,今游后难忘。笑语谷雷石訇,深谈溪泉涨。房蜂杂主宾,坩鲊错盆盎。宵卧纷酣梦,晨兴愕奇状。蜒雨昼既霾,沙雪宿加酿。风排群足跛,波震余心荡。膨腹杂若糟,涔头眩迷向。屏息求安隐,挥手谢供帐。屡簸豆跃箕,欲镕金失鑛。正命知平生,危想入谲诳。水裂蛟窟眠,漈落鱼腹葬。杌隉历昏旦,在险气逾王。窥窗挂桅镫,欹枕打船浪。众中能赌诗,病起讵扶杖。夺席肆幽探,倚壁接高唱。忠信愧波涛,颠连存想像。狂澜世终回,斯文天不丧。潮来丁字沽,矫首倏寻丈。

司炳煃

司炳煃、字煜兹、贵阳人。光绪乙酉举人、官仁怀教谕。有《宁拙堂诗集》。

题张叔平红崖碑后

张君好游复好奇,逍遥不受名利羁。东行泰岱西咸池,凌跨三湘吊九嶷。茧足不遗蛮与夷,直到吾黔罗甸之边陲。红崖山石如猊狮,红崖文字如龙夔。缩本、赝木相离支,怀古徒兴三代悲。何君不畏艰与危,何君不惮熊与罴。崖悬万仞身悬丝,阴气肃肃砭人肌。扪萝擗虺右手胝,摹拓岂任庸奴为。风神号怒山神私,忽跃忽叫交奔驰。夺其所宝心怨咨,旁人亦道君是痴。谓以性命博文辞,君方惊定神怡怡。大呼武侯报以诗,诗所难写记补之。柳公、谢公笔淋漓,仿佛如见磨砻断壁挥毫时。此图二丈如披帷,张之老屋气漫弥。毒龙猛兽相撑持,金仙蛮鬼杂怒嬉。日轮月殿云垂围,大圈小圈光陆离。云黄海黑风凄其,长画短画盘蛟螭。阴阳万象供炉锤,观者揖君相叫噫。或疑或喜或眦睢,口量手揣心是非。谓是好古邹君叔勣不及知,可怜甘受世人欺。吁嗟乎,可怜甘爱世人欺,岂独石鼓铭文岣嵝碑。

龙潜引

西宫日落东宫昏,妖星如月挂宫门。白气映射青红灯,黑烟冲蔽紫微垣。霹雳一震飞电光,排山倒海崩金阊。神丁甲马皆匿藏,平地水溢成汪洋。天吴海童恣颠狂,鳌掷鲸吞肆沸扬。跳荡鳅鳝从鲤鲿,掉尾喷沫鼓涛浪。目闪尸当蹊闯龙堂,欲盬龙脑脍龙肠。老龙负

子拏云起,敛须弥身为芥子。金银宫阙弃如遗,宝藏珠琲散若洗。败鳞残甲侣鱼虾,惊风骇浪走天涯。兴妖驾雾逐螣蛇,蚀月跃起金蝦蟆。狐鼠跳梁雄似虎,鸾凤失路瘦於鸦。镫残犹幸回光驻,棋输讵止一著差。君不见万里为鱼齐荡产,九朝如梦忽倾家,河山大地铺虫沙。

读明太祖本纪有感其语

元虽起北狄,主中国百年。后王纵不才,先帝德未谖。我祖与若宗,为民而受廛。渥受教养恩,太平享安全。一朝至顺帝,淫昏异祖先。英雄起草泽,四宇皆狼烟。明祖乃崛兴,宝位授于天。独夫放塞外,和林妻孥完。中山识此意,明言臣舍旃。上启圣仁心,宸衷矜且怜。诏书戒夸大,臣民禁哗喧。讵因子孙愚,诋毁宗祖贤。大哉开国主,谟训垂简篇。气象迈汉唐,度量包垓埏。至今诵其语,令人生慨然。

陆绍周

陆绍周,初名继周,字纯甫,宛平籍嘉兴人。光绪乙酉举人。有《陆纯甫孝廉遗诗》。

和陈级青

身世鲇鱼上竹竿,冬心独抱不知寒。论交四海同音少,有志千秋下笔难。阅尽风霜翻作健,愁来天地亦非宽。本来弧矢男儿志,离莫生悲聚莫欢。

和缪邰生游郊外

带水襟山地,登临眼界新。草痕迷屐齿,花气袭车茵。风物思吴下,清游拟洛滨。 人生惟骨肉,此外又谁亲。

梅文明

梅文明,字笑山,江阴人。光绪乙酉举人。有《笑山诗钞》。

李堡野望

塞外西风飒飒鸣,乱山堆里豁双晴。炊烟隐向云边出,落日遥从水际明。人立涧头牵马饮,妇归驴背襁儿行。万家镫火疏疏上,暮霭苍然直到城。

蔚州秋怀

叶下亭皋信已霜,捣衣声里杵碪忙。独寻野兴呼驴语,尽放乡心逐雁翔。环郭万山 遮远睇,凌空一塔点秋光。浮云无限苍茫意,黯黯无言绕客肠。

蹠远登高感浩襟, 唳鸿啼蟀付长吟。丘中貍貉争先后, 塞上风烟黯古今。侧望乾坤 双袖手, 自开蹊径一生心。零秋到处多蒲柳, 省识青青松柏林。

李将军射虎行

将军射虎南山中,虎尽射石石火红。归来却遇灞陵尉,将军失气亭上睡。天骄犯塞 来胡虏,将军视虏如视虎。诋欺偏遇主家奴,孤负腰间没石羽。数奇失道上所闻,将军死矣 谁败论。如今有虎射不得,碧尽将军一腔血。噫嘻!碧尽将军一腔血,将军而生眦亦裂。

王莹修

王莹修,字仲镕,号筠琯,闽县人。光绪乙酉举人。有《虚心斋诗》。

壬子除夕

海山风景此栖迟, 劳我精神且祭诗。厄运当如填债满, 钝才祇合卖痴宜。河汾旧学 承中说, 荆楚前尘话岁时。羡汝遐陬人故故, 翻新日月不曾知。

胡延

胡延,字长木,号砚孙,成都人。光绪乙酉优贡,历官江安粮储道。有《兰福堂诗集》。

题真定店壁

喜唱高梁出塞歌,忽随南雁渡滹沱。四山落日连恒岳,万井空城吊尉佗。饮马雄心新鬓发,飞龙残梦旧关河。鼓行背水皆陈迹,取次登临古意多。

天全杂诗

昔闻徙阳地,亦是西南夷。蒟酱相如说,碉楼吕越知。未应夸广泽,且可界渝糜。 牛马何曾富,徒劳八尉师。

万顷鸦龙水,来从青海湾。漉金沙共宝,裁砚石同顽。比户甘黄菽,当关列赤菅。 头兰千里外,一一拥螺鬟。

登登敲炭灰, 岚气逐人来。终古三更雨,何曾一夕雷。碉门红石崛,野店白麻开。 忽地呗啰出,居人身毒回。

赤脚溪边女, 呼嚎唱采茶。界门惟酱醢, 入市且鱼鰕。月黑频喧礟炮, 风清偶送笳。 王然如裹足, 僰道是天涯。

井陉

井陉西上秋色徂,道长日短愁仆夫。七十二滩不可逾,负重难为辕下驹。翠云十斛岩玉瘦,黄叶一亩霜林腴。磵中石出水生骨,岭上草凋山脱肤。溪童泼刺健似犊,往来负水能疾趋。我独何为行在涂,天寒不归对妻孥。白醪一尊作重九,冯辕手撷红茱萸。侧身西望长嗟吁,閒吟莫待清景逋。

栈中与西藏贡使同行感而有作

画游吹角风参差,翩翩骑马红衣儿。丹顶影ネ婴大堪布,来琛竞裹三千辎。我闻达赖号迦叶,匹者班禅通法偈。西来膜拜天可汗,神京高筑黄金龛。佉卢译字偁无上,青青稞米乌斯藏。四骆骎驰为煮茶,二招复沓还输酱。朝廷控驭假班牙,白布红毛休怨嗟。不遣文成通赞普,聊将护国奉思巴。那知天辟三危地,南风吹断夫容利。牛粪欺人取道来,横分印度东西帝。昨者强邻强制吭,不赢不马乌孙王。筹边空建王然策,内附无闻悉怛降。於今环海成庭户,已见岛嵎陈普鲁。铁轨能教阿瓦通,电书那虑流沙阻。云栈萦纡草树春,东风啰呗动行人。行人漆室方长叹,嗟尔嬉嬉燕雀群。

送刘蔚棠省亲南归

十年幕府刘公幹,日日思归此日归。携手送君杨柳陌,关心游子芰荷衣。独怜越鸟 巢枝隐,应有江鱼入馔肥。莫使将军怀揖客,戟门南望彩云飞。

左将军歌

东征虎将花门种,白幹朱丝号神勇。涅臂长悬报国心,生来惯识祁连冢。幼抱犀渠 作健川,塞旂早结上公知。红绡抹额黄皮袴,得意摩天苦战时。论功首重桓虔武,凯歌自和 逻沙舞。莫作寻常蕃将看,哥舒仆固羞为伍。闷杀亲娘曹景宗,鼻端出火耳生风。朅来收拾 穿云履,也向天街蹋软红。百战功名等一掷,枭卢未辨争先得。狂撑大眼睨公卿,酒酣无那 肝肠热。空怜岁月去堂堂,揽镜忽惊头上霜。携得琵琶红袖妓,夜寒如雪按伊凉。此时鳀壑 气尤恶,海壖星子纷纷落。铁轨南通俾路芝,越裳甘弃同瓯脱。从此将军气转豪,岛嵎虽重 主恩高。不教日压秦长脚,空有天生刘大刀。联枝跗萼称同气,斩关破贼真吾弟。长向朝阳 望捷书,可怜夜半凶书至。春风泪洒脊令原,反斗终怀国士恩。祇有拊膺长痛哭,不辞剪纸 与招魂。忽闻传箭追穷寇,困兽凌兢殊死斗。赤峰明月踏营归,血腥裹甲三重透。雕戈早晚 镇高州,都尉连章苦慰留。盼煞桄榔船上客,巫闾目断白云秋。无端骤长邯郸虱,败盟毁约 思蚕食。白旄倏遍萨摩州,红帽如闻平秀吉。水犀十万下三韩,列幕连营袖手看。重英不动 清人轴,一箭谁登广武坛。将军怒马奔如电,提刀愿识罗浑面。我今一死何重轻,不畏前驱 惭后殿。鸭江流水渌汪汪,六月炎蒸鸟不翔。汗雨白沾铜面具,火云红映绿檀枪。酋矛散漫 难成列,虎气腾腾呼杀贼。但使连衡共捣虚,定教执燧探龙穴。八道花旂迤逦排,红衣礮炮 劈两山开孤军已被重围合,不见沈舟项羽来。森索妖星迷赤雾,睢阳齿碎天将暮。红镫白酒 贺兰营,曲误方矜公瑾顾。月晕重重闻楚歌,洞胸犹握鲁阳戈。仲由缨结那惜死,国势不张 将奈何。从今狂寇逾三塞,海门不守长城坏。藁市终悬懦帅头,中原赢得逃兵在。又见长编 纪北盟,符离一溃误书生。万金币去龟阴返,祇恐忠魂恨不平。

明忠顺三娘子画象歌

蠙珠缀耳围双貂,绿韝控马飞鸾绦。天风吹动周昉笔,胭支漉汁倾生绡。拂云堆外小垂手,春深留取边关柳。银须冒顿剧风流,纂得外孙为幼妇。桃殭李代早春时,不遣斑骓嫁袄儿。红镫毡幕羊羔酒,从此青山罢贰师。解忧下降真游戏,中朝漫洒江都泪。何用重围画美人,翻新更出陈平计。失妇封胡怒且羞,腰刀帊首走皇州。申申莫听黄婆詈,格格还封孺子侯。天书朝下泥金色,诏敕阏氏安反侧。娘子军前兔首云,夫人城上蛾眉月。雄威不竞

仗雌风,长见珠帷驻大同。侧鬓低呼乾阿{弥女},翠钿微溜颊涡红。挏酒如泉杯转递,踏歌悄听娇音脆。红云骨杂换新妆,铃卒偷窥魂欲醉。避面尹邢花两行,天教重嫁左贤王。不劳须卜归严卫,永使蠕蠕走大荒。三醮犹能逢赞普,琅琅啰呗飘神雨。抛弓膜拜白衣郎,楼上横飞干道乳。陈汤傅介等閒看,叉手终依天可汗。谁遣恒河偷照鬓,春愁如水压雕鞍。马市重开天驷蹶,黄花堡上秋云黑。筹边都尉尔何人,鸳被虫钗充玉帛。犹记璇宫夜召时,牂江驰传凤车迟。更烦小李将军笔,为写且兰女土司。

感事

青油幕底客弹冠,博士留秦羡美官。四野共知温树好,三秋那识井梧寒。引绳可碍狂夫直,榜户常教冷眼看。太息水平风忽险,更从何处觅任安。居兰处鲍总相宜,台底频加十二棋。金瓮不妨垣外耳,白云常染镜中丝。同园忽长弹蕉竹,落釜应惭煮豆萁。犹幸九渊龙喜睡,探珠回首纬萧时。

北齐宫人镜歌

马颊山倾堕壶月,绿丝萦纽虫书齧。美人抱月思太京,对脸传红红欲滴。凤旌片片下清漳,湿萤满殿秋宫凉。雁柱无声虬箭咽,黄花叶落愁鸳鸯。绣籨黯退盘龙帊,丁香又送潘妃嫁。犹忆君王逐獭还,圆冰悄对残妆卸。汾阴缥缈鸣鸾车,紫绦银带埋尘沙。香词缭線那忍读,金鹊飞飞春日斜。

题太原店壁

才听晴鸠忽雨鸠,麦天凉气似新秋。绿阴遮驿马行缓,不觉夕阳红上楼。西寨村边 乌牛字牛,乱山何处觅潜丘。客途最好逢三月,杨柳飞花水满沟。

宁武刘夫人箭

森索妖星动赤埃,蒙阬不守雁门开。长驱无阻吹唇疾,宁武关头一箭来。惜哉一箭但中目,噀血天狼能齧镞。连飞一箭殪其雌,狐狸不得上门屋。大小眼贼相持哭,小眼含泪大眼瞋,眼开眼阖光瞵瞵。如此善射信有神,周将军妻刘夫人。夫人善射贼胆落,丁零无声夜张幕。可惜援兵阻太原,婴城力尽张空彍。荷叶坪荒走封豕,抽刀不断牛涔水。恨眦欲裂银齶穿,母子父妻火中死。贼心虽喜犹仿偟,前途虑有张睢阳。系帛书来贼乃北,迎降苦恨云中姜。当时寇盗犹癣鳞,草间偷窃同黄巾。中朝女子解破贼,萧山沈与忠州秦。绣旂沁水如云屯,即此足可清烟尘。何况更有卢宜兴,雁门尚书同被徵。祇缘误用李曲沃,南征复任杨武陵,庙谟颠倒诚难凭,金床看看妖兔登,令人怀古悲填膺。至今革兰服藏州库,神光丙夜连句注。碧血模糊赤雁翎,弯弧想见飞虻怒。此地犹来重名节,宵筵铜斗飞冤雪。殉夫昔有代妃贤,殉国今见夫人烈。殉夫之笄名不磨,射贼之箭终不灭。吁嗟乎,箭头不过三寸铁。

成多禄

成多禄,字竹山,号澹堪,吉林人。光绪乙酉拔贡,历官绥化知府。有《澹堪诗草》。

移家

柴门一曲抱江斜,暂息尘劳向水涯。天过重三犹带冷,邻非元九也移家。辙寻深巷 人初到,径扫空庭鸟不哗。何事静中参妙谛,画眉声里落群花。

送刘仲兰之呼兰

留君留君去不顾,寻师独入云深处。秋风库叶一扁舟,斜日伊兰千里路。庚寅之岁喜初逢,我与君家一巷中。气象汪汪黄叔度,照人剪水点双瞳。清谈从此留真赏,夜话篝镫时来往。得逢好友旧盟心,欲索解人先鼓掌。周簠秦彝汉瓦文,图书金石两纷纷。画家自古传三昧,书法于今重八分。蓦地祖刘中夜起,方觉雕虫技小矣。男儿生长天地间,不能为将宜为使。鬓发将凋可奈何,坐令勋业久蹉跎。我闻此语为君壮,燕赵相逢慷慨多。金源自古称雄郡,残碑断碣无人问。偶然名士著名邦,斗觉山川增气韵。此时耳热酒初酣,别绪唫秋与澹堪。他日边云回首处,荻花枫叶满江南。

晓行

出关黄叶欲飞时,京洛风尘绿鬓知。万点残秋萦梦毂,半竿初日上鞭丝。策时才愧 陈同甫,思旧情深向子期。笑我征人无一事,且行且止且吟诗。

宿望梅店

鸦盘远势欲黄昏,我亦随鸦入此村。山小於拳浮岸脚,潮平如掌齧云根。寒烟影里僧归寺,黄叶声中客打门。杯酒盈盈殊解意,好销尘梦醉诗魂。

寄怀于次棠师

跃马横戈事总虚,辞家剩有一囊书。深尝世味文难信,沈醉离怀酒不如。幕上春风 巢燕子,江边秋水梦鲈鱼。他时杯酒重逢处,好是黄花九月初。

汉家

汉家西狩感君王, 蘦落芜亭麦饭香。当日移宫纡策画, 几人专战误平章。龙颜泣下 秋风暗, 马首悲生大月凉。千古党魁谁召祸, 秦关百二感苍茫。

庚子塞上作

万帐貔貅大野开,风声怒挟阵云回。天留一线容西上,地尽中原此北来。谈笑公卿 王猛意,仓皇戎马李刚才。深宵无限关心事,卷入胡天画角哀。

莽莽平沙卷大荒,当年圣武定全羌。汉家佗尉蛮夷长,唐代浑瑊异姓王。册谱球刀 诒法物,图开日月近宸光。兴源待里尊藏处,犹见河山带砺长。

拂剑高吟《敕勒歌》, 酪浆挏酒舞婆娑。黄龙誓饮金乌朮, 白马难盟药葛罗。危局百年沈黑水, 长城万里划黄河。青燐白骨秋笳集, 墨渖新从盾鼻磨。

辕门画鼓乱驼鸣,落日川原碛路平。估客蜡书通敌报,胡儿绕帐听吟声。旌旗占断 金源路,碪杵催残木叶城。草泽即今扶义起,相公何用受降名。

谒朱研生师

采药寻师海外天,归来身带五湖烟。思量劫换红羊后,仿佛经谈白鹿前。吴苑高吟招月共,怡园狂醉抱松眠。自怜江上閒桃李,虚领春风廿五年。

横塘夜泊

出城二十里,孤泊近渔矶。到此橹声渺,悄然人语稀。夜深饥鼠出,水浅乱萤飞。 言念山中侣,停琴待我归。

度兴安岭访宋铁楳观察

云车穿出洞冥冥,形势东来若建瓴。王气遥浮全亚白,长烟直下大荒青。人家水近 牛羊老,战地风高虎豹腥。吟得安西都护句,好骑羸马勒新铭。

同朱古微侍郎刘伯崇殿撰郑尗问中翰胡右皆观察集沧浪亭

六一吟残世已遥,孤亭寂寂草萧萧。秋随天上卿云到,人共山中旧雨招。拨藓细寻墙角字,惜花深立藕边桥。他年谁作沧浪长,词客风流问六朝。

扫尽边愁天地宽,奇怀不减且为欢。无端笑傲偏宜酒,如此疏狂岂称官。风定蝉声摇草树,夜深萤火乱杯盘。临流颇忆渔洋语,拟带笭箵与世看。

赠吴缶庐

大句崔黄叶,衰年杜浣花。高怀付樽酒,凉意泻琵琶。我亦耽吟咏,因之感岁华。 朝来揽明镜,秋思满天涯。

游李公祠

树老菭荒石气深,名园名相此中寻。全淮勋业来苍莽,五省馨香照古今。交外难平 天下口,收吴先定老臣心。吾侪不用寒花荐,王粲高楼试一吟。

帷幄刚筹便誓师,胡曾并世见才奇。良弓高鸟无多忌,老圃寒香又一时。全局存亡 丞相表,大风攻守汉皇诗。中兴人物今销歇,愁倚深秋古柏祠。

送星阶入都

侧帽轻鞭趁晓风,飞车重踏软尘红。金钱下策弹张说,丝竹东山老谢公。九漠风烟雕顾盼,廿年兄弟雁西东。好将三叠《阳关曲》,谱入河梁夕照中。

赵家名璧重连城,奉使乘查壮此行。静女何须伤晚嫁,偏师犹可振危枰。鹏游大澥 秋无影,马渡长河夜有声。欲脱宝刀还自惜,几经肝胆照平生。

歌残玉树冷宫鸦,铜狄摩挲日易斜。几处边声惊筚篥,一腔幽怨诉琵琶。好游敞市招新雨,莫上江亭问落花。洗马临歧一怊怅,不堪垂老又天涯。

江月江花照我颜,绕庐春水碧如环。微吟浅画閒滋味,瘦策宽鞵独往还。我自芝薇 怀世外,君如兰雪在人间。归来莫忘渔洋句,江上蓴莼鲈话故山。

乌拉怀古

虎踞龙蟠拱上京,当年雄长此间争。狼烽已靖孤城在,乌拉犹存四部名。断垒十重 摇树色,大江三面走秋声。老来别有兴亡感,不向西风诉不平。

将军冢与故侯门,玉爵金鱼话旧恩。一自素波愁帝子,独留芳草怨王孙。宫禾踯躅 遗民泪,塞树飘蘦宿将魂。且喜白衣宣召少,此乡端合老梅村。

抱山展墓

平明登抱山,树静栖羽寂。长跪酹佳城,往事思历历。我父卒丙戌,葬日雨淅沥。前母乃同穴,负土坚四壁。其地湿且卑,我心常戚戚。丁酉惊盗发,白日飞霹雳。恨无汾阳兵,志此徒悲激。罪人幸而得,沈痛那可涤。我母复见背,牛眠此中觅。风雨感崩防,迁徙同辟狄。伤哉乙巳春,万古漆镫阒。东西南北身,展转捧毛檄。二年出守绥,三载书考绩。推恩及九泉,襃赠膺殊锡。君恩日以深,亲面何由觌。况当八表昏,满眼愁锋镝。华屋与山丘,险过矛头淅。生儿亦何用,往训空启迪。春秋缺瞻拜,祸变同疏逖。默数生平罪,擢发岂足析。仰观松楸寒,雨泪纷纷滴。

忆榆庐

松花江之西,有村其塔木。历历双白榆,扶疏绕老屋。遐思龆龀年,我父教我读。每书必亲钞,篇篇当削竹。每句必口授,记诵耳须熟。朝曦连夕镫,慈训为家塾。我母尤锺爱,时恐遭笞扑。朝送屋角东,手为栉与沐。暮迎屋角西,食以果与肉。其时榆正新,风动钱蔌蔌。我亦随风来,满院争相逐。有时披绿阴,嬉戏当彩服。二老开口笑,谓我如黄犊。忽忽四十年,此景宛在目。一身倏东西,万事同转烛。自与此庐别,迍邅泪盈掬。我父先见背,家室几颠覆。中经庚子乱,负母窜山谷。白头感冰霜,越岁弃我速。十年走龙沙,忽变橘中局。世外惊沧桑,宵中泣莪蓼。游子悲故乡,归来话樵牧。乌刺好江山,考槃水一曲。爰居避鼓钟,时向东门伏。鱼思故池泳,乌恋旧巢宿。况此鲜民身,往训思顾复。先庐一已荒,树老枝叶秃。頫仰万古天,长歌以当哭。

简张半园

院花有客圣于诗,诗律精严晚更奇。天半笙簧珠错落,酒中芒角骨嵚崎。何尝哭笑 同遗老,岂独风流是我师。颇忆子京修史地,两行红袖写乌丝。 风满西楼夜不扃,元龙高卧饷群经。偶携笠屐宜新雨,稳把纶竿是客星。宛宛吟蝉 双鬓雪,遥遥归鸟一天青。何当鸡黍三年约,共上龙沙万里亭。

澹堪杂诗

吾家墙之东,云水一庐小。菜圃杂菊畦,种得花多少。新柳垂万丝,好音坐幽鸟。 别院寄妻孥,人事一无扰。牙签三万轴,枕馈忘昏晓。遥想云中君,吾意方缥缈。

老友林琴南,写图远寄我。虽未至吾庐,位置似亦颇。大江日夜流,襟前复带左。 老树听吟声,满地松花堕。白云时出入,幽扃浑不锁。即此有声画,谓之诗也可。

潇洒诸葛君,澹泊以明志。我无古人学,而师古人意。当年守一麾,偶以官为戏。 拂衣归去来,甘为世所弃。闭门老著书,松鳞落幽翠。寄语热中人,吾僎与子异。

京华有故人,招赏西山雪。吟鞭逐寒影,遂与吾庐别。人皆憙清凉,我独畏炎热。 自惜洁白衣,常恐缁尘涅。何如老圃花,寒香争晚节。曰归复曰归,聊以守吾拙。

好山喜我来,螺黛绘深浅。怪石待主人,僵立殊偃蹇。我感山石意,花径行宛转。 入夜犹寻诗,露湿衣裳软。镫花自开落,幽静不可翦。时闻华子冈,人定一声犬。

幽人早起时,初日未挂树。微闻草木香,群动澣清露。我思陶隐居,曲閤入烟雾。 北窗卧羲皇,未必得此趣。持帚扫白云,不令白云住。生恐尘世人,认得云深处。

我生何所求,与物本无竞。得庐便已足,况复极幽靓。檐树咽晚蝉,窗月飞孤镜。 人语出幽丛,小院绿菭净。何必期长生,安居自却病。珠柱怡我情,玉杯悦我性。

别厂而曰堪,实一土屋耳。有古陶复风,此意差可喜。白发老诗人,萧然水云里。 荒径长菊松,小园遍桃李。兰成与彭泽,前身毋乃是。白水寄神交,长怀古君子。

乌刺古江山,风物秀而野。忠毅与富察,其人皆健者。赐第成瓜田,荒祠賸穨瓦。 陵谷一变迁,侯王亦已假。何如高节义,声名震天下。所以胡澹庵,千古皆其亚。

遗民周之馀,大隐南山麓。习习清风生,美人慕空谷,淋漓寄诗酒,欢笑杂歌哭。 华发已满颠,踽踽行犹独。遐哉邴管风,邈矣顾黄躅。兰室有清芬,芳邻吾其卜。

赠宋芝田侍御

一疏居然动九阍,河山虽改片言存。先芬远谪曾金齿,此老生还入玉门。铜狄吟秋 馀涕泪,铁函著史自朝昏。平生意气倾湖海,欲话新诗酒满樽。

散材心迹议郎名,白发青衫也自惊。卓荦幼安容片席,萧条庾信话平生。十年燕市 黄花酒,万里秦关落叶声。一样天涯感今昔,壮心直气总难平。

九日陶然亭独坐

西山青到谷为陵,谁向荒亭问废兴。半老年光秋似嫁,独来风味野于僧。乡心满地 滋鲈脍,兵气缠霄引雁绳。欲折黄花还自笑,白头傲骨两崚嶒。

次郑苏戡先生韵

胸中五岳郁风雷, 琐琐雕虫枉费才。解道横空盘硬语, 华山云气划然开。

地接沧浪天蔚蓝,华严境界记同参。香南雪北多常句,逸响谁寻落木庵。

于云赞

于云赞,字夔仲,慈利人。光绪乙酉拔贡,官攸县教谕。有《迎曦堂诗存》。

周上制剑

考工桃氏职为剑,万用高曾守不变。遗制空存遗器亡,坐规成法目如眩。一鉏劚出苔花班,隔三千年与相见。把剑按记穷心思,名义程法两得之。茎颈后喉按剑首,腊形象鬣 閷旁披。承身隆起即为腊,黄钟之数繇此推。以腊校茎茎长倍,双后匝轮中茎施。身五茎长无参差,合之古制称上制,易田说剑真我师。吁嗟嚱!嬴颠刘蹶今何有,一剑完好落吾手。嗜古性成少不廉,比是贫家矜敝帚。目穷之罘探鸟虫,手攀岣嵝拓蝌蚪。得此差足证遗经,校勘分寸陈编守。祇恐四海望澄清,会当一麾出神武。君不见,三尺龙化翔神霄,云雨须臾周坰郊,安用累黍徒锼雕。

登狮子岩示徐生

谁倩倪迂洒画毫,狮林累累出平皋。行滕孤往吾犹健,绝巘同登子可豪。远听秋声动寥廓,俯临云气匝周遭。雷峰西下山千万,一障东蟠此最高。

勒深之

勒深之,字元侠,新建人。光绪乙酉拔贡。有《门龠三宝斋诗》。

钓鱼咏

钓鱼有大欲,所贵在钩曲。钓鱼不谋食,所患在钩直。曲钩钓鱼鱼满筐,直钩钓鱼 鱼远扬。人钩如彼我如此,宁怪得失不相似,何如去作沧海游,世间应有任公子。

团扇吟

人事有离合,明月时亏盈。裁纨制团扇,昭此中心诚。纨素岂不洁,爱恶殊其情。 团扇岂不嘉,循环葆其贞。招招弄玉手,习习凉风生。因风讬方便,愿入君怀清。君怀无由 开,妾恩将焉呈。 团扇如玉玦,宛转无端倪。物贵妙於用,曰人固其宜。用行而舍藏,此理我则思。 嗟哉班婕妤,弃捐亦何悲。

题张少伊廉访剑女图

击刺之术久不作,猿公越女空传疑。锦衣玉貌者谁子,攘袖轩眉斯亦奇。浮尘莽莽 自今古,浩劫茫茫未转移。省识图成心独苦,请君看取几男儿。

至福州

巨镇东南气象开,嵯峨城堞倚星台。无情岁月闽王老,残喘河山胜国哀。地接夷蛮 资控制,天生沧海走喧豗。我行自慰趋庭愿,不为兴亡浪费猜。

春草

野绿浑无赖,怜伊讬蒨林。绵绵远春意,了了隔年心。永忆搴芳侣,陈踪不可寻。 瑶笺苦延伫,凄断梦痕深。

白永修

白永修,字澂泉,平度人。光绪乙酉拔贡。有《旷庐集》。

青竹杖歌

男儿不得遍览天下奇,荒村埋头如茕嫠。几度赍粮甫欲出,行蜗复缩故壳栖。忽然 两腋生羽翼,腾骞身疑跨蛟螭。五岳饱看日未晏,时闻耳畔猎猎寒风嘶。握中不知是何物, 但觉滑润胜琉璃。谛视始惊一竹杖,乃葛仙翁之所贻。质坚色净高九节,太乙不敢夸青藜。 嗟余微生逐蠓蠛,仰屋著书自笑痴。未与仙翁有夙分,何来投赠蒙提携。得非游痴结胸往, 无力造物哀我穷黔黎。归来高挂那敢拄,晓色著壁横苍霓。杖兮杖兮勿化蜿蜒去,扶我更上 青云梯。

神清宫

山脚夕烟横,披烟谒上清。云中樵客斧,天际羽人笙。入户群椒矗,升阶万竹平。 虚堂绝尘想,岂复梦魂惊。

题少隅诗卷

猎猎长风吹日沈,老松千尺作龙吟。径携仙人绿玉杖,来听太古朱丝琴。岭头孤月一何净,浦口暗潮相与深。不识寥寥天壤内,几多倾慕讬知音。

葛金烺

葛金烺,字景亮,号煜珊,平湖人。光绪丙戌进士,官户部郎中。有《传朴堂诗稿》。

十三夜雨寻霁枯坐篷底一镫荧然感事怀人悢悢不已叠九日黄楼韵

愁人坐愁日兀兀,归心勃逐征鸿发。暝合极浦帆影迟,雨收隔岸屐声滑。伊人乃在秋一方,何处凌波见罗袜。芦摇残滴时作声,如鱼唾沫闻喋呷。悬知今夜山中人,快趁一犁负长锸。水程羁梦梦难归,风影刮镫镫乍杀。冥然入定辟支,恨不将身皈梵刹。破篷留隙吟商飙,宵深时答响吚轧。峭寒刺面殊洒然,知有霜华篷背压。清景一失逋难追,欲补已如齿成齾。东方渐高岸标沈,葭薍从中闹鹅鸭。吟成凄绝不忍听,柁尾水惊流霅霅。

寓斋即事

避地得幽憩,闭门风雨寒。如何天宇窄,不抵酒杯宽。四海正多难,孤怀殊尟欢。 随身几点泪,未敢向人弹。

题张船山诗集后

酒酣忽吐惊人句,飞向峨嵋化白云。剑气纵横馀万里,珠光闪烁仅三分。性灵笔妙 元无敌,仙佛才兼迥出群。落落孙洪亦豪宕,当时敛手共推君。

于齐庆

于齐庆,字海帆,江都人。光绪丙戌进士,改庶吉士,授编修,历官广东提学使。 有《小寻畅楼诗钞》。

闻警次石逸韵

薄宦身如寄,忧时泪欲倾。韬钤徒话柄,草木亦军声。糜费金无算,仓皇卒践更。 诸君皆柱石,何以慰宸情。

庭荫惭桃李,家风足黍黎。新愁哀雁语,旧恨夜乌啼。禄薄难言养,巢危尚忍栖。 长安桥上柱,留与长卿题。

贺喻志韶归第

门前桃李报花开,官酒亲尝第二杯。此日幸陪闻喜宴,当时几失轶群才。吾皇有意 求龙比,君辈宁徒学马枚。青甚於蓝冰甚水,相期勋业在云台。

笼鸟却寄关中友人

一落樊笼不自由, 嘤鸣无复旧同俦。印留白云空陈迹, 梦入青云悔壮游。比翼早辞帘幕去, 失身岂为稻粱谋。最怜风雨漂摇后, 索母孤雏语磔辀。

陈遹声

陈遹声,字蓉曙,诸暨人。光绪丙戌进士,改庶吉士,授编修,历官四川川东道。 有《畸园老人诗集》。

滹沱

與卫寂寥野店秋,滹沱唤渡已无舟。汉宫练被三军劫,晋帝鞭为五骑留。几处荒烟 炊豆粥,深宵趁月渡芦沟。芜蒌亭子饶阳路,羌笛催人易白头。

江东

水阁歌船宴虏酋,停杯听唱白浮鸠。忍将燕北伤心泪,付与江东捉鼻讴。元老清谈 俱庙略,新亭对泣亦风流。为询折翼陶都督,可有偏师出石头。

回銮

回銮喜见旧慈容,烂额焦头俱策庸。辨色仍临垂拱殿,伤心怕听景阳钟,已闻大夏 通新使,莫向临春问旧踪。今日东朝亲召对,隔帘涕泣说神宗。

中秋夜颐和园直庐

旷籁寂思虑,直庐饶清秘玉漏响沈沈,声递宫花外。谁家宴西园,夜半发歌吹。怅 触羁旅情,竟夕不成寐。秋月照关山,千里共明媚。遥忆故园人,娟娟坐相待。

枯莲摇碧漪,冷露瑟金井。秋寒鹊高飞,风紧鹤知警。水自玉泉来,到地声始静。 清波摇帘隙,万籁澄秋景。宣室未可议,闭门杜造请。天阶凉如水,夷旷绝人境。开窗延晓 色,残柳梳月影。

江村

夕阳红沁蓼花根,枫树无声白鸟翻。鸟柏人家黄叶寺,青帘酒市绿橙村。蒙庄齐物 鱼知,渔父忘机鸥到门。鸡犬声中人语乐,何须世外问桃源。

雨宿偏岩子

舟人知风雨,泊舟偏岩子。日脚漏微红,电光闪黯紫。茅屋两三家,大风撼不已。 山川杳霭中,云树模糊里。行人擎破伞,唤渡候江汜。渔父棹船来,披蓑卖鳊鲤。米颠坐泼 墨,一幅好山水。

江行杂诗

浙涛如白马,蜀险度黄牛。风雨销归兴,江山助壮游。宦情随水落,乡梦逐波流。 帆影岚光外,依稀见庾楼。 客路忘行役,船窗杂笑谈。云烟收楚北,风雨渡江南。鸟白山逾碧,螺青浪泼蓝。 天晴山寺现,微月上松龛。

风物如全盛,江山已破残。淮盐都改掣,唐镇旧迎銮。鳌负三山重,蛟嘘六月寒。 鸡鸣京口泊,镫火隐渔滩。

船出焦出口,东方已破冥。人惊双鬓白,山为六朝青。梵呗松寥阁,梁碑鹤冢铭。 晓峰开画幛,环列似围屏。

游金山用东坡韵

东坡蜀人游江南,我宦西蜀归东海。两人踪迹异而同,山门玉带今何在?去年滟滪触危陀,几将性命付洪波。出险一路卧看山,蜀山奇於吴山多。扬子江中晚舣楫,树脚山头衔落日。秋波细蹙云鳞碧,长鲸返掉霞尾赤。系缆登山山径仄,初三无月丛林黑。窗隙微露佛镫明,拨径敲门僧梦惊。开门相见不相识,瓶拂挂壁无长物。留我对榻谈名山,极言吴秀而蜀顽。夜半舌乾辩不已,煮茗呼吸中冷水。

放船

鹅鸭声中打桨行,放船天气趁新晴。风吹水面鳞鳞皱,波到桥心贴贴平。绿树炊烟 千缕直,青山夹岸一帆轻。渔村镫火穿篱出,舵底吟诗待月明。

题兰亭壁

又见兰亭土木新,题名勒石是何人。更谁知读《冬青引》,合祀当年六义民。

病起寄吴四杭州

卷帘不见草萋萋,鶗鴂畏寒向我啼。病久竹妨行药径,春来水涨浣纱溪。篱边卧犬惊花吠,雨外飞鸠觅树栖。遥想孤山残雪里,看梅人立断桥西。

午眠

炉香初爇茗初烹,一榻萧然暑气清。梦醒蝉嘶桐叶院,秋来虫上豆花棚。消閒棋酒过三伏,权领图书拥百城。小院疏帘无客到,抛书欹枕听鸣莺。

秦树声

秦树声,字宥横,一字晦鸣,号乖庵,固始人。光绪丙戌进士,授工部主事,召试 经济特科,历官广东提学使。

题朱古微同年霜腴图

战胜萧辰道自肥, 其如百卉已云腓。倚语私恨灰心晚, 舞镜终疑惜羽非。凿齿大风

同日月,腥鳞涎甲满裳衣。夏黄公亦岁寒侣,收肃琼明一钓矶。

述怀

羞将蝉翼博千钧,牢落乾坤兀此身。梁国物情真吓鼠,鲁郊吾道未伤麟。谅无肝胆 酬斯世,薄有襟裾拂古人。若道干戈堪养拙,夜吟无可百篇新。

为曹纕蘅书扇

乌咽中江入海流,知君清坐不胜愁。鲁戈过眼空三舍,宋铁伤心尽九州。自古武夫 避黄发,於今吾道属苍头。人间合有蟾蜍寿,书剑临风涕未收。

赵次珊馆长重葺舫斋用朱{艹尗}堂韵自述属和

议兵尺籍亦空虚,莫愧荆卿剑术疏。楚国丘墟留宋赋,汉家忠孝属班书。朔风忽送 高斋雁,斜日微噞浊水鱼。羡杀昔贤悲夜雨,寂无情感到胥馀。

壮心耻作嬖人奢,投老佣书两鬓华。许我千秋惭刻鹄,负公一事是涂鸦。荒凉寓县 元和志,汗漫星河博望槎。景范以还无述缀,未知敝帚在谁家。

薄持愿力即天魔,十载经楼枉杜多。差喜羽陵留蠹简,不愁钓渚起微波。寸阴鼎鼎 驹隙,一适悠豕渡河。莫道陆沈赢老泪,要分一掬点吟窝。

挽顾亚蘧

死生有海沦甘蔗,穷达无天补女娲。乱世故人如落叶,清时言路漫含沙。志蜍误国 诚堪惜,婴蚡同朝孰不瑕。况复翠微可将息,破甑何事种何芽。

猿跳象掷竟纷纷,正始遗音可复闻。羽扇中流失元帝,金徽一世误文君。女萝山鬼 幽修语,渴鹿摩尼习气熏。赢得屠门留故步,侍郎排闼是杨云。

为人题画兰

裛露不掩骨,临风忽断肠。王者久不作,知君为谁香。

有人亦自芳, 岂必恋空谷。弃置乃偶然, 天命期无辱。

寒花有晚节, 犹伤天地秋。虽各一时秀, 论心耻与俦。

缪祐孙

缪祐孙,字柚岑,江阴人。光绪丙戌进士。历官户部郎中。有《稽弦诗存》。

观唐昭宗赐钱镠铁券

镂金煌煌字三百,咨尔彭城上柱国。镇海镇东开军府,持节中书太尉职。媲汉邓骘卫孔悝,襃德策勋视斯敕。有唐吉金经千年,懋典法器稀流传。重以浩劫遁濩落,既失复得宁非天。台州诸钱始南宋,守器曰忱贤不惷。翠华南幸稽乾隆,裔选拜进随云从。天章巍焕锡琳琅,使臣树铭镌嘉颂。於乎卢龙万骑潼关走,藩臣跋扈貙枭丑。河朔三镇尤披猖,不反而反惟怀光。人臣谋反赐铁券,其辞虽悖非无见。几曾丹心贯日月,必要信誓兼金炼。我思昔日唐昭宗,纥干山崔愁穷冬。太师尚父王行瑜,魏王九锡朱全忠。中原生民成疮痏,节度恣睢玩天子。董昌之辈不足诛,大梁逆祸肘腋起。郑畋壁垒惊黄巢,处存赴难麾旌旄。晋阳招讨李克用,死遗三矢忠肝昭。矧此勇慑钱塘潮,诛昌定頵精兵饶,河山带砺铭勋高。胡勿驱马入淮汴,朱三之颅力可断。胡勿连兵杨行密,斫头穿眼仇奚益。乘乱胡为割据谋,毋乃鼠窃兼狗偷。可怜江东一罗隐,曲讽勤王志悲悯。拜恩乾宁曾几时,名马玉带臣受之。虽云屈节完江表,得勿惭对沙陀儿。吁嗟乎!取以为式号哮虎,不学无术笑洪武。

拗岭

山以拗而奇,文以拗而宕。我笑王荆舒,辞章误宰相。

钓鱼岭

无水乃去钓,有才祇负屈。纵已陟林端,求鱼奈缘木。

赠李秀峰

鲁酒倾燕市,衔杯感喟多。壮怀销国士,旧梦付春婆。孺子亭边柳,苏卿祠外荷。 因君重回首,三宿纪东坡。

次韵宋芸子同年即送赞使英伦

我今止酒蠲酒逋,我今寄慨黄公垆。剧疾更生庆此日,还从诸子狂讴呼。伊谁持节浮西海,开谕威信今相如。壮夫之志在万里,快哉饯饮频催酤。博望定远何足数,敦槃旁取弓彤卢。一帆直度师子国,炎蒸红海赛阳乌。俄顷冰霜齿牙绕,长筵左右侏亻离徒。问操修史如椽笔,翩翩书记腾七苏。默觇彼国情势颇,要有囊括四海图。纵横术嗤苏、张粗,欧、亚将使通风衢。三岛神仙云中下,尽化瞿瞿而狙狙。圣人能虑不能至,兹乃履坦无踟躇。昔吾远游徒自放,敷张伟议惟君须。触念遂逾亚丁岛,袖中讵止钱塘湖。劝君勤读旁行书,胜斩郅支及温禺。昆仑金玉幸勿羡,计臣之计终疑疏。

曹允源

曹允源,字根荪,吴县人。光绪丙戌进士,授兵部主事。历官汉阳知府。有《鬻字庐诗略》。

宿富庄驿

树里村塘火几星,炊烟漠漠起岩扃。暮程车马催人歇,贫女琵琶絮客听。墙外漏敲

孤月落, 灯边梦绕万山青。早眠为怕宵征苦, 袱被蒙头唤不醒。

舟发滁州

青山如黛水如油,三日阴霾一日收。风色满林摇客思,万蝉声里过扁舟。

秋夜有怀徐侣樵上舍

寓言十九演蒙庄,键户细书鬓未苍。汀雁声寒沈远角,莎蛩语涩咽新霜。荣枯世事 云千叠,缭乱秋怀叶半床。何日隆中起高卧,手提长剑扫天狼。

谭国恩

谭国恩,字彤士,新会人。光绪丙戌进士,官工部主事,广西候补知府。有《写趣 轩诗稿》。

秋暮

不觉黄花老,秋来少倚阑。愁多辜宿酿,病久怯新寒。持论皆卢扁,救时谁范韩。 殷忧到野老,莫作杞人看。

李子荣

李子荣,字杜生,衡山人。光绪丙戌进士,改庶吉士,授双流知县。有《荷塘诗文钞》。

捣衣曲

梧桐落金井, 蟋蟀鸣房帏。风物凄以变, 逝晷不能追。自从俦侣乖, 梦寐想容徽。 含情理瑶翠, 开箧视裳衣。曳带下空櫚, 缓步出中闺。秋碪勤拂拭, 急杵繁且哀。响随凉飙起, 思逐孤云飞。挥手难为忆, 顾影空自依。

小孤山

大江西南来,雪涨浩飞湍。连山叠隐见,孤岛骤巑岏。贝阙支铁柱,鲛宫涌银盘。 姽婳真静女,倭堕摇螺鬟。风箫激灵籁,石镜明仙颜。凌虚自矫矫,望远故漫漫。不图惊蠢 尔,烽火照狂澜。击楫伊何人,指挥心力殚。遂令藐姑射,依旧空明间。停桡结崇玩,雅咏 非夸谩。阳冈无堕燹,阴崖有栖翰。浩歌日欲曛,片云天际还。

春夜宿武侯祠晨起诣青羊宫就李道人觅餐

疏篠禅房,枝枝带微雨,流莺啼欲阑,系马向廊庑。蜀人思武乡,千秋荐椒醑。并 吞业未成,精灵歘然聚。莲界夜沈沈,佛香篆微缕。薄醉易成眠,对榻欣得侣。一梦觉华胥, 无意吟梁甫。晨兴何所谪,更就炼师语。清盥挹溪磵,静趣生花屿。饷我青精饭,应从丹灶 煮。九衢冠盖中,此味閒领取。杖策行出门,苍烟散平楚。

明桂藩石狮歌

天降金精百兽伏,电光熊熊闪双目。白泽疑锺乌戈奇,拳毛葺葺势如缩。回雁云中耸翼翔,受封启宇是何王。不恨封藩属贫国,犹闻杰构埒灵光。凿得荆山一片石,狻猊屹立神飞扬。孱王龙种祚衰薄,安仁永明远依话。宗盟列爵拥虚名,肇庆称尊日刓削。锯牙钩爪空自雄,无端怒吼风雨作。似惜奔梧坐屡迁,更怜入缅惭三恪。嗟乎!乾柱倾颓坤轴翻,督师漫欲羝触藩。陵园石马早流汗,戚里铁狮今不存。自古兴亡一转瞬,寒林衰草吊斜曛。

登昭山

湘中山水天下奇,秀色天造非人为。兹山灵异尤杰出,一松一石皆清姿。素虬翻空 激巨浪,到此停蓄倚危嶂。平生寤想穷三山,咫尺丹梯更神王。洄潭落照风萧萧,急督舟子 停轻桡。萦纡石磴路九折,行人渐逐盘鸦高。花木丛深蔚幽僻,钟摇上方暝烟碧。童子开门 吠仙犬,老僧扶杖款来客。殿高铁凤摩霄迥,栴檀香散疏寮静。惜无轩槛临江开,难乘日车 观倒景。山云舒卷随轻风,予亦去来无定踪。明朝遥望更奇绝,江上一朵青芙蓉。

雪豆腐

孤城斗大云为衙,朔风战树啼栖鸦。天公作意破岑寂,排日玉戏矜豪奢。炉温祇有茗堪煮,水浅惜无鱼可叉。山田萁落漉浆汁,争言此味清而嘉。夜堆晶盘置墙角,晨碾玉屑挥霜牙。不令急煎汤一沸,气蒸釜底烧枯杈。滑腻流匙得精粹,如吸沆瀣餐朝霞。又若道人发逸兴,踏雪笑嚼寒梅花。沁入心脾涤肠胃,消去渣滓无疵瑕。五侯鲭膳贵人家,驼峰獾炙盛相夸。凿冲辇致佐珍馔,门外往往翻冰车。岂知菽为五穀一,来其出自貍虎沙。蠲烦但藉半瓯水,含冻偏宜六出花。癯儒秉性甘澹泊,野客与我同生涯。况复绵州得春酿,官厨取给无须赊。

游晓霞峰

不到此山久,今晨岸角巾。还寻路崎曲,休怪客逡巡。井水祈神活,天香散座频。 恒沙无量劫,僧亦后来人。

大洁口

朝宗万派碧波遥,气压鼋鼍静不骄。云树自依丁字水,风颿须趁子时潮。三河形胜 由来壮,四塞烽烟近已消。犹忆贤王劳苦战,敢忘秋戍肃金刁。

秦淮镫舫词

桃叶渡头枫尽凋,莫愁湖上雨潇潇。烟花南部都零落,几点秋镫散板桥。

金鹏

金鹏,字桂庭,桂林人。光绪丙戌进士,授户部主事,改临武知县。

将之临武感赋即以留别诸同人

南宫释褐廿馀年,无补丝毫忝俸钱。湘水丛兰新宦况,瀛州烟树旧诗篇。多言铭懔三缄戒,敛手棋输一著先。愧负师门期许意,花封治谱不曾传。多情旧雨聚京朝,捧檄风尘惜下僚。塞马早经忘得失,云鹏今漫说扶摇。由来不辱缘知足,未碍居卑且折腰。班史閒披朱邑传,桐乡谁复令名标。

裴景福

裴景福,字伯谦,霍丘人。光绪丙戌进士,授户部主事,改官南海知县。有《睫闇诗钞》。

太湖石

四万八千顷,越与吴各半。奇峰七十二,缥缈插天汉。水土互争抟,刚者柔所判。阴火煽洪炉,万劫馀飞炭。成兹积铁色,纯黝等锤锻。水精融地脉,顽璞岂受碫。天工好斗奇,人巧谢雕钻。风雷开窍窦,烟雨洗漫漶。高截青岱顶,深蟠黄岳幹。古柏根磊砢,苍苔色绚烂。横卧洞庭渚,峭立震泽岸。中藏天下云,肯为耳目玩。昔作江南客,屡游太湖畔。蒹葭浩无际,洄溯日将旰。归舟索一拳,空袖增怅惋。何年筑石步,花鸟资萧散。尽拔苍山根,具区在几桑。

郑州望黄河

积石导源归大海,宣房负土困中原。薪刍民力今难继,疏凿神功古尚存。一曲南来 蟠二华,万灵东走下三门。迁流可有回澜日,白草黄沙雾雨昏。

过黑水沙漠至抚夷城

卅六国中亲往还,荒唐旧说一时删。流沙穴地真成海,弱水滔天欲撼山。西去关乌 头尽白,东来宛马汗皆殷。倦游小睡昆仑顶,应被群仙笑我顽。

安西行寄王方伯

天山如龙游平川,送我东行路三千。我行百里一食宿,左右出没相周旋。我到安西不见山,问山己入玉门关。人行欲住山不住,以鳖追马焉能前。大黄亘天接祁连,终南太华纷联翩。望尘不及仰复羡,云车风马真神仙。我行踟躇不得前,牵来天驷金鞍鞯。朝发流沙逾月窟,暮宿饮水黄河边。更驾飞车入东海,群仙招手蓬莱巅。登高回首望西极,落日未落生苍烟。美人娟娟立云表,梦魂不到空潸然。

删丹晚行

峰头落日一尺景,平地行人一丈影。登高试望石觜山,缺月已悬大佛顶。红柳不青

白草黄,西风雁唳凉州凉。今宵删丹郭外宿,客路更比长城长。

闻捷

闻捷、字鹿樵、蕲水人。光绪丙戌进士、官鲁山知县。有《怡养斋诗钞》。

姚相国故第

当年楼阁賸荒墟,夕照家家撷晚蔬。老圃不知缘底事,人前深讳相公居。

仙人洞

玉台岭畔夕阳低, 古洞迷离草色齐。仙子不归山月暮, 流莺空傍落花啼。

刘炳青

刘炳青, 字书圃, 陇西人。光绪丙戌进士, 官丹阳知县。

新疆纪事

边城沙漠废耕耘,三月春归草未薰。寒气裂肌凝冻雪,怪风卷物入层云。羽摧汉节 羝难乳,声乱胡笳马失群。会见甘泉闻报捷,凌烟首绘霍将军。

拼死沙场革裹尸,从军万里滞归期。春风杨柳关西路,秋月琵琶塞上诗。刁斗夜惊胡骑走,鼓鼙声动楚歌悲。可怜绝域乡音渺,纵博封侯奈别离。

夏葆彝

夏葆彝,字子琴,号文宿,黄冈人。光绪丙戌进士。浙江即用知县。有《井字山人诗存》。

白鹭洲

鸭头新水碧波澄,客思春潮总不胜。行过平湖三十里,满隄烟柳是江陵。

舟次归州

峡江春水碧如油,楚客来时又泛舟。烟雨一帆三月暮,子规声里过归州。

谢昌年

谢昌年,字寿田,嘉兴人。光绪丙戌进士,官金华教授。

赠沈组斋

世泽齐梁旧咏楼,冷官居处剧清幽。多君腰脚藏青骨,负我田园剩白头。婺野星霜嗟久阔,吴淞烟月忆同游。回寻三十年陈迹,莲社追陪更唱酬。

【卷一百七十六】

荣庆

荣庆,字华卿,号实夫,蒙古人。光绪丙戌进士,改庶吉士,授编修,官至协办大 学士、弼德院顾问大臣。谥文恪。

送何见石甘肃之行

使君奉诏陇西行,洱海归来又远征。忆昔文章动秋榜,频年诗酒共春明。诸昆并焕 鹓鸾彩,一柱同惊鸑鷟鸣。毕竟衡才又司理,定知贻上是前生。

冯煦

冯煦,字梦华,号蒿庵,金坛人。光绪丙戌一甲三名进士,授编修,官至安徽巡抚。

答研孙

相逢吾与子,风雨黯虚堂。意气摧愁病,诗歌接混茫。读书忧太苦,入世忌能狂。 千里沅湘路,镫前说故乡。

十日枕上作

簟凄镫磊夜孤清, 卧病空堂月半明。我已思归眠不得, 乱虫莫更作秋声。

得仲修书却寄

一卧空江晚,风前得子书。诗歌犹磊落,酒病未蠲除。雨过岚阴合,霜清木叶疏。 荒园秋色老,日涉更何如。

和研孙登秣陵城之作

荒烟衰草晚萧萧, 倦客登临恨未销。寒蝠虚檐吹雨暗, 饥鹰废垒挟霜骄。九秋败叶 辞枯树, 百战孤城咽暮潮。剩有戍楼旧雉影, 更衔残照送南朝。

九日同少符饮

汪子饮我酒, 日落南城楼。百语无一欢, 相对如羁囚。羁囚岂所怀, 辛苦难自由。

失妇古云悲,况子罹重忧。酒半掩袂起,涕泗咽在喉。四时各有禀,胡为得其秋。天地尚怜 朁憺,子也复何尤。

天地一个 朁憺,草木无不靡。百里暮浩浩,下见旧时垒。野鸟声何哀,啾啾沟壑里。 万骑此摧藏,烦冤不能理。白日寒原昏,犹闻泣荆杞。岂无侯与王,独以征战死。有酒不能 酹,悲风动淮水。

淮水去不返,我心重怆恻。弟兄各异县,欲往无羽翼。八月遗我书,开函泪沾臆。 知我病乍起,一一问眠食。共此千里心,相思不相即。茱萸勿复采,忧来簪不得。兄今更何如,吞声望故国。

故国丁丧乱,遗民三万强。野田足耕作,少少归流亡。今年盛阴潦,秋穀半已伤。 饥寒岂不惧,幸得守其乡。不见江汉上,千里流汤汤。脱身洪涛中,颠越皆四方。登高气潜 阻,飒飒哀鸿翔。

秋尽同蘋湘夜饮赋此示之并柬漱泉

相逢意气莫摧残,秋尽江湖雁影单。老屋疏镫霜力紧,暗潮孤艇雨声酸。百年有酒 难为醉,九月无衣渐觉寒。更向城南望城北,何时共饱腐儒餐。

送研孙归湘中

阴阴霁色赴遥岚,携手荒城思不堪。为语离人莫回首,乱鸦残照是江南。横笛吹寒 断雁秋,旧时云物此淹留。黄陵暮雨孤帆远,楚竹湘烟一望秋。

用可庄韵柬子培

身世何劳季主占,与君人海守齑盐。每徵古事搜行秘,还忆清言下漏签。赋别争禁腰带缓,谈空祇觉鬓丝添。自惭牛铎谐钟吕,敢道今来得二严。

答石公

极目陪都万幕屯,顾侯杖策气无伦。诗宗南国风骚古,经证东荒地望尊。多病祇今 宜药裹,旧游终古恋桑根。吾衰五十君行及,争得同归白下门。

瓜步

瓜步荒烟上远墟,金焦南望赋归欤。乱鸦正掠斜帆过,寒柳黄於二月初。

剑州闻蝉

列柏西台寂不鸣,九天风露特凄清。剑南雨过延新爽,始得疏林第一声。

己酉清明同运甫晚望

漠漠春阴减却春,晚来微雨散轻尘。半生怀抱蠲冰炭,十载交亲逐溷茵。天末孤云 归似客,门前疏柳澹於人。屏居淮表堪罗雀,劳子东来慰隐沦。

陈昌绅

陈昌绅,字杏孙,一字稚亭,钱塘人。光绪丙戌进士,改庶吉士,授编修。

虎丘新构灵澜精舍嘉定钱少詹书海涌峰三字石刻尚存分隶绝雄伟

整公卓锡地, 苔涧昔曾经。山寺有兴废, 泉流无古今。云岩清梵答, 海涌夕岚阴。 名迹怀前辈, 潜研诣力深。

狮子林今为吴中黄氏废园

叠石摹山格,奇礓曲折通。广庭成结构,危磴接玲珑。碨磊当轩出,狻麑据座雄。 云林共高致,皴染画图工。

陈田

陈田,字松山,贵阳人。光绪丙戌进士,改庶吉士,授编修,历官给事中。有《滇游》、《》斥沅》、《悲歌》、《津门》诸集。

安平晓发

筍與坐啸足萧閒,曲径纡回水一湾。绿野催耕新贺雨,白云作海欲沈山。地饶丘壑 能留赏,春满莺花为解颜。记取定翁诗句好,幽居掩翠忆乡关。

板桥和题壁原韵

惜别怱怱折柳条, 东风几度客魂销。君来我去分明记, 瘦马驮诗过板桥。

犹是当年旧柳条, 低徊故事总烟销。才名一代杨公子, 曾踏东风赋板桥。

叶在琦

叶在琦,字肖韩,号稚愔,闽县人。光绪丙戌进士,改庶吉士,授检讨,历官御史。 有《稚愔诗钞》。

林赞虞丈出守昭通过黔赠别

长孺忠鲠臣,卧治典一郡。帝重二千石,择贤出邦宪。况轸边氓穷,宵衣廑清问。 乌蒙硗瘠区,百产阙转运。比年累歉收,妇子乏馈餫。流亡入邻疆,风雪挟敝缊。颇闻今兹 秋,可无颔顑恨。况又五马来,襦袴振贫困。吏人畏直声,屏息戢豪健。猺猓皆家人,睢盱 听明训。政成召和甘,寒暑泯咨怨。春风苏枯壤,吹万有宏愿。崇朝天下霖,兴云自肤寸。 姎徒岂敢私,俯首节旄建。实事副大言,乃不愧拜献。谁云儒术迂,卑之勿高论。

京洛凉风来,阶墀秀佳菊。出门畏秋霖,泥潦胶双毂。城南邸居日,拥书坐斋屋。 岂识行路难,终日跋岩谷。黔山无纡徐,阜众若穷蹙。西行望滇云,乱峰更奇矗。盘盘关索 岭,高揭据腰腹。往来尘满襟,辛苦茧在足。境连无撤疆,人半奢安族。光阴问场市,村寨 觅饘宿。久客惯荒程,渐於风土熟。此去秋渐深,薄寒起林麓。呷酒可辟瘴,郫筒旨且蓄。 晓发耐煗佳,行装换禅复。起居望精调,长涂羡载福。

超岁迎高轩,客座睹妙墨。初知学波磔,涂鸦常侍侧。甚荷容觕顽,陋质许磨试。 睽违重相见,吹竽滥清职。学步瞠乎后,蹒跚怯无力。同时侍从班,公书最杰特。天然擅风 华,意不假雕刻。比来愈高卓,下笔成典式。台端索靖碑,论古诣精域。喜闻前驺过,寒厅 觐颜色。久别犹虚庸,盛望愧难塞。骊驹不可维,送行已曛黑。探怀出绢素,忽忽那敢迫。 请附书簏行,期寄邮筒得。郡斋知近山,春秋好登陟。使君今苏黄,摩崖待镌勒。

奉寄献恭叔父

寒澌缓缓回春流,闸河不任浮轻舟。空斋腊去六十日,短梅疏花为客留。梅花留客看春雪,三月西湖有此不。浙中山水夙缘重,官辙过处皆曾游。昔来趋庭不谒郡,潇洒题诗八咏楼。今来下车谕父老,邻邑人识新君侯。中年最乐奉亲事,况自官舍涓兰修。愉愉门内涤腧器,善气已动舆人讴。琦也弱岁从诸父,僧院镫火春徂秋。栖鸦暮满窗外树,斜月照见低枝樛。依稀此景但畴昔,辗转人海嗟萍游。新岁岭外有消息,阿叔奉檄归梧州。仲兄忽忽别数月,踪迹尚滞藤溪头。惘然当别念家事,未敢孟浪干时忧。都门送人已屡屡,居者不去宁无求。颇思十亩有收获,胜似朝市为身谋。高堂康健慰游子,宁赡邸费无归休。亲慈自望可树立,力薄欲进途无由。求才正亟汰冗长,太仓鼠雀能勿羞。还家温清帅群季,何有郁郁思八驺。

盘江铁索桥复成寄安义蒋镇军炳堂

潜蛟生角隘潭穴,击水飞行越危岊。浮槎木石互撞才必,严隒冲波半偏裂。长虹战 衄失首尾,波落江心见丛铁。二三残絙远可数,窸窣犹鸣阴雨节。江流入夏悍且深,朅来一 苇愁行人。蹑空讵有鞭石手,駴目更甚缘橦身。健儿触险尔勿矜,善泅常遇龙蛇嗔,衡流赪尾坐太息,延颈望有仁人仁。觥觥镇军顾我语,期我重来兹役举。千金之诺果如响,万口同 讴固其所。峰回一转见栏楯,耸碧流丹映烟雨。导行一骑已欣欣,方驾群驺相衙衙。炉锤百 炼力无惴,沤泡万钉巧能补。众材骈列直中弦,巨缆下垂句若股。谛观颇识巧工精,小憩都 忘行役苦。当年当辙弄螳斧,捣穴偏师絷穷虏。飘飘大纛自舒卷,如此釜鱼何足武。牙门分筦般输籍,次第庀材料山泽。澜沧之制今宛然,更念西征恢旧驿。纪功莫忘奢香名,访古欲 搜庄蹻迹。要令千里通滇池,亭堠画一悬旌旗。建牙出为方面守,古有举者勿废之。利民岂必创奇绩,凿空不若培其基。铁官矜贵铁政急,欲健元气忘疮痍。知君默默用此意,实事求 是良可师。暄妍共爱山姜笔,小李画图纪风日。灵蠵赑屃能驮碑,深镌傥取吾言质。

题林文忠公京师日记

沧桑胡变为人迁,终古蓬瀛在日边,远想严徐供奉盛,犹居李郭中兴前。委蛇初若

无奇节,忧乐於时属大贤。自省虚庸曾窃禄,后生坠涕读兹编。

和珍五同年汉上见怀

倦客心情未耐官,蹉跎弥觉去乡难。十年泥爪如过梦,此度参商最损欢。在树嘤鸣 殊可感,解装食息得都安。雪残新见庭柯绿,怅倚黄昏独自看。

马忽马行城是好官,都人犹惜欲留难。何劳远蹠须争道,未有刚肠怯失欢。几日题 襟从汉上,重来观弈向长安。登临知切先忧抱,楼上君山尽日看。

病间独坐寄默园

负尽流光又过春,窗前夜雨绿荑新。堪怜丸药心情细,乍可繙书卧起频。扁鹊视人 当未病,维摩贤我是无身。年时任率何须悔,莫向东风枉自陈。

去年今日诗

去年今日犬台上、纱縠禅衣造膝时。岩阶岂无群獬廌、凝听清禁漏声迟。

嫌如绛灌阻长沙,不惜伾文占禁衙。霜鬓雪眉忧国瘦,委蛇中度激昂差。

凤德栖栖览九州,尊王所以事诸侯。《春秋》独盛公羊学,竟取何休说黜周。

捐灰徙木意无已,敢议庙中羔兔蛙。在昔圣人刑两观,不搜根柢治萌芽。

法如日月食於私、别立条流但售欺。世有龙钟周伏柱、不忘数典是吾师。

会盟定用国成子,筦计无如范大夫。万族戴天无怨苦,一人稽古定訏谟。

贺涛

贺涛, 字松坡, 武强人。光绪丙戌进士, 官刑部主事。

肯堂以诗倡吴先生先生之弟熙甫先生张君采南李君和度熙甫先生之子千里

往复酬和积十馀篇涛不能诗肯堂强之乃依其韵而错杂用之勉成一首

吾师性好客,亭园极遐赏。高宴无虚日,嘉客时来往。酒政酷汉吏,诗律密秦网。 张李争出奇,范子才无两。群雄不相下,建国各分壤。小侯执贽来,听命甘诮谤。郡县 不敢居,退思乘一障。忆我二十馀,抗志薄今曩。良马脱羁络,千里犹莽苍。盲进不知退,力竭仍思强。岂料遇仲达,唾手收曹爽。蚁垤恐颠踬,嵩华恶能上。范子笑其旁,瓦缶击之响。 怜彼蜩与鸠,不使控草莽。趣我令当阵,怯夫胆忽放。纵横大敌前,那复计弱壮。思酬知己恩,胜负不设想。请师备良药,将疗灌夫创。 过天津肯堂留饮用山谷次晁补之廖正一韵见赠依韵和之

筝弦在耳酒在口,老范为诗胆如斗。謇博意兴何超然,日以诗歌相往还。既得薛君与鼎立,何又援我厕其间。我自受形尘世上,孤怀那肯邀人赏。茫然四顾吾何从,自投所向归桐城。桐城大儒世与齵,岂屑稽古如桓荣。不事公卿乐处士,知音四海惟吾子。大匠门下多瑰材,散栎见收殊可喜。群贤会合古所难,伯牙琴为锺期弹。得与良朋日欢饮,云路悠远何须攀。吾师罢官我何望,将从子言归故山。

刘孚京

刘孚京,字镐仲,南丰人。光绪丙戌进士,授刑部主事,改饶平知县。有《绣岩诗存》。

题画

觚棱寒日闇重闉,记隐金门几度春。却为丹砂乞句漏,似闻人诵《北山文》。

酬陶子祥

尘海劳劳尽化城,藏舟移壑误长生。东方避世初非隐,柳下卑官不碍清。敢以出山 忘远志,悔因千禄贸时名。而今未老思回首,愧尔宾筵颂瑟声。

空山

独坐万缘起,空山非寂寥。市声腾野马,海色隐神鳌。北望疑天醉,南来耐客嘲。 天涯有芳草,魂断不须招。

杂诗

秋风肃天地,蟋蟀鸣阶陲。华月明秋光,流影入清池。独夜不成寐,起坐吟且悲。 我行始孟冬,今秋犹未归。不惜道路远,所悲岁月驰。身世复何论,素心亦已违。抒情焉所 告,援笔歌此词。

孤鹤海上来,集君白玉墀。鸿鹄游万里,辑翼君家池。秋兰被长坂,蒲荷生绿陂。 园葵依崇墉,女萝缘高枝。重阴霈膏泽,晔晔含光辉。懿彼君子德,忘此孤生悲。孤生良独 难,聆我感激词。

吴庆坻

吴庆坻,字子修,钱塘人。光绪丙戌进士,改庶吉士,授编修,历官湖南提学使。 有《补松庐诗录》。

甲辰仲冬赋呈葵园师

大道委榛莽,率土无夷庚。群邪狎白日,中馗沸鼯鼪。天步丁艰难,幹国求良桢。 外谘吾洲俗,上契三代程。讲舍盛兴作,条教一再更。堂堂大国楚,匪独文儒鸣。缅维咸同 间,龛难多书生。流风笃忠悱,馀芳扇湘蘅。如何兰渐滫,异说恣纵横。乱苗必恶莠,谁为 折其萌。贱子忝持节,擿埴嗟冥行。握枢在宗圣,致用先穷经。畔道文必黜,析疑经始明。 但严泾渭别,无召水火争。钱朱企囊轨,历久垂芳声。材薄愧弗任,持禄常屏营。

并世有硕儒,方雅镇流俗。幸厕籍湜伦,韩门仰培沃。暌离过廿稔,失喜访灵麓。 拙工倚大匠,隐栝到曲木。奉手请旧业,蒿目悼危局。俯仰身世感,愀焉轸心曲。小子有狂 言,勤拳效忠告。古称不朽三,造物靳庸福。南菁经解编,东华史宬录。传讽遍海内,学子 匄膏馥。投簪味道腴,勤学资先觉。甄文重流别,姚李踵芳躅。孔传刊伪文,班书证疑读。 遐哉千禩业,悉数屡更仆。葵心倾太阳,匪曰智卫足。公当勉加饭,弟子行抱蜀。

少小苦羸疾,中岁疾良己。西南驰王程,江山壮玉垒。意气高岷嶓,险阻穷筰徙。期搜蜀才彦,持以献天子。適遘庚辛交,冬狩纪诗吏。冲寒赴行在,伏阙泪盈眦。明年还京师,儤直近丹戺。草奏引古谊,论迂駴俗耳。往岁乘滇輶,暑雨涉万里。津梁行告疲,占爻得艮趾。何图被恩命,沿潕下沅澧。岁晚暂投装,百惧而一喜。喜者亲丈席,谭经竟源委。惧者臣精亡,无繇振穨靡。蠠没方期岁甄校无隙晷。遽遭病魔侮,瞑眩不可止。引疾幸得请,感极转汗泚。岂不睠芳华,升庭采兰芷。上负吾师期,下负横舍士。赠言意深厚,三复重嘘唏。朝廷纳群策,下士有葑菲。安得一謇谔,靖彼万谲诡。敝庐有孤松,贞幹无曲理。蕲保岁寒心,明明指江水。

和琴志

云外匡君宅,山中《梁父吟》。娱亲得高寄,报国矢初心。厝火颠危局,虚车著作林。此邦关学盛,谁与振元音。

奉命典试云南留别政垣诸公

华发年来已满簪,岂期乘传采南琛。十科取士颁新令,六诏宣风有嗣音。刍狗醯鸡 笑文字,蛮花犵鸟付讴吟。友朋漫为劳人惜,老鹤犹怀万里心。

沈曾桐

沈曾桐,字同叔,号子封,嘉兴人。光绪丙戌进士,改庶吉士,授编修,历官广东 提学使。

题徐鞠人同年北江旧庐图

海王置官烧琉璃,迤南有井清且漪。北江先生旧卜宅,百年徐子来居之。北江抗疏 击权贵,头颅分与欧刀期。天王圣明臣不死,投荒万里百日归。徐子起家官禁闱,风流文彩 高山思。读书尚友眼如月,燕坐观世争虫鸡。甲午之年海水飞,徐子忧国如輖饥。袖中一疏 帝动色,坐决成败如蓍龟。惜哉玄黄有翻覆,九关虎豹吁可悲。君门潭潭士气死,柴户奉母 莱衣嬉。中庭花发莺乱啼,高堂绕膝孙含饴。岁时伏腊召亲友,上堂鞠月卺陈一卮。僧弥法 护自师友,一门妇子无嗃嘻。人生此乐讵易得,天意枯菀真难齐。玄冬凛冽谖草萎,眼枯泣

血惊乌栖。后先死孝真一辙,麻衣雪涕称孤儿,我昔升堂拜圣善,图中光景犹能追。观河性 存面已皱,论交十年倏路歧。春风劲厉河冰澌,送子执手情凄其。他年史笔传滂母,更溯机 声镫影时。

张士珩

张士珩,字楚宝,号潜亭,合肥人。光绪戊子举人,直隶候补道,加四品卿衔。有《劳山甲录》。

陪张湛存先生入崂访逄公栖止感赋

岧峣高不极,选胜共登临。涧壑随峰迥,烟峦障日阴。摩天悬壁峭,访古入岩深。 欲问幽栖处,云封不可寻。

九水崖循曲,千岩路转迷。高山深莫莫,客子意栖栖。石咽泉声细,松虬日荫低。 紫芝如可采,乘兴更攀跻。

萧端澍

萧端澍,字雨根,号水卿,三台人。光绪戊子举人,官武昌知县。有《赏松石斋诗 存》。

春日听徙南道人弹琴

丹房昼静春风香,仙人隐几琴眠床。客至呼僮瀹苦茗,兴来为我弹清商。山水虚深 道心古,鸥鹭澹远尘机忘。祕弄初开若有会,寸衷感激空低昂。

九里冈

荆门西上路坡陀,九里冈平松桧多。秋雨乍晴云乍敛,无边浓翠滴烟萝。

即目

野水吞桥争赴壑,晴云夺路乱趋山。雨馀好景凭谁写,画意诗情满目间。

张宝森

张宝森,字友柏,丹徒人。光绪戊子举人,官仪徵训导。有《悔庵诗存》。

石帆歌

长鲸挟怒将波送,黑风飞出观音洞。江上楼船欹欲眠,惟有石帆吹不动。石帆何高高?张如鲎背立如鳌。不知插入江心几千仞,世间知者惟神蛟。上有巍巍之铁塔,下有滚滚之银涛。此帆非蒲亦非布,高排石筍坚且牢。安得挂之游沧海,天风吹落瀛洲坳。吁嗟乎!

天公造作遍穹宇,刻划雕毋乃苦。若非操蛇二子运鬼斤,定是金牛力士挥神斧。

与客谈徐武功事感赋

岳飞谋反,其事莫须有。不杀于谦,此举为无名。三百年中两妖鸟,秦会之后徐有贞。同罪者谁?御史王文。同功者谁?将军石亨。前日议南迁,今日议夺门。武功武功,尔亦靦然人,甘与分尸之桧万年遗臭独何心!宋少保,明少保,栖霞山色至今好。两家祠墓岿然存,秦徐残骨贱如草。东窗饶舌莫嗔司晨鸡,此时并无长舌妻。

和月楂观察秋感

台城草浅下牛羊,纵论南朝让客狂。天远生云微似发,人归踏月白於霜。零残碑碣 寻僧寺,寂寞关河忆战场。黄菊渐乾红叶饱,一年一度看山忙。

读太白望九华赠青阳韦仲堪诗感赋

我读太白诗,如见太白豪。青阳有韦生,名山同游遨。莲花亭亭出渌水,谁其卧者 赤松子。相期携手凌紫霞,俯视云台若敝踪。青莲仙人不再来,韦生韦生安在哉! 九华山中何所有,但见玄蝯白鹄悲吟而徘徊。空江月明几千年,采石谁放宫袍船。我欲临流一长啸,夜深恐惊鱼龙眠。吁嗟乎! 丈夫在世贵行乐,安能摧眉低颜就羁缚。夜郎万里仍生还,笑尔公卿枉谣诼。名山有约不可忘,端委何如在岩壑。有诗须乞太白灵,有酒须酹长庚星。他时白鹿青崖路,重访芙蓉九朵青。

答黄陂黎济川孝廉秋思诗

银河澹无晖,虚庭忽已白。筦簟清於冰,微风入帘隙。残梦犹摇摇,晨钟荡烟碧。 秋士恒善悲,况此久羁客。羁客动归心,有如燕将别。岂不志四方,风尘难合辙。四壁秋蛩鸣,临风助凄咽。去去勿复陈,搴帷望明月。明月入我抱,凉风吹我襟。白云自舒卷,去留皆无心。海内方多故,志士甘浮湛。不见梁伯鸾,《五噫》有馀音。馀音渺何许,独鹤鸣青霄。君才夙磊落,惊采追湘骚。枳棘虽暂栖,六翮终翔翱。努力祖生策,万里乘长飙。

秋日杂咏

水漾秋光卵色天,夕阳明灭起炊烟。疏花似穗曾相识,新月如弓绝可怜。欲醉翻思 缸面酒,不归空问橛头船。今宵短梦知何处,绿水桥西老屋边。

姚永概

姚永概,字叔节,桐城人。光绪戊子举人。有《慎宜轩诗》。

肯堂用大人韵作诗示予因及予与吴仲懿江阴之旧游而以身强为可宝次韵奉酬

生於吴楚爱幽并,五岳填胸不可平。少壮渐过添老态,江湖行遍减山情。高吟斗室春回座,腊雨连宵冷入城。彭蠡枞阳二千里, 茫茫帆楫又东征。

用山谷游王舍人园韵题天柱阁

筑阁行省司,地直龙山阳。天晴西北望,岳色不可藏。自古贤政策,在暇不在忙。 沈公有道气,官居等宝坊。论徵古典籍,坐集儒衣裳。时流老成泪,或惭燕寝香。去年江淮 饥,稻黍不芬芳。库藏又久空,安得化金方。货粟监河侯,救此灾剥床。忧多公膳减。孤负 数百觞。世方竞炎热,谁解心清凉。赫然声利场,照以明月光。横流波浩浩,正色天苍苍。 潜霍有佳境,中开天地房。宛委古藏书,待公与意量。其男多朴野,争席鱼相忘。其女半高 髻,未知时世妆。公令四境安,容我接舆狂。

题子善秋景

柳老西风作意骄,孤蝉独自抱疏条。不知更有春来否,到眼秋光太寂寥。

偶怀梁节庵胡漱唐

上书不报拂衣去,绝类西京梅子真。最痛篇终陈苦语,异时逆耳更无人。

黄锡龄

黄锡龄,字春圃,冀州人。光绪戊子举人。

拟杜工部观打鱼歌

秋风瑟瑟吹笼蘩,渔舟荡入川流冲。席地幕天施大网,千鱼万鱼纷横从。大者鲣鱼巫小鲢鳙,*鱼亘鱮鲉*鱼右鲂鳢鮦。生者半已点鳞腮,况复死者无完形。日暮水伯游兹川,咄哉吾徒谁使然。回风倒翻三江水,尘沙卷浪声连天。渔人未解此中意,呼斟叱鲙还相醉。君不见竭泽之渔古所耻,贪餮毋亦病仁义。孤城落日淡秋水,前此观渔今复尔。天生馋渔性绝诡,谢却罟网逞奇技。钓饵微琐大鱼耻,尖杈锐舌利如舌易。风鸣雨咽波涛汹,顺手撑入无崩阤。吾观此事心悠悠,渔人睨我发清讴。水伯夜起争窟窝,鞭驰丁甲翻天河。乌乎水伯意我知,乾坤惠施万物嬉。满目伤残吾一体,安得忍受旁人欺。

葛嗣溁

葛嗣溁,字弢甫,号云威,平湖人。光绪乙酉拔贡,戊子举人,户部七品小京官。 有《弢华馆诗稿》。

禽彝铭

延陵手拓禽彝铭,古香著纸松烟青。二十三字科斗形,钱氏阮氏诠释精。粤稽周鼎东迁后,彝器铭勋历年久。释某为谋又作右,偏旁阙略通篆籀。王祭於社名曰宜,公谋诸禽司其仪。受脉交福称厥职,锡金百鍰禽作彝。伊昔《春秋》严笔削,许男何不书侯爵。杞滕自贬齐晋雄,黜陟无权视强弱。古今大谊惟尊王,诸侯助祭登庙堂。《黍离》以降竞蚕食,百千祀物嗟沦亡。夔龙饕餮付残劫,毁及尊卣钟鼎{将鼎}。此彝可宝铭可读,拓本相诒韫诸

匵。墨云拥护蛟螭蟠,字字昆刀切玄玉。请编款识摹奇文,补入欧阳《吉金录》。

王定祥

王定祥,字文甫,号缦云,蒸谿人。光绪戊子举人。有《映红楼诗稿》。

秋感

斜日平原雁影高,四山落木晚萧萧。吟成秋兴诗才薄,醉倚西风酒力消。病叶经霜 先委地,寒塘无水不通潮。空怜松菊长荒废,独掩柴扉慰寂寥。

胡体晋

胡体晋,字锡蕃,孝感人。光绪戊子举人。有《退庵诗集》。

梨花亭题壁

梨花亭子小桥东,近接南湖一水通。为看春山归较晚,马蹄踏落夕阳红。

惲毓鼎

惲毓鼎,字薇孙,号澄斋,大兴籍阳湖人。光绪己丑进士,改庶吉士,授编修,历官侍读学士。有《澄斋集》。

梅叟移居近巷时遭国恤兼闻皖中兵乱奉柬

北陆将回律,西城好结庐。乾坤多泪日,岁月杜门馀。天暖犹存菊,家贫但载书。 清风比通老,谁与绘《移居》。衔恤孤衷耿,忧时两鬓斑。闻君来卜宅,令我暂开颜。江郡 风尘警,霜庭竹石閒。艰虞思智略,肯遂老东山。

门人黄叔权寄诗见怀答之

落落交亲远, 骎骎岁月新。人才亦东豕, 吾道竟西麟。旧学存门下, 离怀逐渭滨。 岁寒期共保, 勤寄陇头春。

送易实甫观察分巡滇南

相逢冰雪痛乌号,晚岁功名感鬓毛。残夜除书新使节,南天行幰旧征袍。春归日下人偏去,诗历黔中境益高。闻道吐蕃窥六诏,安边筹略望韦皋。

再送实甫

万里从兹始,依依祖帐歌。绣衣唐察使,蒟酱汉牂牁。春色随人远,江流出塞多。 先公有遗爱,莫更叹蹉跎。

李传元

李传元,字橘农,新阳人。光绪己丑进士,改庶吉士,授编修,历官浙江提法使。 有《净严诗草》。

伤乱

题甘泉乡人冷斋读书图

二石儒林宗,高名继坡颖。家书七百通,学术商之稔。岳岳衎石翁,碑版照五岭。晚岁刊经说,传注遍收据。参考阙其疑,雠校心惟谨。先生学尤力,万轴朱蓝靓。琳琅诸父贻,卷过南阳井。学海为上驷,文鉴亦神品。览观不自足,异籍频搜诇。经访公库本,韵求汲古影。吴郡怀杜诗,南阳忆耿秉。惟时藏书家,别下迹最近。振绮若拜经,一瓻乞通请。善本遇辄校,三史尤精审。缺漏补正义,杂揉理索隐。班有特斋藏,志取南雍本。副墨曾过录,细字目为首。嗟从雕搜兴,一书恒数鋟。数曲亦己难,婪取那可尽。何况字句间,异同细己甚。半部蟫蠹馀,求之金百饼。书仓困检点,舟车艰载捆。奚如萃一编,朝夕便观省。肉弗义不遗,眉列目易醒。坐卧挟与共,得一馀可屏。先生老学官,辛苦仰寸廪。豪侈输绛云,浩翰谢千顷。徒以精力勤,敌彼金布赈。孤灯一对勘,百城俨吞并。平生苜蓿感,官斋颜以冷。犹闻念长安,千里致脩脡。爰知友于笃,匪直文誉并。厚德族党钦,清芬子孙引。一帧六丁遗,宝视宗彝鼎。

移居吴中述怀

补写澹台墓上诗,黄花迎笑我来迟。扶衰怕履曾行迹,忏惑仍留最后痴。生处自应 叹华屋,归飞犹复拣寒枝。登临换却看山服,幻尽烟云未觉奇。

结庐仍傍少城隈,七返须陀賸一来。树石无情能说法,松萝好在且衔杯。推愁远堕 九州表,誓墓常衔万古哀。一卧从今凡几劫,揵椎声里鼾如雷。

观新历日

白头又见一年春,眯目愁看历日新。眼断辽天无过雁,心寒客籍少遗民。距程百里 潮声远,寄恨千秋涕泪陈。出世固应难问世,勉修六度答君亲。

和乙盦

愿海无边引领望,称情诗是大悲光。心惟一佛禅那境,书有多车惠子方。遍色空天 谁乐国,送今古世只斜阳。众生计著常颠倒,才说兴亡已不亡。

文字观为般若光,威音那畔秘难彰。杜鹃枝上相怜切,野鸭声中过去忙。平视风雷 聊徙倚,寄生天地剧悲凉。萧萧坏劫惊砂里,时比诸天日月长。

奇观能生净眼花,分明定里到君家。大千一榻无离相,小别三春感物华。密印伽陀 驱疠魅,高楼海日隐朝霞。希音可会稽生旨,商乱宫移一叹嗟。

朱户黏鸡岁事新,引年犹让古稀人。裴公座上夸年少,耆崛山中剩小身。悲喜澹忘 聊适性,松风不问略相亲。六根解后仍非解,欲请如来更绾巾。

后月蚀诗

我作《月蚀诗》,体效玉川子。客诵为胡卢,子言无乃俚。天空有闇虚,径直十万里。望舒经其间,如暍就阴翳。月体万里馀,妖蟆胡能噬。蝦蟆既蚀月,应亦食大地。后土入蟆腹,含生将焉止。主人起谢客,大小何可泥。不闻瞿昙钵,滉漾容海水。亦有净名庐,狮座昆仑比。蚁穴擅侯王,蟁睫驰九轨。一粟容大千,大千一稊米。莫大於秋豪,天地乃至细。大块一馎饦,食者京垓秭。厥灵为倮虫,其蠢为蝼螘。人虫又相食,巧历不可纪。胡独靳饥蟆,偶动子公指。我思蝦蟆肠,清虚绝泥滓。既能吞曜灵,亦必有城市。虽无八极宽,应殊五浊世。蛣腹蟹为巢,马腹蛇作肆。螺腹素女游,鱼腹屈原喜。方当招饥蟆,厉斧凿其齿。逍遥彭亨中,绝胜掩藟梩。

乙盦以登高诗写寄又题后五言一首依韵酬答

朔风凄以栗,万物含春姿。沍阴一阳伏,三复朋来辞。升陵羡飞锡,秋气清不悲。一切为一刹,是说楞伽时。摇摇思过去,茫茫待来兹。介石具定性,林节无懦枝。时教泯义例,殊胜绝寻维。且复念欢会,把臂游轩羲。

叶昌炽

叶昌炽,字颂鲁,一字缘裻,号鞠裳,长洲人。光绪己丑进士,改庶吉士,授编修, 历官侍讲。

宣统己酉范祠春祭纪事

又是嬴燔道丧时,鲁宫孔宅閟金丝。野人有祭方披发,海客能谈但傅皮。后进师心雕混沌,左言充耳效侏亻离。秀才忧乐关天下,百世闻风是我师。

异地重瞻高义园,忆持使节到邠原。堇荼不改沿陶穴,蘋藻毋忘报水源。良相同朝惟富弼,霸才今日尽张元。裂冠毁冕嗟何有,礼教无逾视短垣。

齑粥家风有象贤,箕裘趾美得忠宣。治当皇祐至和日,文在庐陵子固先。精椠访求

昭德第,谠言启沃迩英筵。即看公库新雕本,留与诸生肄诵弦。

刘尔炘

刘尔炘,字果斋,皋兰人。光绪己丑进士,改庶吉士,授编修。有《果斋集》。

杂感

谁家儿女凤凰雏,携手寻芳遍九衢。野草閒花都著眼,道旁遗却夜光珠。

丹鼎飞烟鹤绕林,开炉竟尔失黄金。主人自恨无奇福,辜负神仙一片心。

阴山洞里入层层,一线阳光逗石棱。何处尚能传宿火,半窗风雨读书镫。

费念慈

费念慈,字屺怀,号西蠡,武进人。光绪己丑进士,改庶吉士,授编修。有《归牧 集》。

邓尉探梅图卷吴丈翛闲属题

菖蒲潭西冷香沍,千树万树梅花开。招邀胜侣惬元赏,座中宾主皆仙才。是时湖山正全盛,倡酬诗海倾金罍。深山大泽发光怪,眼底祸起红尘胎。黑唳翻空吹海立,黄狐吐火鸣篝隤。猰貐磨牙豕人立,关河萧瑟江南哀。圣赫斯怒奋厥武,鹰扬将帅多奇瑰。横腰大弓射明月,脱手飞旝奔惊雷。将军仗节壮士死,仅乃战克名城恢。翦除榛莽到林麓,酾酒重上姑苏台。斯时此卷落何处,蛮烟瘴雨侵煤炱。潮州太守古循吏,一檄能走鱷与鲐。政平讼理民气乐,搜奇获向文书堆。家山在眼嗟久客,忽忆三径埋蒿莱。压装重比郁林石,鲈鱼正美归去来。翛闲堂前盛宾客,论文话旧相追陪。石泉泼乳试苦茗,地炉暖火开新醅。公武图书几上列,天随杞菊阶前栽。人生百年贵行乐,忘忧惟有常衔杯。桑田沧海几迁贸,麻姑三见生黄埃。呜呼和靖不可作,使我瞻望心徘徊。零丁一岛弃瓯脱,泥沙万斛输边财。鲜卑重译语格磔,侏离短后声喧豗。奇鸧九头当户叫,社鼠五技凭城猜。景教流行大道晦,佉庐左上群经灾。浮云扫空烛龙曜,尧天舜日照九垓。江湖一卧几裘箑,键开且复甘驽骀。春风人日一壶酒,草堂久闭滋莓苔。山僧报我雪成海,款扉一纸劳相催。朝来折简与君约,拏舟同访山之隈。

吴丈又出棣华先生诗卷索题时久晴望雨甚切

一冬苦无雪,赤日照屋檐。忧时愿丰岁,望泽愁穷阎。颇听老农说,絮语如病店。汲深井泉浑,突冷米价添。草桔卖却牛,水涸拾得鲇。东家羊兆卜,西邻鸡骨占。偶见飞霰集,旋吐骄阳暹。待兹土膏动,所恐良苗歼。我闻一长叹,忽忽意不忺。故人诵清芬,一卷珍匹缣。示我乐府吟,敬获先德觇。伤时兼悯俗,大言何炎炎。情深语多讽,意重律更严。安得輶轩采,用作美疢砭。昨夜春风来,濛濛雨廉纤。好作三日霖,犹及四野霑。欢呼满闾巷,作苦勤黎黔。吾侪乐康衢,饮酒亦不嫌。寒香一万树,开遍东西崦。相约扁舟游,聊复险韵拈。屐齿判高下,诗心斗叉尖。胸撑汉柏古,口读邾钟箝。重结山水缘,况有翰墨兼。

飘然意独往,已在前村帘。

为鹤逸题画

栖鸦点墨柳丝黄, 瑟瑟寒流泻石梁。帆影在天秋在树, 至今离恨满斜阳。

淡月微茫芦荻秋,风流回首未全休。重温二百年前梦,为写当时送客舟。

重九侍松禅师剑门登高

重阳苦风雨,难得今岁晴。凌晨出北郭,天高日初晶。小子撰杖履,山静箯舆轻。 款扉过赵叟,一笑掀髯迎。图书敞小楼,花竹当前楹。古墨烂在几,照我双矑明。酌磵煮凤 团,饱饭烹鱼羹。西风昨夜来,策策秋叶鸣。霜气满岩壑,紫翠纷纵横。颇闻田家言,秀野 摇香杭。爱此云子白,念彼鲂尾赪。扶筇入深谷,梵阙辉丹甍。苔壁画螔蝓,松梢窜鼯鮏。 采药僧未归,隔屋闻棋声。老人健腰脚,纵步叶家坪。郁郁青松阡,毅魄埋忠贞。重修卞壶 墓,遐想仲路缨。肃拜重马岂仰,对此羞嫈嫇,摄衣贾馀勇,峰势罗峥嵘。剑门郁盘折,直 上扪长庚。石面小斧劈,崖腹孤藤杭。凭高一纵眺,极目凌沧瀛。桑田拾螺蚌,恶浪愁鲛鲸。 下有蘼芜泉,泉水冽且清。可怜红豆花,不见啼春莺。栖尘与过驷,珍此歾世名。严家有祠 宇,傍岩结柴荆。菊铃隐木堇篱,瓜蔓垂松棚。芙蓉濯娟娟,临水生远情。小憩返旧居,茅 舍炊烟生。疏钟响林薄,新月衔高城。裁笺博莞尔,野性惭麚麖。

江标

江标,字建霞,元和人,光绪己丑进士,改庶吉士,授编修。

和林金石诗

剥落残碑认短铭,舍人书体出天廷。吾从字画徵旁刻,大《泰山铭》小《孝经》。 脱脱已罢巙巙卒,谁是平章至正秋。一记不传名姓在,朔方剩有断碑留。

徐仁铸

徐仁铸,号研甫,字缦愔,宛平籍宜兴人。光绪己丑进士,改庶吉士,授编修。有 《涵斋遗稿》。

送言謇伯之天津

潞河水程安且娱,盘旋直到丁字洁。却舍双轮曳双桨,歌诗不歌余马疒者。言子觥 觥世文学,能为汉赋摧吴歈。春风原草出佳句,才名英绝传皇都。金台骏骨已不朽,上客珠 履争迎趋。析津形势控南北,黄河万里此尾闾。方今金瓯无点缺,谁令堂闼来貙貐。宗生乘 风范揽辔,斯志颇志常人殊。虫鱼釽析小言耳,彼哉沟瞀而拘迂。我生心力百无赖,有书废 读冠则儒。坐看鹒蟀似流电,安有远志殚八区。以我方君何所似,强者齐楚,弱者犹曹邾。祇馀结习未全汰,别无美谥惟至愚。临歧一语重诿諈,君应诺我勿嗫嚅。水西庄畔脱经过,尚闻八卷题襟韵事无?

游浯溪

路转云深处,荒台枕碧湘。江山开百粤,文字属中唐。影落斜阳紫,名题卧石苍。 风流呼漱玉,提笔妙能狂。

流涕中兴业,艰难一遇之。纪游聊有话,作颂更何时。鼙鼓家山梦,荪荃泽国思。 镜厓今照客,犹未鬓成丝。

述怀

颇志万方略,而抱千古悲。凝情叩丹府,俯仰将安为?江湖摇落处,詄荡高莫窥。 堕地得此生,追怀涕如縻。欲从世尊法,解释诸苦危。一发钧所系,片云雨之基。悠悠尘世 名,耿耿罔极思。歌成孰告哀,中夜三歔欷。

杨深秀

杨深秀,字漪春,闻喜人。光绪己丑进士,历官御史。有《雪虚声堂诗钞》。

齐镈诗为寻管香给谏作

雕上后土祠,汉皇获鼎所。金气颎秋空,斒斓作伏虎。阴崖閟瑰宝,阳侯盛赍怒。高浪掀天来,射岸丛万弩。石罅閛然裂,缒出古镛虡。伊谁窟室悬,乃有歌钟拊。黄门钟鼎家,昆季并嗜古。脱贯径购归,通夕手摩抚。绿绣剜藓斑,墨华捶麻楮。举例先辨体,析疑自画肚。微霭带繁星,平畴擢秬黍。涎迹盘蜗交,斗形瘦蛟舞。旁行忽斜上,中栾左右鼓。齐字秀三禾,铭文围九乳。齐景族铸钟,鸿烈典堪数。钟大鑮乃小,高陵注《周语》。独怪此齐钟,何由薶晋土。葵丘会所悬,崔氏赂所取。我闻晋义熙,霍山得钟五。篆古识者希,箝口尽龃龉,嗟我河东郡,法物兹焉聚。即欲考古文,何用寻岣嵝。况乎古之乐,悬钟必成堵。此镈既来归,应为啸匹侣。鼎有盖底铭,剑分雌雄股。神物不独见,试更觅故处。齐人有韶乐,所铸备律吕。上以考籀文,下以佐杜举。太平既有徵,逸经何难补。

再为管香给谏题齐镈拓本

齐镈齐镈,乃出葵丘。黄河所齧之绝壑,给事家居茂陵获鼎处,并得其鬲与其铎。为拓镈上文,绿涩墨光错。首云五月吉丁亥,中云齐师{陶革}鲍叔作。人徵《世本》遗,字补《说文》略。铭辞百七十又二,《盘庚》、《大诰》同灏噩。前诗引晋中兴书,比之义颐得钟在太霍。今再送数难,聊试发一噱。昔者韦曜郑康成,镈钟大小若相争。我云二者各自有大小,物之冤雪人讼平。独怪王肃陈统辈,强谓妇人尚柔不用镈钟声。如使女器同不迩,郑娷燕姞孰为铭?况此大钟用享祀,胡然三著姜女名!又怪杜预解《春秋》,乃云齐桓会地在陈留。果使兹役非晋地,安得惶遽赴会之晋侯?况自班固《汉志》来,郑上久矣名葵邱。今者齐镈又出此,益信西河攘翟有方舟。数事皆足证经义,瑰宝真欲胜天球。无怪好事潘司寇,千金购存攀古廔。我闻北魏张恩发汤冢,钟磬尽向河中掷。同出尻脽一片土,兹遭拂拭彼沈溺。又闻唐时宋沇精於音,塔铃车铎尽能识。广平文孙知律吕,傥见此者更不释。噫嘻贱子敢一言,此器千金良不易。古今出地第二钟,自宣和来难再得。何不悬置汾阴后土祠,永与

焦山周鼎张南北。

春暮得秋湄太原书却寄

美人在雁门,寄我一端绮。春风吹我愁,忽满晋祠水。晋祠春水绿沄沄,万树桃花粲锦云。长亭短亭一百五,茅龙一夜度吟魂。却从天际路,邂逅云中君。月映群帝珮,风摇列仙裙。红尾小凤臆语我,使我手擂碧玉称外臣。臣家赤野无春草,麦苗桑叶青欲了。往日膏腴比龙鳞,即今灼裂成龟兆。臣谨顿首,伏俯私告。帝旁玉女何不排青云,撒白雨,使我士女前歌而后舞。帝乃嘘万里之天风,送我太行之西,洪河之东。鲸波百丈悬瓮寺,羊肠九折铜鞮宫。美人幽居怨瑶瑟,明睐垂泪双玉红。告我春欲尽,寂寞无花丛。台骀之帝子,藐姑射之神人。赤豹云軿日六簙,屯膏不下愁吾民。美人美人尔莫怨,三十六帝余亲见。无须膜拜祝香花,会有唾咳激竹箭。君不闻唐祠峨峨晋水曲,自昔能为一方福。若令群黎靡孑遗,至今谁为荐椒菊。还君锦绣段,持作荒年縠。不用蓬首怨春归,行看夏雨生众绿。

题冯鲁川廉访所藏米芾芜湖县学记为武养斋大令作

老颠洁痴深,祭裳涤藻火。想其俊逸情,礼法无一可。何意仍书学宫碑,天马能教 羁靮施。蛇惊电发不可状,凤泊云纷信有之。芜湖月皎砚山洁,一刻挥成八尺碣。放衙脱帽 踞胡床,正对石兄矜奇绝。代州廉访有拓本,满纸纠蟠见春蚓。可怜墨宝易朝餐,仍似黄金 掷虚牝。君今何处得此书,莫令泪滴玉蟾蜍。

自题所作画

深林叠巘隐牛宫,略彴弯环处处通。槲叶冷回千嶂溜,稻花香飐一川风。鱼龙卷水 江翻白,燕雀穿云日漏红。闻道故园春不雨,聊将泼墨补天功。

边拙存见示秋雨夜话之作次韵书怀

凄风凉雨耸吟魂,读彻《离骚》眼不昏。镫灭耻争山鬼照,诗清拟配水仙尊。已捐 秋扇仍挥麈,尽典春衣且曝裈。为问候虫终夜语,欲将哀怨向谁论。

王继香

王继香,字子献,一字止轩,会稽人。光绪己丑进士,改庶吉士,授编修,河南候 补知府。有《止轩诗集》。

秋晚归棹

病起出访友,一棹乘风轻。回舟趁斜照,秋气分外清。遥山何蜿蜒,秀极不可名。 层云漏日气,白如匹练横。风禾翻青黄,霜枫交碧赪。澂江泻浩瀚,长桥势如扃。蓤罫迷归途,鸥凫导之行。港曲农户聚,树古村社灵。隔隖动歌龡,渔唱若为赓。莫色苍然来,勌羽还林坰。日落万象隐,但见佛火明。一星冷萤度,四野寒螀鸣。掩篷瞑趺坐,身仄心转平。须臾达北郭,街木橐方初更。昏黄句欠关入,夜市镫荧荧。

丙子下第感赋

依然毷氉醉春风,怕见霜蹄蹴落红。岂有方干登上第,何烦阮籍哭途穷。天涯作客 逢春暮,独夜思家况病中。一枕朦胧浑不觉,梦魂飞逐海潮东。

赚杀燕台郭隗金,轮蹄蝶躞到而今。丹青妄冀收凡骨,磁石原难引曲针。独向风尘 伤茧足,轻违定省亦何心。祇应散发东归去,醉抚成连海上琴。

海舶遣怀

屈指乘楂第七回,求仙何处觅蓬莱。百年身世浮名误,万里风涛倦眼开。帆影和云随日落,浪花如雪拍天来。舵楼泼墨馀豪兴,漫向龙门感暴{髟思}。

午门迎驾恭纪

一鞭风月鬯ì 金怀,镫仗纵横夹道排。贴地霜华尘不起,轻车轧轧上天街。行行绕 道出长安,缓步虹桥过石栏。踏遍午门门外月,一房炉火待迎銮。

两行星燧问霓旌,鸡唱东方尚未明。万骑趋风千仗肃,耳根但听马蹄声。龙楼凤阙 郁崔巍,钟奏重门已洞开。警跸渐稠人渐密,红云高拥翠华回。

日出烟开驾返宫,退班珂马各西东。似闻壤叟辕童语,此后年年报屡丰。

次韵简书衡

可是天台再见身, 匡时策待万言陈。功名唾手才何健, 书卷罗胸语自真。万里鲲鹏腾渤澥, 九秋雕鹗出风尘。缅怀三世循良传, 明德由来有达人。许君说字郑君笺, 文是坡仙诗阆仙。独契聃龙惊俗眼, 同师执象亦前缘。太原宗派遥遥共, 中散歌行字字圆。会看安排作元宰, 孝先先播《咏梅》篇。

朱秉成

朱秉成,字文川,浙江山阴人。光绪己丑进士,官常熟知县。有《寄毡诗文草》。

入山行

车行五日不见山,壮思酷欲登孱颜。耳闻车子坐愁叹,明朝腰脚疲扪攀。我闻此语哑然笑,丈夫胡为畏山峤。桃镫手蜡一两屐,好凌绝巘恣凭眺。荒村鸡未鸣,车子催登程。车声隆隆入山去,山径渐仄陂不平。一石忽仰一石俯,怪石作堆蹲去路。十步摧轮五步颠,精摇目眩已生怖。有如挽舟上恶滩,欲上不上摧心肝。有如飞鸟坠绝壁,一落千丈屏不息。破晓惊魂午始定,到此扫尽看山兴。努力加餐复上车,上车颇复忧蹭蹬。道旁争说太守贤,累累石齿经磨镌。不然十里五里路,弃车覆辙纷蝉联。吁嗟乎!人生足卷足不出户,道路那复知艰阻。君不见太行山高高插天,行人终日如蚁旋。又不见天梯石栈歌蜀道,王生叱咤头不掉。由来世路多崎岖,岩岩泰山犹坦途。

出山行

入山如登天,霜蹄健卫鞭不前。出山如登仙,轻身飞落层云巅。山路盘陀六百里,铁蹄齧尽薄如纸。一山忽断一山连,四山终日无人烟。卓午渴掬涧流饮,薄暝倦登藜床眠。饥黎呼号满山谷,女首飞蓬儿赤足。苦曳奔轮不得停,空教行路伤心目。噫吁嘻!男亦务鎡基,女亦勤杼机。八口皲手指,不足偿呼追。天意何独仇蚩蚩,鲰儒尔本无民责,道除见此犹恻恻。恻恻全忘行路难,轻车行尽千山侧。千山行尽路渐平,马蹄电掣飞尘轻。向前行,车莫停。长安已近闻春声,帝城遥傍云霞明。

四月出都

日日言归未得归,今朝才是上征騑。轻装手办身都健,浪迹依人计总非。京国春阑 花事歇,黄公市散酒人稀。上林无尔营巢处,归去江边旧钓矶。

平原道中

鞭影长隄不计程,槐阴走马午风清。吟衫贴雨凉兜梦,官柳扶烟绿上城。诗胆陡浇 村酒大,旅愁莽拥乱云生。劳劳身世成车脚,笑尽轮蹄有耦耕。

寄沈吕生大令

浇愁谁解脱金貂,家世文章重六朝。八九气吞云梦泽,两三人对雨风宵。人间彩笔诗无敌,天上红墙恨未消。最是伤神逢客里,君应珍重旧时腰。

快阁

跨湖桥外水天秋,醉拍阑干动越讴。满地斜阳人去后,绿阳閒杀水边楼。依旧人家 水上村,浊醪浑欲酹诗魂。江山如此人何处,黄叶萧萧自打门。

史恩培

史恩培,字惺石,号竹孙,遵化人。光绪己丑进士,官鱼台知县。有《鹭藤吟舍诗钞》。

与姨丈李幼云师希杰再游长城感旧

一带荒城隐僻村,秦关汉隘竟谁论。万重冷翠侵眉宇,前度飞鸿失爪痕。石磴几湾 容马足,山泉多半入云根。明年桃李花开日,可许春风度玉门。

楚霸王墓

休将神圣例英雄, 抔土残碑已不同。埋伏拌当韩十面, 宽仁宜似舜重瞳。何伤刓印 封诸将, 不悔分羹释太公。迁固汉臣多曲笔, 岂真纪录尽由衷。 秋宵

秋宵静坐冷於僧,参澈诗禅悟未能。也是置身图画里,菊花深处一书镫。

题徐友梅碧梧听雨图

人生天地间,百年直须臾。我生俦类间,七尺同骸躯。置身冠盖间,苦为形所拘。属耳笙琶间,易为声所濡。讵知遭际同,各讬情怀殊。或从喧求寂,或必清始娱。争似廓襟期,所至任菀枯。抑且脱羁束,自顾忘腴癯。何事非吾天,何地非吾庐。何遇非吾乐,何曹非吾徒。第未逢解人,畴复嘲迂儒。吾乡迩郊畿,邻壤接津沽。屋指东西陆,家称大小徐。诸兄文福齐,二难乡科俱。元方快登龙,仲氏怅飞凫。讲席中州游,宦辙东海隅。记主聚星堂,迭绘听雨图。培娄当苍厓,芭蕉间碧梧。咫尺具千里,峥嵘喻双株。画笔羡干云,题句抵穿珠。辁才钝且庸,座谈嗫复嚅。恨未侍皋比,思将访许都。写生宋与王,慕古欧与苏。神交证丹铅,客程阻舟车。快登北极台,俯瞰大明湖。恰逢屋雪融,恍滴檐溜疏。此味此声希,旧雨今雨符。多恐柳阴浓,未及桐柯孤。况隔杏坛遥,孰开蒋径芜。安得足所经,遍假手为摹。纵甘耳无闻,究喜身自如。酒杯块磊浇,禅机色相虚。放出野腔歌,泼开墨渖涂。弹倦悔冯铗,吹滥讥齐竽。转防知音知,相对同胡卢。

王济

王济,字既生,泰安人。光绪己丑进士,四川即用知县。

关山

木落关山晚, 驰驱尚据鞍。天低云影重, 风急鹊声乾。度陇经春早, 辞家逼岁阑。 椒花明日酒, 难作故乡看。

【卷一百七十七】

唐烜

唐烜,字照青,一字仲旭,晚号芸叟,盐山人。光绪己丑进士,授刑部主事,历官 大理院五品推事。有《虞渊集》。

戊戌纪事八十韵

皇帝廿四年,戊戌秋八月。其旬有三日,国乃有大罚。我时官西曹,滥膺折狱职。 日抱城旦书,上取司寇谳。是日天向午,旅进缀班列。济济白云亭,冠盖正窸窣。突来高车 客,并肩趋上谒。密语人不闻,掉头即揖别。众僚先屏退,行迟独居末。似传中旨至,满堂 气惨慄。处分要异常,举动何仓卒。私心妄惴惴,口语互藉藉。或言事虑囚,或言行伏阙。 事在三日前,圣主下天綍。归政东朝廷,新进官悉夺。东海大鳗鱼,早惊金钩脱。深宫含盛 怒,钩党穷诛灭。罪甚八司马,一一付缧絏。众论方快心,有识甘卷舌。外间喧噪声,禁旅 杂街卒。传呼丞相来,肩舆两飘忽。入门坐堂皇,须张面凛铁。趣召主者至,连缚六人出。 敕旨星火催,决不待时毕。狱吏走且僵,伍伯整巾袜。须臾各就缚,衣冠尚綷纟蔡。峨峨四 新参,入朝三旬劣。辄思大厦扶,竟触天柱折。其一职监察,抗疏气郁勃。同官侧目久,飞 语相诋讦。更有粤布衣,未膺簪与绂。壮志不一伸,连坐太突兀。我时迫近前,木立若朽质。 故人乃面之,颜忸心忉怛。传诏官人来,天宪口为述。尔等悉逆党,左右皆曰杀。跪听宣读 毕,臣当伏斧锧。林君最年少,含笑口微映。谭子气未降,馀怒冲冠发。二杨默无言,俯仰 但蹙额。刘子木讷人,忽发大声诘。何时定爰书,何人为告密。朝无来俊臣,安得反是实。 抗辩语未终,群隶竞牵捽。但闻官人言,汝去不得活。相将赴西市,生死此决绝。扬扬如平 常,目送肠内热。步骑夹道拥,闉阇车填咽。丞相亲莅刑,事与往昔别。并有覆巢惧,妻孥 不敢诀。引领就白刃,夏侯色可匹。携手入黄泉,夕阳照碧血。今日身横尸,前朝语造膝。 幸赖乔公贤,为收无家骨。吏人讫事返,流涕向我说。役卒呈数纸,云是狱中笔。我时但悯 默,反覆难终阅。人生遂到此,顷刻化异物。仰见天上月,照人倍萧瑟。徒步归寓庐,入门 忘饥渴。家人怪我状,疑是感夙疾。约撮告之知,相对亦气噎。夜半魂梦惊,不觉自嗟叱。 国事方艰虞,时政有愆失。徒闻縻好爵,谁肯念王室。养士二百年,辛苦数才杰。贡自九州 来,帝曰予惟弼。求治或太急,论事或过烈。庶几鼓朝气,一洗宇宙晴。贾生昔痛哭,绛灌 颇不悦。出为长沙傅,谪宦犹称屈。况我祖宗朝,钦哉惟刑恤。未闻禁近臣,中道遭黥刖。 不待奏当成,一朝饱屠割。举朝孰营救,到处肆媒孽。罪状在疑似,性命快谗嫉。逝者傥有 知,叫阍天听彻。人世无是非,恨难万古雪。我作纪事言,覼缕话畴昔。匪以悼其私,实为 愤所切。

二哀诗•兰午亭明府(维均)

沧州吾邻郡,自古多奇士。周旋文字交,知我惟兰子。早岁歌《鹿鸣》,壮年偶出 仕。未膺赤绶荣, 忽集青蝇矢。一官奚足恋, 弃之犹敝屣。归来发藏书, 今古究终始。下觑 章句儒,前后等糠秕。一身甘支离,众口任訾毁。我时困青衿,相遇长安市。冠盖日纷纭, 惟君独伟视。从此弟畜我,论长十年齿。会合常苦慳,两度过君里。君复京洛游,我初弹冠 喜。对床话风雨,解囊济庚癸。导我语周详,爱君文丽绮。君忽掉头笑,书生见尚尔。丈夫 宏建树,岂在钻故纸。陈编酣糟粕,随人效诺唯。以此取世资,咄嗟尔奴婢。东西日侵略, 当引为国耻。衮衮诸公卿,了不知彼己。隐忧伏萧墙,闰位乱鼃紫。嫠恤岂徒然,兴亡有责 耳。邻舍闻咋舌,窃骂君狂诡。昧昧我思之,针砭彻心髓。句留逾半载,暌违倏一纪。中间 一邂逅,匝月整行李。有如饥得食,颇似鼎染指。誉我学精进,窥君貌衰委。君养丘园高, 我痛垩庐倚。朝端争水火,君言斯验矣。三辅暴徒起,爬梳不可止。红巾塞里巷,朝人暮犬 豕。官吏莫谁何,父老肃拜跪。君曰乃盗耳,蕴祸在内宄。忌者走相告,凶党抽刃俟。俄顷 悉坌集,大索不移晷。倔强就执缚,讙呶醢之已。枯胔暴原野,家人幸料理。不日渠魁诛, 沥血为君祀。我闲围城中,翠华已西驶。消息故乡来,流涕但抚髀。不得哭寝门,喉梗若结 痞。乳臭实召祸,贤哲独遭否。昔约君卜邻,今为君作诔。昔别客魂消,今伤臣质死。造物 能穷人,先夺其所恃。欲碎伯牙琴,且隐南郭几。天池有时翻,泉台何日起。安得寄此词, 置君幽宫里。

二哀诗•王湘岑参戎(燮)

王公宁河彦,家山推麟凤。曾祖谥刚节,殉国泰山重。君少负逸才,力学不好弄。 追琢成文章,将为清庙供。家贫守世禄,国恩支薄俸。辛苦事櫜革健,黾勉易章逢。上承老 母欢,下教叔与仲。各举进士第,先后玉堂贡。惟君补右职,羽林困羁鞚。时有张勤果,许君为国栋。劝君脱兜牟,论荐储大用。君恋洁白养,甘阻六翮羾。执戟扬子云,思比相如讽。朝出介马驰,暮归摊书诵。我昔客京华,颇好事吟哢。定交杵臼间,羡君识鉴洞。说诗解我颐,论文释我疭。一别忽六年,天为补缺空。君备千城选,我献皋陶颂。重结金石契,忧乐誓与共。造访停吟鞭,招邀破蜡瓮。暖扑东华尘,寒蹋天街冻。快论争轩渠,得句互磨砻。往往拍案起,绝叫惊仆从。君胸罗五洲,强弱分郑宋。谭兵鄙马武,著论先江统。东邻氛正恶,庙堂事倥偬。我适登君堂,独居心有恫。太息事至此,国是尚昏霿。一战将不国,祸变由斯种。我闻疑信参,君言果亿中。岂料庚子夏,畿辅暴徒閧。咄咄密勿臣,乃为市井哄。杀掠遍衢阓,横流如决壅。君守朝阳门,匹马力制控。鸱叫昼日昏,麕聚凶徒众。乱刃随交下,须臾毕酷痛。白骨荡灰尘,碧血滴乳湩。次日我闻知,痴立若呓梦。犹忆十日前,过我食角粽。哭君不成声,赙君不能赗。妻孥仓皇避,凛凛覆巢恐。书史付一炬,遗稿莫甄综。钞存我亦失,慵放亟自讼。我时三上书,不得采菲葑。京华随之覆,豸契貐谁始纵。公卿不解事,安能责愚蠢。良人身尽歼,恩恤徒颁赣。我长君两年,后死其犹瞢。匪仅抒私悼,兼为千古恸。

乙卯都门杂感

壮岁耽图史,衰年厌绮罗。无官轻束缚,有志悔蹉跎。燕市谁晞发,秦川尚枕戈。 书生信枯槁,三复采薇歌。

未能追古哲,不敢傲时人。衰病惭通隐,羁栖学任真。镜中吟态苦,衣上酒痕新。 去住都非计,閒愁怕损神。

南郭方隐几,君平正下帘。新丛培药本,细字认书签。散漫妻孥怪,疏狂故旧嫌。料无白衣使,生惜后陶潜。

偶被招邀去, 亲知笑我顽。停杯数人物, 洗眼看江山。往事宜缄口, 新闻足破颜。 畏人问出处, 曾记点朝班。

不觉光阴换,经春又及秋。薰风雏燕喜,凉雨晚蝉愁。物理皆如此,人生当自谋。 荣枯千载事,吾道岂蜉蝣。

旧业荒芜尽,中年仕宦疏。任饥儿女色,懒复女友书。落叶愁难扫,名山愿已虚。 故乡春梦里,父老话菑畬。

天地此儒冠,馀生迁一箪。交疏讥讪少,家远转迁难。偕隐终无侣,盟心殊未寒。 平生薄庾信,开府在长安。

一代论风雅, 渔洋神韵标。明湖赋秋柳, 遗恨在南朝。辞汉铜仙泣, 朝周玉马骄。 前贤如可作, 何但客魂销。

王铁珊

王铁珊,原名乐洋,字海门,一字伯唐,英山人。光绪己丑进士,官兵部主事。殉

难,赠道衔。有《王戎部遗墨》。

和哭盦诗

匹马长城见窟泉,上都宫阙夕烽边。穹窿远下诸陵拜,转战谁容一剑前。不有艰危 多难日,岂看社稷中兴年。风尘逆旅鸢肩客,回首关门已泫然。

才名海内更无兄,漫汗当年谒太清。閒道旧悲经丧乱,新亭还见泣公卿。黄尘夕警甘泉火,白帽云屯左辅兵。仓猝东山安石去,可令回首计苍生。

铁砚冰镕汎墨花,南山夜雨走雷车。深怜范老胸盈甲,尽道温生手惯叉。鹿野呦呦 春唤侣,鱼歌浩浩客无家。悬知衡岳云开处,一叶轻舟渡赤沙。

和檗坞四丈杂感诗

士风燕赵惯悲歌,南市楼台数广和。十日大酺频际会,两都旧赋苦研磨。金牛雪塞朝窥牧,石马天池夜涉波。见说蒿宫亲撤乐,简兮贤者意如何。

撒手扶馀万马回,汉兵歌啸走飞灰。可应幕北诛苏建,终见川西赏妙才。九庙神灵 园寝固,百州琛贡简书来。重乔介驷君休问,渝水孤军事亦哀。

海东关白本无名,沈石天教拔汉旌。浪语似闻陶李子,大星更落武昌城。苍黄榆荚 飞春雨,赤白花园筑帝京。稽首湘川老渔父。刺船须我踏莎行。

天上群仙紫玉衫,芥山昼纳石岩岩。晋家族阀无敦应,亳社衣冠尽陟咸。怪犬穴潜 知牧贵,灵蛇池报为恩衔。岱舆北极重浮出,清浅蓬莱急举帆。

忧天一泪直滂沱,寂寂中原独枕戈。恣眄重溟故如此,试开函谷敢谁何。陶轮世界 归高掌,霓舞灵仙醉大罗。万里身行但有哭,商山莫唱《紫芝歌》。

登高作

叶叶罗云结翠帷,梵天花雨照秋晖。登高悔是重阳日,千里燕山一雁飞。

陆锺琦

陆锺琦,字中甫,宛平籍萧山人。光绪己丑进士,改庶吉士,授编修,官至山西巡 抚。谥文烈。

题金桧门总宪观剧绝句

虞陛赓歌际盛时,人閒弦管不教持。寓言本是南华旨,翻作西涯乐府辞。

停轺畿辅正搜才, 桃李千蹊是旧栽。玉尺罢量閒作字, 几人法曲共听来。

登场鲍老意阑珊, 粉墨徒留壁上观。一首加官先道破, 退场多是不堪看。

短髯道士梦中身,唤醒邯郸索解人。莫作东山品丝竹,神奸禹鼎铸方新。

陈曾佑

陈曾佑,字苏生,蕲水人。光绪己丑进士,改庶吉士,授编修,历官甘肃提学使。

和少璞饮茶诗

少小不嗜茶,茶具随例供。迩来日数酌,收茶资微俸。茗碗慰朝饥,瓶笙伴夕诵。 火活烧松明,香清与梅共。饮罢北窗眠,看云目为纵。

品茶先品水,水佳味乃全。晨兴汲甘井,一勺手自煎。适意岂必酒,饮中亦云仙。 安得兰谿水,到此冰雪天。置符信可调,今无苏子贤。

朝士竟徵逐,饮籑造细微。传餐学西式,何止肉食肥。朋侪八九聚,日晡醉忘归。 低心逐时好,暂勉终有违。一杯且解渴,伯玉今知非。

柯劭憼

柯劭憼,字敬儒,胶州人。光绪己丑进士,官安徽候补道。有《二州山房诗钞》。

立春日寄姚小樵闽中

故园惊春至,题书寄岁阑。以君为客意,知我傍人难。鼓角严城晓,星霜旅夜寒。 飞乌频寄语,那得一枝安。

游陈氏园同劭忞弟及经五妹丈

十里城西路,名园蜡屐寻。松阴连径润,苔色到门深。霜木垂丹果,风湍落翠禽。 转怜烽火后,复此共登临。

都中赠别范岱云大令

前年河北有书至,知君共作邺中客。风尘暗天道路长,寄书何由到君侧。今年予季初射策,春风共上长安陌。君时亦来甫下车,抱袂渐得亲颜色。燕台三月风景殊,白日不见黄尘趋。杜门客馆不复出,踪迹往往嫌多疏。尔来天气复清霁,访君一为倾欢娱。郎官大令今二苏,谈诗不见心踟躇。街头泥滑春雨初,观棋邀我高君庐。天门蕊榜照九衢,南宫姓字君则无。晋州齐州千里俱,分飞急又唱骊驹。君言航海欲归省,我闻此语生嗟吁。我家闽宰故丈夫,荒祠落日空啼鸟。归骨未得返故都,眼穿不见螺江书。即今沦落昔不知,艰难万事谁能图。感君意气真吾徒,为君长语留斯须。海水东流南北区,嗟君此去天一隅。明朝分手九河道,他日相思万里馀。

出东昌作

十载风尘梦一回,征车重过鲁连台。荒原水涸新苗长,大泽春寒细雨来。战垒经年 荒草合,戍楼一角暮云开。邹枚久作梁园客,深惜当时作赋才。

鹿邑署中

何事他乡客,淹留迄至今。官斋连夜雨,泽国足春阴。小院通花气,閒窗度鸟音。 仙台城内有,几日废登临。

徐珂

徐珂,字仲可,仁和人。光绪己丑举人,官内阁中书。有《真如室诗》。

安庆答宗笃庵

风雨昼如晦,江淮春已深。看花千里约,听雨五湖心。旧燕营新垒,归鸦失故林。 因君感飘泊,还答《式微》吟。

王存

王存,原名景沂,字义门,一字存子,江都人。光绪己丑举人,官内阁中书,改广 东知县。

赠李审言

多闻直谅今有几,李叟肫然古君子。踪迹各在天一方,文字不隔心千里。我方登坛拜龙象,君乃缘谿顾鳣鲔。乱离再见惊老丑,险韵相贻斗诙诡。时危佳人有作贼,命短诗朋半为鬼。多君守道宗渊骞,扶病忍饥嚼宫徵。嗟余食粟晚知惭,未完补读贤乎己。闭门饱听妻孥骂,枉尺惧为魑魅喜。即今义熙何甲子,坐见淮海呼庚癸。江楼得酒肺肝热,更乞雷音苏冻耳。

拔可邀食新荔病冷不克往梦回口渴忆粤中黄皮果不置写寄二绝句

已倦横陈疏女颊,所须丹药火吾宫。爬搔痒垢除巾袜,賸受凉宵一簟风。

渴羌曾作近南官,山驿鸣肩啖露团。绝忆墙阴金弹子,江南无此可人酸。

寄沈友卿江宁十二韵

七载炎州别,相望阅岁寒。羁孤转江海,旅食守丛残。枯树馀生在,狂花瞥眼看。 枭鸾一毛羽,蛟蜃各波澜。错有量金铸,饥愁买玉餐。自然堪陨涕,何处足凭阑。念子从军 幕,论文据将坛。新诗能惠我,傲骨不应官。西瀼酣歌老,南楼宾主欢。愈风烦草檄,活国 待弹冠。腰瘦心逾壮,时危地孔安。近闻摧六虎,早与说廉丹。

董卿书来有归志顷闻移鄂卻寄一首兼讯蘅意

书来款款说宜休,谁遣移官》斥上游。泊宅何须问乡里,买山是处足林丘。微生共 老兵戈际,别梦仍依江汉流。绝笑欣奔彭泽令,轻装能为小姑留。

旅居对门有饼师儿当垆唤卖探喉转音圆折哀厉达丙夜不息方今之人以口舌取富贵 者何限是儿操业贱而劳苦已其诗以哀之

嗟汝饼师儿,转吭清越若杜宇。胡不挟瑟邯郸去,不然琵琶鲜卑语。可以千金一曲 事贵人,鲜衣玉馔驰飙轮。惜哉守此犊鼻裈,霜寒月斜不得息。贯珠绕梁空呖呖,更苦邻家 失眠客。

武进陈君研因以余与其尊公鉴沤先生有一日之雅介公约通殷勤感念畴昔怆然有赠

佳茗醇醪忆往还,惊蓬宿草断追攀。能先大劫收身去,坐看弥天战血斑。已隔死生 江海外,待通风义纪群閒。哦诗莫起苍茫感,排遣春愁对蒋山。

山海关旅次送别王翕丈

孤云逐南风, 六月出辽海。登临旅情换, 俯仰人事改。江城寒雨别, 捧手忽三载。兹来已行乐, 逭暑赚清快。楸枰困而学, 笔舌文无害。何期畏简书, 虚用涉涛濑。五日遂分携, 莫罄胸磊磈。苟活忍须臾, 既往孰追悔。两仪方汹汹, 谁能理功罪。先生还野服, 日与金石对。贱子坠坑埳, 将老倚市卖。何方觅二顷, 解脱得自在。寻诗撰邛杖, 湖船听欸乃。

丁巳八月十三日过菜市吊晚翠

碧化花烟销二十年,等閒鸡犬尽升仙。回天独坐成今昔,屈指甘陵让汝贤。

燕啄龙归事已陈, 本初仲颖亦成尘。千秋抉眼东门客, 输与焦头烂额人。

鹤归燕市风尘黑, 笠钓鳌峰海气凉。消受湖山新俎豆, 故人今作水仙王。

约兑之游香山

浮生浪说贫非病,渐老翻因病得閒。冗食不烦先请急,郊游聊喜当看山。梦回乌帽 黄尘底,意在青林白嶂间。祇恐输君腰脚健,上方萝葛未能攀。

海水

海水阎浮几变迁,天龙八部散如烟。世尊终堕泥犁去,迦叶拈花一莞然。

笼东

弥天四海一鸡虫,束手收心破屋中。晚学健忘诗送日,寒衣迟到酒鏖风。腐儒稷契成秋呓,穷鬼车船用火攻。莫问阿婆三五事,看花揽镜本笼东。

赠何墨

何郎二十已勃窣,能写山容凿山骨。时为阿翁添老树,独》斥西江问津筏。槐堂之年半缶庐,子入虎穴捋虎须。我今赠诗媵以斧,出一头地让宗武。

赠张君自操兼简姚雨平四十韵

张侯二十强,已学万人敌。四七建旗鼓,荡决走南北。投壶谢多马,解甲遂敛翼。王城三年住,大海六月息。《阴符》蚀秋雨,青春送白日。玄黄野血乱,袖手养渊默。邂逅羁旅中,屯遭引佳觌。初见相劳苦,深语倍温克。昨来更殷勤,念我悬磬室。谓可恣取求,袱被数晨夕。金门一囊粟,与共尚有力。贱子感且辞,齿粲泪暗滴。安得长者言,温馨暖立壁。床头金未尽,旧馆足容膝。无为使君累,政用自鞭策。忆在光宣朝,珂乡弄刀笔。戴星虽疲劳,省己多阙失。才贤幸匡救,父老宽刻责。昔年甘苦事,都化烟云迹。惟馀香火情,异代犹不隔。穷老众吐弃,沟壑分所得。假令一瓶钵,墟里传而食。庶几相招邀,勿虑被呵叱。充君解推意,兹愿傥可必。方今海南州,鱼尾烧天赤。鲸蛟各磨牙,人命贱虮虱。曷不投袂起,大云荫火宅。山民耐征战,私廪尚丰实。异军成一队,士勇吏悃愊。运以岂弟心,治以清静律。剥复汔小休,理数有终极。壶浆罗马首,骄将定传檄。拨乱反之正,功成就耕织。腐儒无见逾,长揖参寸尺。诗新荔子熟,惠州饭饱吃。便当行荷锸,醉死笑哑哑。斯言如梦呓,此计关家国。赤亭姚弋仲,我敬公所暱。同来听荒鸡,起舞霜月白。愿言厉毛锥,攘襟二豪侧。

丙辰初夏雨中口号

虞罗满山筍在梁,天时人事两未央。扶颠误喜相司马,竭泽谁与烹弘羊。残客亡人 同所愿,监军使者空相望。泥行赁舂换一饱,雨积坏麦愁青黄。

书衡曼仙招饮赋谢兼述所怀

汾水鸣箫侣,荆台傅粉郎。两贤同好我,五岁再升堂。窗竹如相识,庭柯暗有香。 买春饔子贵,清暑食单凉。野服羞残客,元谈半楚狂。坐迟花上月,梦隔海生桑。眯眼风尘 际,回头翰墨场。别来俱老大,饮罢独苍茫。险欲增诗胆,宽惟拓酒肠。故人真赏在,一为 奏清商。

赠覃孝方二十韵

十年電鱼乡,耳熟贤令尹。连城近芳躅,短辕接高轸。觥觥慈惠师,拔薤健秋隼。 东施苦描画,寸锐来尺窘。香江酒楼上,华星俯栏楯。石塘明月圆,海气天风引。通辞喜揩 眼,陈力知绝膑。彼都为合传,汗滴谢不敏。清言互蛮语,促坐恣嘲辴。瓶空夜潮急,扶醉 去可哂。官符王路隔,军笳楚歌紧。归客赋鹦鹉,流入杂蝼蚓。苟活焉用文,半黠祇自闵。 立槁亦素心,女媭詈安忍。薄游背雁飞,新凉惜荷尽。长安弹棋局,青红幻蛟蜃。登堂话畴 囊,槿篱绕石筍。相看各鬑鬑,岂谓俱泯泯。君其奋羽翰,我惟鉥肝肾。梦中荔枝湾,花田 共畔畛。

上将

上将尊南服,苍头起异军。不成传檄定,可惜治丝棼。黯澹蓉湖水,迷茫笠泽云。 吴蚕春罢箔,江雁夜惊群。大树婆娑老,悲笳日夕闻。毋然更烦费,终仗解纷纭。

读槐楼病中杂咏题后

天遣诗肠取病宽,浑然虚白得还丹。铁门限外千年调,玉版声中一字难。作夏可知 行药趣,送春准拟折枝看。梦医尚寐吾方始,欲寄陈芳觅暂安。

福庐先生枉寄亥既集读竟赋谢

一贫报国愧多财,三字称官列上台。投老昌诗犹课日,吞声每饭自兴哀。病鸱凌凤 知何有,腐鼠呼鹓更不回。賸好推枰延橘叟,冷吟销尽掞天才。

和槐楼瓶中芍药即用原韵

盆盎能留绝世姿,浪蜂惊蝶莫教窥。幸逃风雨犹为福,取媚轩窗暂入时。赠远祇应怀孟弋,埋香须遣近要离。大千春色从人看,比似鹪鹩借一枝。

写近诗就正於志盦复书谓当与松邻同读再简一首兼讯松邻

吾宗诗律早升堂,道子开元远擅场。二妙取怀相赏析,百篇低首待平章。自怜微尚牵人事,未有中声起国光。腹负真惭读书少,眼明今喜得朋良。

金蘅意来诗盛言彭泽山水之胜君官翰林二十年坚卧不出今忽两作县令寄此调之

平生金翰林,懒不听朝鼓。年年送作郡,高枕卧江浒。胡然百六会,攘臂说治谱。 辞尊而居卑,舍身救众苦。岂云恋升斗,颇亦商出处。诸侯有惠爱,好景相媚妩。犹能赋新 诗,艳说名山主。三径资有无,公田祝时雨。

昔我折腰日,人祸未蔓延。入官已惊怛,百怪来蜿蜒。不免用意气,中更相哀怜。 知罪仍窃禄,徇己稍任天。如是八九载,颜厚手足胼。较知偏瘠区,差得试所便。喜君山水 县,远绍陶公贤。陶公岂不美,吏事无述焉。毋亦望而走,賸可酒作缘。疲氓今孑遗,况入 义熙年。君勿小百里,岂弟足回旋。

癭厂过访奉赠一首并怀东原

陋室能来长者车,寂寥羁旅意何如。安心欲访无生法,用世惟求相斫书。莺燕老君 评玉雪,马牛嗤我在襟裾。南天桂十如通问,拟傍桄榔赋卜居。 陈孝起索题四十九岁所临晋唐人书册子

发兴自轮困,临池见苦辛。问年穷不死,惊坐笔如神。亦恨无臣法,应难索解人。 莫将酬酒债,留尔伴萧晨。

罗润璋

罗润璋,字琳修,湖南桃源人。光绪己丑举人,江苏知县。有《羽仪阁诗稿》。

延泉夜泊

露重天高霜气清,满江流水浩无声。山钟响歇渔镫远,独倚帆樯看月明。

偕陈四伯彝游鸡鸣寺楼晚眺再登北极阁

峰头杰阁耸崔巍,望里星辰北斗开。半壁江山留柱石,八荒烟雨会楼台。陈登百尺容高卧,罗隐三生傥再来。南国风流今未艾,乡关庾信不须哀。

汪兆镛

汪兆镛,字伯序,号憬吾,番禺人。光绪己丑举人。有《微尚斋诗》。

泐溪岩

秋士无好怀,新爽却喜秋。墙头数点山,寒碧与目谋。蝉声引苔屩,鸟路穿林陬。岩腹呀然入,绕户众绿稠。石骨鬼斧削,竹根禅床幽。循磴蹋枯藓,开轩临清流。杂卉响笙筑,古藤蟠蛟虬。扑衣山翠湿,敛袂尘虑收。惟叹绍兴年,题壁穷雕锼。其时南渡初,戈鋋遍中州。萧然《人间世》,胡为《逍遥游》。曩贤岂无意,诗人工写忧。兴感在千载,寄怀聊一丘。青草藉可坐,素醪醉即休。径当结茅庵,佳处为我留。

曾习经

曾习经,字刚甫,号蛰庵,揭阳人。光绪庚寅进士。历官度支部右丞。有《蛰庵诗存》。

汪子贤宅菊花

平生汪子交情厚,十年同巷更稀有。日日天衢比马归,夜或纵谈月挂斗。心亲直置 形骸外,岂有物色阻携手。近营别墅足丘壑,忆向春前乞桃柳。谁能助长烦智力,要令生气 充户牖。先生固是羲皇人,侧身竟落乾隆后。年来万事足悲咤,暮唶朝唏如疾首。既念大弨 挂空壁,聊复千金珍敝帚。眼看世事纷棋局,安论文章覆酱瓿。青天白日了无事,紫蟹黄花 几重九。王尼居处沧海流,杜陵老屋秋风吼。且喜官斋得閒旷,扫除一室意不苟。浮花浪蕊 雨淹尽,纷纷泥尘同一垢。最念东篱乾净地,醉倒且击秦人缶。手揽一枝聊自慰,后时独立 差可久。结根失所古所叹,且从忧患养年寿。

赵尧生招同法源寺看丁香

游心难再羁,迫此青阳暮。投鞭事初地,把臂获良晤。沈沈大雄殿,丁香覆两庑。峭蒨资文字,香润及巾屦。连檐竟晻霭,久坐宛清曙。固知佛日长,稍觉天倪露。平生赵御史,补缺匡王度。似尔风霆手,正要玉雪句。入世有生老,随缘无迎拒。长年眇欢悰,及春理芳绪。馀花今未歇,陈迹昔已屡。初非两眸计,似深一宿悟。达生幸能讬,净义略可树。春芳固外物,且任腾腾去。

陈麓宾乞罢客过之方灌菊畦语客曰顷顿间有园居之适然每傍晚浇花望平西之日觉 其异也予闻而悲之

投老归来幸未迟, 菊丛犹賸两三枝。可怜看到平西日, 不是寻常堕甑时。

穆天子传

黄竹三章悔可追,周家仁厚有流遗。君王寡乐吾真信,不待归途哭盛姬。

田居

渐缓愁年入渺漫,村居二月尚严寒。未应开口逢人喝,且试将心与汝安。迟日野阴 残照在,新潮春涨断冰宽。荷锄已是馀生事,报答东风只肺肝。

二月十一日大风雨雪

入夜风怒号,雨雪倏兼至。晨兴启半户,浩浩势未已。河流骤生波,檐雀俱敛翅。 春锄正入手,今日适无事。坐诵渊明诗,閒临隐居字。我牛缓齝草,亦似有閒意。一杯聊引 满,不觉及三四。村醪虽云薄,饷我一美睡。

夜起海棠花下作

月气冥濛罩海棠,偶然沾醉绕回廊。似闻德祐编心史,颇讶希夷得睡方。久闭亦嫌 吾眼懒,独居遂觉老怀长。此花只与春阴便,雨砌明朝有坠芳。

题周子元遗诗

四卷完完手自编,乡邦文献一潸然。倚庐不及寝门哭,并世同为膏火煎。 雙地活埋 惭我在,生天成佛让公先。昔人只叹龚生夭,苦忆庄休木雁篇。

清明日同社约访万柳堂遗址予到迟社散僧方掩楼扉独自登楼凝望春色苍然

旧栽杨柳半成薪,惭愧寻枝摘叶人。异代同时俱怅望,良辰佳约阻逡巡。固知万事 欢难并,却恐孤游迹易陈。独立小楼无可语,偶从暝色得清新。

送温毅夫还山

寻常惜别到今非,反袂翻无涕可浑。下国未闻椹实美,故山谁信药苗肥。鸿毛生死 听时论,燕羽差池赋大归。去与遗民谈野史,一亭宛在雪初飞。

文廷式

文廷式,字芸阁,萍乡人。光绪庚寅一甲二名进士,授编修,历官侍读学士。有《云起轩诗录》。

赠盛伯希祭酒

郁华阁里警秋声,道在忘身况强名。十叶承华真帝胄,五经通贯老儒生。如闻抚剑 忧边塞,复此衔杯乐圣明。未敢劝君焚芰制,寂寥太学想阳城。

山居杂诗

雪山筩里勤求药,祇树园中广施金。独有净名无一语,天风吹座落花深。石瀃才扃三尺瀑,岩梯高罥万年藤。窥窗欲下猿偷果,过涧仍回鹤啄冰。山谷老人亲种树,碧池处士旧凭阑。斜阳不改青山色,寄语时贤郑重看。

潞河舟次

春色在杨柳,北风犹峭寒。城阴连岸暝,浦浪激云宽。蔬少厨人计,钟残旅梦安。 箧书留谏草,未折寸心丹。

夜坐吟

铜壶咽漏夜雨长,兰缸坠穗凝寒光。弦声凄凄管声促,送入北风闻断肠。此歌不足听,此心不可传。如海漾千秋,循环固无端。阶除无声集白霰,白凤旋空羽如电。邺台铜瓦化鸳飞,冷灰糁入甘泉殿。

辛丑元日试笔

谪籍栖迟久, 穨波感慨频。新年增白发,故国满青磷。星朗空江夕,花秾小槛春。 迂生谋已拙, 窥管验钩陈。

谁解横刀出,真成下殿趋。亡秦三户在,哀郢两门芜。日月回元运,风云感圣谟。 几时哀痛诏,寰海庆昭苏。

刘树屏

刘树屏,字葆良,阳湖人。光绪庚寅进士,改庶吉士,授检讨,历官安徽候补道。

庚子秋金丈溎生以冰泉集索和时有谓伯兄葆真已遭拳祸者集中有伯兄书后一篇读 之增痛

漫叟一亭古,琴尊续旧游。风泉满清听,天地入高秋。茶味静中永,诗魂醉里收。 苍梧故炎徼,胜迹待冥搜。

粟香披大集,名下固无虚。老去宦情淡,归来尘事疏。招邀书画舫,卜筑水云居。 我欲图蓑笠,持竿逐老渔。

伯氏文章伯,惊心汗漫游。临歧才一瞬,小别竟千秋。荔薜魂无语,榛荆骨未收。 名山傥不朽,遗箧忍重搜。

风尘正澒洞,畿甸况空虚。白挺交衢乱,红镫闪月疏。土沙卿相血,豺虎帝王居。 重我鸰原痛,张图问野渔。

程秉钊

程秉钊,字公勖,号蒲孙,绩溪人。光绪庚寅进士,改庶吉士。有《琼州杂事诗》。

琼州杂事

大中初政快恩雠, 王气中原日渐收。若祗寻常悲谪宦, 千秋何止李崖州。

凌和钧

凌和钧、号衡甫、嘉兴人。光绪庚寅进士、官工部主事。

岳武穆王铜爵歌

古爵斑斓高寸五,文字郁律蛟龙舞。云是嘉泰四年造,相台后裔祀忠武。忠武祠宇松柏苍,金牛湖畔金陀坊。生恐精魂招不得,却铸彝器荐椒浆。馨香上达为王侑,王欲下咽眉应皱。若教痛饮抵黄龙,何用款字精忠籀。生气旁魄物与传,尘劫受磨五百年。商尊掊击鲁壶碎,神灵呵护非偶然。吁嗟乎!秦张当年漏鈇钺,麦饭浊酒春秋阙。子孙岂少不祥金,徒供当官铸佞骨。

黄绍弟

黄绍弟,字叔颂,号缦庵,瑞安人。光绪庚寅进士,改庶吉士,授编修。历官湖北候补道。有《缦庵遗稿》。

将去彝陵用梁节庵閒山韵留别李尧岑参议李子申观詧

解官乍觉此身閒,引睡文书一律删。乡梦难忘斤竹涧,宦游屡访下牢关。江流东去欢将别,崦景西催老未还。鸿雁惊风遗迹在,苦教夜雨忆巴山。

留别凝碧轩园中草木再叠前韵

小园草树称萧閒,手抚庭柯绿未删。身世巢鹪聊此寄,门庭罗雀不妨关。落梅送客 应伤别,丛桂留人似乞还。辜负故乡松菊约,结庐相对集云山。

读林霁山集

幽草琼花讬梦中,至今文字照江东。玉鱼葬处魂何往,石马陵前力竟穷。严濑孤踪 皋羽伴,娥江沈恨叠山同。如何采药谈遗老,不及芗林郑朴翁。

读辛忠敏南渡录

长城迤逦西复东,烽火犹照甘泉宫。荧惑入斗下殿走,黄沙万里鹃花红。神州陆沈 始典午,铜驼荆棘无宁宇。行酒天子泣逋臣,奉巾庶人颂圣主。建业铜马浮江来,长淮以北 多蒿菜。襄国岧峣季龙阙,长川嶻嶫佛貍台。关西杨后陇西李,天上真龙起晋水。天宝蕴孽 野猪精,贞元伤心假狮子。唐季藩镇益纷纭,沙陀特起鸦儿军。姑夫称兵向{巩革}洛,翁帝 责赂捐燕云。天福太后徽陵女,白衣待罪黄龙府。北来吃饭主恩深,南向飏灰妾心苦。天水 龙飞开帝基,黄袍仓猝陈桥师。薰风门外降王宅,长春殿前学士诗。惜哉嗣皇多失德,艮岳 竭尽万夫力。道君端拱上清宫,媪相铺张燕山石。朔方胡骑风萧萧,杜鹃凄绝天津桥。城郭 一朝华表改,烽烟三月咸阳焦。平沙浩浩窜荒裔,毡庐惭对延禧帝。役夫申恨骨碌都,府吏 报恩阿计替。马角乌头久不归,凄凉羌笛梅花飞。珠结同心泽利妇,金钗一角盖天妃。五国 城边藁葬处,墓门无复冬青树。首祸未蔽童蔡辜,复雠重为汪黄误。百年兴废天难知,青城 续赋遗山诗。孟珙幽兰函朽骨,刘祁甘露题残碑。稼轩奋笔书国耻,内讳颇乖春秋旨。未妨 杜牧著罪言,宁免魏收讥秽史。建炎南渡颇偷安,愿写百本朝堂观。激发功臣动毛发,针砭 孱主无心肝。东南半壁金瓯缺,抱虎枕蛟同一辙。葛岭高筑半閒堂,兰亭私题二义碣。我生 颇似靖康时,举目河山泪满颐。江南更无乾净土,河上坐拥逍遥师。冲人高蹈勋华迹,文武 旧臣奉金册。衣冠何似广明年,正朔旋更至元历。鼎湖一去龙为鱼,湘女祠前斑竹枯。沧海 横流无著处, 搢绅莫复谈黄虞。

黄岩扬定夫前辈寄示感怀诗次韵奉答

九死馀生似裕之,秋风萧瑟鬘如丝。私忧嫠妇周将陨,颇羡村人汉不知。野草有心烧后在,残花无力雨中持。玉京回首昇平梦,可复衣冠尚昔时。

郡记重编郑缉之,梓乡旧帙渺金丝。赤城灵秀逶迤接,白石渊源约略知。垂老生涯 同寂寞,读书种子孰扶持。至今墨妙碑亭过,尚忆先生坦腹时。

黄岩王玫伯同年后雕草堂落成寄诗索和次韵答之

略识文章豹一斑,传经著述二洪间。暮年萧瑟初归里,故国周围賸有山。闲与灵均 吟楚泽,敢烦尹喜候函关。露车草草差安稳,馀痛惊心倦鸟还。

沧桑饱阅如传舍, 莽荡乾坤一叶身。杜老万间思突兀, 放翁干步爱嶙峋。 手编诗集

还题晋, 口授经文未毁秦。闻道草堂无俗客, 哦松来伴岁寒人。

重拟东坡赠影形,清文落手似新硎。芟除芜秽谈经席,点缀芳菲问字亭。万里新愁 双鬓白,百年旧物一毡青。五峰师友渊源在,咫尺苍溪有典型。

年来儒效猒迂疏,寂寞兰陵讲学庐。归去聊营陶令宅,写成应有郑君书。海滨孤愤 消精卫,世上危机避寄居。衮衮诸公台省满,华堂意味近何如。

杨承禧

杨承禧,字疐菴,江夏人。光绪庚寅进士,改庶吉士,授编修,四川候补道,有《疐 菴集》。

与艾立三

丈夫盛年弄笔砚, 宦学已成难自荐。黄金铸交知未深, 明珠投人望谁眄。即今蛮触斗纷纭, 朱方羽檄时相闻。天子独嘉南越义, 汉朝重召李将军。似君奇士几曾有, 韬钤百万谈兵口。不战成功在伐谋, 运策决胜由反手。贾谊翻思属国勋, 请缨乘传壮终军。立柱穷边标汉界, 封山绝顶诵奇文。岂知闾巷无人识, 负担行歌黯颜色。志存沟壑不肯忘, 时须富贵终来逼。请为先生善解嘲, 壁间雄剑双缠绦。可怜一试非容易, 莫将轻重比鸿毛。

大风雨从汉阳渡

中流拔剑横江水,雪浪如山复几重。浮世津涯何莽苍,平生淮海在心胸。天边电笑 多投马,雨后风颠远送龙。回首晴川烟树阔,夕阳一角度疏钟。

与田静轩艾立三饮周试生宅作歌

周氏堂前饮春酒,座中四客平生识。烛花欲谢杯琖空,乐且厌厌情未极。借问客为何许人,四人同心不易得。即今便已称奇士,於古亦足争雄伯。折节初慕季心恭,负气难除袁丝直。丹青皎洁见本性,卞和犹抱荆山石。若使当初入秦市,仰天一叹乌头白。亦能铁椎怀袖中,千夫之勇皆辟易。不然扁舟五湖去,黄金珪组判一掷。宁当偃蹇诧不遇,跋前疐后遭狼籍。未来成败岂逆睹,眼前义利粗分晰。螳螂当车蚁拔树,久知造化非绵力。区区志烈差自异,悠悠虚生真可惜。吾徒终竟止如是,人生何贵有羽翼。

榕湖新建楼

榕湖老榕荫百尺,增巢架构接飞暾。瞥看画壁云来影,直到长天鸟尽痕。千岁枝柯 荒藓大,当时城郭废谯存。精灵化作山岚古,瘴雨横吹敛夕昏。

遣愁

流水何尝舍,春风不肯豪。野晴新树直,池雨暗泉高。多病悦人健,观生知己劳。 愁来莫强酒,一琖即酕醄。

显凡翊夫出示晚步武担山之作奉和

城隅荒僻问谁来,二子能居何陋哉。雨后新苔随屐合,风前敝席映门开。久幽不改 沈冥操,多累元非隐遯才。相与褰襟延暝色,空思呼酒傍池台。

武担残山草树傍,晚登蹀躞似平冈。云容流过锦江碧,月影飞还石镜凉。池上私蛙偏吠主,城头野雀尽归仓。幽居自占无人觉,薇蕨如生即首阳。

蒋廷黻

蒋廷黻,字稚鹤,号盥庐,海宁人。光绪庚寅进士,历官潮州知府。有《随扈纪行诗存》、《麻鞋纪行诗存》。

抵行在率赋

频年清镜点吴霜,回首燕京道路长。千里不辞冰雪劲,一官耻为斗升忙。乍瞻魏阙 真疑梦,重睹尧天喜欲狂。闻道深宫珍贡卻,愿将在莒祝毋忘。

江云龙

江云龙,字润生,号静斋,合肥人。光绪庚寅进士,改庶吉士,授编修。江苏候补 知府。有《师二明斋遗稿》。

二女篇赠李仲仙布政

巢湖如洗镜,孤山如点黛。就中生二女,容颜婉娈对。年纪颇相若,幼者弱一岁。 闾里既相接,性情复相爱。初七及下九,出入每连袂。同守不字贞,各抱知希贵。毕竟幼者 美,光华难久閟。空谷发幽香,清飔飘兰蕙。朝扫峨眉月,夕解湘江佩。飞云撮其履,紫霙 承其盖。来去儵如风,游戏天人界。老女坐湖山,日抱泉石睡。梦醒堕京华,王侯高甲第。 其中多美女,艳妆争妖异。冠髻峨以高,眉腰曲而细。自惭步屐非,欲进仍却退。幼女翩然 来,光艳照满地。邻妪啧称羡,室婢惊走避。老女出迎将,掩扬增丑态。絺衣黯不光,荆钗 理复坠。怜我女贞木,惨淡无泽气。分我玳瑁簪,系我香罗带。饰我百琲珠,一一生光怪。 携手上香车,流轸衔飞辔。大道易扬尘,长风影轻旆。生惧一点汙,芳兰竟体败。每念旧湖 山,结庐今仍在。野菊灿晚花,修竹洒晴翠。自冷二女踪,庭宇生萧艾。绩女挑镫叹,田妇 倚锄待。会当联袂归,岁寒保松桧。

梦湘校试通州卷用东坡监试韵赋诗见示倒韵和之

疏室过清风,午梦初回枕。失笑少年事,欲语口还噤。束发受章句,眼光入椠鋟。 偶弄嫫母姿,爱者忘陋寝。堂上诸公坐,暗中摸谢沈。染指天家庖,自许精调饪。后生思大嚼,过屠来密谂。函人耻为函,察革眡其朕。奸者侈异服,吾道悲左衽。泮林十亩地,鸱鸮来集椹。云中鸟乱群,渊底鱼惊淰。积阴塞大荒,不寒思之凛。嗟子刷天马,故步愁踔踸。水翦双玉瞳,净洗砂石碜。我为老弃妇,不堪再裹锦。痛哉卢瑑言,此日霖何甚。定当置高 阁,十羽東为审。爱兰必锄艾,披麻时见荏。班固眼如豆,人物混九品。铁点史公书,佳者 拾馀渖。此语起公兴,斗酒快一饮。人才荒年穀,储之岁必稔。逸士涧底松,郁之天所禀。 八百尽孤寒,日思发帝廪。

梦湘肯堂叠前韵复我因顺和之

大儒盗诗书,大官盗庾廪。颜稷遇殊途,惠跖生异禀。豺虎欺岁凶,螟螣贼岁稔。 鹪冥鸟稳睫巢,鼹鼠饱河饮。鸡犬舐剩丹,蝇蚋拾馀渖。凡此芸芸生,实难一一品。中疑辞 或枝,色厉内多荏。离朱视必明,师旷听必审。渊明圣之徒,有解不求甚。昌黎诡於文,天 孙织云锦。大风扬秕糠,长河走砂碜。奈何一蹉跌,只足怜夔踸。嗟余才力薄,六马朽索懔。 坐井鼃不旋,竭泽鱼初念。先生好六经,日日鸠醉椹。更得主人贤,向趾请席衽。河马行负 图,宝龟应卜朕。定古见文运昌,后学争来谂,换骨予大药,咽气谢凡饪。江左起王谢,眼 中无刘沈。颇闻大憝诛,四裔兵革寝。且图眠食安,肝鬲息雕鋟。吾舌固尚在,愿学寒蝉噤。 约作梦中游,得趣同忘枕。

次梦湘登海陵城韵

黯澹春容久不晴,天时人事两心惊。匹夫何责齐兴废,古道论交一死生。许有青山 埋俊骨,怕无黄竹写哀声。神仙儿女终能累,婚嫁何年毕向平。

漫兴呈穆少若观察

事到无聊学闭关,孱躯宁耐地卑寒。閒云零落不成雨,病木支离强恋山。岁歉每伤棉力竭,时危便做布衣难。郭仙雅意怜才尽,早索江淹彩笔还。

王以敏

王以敏,原名以{敏心},字子捷,号梦湘,武陵人。光绪庚寅进士,改庶吉士,授编修,截取江西知府。有《檗隖诗存》。

怀易五实甫赋寄都门

惊飙荡颓云,行人何时休。别君未经旬,嘉会成千秋。当时两年少,意气轻王侯。小蹶不知惜,宁畏风尘游。及兹三载逢,射策终未收。君羁长安踪,我返琅邪辀。临歧一握手,泪忽缘缨流。勋业不一建,岁月去我遒。岂伊恋别离,奈此霜盈头。白日何昭昭,河水何悠悠。飞鸟各适林,嗟我谁为俦。高名鬼先恶,清狂世所尤。珍重千金躯,慎勿耽冥搜。已矣不复道,各勉独善谋。

人日遣闷

掠面清风酒在亡,春云晓梦两茫茫。天涯岂料逢人日,海外谁传获鬼章。地僻鱼蔬 登肆晚,岁新笳鼓赛神忙。空林独立翻成笑,北雁何曾识故乡。

游佛峪龙洞偕石励斋张采南孝廉

天风吹石梁,金碧炫岩腹。万花两空际,宝相一何肃。山僧出迎客,野饷杂溪蔌。 散发对屏帐,开襟到童仆。一蝉户外鸣,导我访灵瀑。香乳漱云石,阴籁荡琴筑。佳哉草木 气,照水同一馥。閒持酒巾浣,静观游鯈逐。何处烟寺钟,凉蟾挂疏木。

夜梦不知所,晨起搴云梯。乱峰偃蛟鼍,初日升虹霓。浩浩长风号,足底双塔低。 登高一舒啸,白气迷青齐。济北万烟户,黄流一沙隄。系我襟带间,安能辨东西。南有仙人 坪,亭圮馀芳荑。我欲掇其实,上追阮与嵇。日鹤不可招,袱被谁与携。回看下山路,松毛 落寒谿。

冬夜读吴门沈润生二白词

空山谁按九歌声,一种斜阳万古情。绿发搔残红袖冷,江南肠断沈初明。

清镫画舫醉蛾眉,落魄江南笛一枝。绝似当年柳三变,晓风残月酒醒时。

登岱绝顶放歌

乱山北走如游龙,岱宗屹立东溟东。胚胎元气孕万有,独踞震位鞭群雄。我来二月雨新霁,喜见突兀凌苍穹。云声涛影接咫尺,呼吸似与神灵通。天梯万仞不可以径度,朱阑一线悬长虹。峨峨南天门,双阙缥缈中。秦观日观左右峙,俯视下界青冥濛。摄衣直走太清宫,两袖浩浩来天风。齐烟飞青吴练白,混茫八极畴能穷。海水一变河一勺,何论凫绎兼龟蒙。惜哉西山去我远,举首不见扶桑红。手折秦松下山去,半岭星月摇青空。我闻蓬元仙药寿无极,青天跨鹤何怱怱。笑谢山灵约息壤,誓晞绿发寻崆峒。

游皋兰山

东岩悬流若铿玉,西岩喷瀑如鸣筑。两岩路断青扉开,古柏阴森扑眉绿。摄衣拾级 趋琳宫,飞阁连云满岩腹。能仁高卧何处寻,空山落叶无古今。香烟欲烬栖鸟散,长河如带 悬疏林。惊飙荡空白日晚,坐觉尘嚣去人远。兴来瀹茗掬清泉,更逐归云度层巘。清晖阁里 金尊开,秋色极天边马哀。接 倒著径归去,忆尔征西骠骑才。

六盘山

积雪瞻太华,油云揽东岱。今过六盘山,益信天狡狯。高高陇坂云,横分雍梁界。一支走北地,群山互鳌戴。梯空安可穷,毋乃厚坤隘。七月阴崖寒,风雨白日晦。千盘作螺旋,百转出鸟背。登高望西极,川原尽破碎。一身裹云气,焉能辨泾汭。元昊昔盗兵,藏鸽逞机械。宋师实不竞,赤手搏蜂虿。惜哉一韩名,何救好水败。元老圣朝出,军威震无外。一清关陇尘,再荡祁连秽。兹山屡驻节,烟岚壮旌旆。事往哲人萎,攀柳尚遗爱。凄其陇头水,邈矣风云会。驱马拜萧寺,松风漱寒籁。元宫亦成尘,惟有名山在。

夏曾佑

夏曾佑、字穗卿、钱塘人。光绪庚寅进士、改庶吉士、历官泗州知州。有《碎佛师

杂诗》。

超山

超山我故人,十载心相识。愧我作劳薪,与山失交臂。行将入京华,立愿穷幽异。孤帆落栖溪,招邀有昆季。更约一二人,刺舟响菱芰。遵渚》斥回波,压篷满空翠。人望意中山,山有迎人意。弃舟入松篁,芒鞋快新试。萝磴转千盘,树杳琳宫閟。石壁傍寺门,青苔拭题字。小憩款禅扉,烹泉展茶具。寺后倚巉岩,仄径通幽邃。崩崖络藤萝,荒榛切冠屣。誓与山相穷,志决力亦鸷。俯首而蛇行,直上猿猱避。一瞥天地开,大快生平志。纹波上下河,罗带萦回腻。叶叶过风颿,绝似凫鹥戏。遥望钱塘江,东去何雄肆。浑茫接海门,应有鱼龙蛰。江右置州城,峰峦相覆被。西湖与南屏,落日苍烟里。中有倚闾人,会当念征辔。回首望吴兴,群山列如帜。其右秀州城,风烟隔明媚。高鸟入寒云,平芜没孤骑。微茫烟雨楼,缥缈茶禅寺。明日泊孤帆,极目知何地。莽莽目中山,历历心头事。宏识与孤怀,对此将谁寄。凉蟾欲东升,踆乌渐西坠。四山横暮烟,万籁交寒吹。愀焉不可留,心魂为之悸。挥手谢山灵,归觅垆头醉。

送汪毅白

落拓长安酒半醺,烽烟如此况离群。马头风雨连红树,笛里关山望白云。千古心期 凭寸简,九州容易入斜曛。江湖断梗藩笼翼,一样生平负典坟。

钧天帝醉谁从问,红烛光寒各自愁。缱绻骊歌凭夕照,沈吟龙战老扁舟。观河岁月皆青史,吓鼠功名惜黑头。用舍皆非惟我尔,片帆开已愧沙鸥。

答叶浩吾

亦知非远别,云树黯销魂。心逐孤颿远,人归暮雨昏。到家知客乐,多难悔身存。 岁晚如相见,应添雪鬓痕。

愁边天地窄,寒雨复沈沈。竟夕真无寐,披衣独苦吟。壮怀残月落,交谊暮涛深。 便有中旗在,无为便爨琴。

春雨

频年饮饯短长亭,暮霭沈沈一火荧。已觉平芜千里碧,不堪回首数峰青。楼台几处 曾登眺,身世无端入杳冥。柔舻古来多事物,几人元鬓为伊星。

丙申三月将改官出都和青来前辈

连天芳草送征轮,未免低徊去国身。八百馀年王会地,垂杨无语为谁春。

何士循

何士循,字勉之,息县人。光绪庚寅进士,官乐清知县。有《礼息庐诗钞》。

芙蓉早发至大荆

空斋起对佛镫明,辨色东方已启行。半岭松风斤竹涧,一天梅雨大荆城。稍分岩壑 供游瞩,犹觉衣冠苦送迎。带得山中云雾去,煮泉且试雁茶清。

壬寅春正四日晋郡小憩道中古菴信笔书此

平野丽晴晖,春风扇和淑。冈峦界昼明,山树杂红绿。遥闻村鼓喧,近视儿衣簇。新年幸无事,对之悦心目。篮舆此暂停,庵小堪容足。移几置诗编,对佛脱官服。拭面瀹山茶,小坐忘尘俗。

行肠转易饥,草草具午饍。餐少味无兼,酒浊壶有半。举酒酧古佛,低眉佛无见。 独饮意亦欣,暂喜得閒散。乡民纷来窥,短衣仅及骭。窃言宦性殊,不米而食面。儿童不畏 官,索食天真烂。祇此数餦餭,分食苦难遍。安得仓箱盈,家家足饱饭。

自我来太平,十日五巡乡。一到松门城,六夜宿箬簧。凡再至三至,新河及新场。足迹遍东南,更涉大陈航。乘风破海浪,百里犯重洋。兼至隘顽城,除夕食不遑。鸣琴易鸣笳,谁云不下堂。每每督队出,有如事戎行。前行列营哨,到处联团防。炮声雷訇匉,旗影风飞扬。冒雨群如沐,犯雪冻欲僵。我劳民未安,中夜起徬徨。且喜入新年,暂可息尘忙。行行复至郡,乃为迎送忙。

上滩

送人不断青山青,舟行如马江流澄。舵师辨水苦未能,轰然地轴翻雷霆。船尾一呼船首{雁言},一篙齐以一肩撑。乱篙刺水水欲腾,乱石抵篙如相争。一夫跃入推以肱,十夫齐跃声石訇。或扛以木牵以縆,直似洪钟撞寸莛。气急声嘶力不胜,上滩乃如天难升。四山日落烟冥冥,江风吹过鱼龙腥。有客兀坐如枯僧,为言舵师舟且停。诘朝辨水重扬舲,舵师无语双目瞪,篷底荧荧明寒镫。

江山县

百二滩行尽, 岧峣指县门。溪流牛鼻没, 山势虎形蹲。夜赛知年富, 冬晴爱日温。 孤舟停泊处, 红叶自成村。

夜泊桐庐

八年五过此,身世感飘蓬。短发盈梳白,颓颜借酒红。打窗疑夜雨,移烛避江风。 津柝声声急,垂头有睡童。

李长郁

李长郁,字康侯,衡阳人,光绪庚寅进士,官宣城知县。有《崇实堂诗集》。

宝剑篇别同年黄方舟中翰

咄咄出匣风雷惊,曹子登坛劫齐盟。督亢图尽机不决,荆轲手中是顽铁。长桥老蛟何太馋,身沐腥血出吴潭。英雄成名仗一剑,千里取胜马如电,楼兰头血战袍溅。此剑矫健龙虬如,此宝忍将犬羊污,拂拭苔花且深图。智勇自甘落人后,五更古壁生铜吼。

李结

李结,字绿宝,庐陵人。光绪辛卯举人,官内阁中书。

宿瓜州

忍别东吴却上征,西风吹雪浩纵横。孤镫未照西归梦,且听东流一夜声。

和许正卿见怀原韵

蛮荒镫月送生涯,上国江山照物华。方恨南昌违北斗,翻令西子羡东家。劳人身世皆樯燕,盖代功名亦盏蛇。待与吾师听流水,成连会泛海天槎。

京口口占

汩汩涛波出广陵,关梁咫尺润州城。送人万柳参差没,夺眼诸山次第生。三楚暮云 寒有思,九江落日浩无情。劳生未厌听胡笛,愧煞中流击楫声。

京口望金山示吴将军

夕阳滚滚海门涛,大将楼船暮雪高。谁向天南扼天险,梵王宫殿压金鳌。

金山绝顶晓望

烂烂匏瓜懒不扪,冥冥钟梵歇天门。海波忽动扶桑紫,金粟山河绕世尊。

中秋登南昌南楼玩月有寄用东坡韵

南昌仙人楼何高,上凌月窟宵察毫。三年两次失佳会,不随众上看银涛。尔来散尽便娟子,十丈飞甍杳如水。酒酣舞节无奈何,忽复登楼惆怅起。此时碧汉飞晶丸,妖蟆避焰都潜蟠。转留更恋玩莫释,冰辉乱溢生芒寒。回首秦吴复燕汴,繁华百代须臾变。但闻帝子閟银盘,那见仙人遗铁板。重挥双泪对江山,露草风镫若个坚。照遍古人今月在,不留今月古人看。古今看月斯楼好,一一欢娱太潦草。数去明年恐更非,悲来今夕还应老。自从离别万事贫,南昌风景尽愁人。凭栏一吐肝胆出,为寄当时楼上客。

塞鼓

塞鼓惨渊渊,幽都落日天。严阴壮短昴,朔吹下寒烟。岁事孤鸿外,霜威万马前。

谁知貂锦客,倚剑望三边。

直中书省学谢玄晖体有寄

黄晖霭紫轪,索景驰金爵。钟镛殷西清,球鼎閟东阁。愔愔玉漏歇,幕幕金露落。禁卫集駴鼓,将作散丹雘。伊余躬休庆,肃佩趋禁钥。未遗贡公荣,窃厕曼倩谑。弇微泚貂珥,陋拙汗朱襮。敢尘侧阶典,聊忝登池乐。寄语隐雾豹,勿訾乘轩鹤。

吉州道中

马蹄前路莽苍苍,回指寒林是故乡。草木岂知人事变,间关赢得役车忙。几家村落成墟墓,终古河山对夕阳。莫怪停鞭行更缓,沿溪十里橘橙香。

望湖楼

君今望湖楼上眠,楼前已系过湖船。明朝我始探湖出,登楼望湖心惘然。

姚鹏图

姚鹏图,字古凤,号柳屏,镇洋人。光绪辛卯举人,官邹县知县。

丙午八月日本修文馆讲席赠南菁旧同学

南菁文藻久荒芜,尚有君山一卷图。但使遗珠返沧海,未妨吾道在江湖。窥墙已被东家笑,博{竺塞}应怜玉女孤。安得灵猧收此局,倚枰难换旧棋枯。

同上修文海外楼,李唐榜署到今留。千金未计求真骨,一傅犹能敌众咻。反哺漫言 乌尽孝,补天终与石为谋。书生踏遍抟抟土,日入还为日出讴。

王景

王景,字兰生,侯官人。光绪辛卯举人。有《秋影庵遗诗》。

雨后木山堂独坐

雨馀身亦适,地僻榻长闲。落叶过桥水,凉云隔屋山。未能饮文字,尚许惬孤顽。 昨夜还家梦,思之仿佛间。

犍为野望

丛芦深处见平皋,细路回沙曲折遭。山势锐於牛砺角,江湍郁似马羁槽。儿童弄水 红衣薄,楼观迎秋碧瓦高。欲访尧夫游憩处,西风吹鬓晚颾颾。

答文子静

唱后巴歌更楚骚,海门东望涉惊涛。他时忆我西窗话,满树梅花霜月高。

谒工部瀼西草堂

问讯瀼西水,千年旧草堂。山容明积雪,江色动垂杨。生事花钿尽,人情菜把伤。 苏门引长啸,输尔是能狂。

自分贫非病,还因瘦可怜。负薪同谷日,中酒耒阳年。世难生前感,诗名死后专。 临风抚残碣,零落到重镌。

吴宝钧

吴宝钧,字芷涯,秀水人。光绪辛卯举人,官教谕。有《风雨庐残稿》。

盐官东郊观涛赋四绝句比物连类以起兴

露桃云杏艳妆红, 一路胭脂点玉骢。江上芙蓉屡憔悴, 不须枨触怨东风。

琴台一簇压狂澜,流水高山识曲难。欲觅钟期渺何许,乱峰重叠绕盐官。

遥看秦驻舞烟鬟,白浪黄云苍莽间。万里瀛寰恐漂荡,故教赑尸赑冠灵山

奇珠颗颗滚波心,牛渚无犀那易寻。衔石难填沧海恨,可怜精卫是冤禽。

言有章

言有章,字謇博,宛平人。光绪辛卯优贡,官获嘉知县。有《坚白室诗草》。

示周大曹四叠韵

孔與墨突为谁忙,治国真如卜式羊。奇气尚堪凌海岳,天心底事有冰霜。且拌觞咏 依金谷,绝羡昇平到柏梁。欲判从违问詹尹,黄钟何地许高张。

次蘧公见赠韵即送之渡河

置身高处凤巢阿,虹欲为霖下饮河。萧育后曹同气短,孟公侠骨入诗多。豺貍载道纷忧患,鸾鹤排空足啸歌。潘岳重来桃李笑,几生慧业问维摩。

【卷一百七十八】

刘福姚

刘福姚,字伯崇,号忍盦,桂林人。光绪壬辰一甲一名进士,授修撰,历官侍讲。

端午赐衣和毅夫侍御韵

趋朝犹著旧宫衣,楼阁云深望里非。文字酬恩殊负负,江湖恋阙尚依依。苍茫天意 凭谁问,老懒心情与世违。一领渔蓑归计熟,中原豺虎未应稀。

张鹤龄

张鹤龄,字长孺,号筱圃,阳湖人。光绪壬辰进士,改庶吉士,授户部主事,历官 奉天提学使。

拟庾子山咏画屏风诗

南辆回紫极,鄠杜春光开。华林候气转,琼葩照地来。暂迎飞盖举,将看舞袖回。 侍饮香春殿,未惜流霞杯。

碧汉歇微雨,层澜霁旭前。桥平疑断渚,花香碍荡船。新歌倚烟棹,过锦出丛莲。 低映芙蓉面,回波始惘然。

虹楣延丽春, 莺燕动芳邻。蹑带恰香芷, 辑佩遗美人。犀筝促凤柱, 鸾吹发腥唇。 明睐自呈露, 愿逢洛波神。

步廊周釦砌,虚阁折璇源。水出珊瑚气,山开云母门。选骑长杨苑,飞觞金谷园。 芳华未衰晚,留醉枕云根。

江东盛文宴,冠盖足遨游。杨枝狎文羽,桃叶送烟流。石梁遥擘径,云栈近依楼。 何事悲田宅,东陵故彻侯。

旧舞青溪记,新歌子夜连。钗花翻宝扇,钏玉砑珠弦。酡颜低障后,密态出镫前。 谁谓无青鬓,欢娱四十年。

窈窕排丹闼,回翔出钿车。春旗拂岸柳,轻吹落山花。似出齐遄室,将宴楚章华。 夷庚休畏险,峻坂隔褒斜。

锦卫香如海,金庭花作林。新霜拭明镜,飞雪绕青琴。干将赠知己,琅玕结素心。 风前莫喻意,杯酒自清深。

丹霞丽藻楶,碧霭萦兰堂。步障艳围锦,歌尘长绕梁。连房箫管竞,映水绮罗香。 竟日陈长簟,红豆自安床。

凉秋碪杵急,击响逐风飘。流黄出纤手,束素怯轻腰。吴绫刚就织,蜀弦应罢调。 边书迟塞上,校尉旧嫖姚。 列嶂明浮黛,水纹生薄罗。长星耿清旦,房露转商歌。原陵望松柏,汀洲搴芰荷。 南都歌舞地,金粉苦无多。

连楹璧珰启,洞户珠缨悬。翔禽恋丛薄,鯈鱼戏水莲。芙蕖时葺盖,鸳鸯不碍船。 遗簪未捐弃,清尊话年前。

密篁匝地迥,高树带云齐。华斿双道卷,黼帐四围低。丹岩游锦凤,云外叫天鸡。 芳菲共珍惜,流莺绿树啼。

群流争乱石,摧块栈车过。雕戈挥落照,楼橹黯横波。秋残问古渡,天外走长河。明日江关隔,马首朔尘多。

已折青泥坂,还倾碧醁壶。桐华拂石井,竹筍供香厨。山盘太行上,云飞易水孤。 羁禽聊逐侣,无用感黄垆。

雍门冠珮肃,列禁羽林长。貔貅环细柳,龙马出长杨。莺歌逐鼓吹,花雨乱衣香。 簪毫预清宴,还拟侍承光。

万骑回天跸, 句陈阁道开。景阳新舞入, 宜春陪乘来。翡翠金蝉钿, 葡萄红玉杯。 更待兰池月, 轻衫舞雪回。

金轺言奉使,宝鬲报平戎。皇图跨灞浐,予乐盛岐丰。大漠云屯碛,天山月挂弓。 芳林还校射,摛文步侍中。

绮林交翠羽,锦浪狎文鳞。花分盘马路,草斗踏歌人。危楼欲回汉,别殿易惊春。 采罽郎官赐,应知通大秦。

茝若承春辇,杉萝静夏池。金铺桂烟晓,绣帷蕙风吹。玉柙流苏帐,珠镫火齐枝。 谁攀大隄柳,寂寞雨丝欹。

藉草得幽径,餐松习清斋。树老云都聚,苔深石半埋。柳花时扑面,花片每投怀。 吹笙启别馆,惜无洛客偕。

黄图风日美,丽瞩满芳菲。朱郭羽觞集,金张绣毂飞。游丝香惹鞚,蝶粉湿黏衣。 野草独无数,王孙殊未归。

雕弧森列队,羽葆拥中流。健客青丝笼,彩女木兰舟。新宫开戚里,大道起青楼。蓬莱帝子醉,油幕正从游。

斜阳下古台,画烛唤传杯。楚舞空江怨,燕筑暮云开。片云移翠竹,零雨落黄梅。 天北星辰指,江南书剑来。

惲毓嘉

惲毓嘉,字孟乐,号苏斋,大兴人,原籍武进。光绪壬辰进士,改庶吉士,授编修, 历官延平知府。

自题宣南话别图

身世浑如燕翦抛,一年一度一新巢。南横街北春才定,别竹辞花又打包。

茫茫宙合迭翻新,且作龙津小住身。出本无心归亦好,閒云何似看云人。

六十述怀

往事成尘六十年,苍苍非复旧华颠。流光捷似追风马,望治难如上水船。蜗角栖迟 投老地,蝇头生活卖文钱。英雄汗血羁人泪,一例消磨化作烟。

傅增淯

傅增淯,字雨农,江安人。光绪壬辰进士,改庶吉士,授编修,历官江苏知府。

雪夜度安南鹅翅膀

积寒破荒屯,迸出众山皭。三望到地平,一峰横天拓。途长日下春,行役苦煎灼。初陟缘陂陀,渐进度{山厄}岸。涩隃绠汲井,退速水泻壑。后顾辟百夫,前猛厉双笮。陷淖雪泥融,坚滑冰垒薄。既再接再厉,乃一前一却。锐进进步饶,奔殿殿陈讬。其上属绾毂,厥象肖张膊。晴明已巑岏,冥行倍跼躩。活泼泼地时,如涂涂附谑。登顿驭朽惩,临深遽叱莫。舍舆而徒行,履险傔从约。济胜鲜飞筇,尔能期奏各。凌风风冷冷,俯地地漠漠。拗折峡角长,峭立壁面削。秉烛黑如磐,星火耿馀爝。细路并猱争,积泞蹙鱼目咢。扶危承厥肘,踏实忖以脚。罥藤衽屡摄,触石手暗摸。磨旋蚁延缘,旁行蟹郭索。突出悬万仞,凭虚寄一箨。坎循倒马痕,势压饥鹰掠。娲补陷未弥,灵劈迹犹崿。既窈兮冥兮,亦波若磔若。或逼窄叠迹,复争道急著。似蔡州雪入,如昆仑夜搏。奇局成独往,偶趋致众愕。悸魄重渊升,险语半天落。之旋摩层巅,旷若出虚霏。皓洁映渊茫,问汛乡导遌。陈仓竟汉袭,阴平乃邓踱。吓煞岭同怵,惶恐滩犹怍。禅地回证初,陈迹积感作。吁嗟七圣迷,终待五丁凿。徘徊三叹息,藉慰百维度。泥滓亦偶然,平坡悟理钥。王道本夷庚,设险岂犹昨。敢告良有司,馀地盍留绰。

庚子春初自兴义按试回雨雪载途连日大雾道经关索岭适值开零俯仰流连偶然有作

昆仑地脊控八方,南方一幹支夜郎。上薄昆明下五岭,中间脉络纷开张。迸地突出罗万菌,攒天拥簇森千枪。到此划然成巨堑,滇黔锁钥真金汤。我行积日苦堕雾,今日顿觉神飞扬。试登绝顶一怅望,如辟混沌开天荒。禹迹晦昧遗疏凿,厥宅殷土尤茫茫。二盘源处近黑水,三危傅会同荒唐。磨岩强被诸葛碣,将军名岭谁能详。却思当关据形胜,一夫足使千夫僵。鸡岭对峙殊险易,纡筹坐令输批吭。朅来承平二百载,芟夷荆棘成康庄。阆风蹀马同下视,仿佛华碧河流黄。四十三盘穷践跞,拟坐眢井窥天阊。墨客争摩晒甲上,白云不使红岩藏。灞陵一勺山一垤,省识擘画资维纲。耕凿相忘陵谷险,田流氵虢氵虢皆琼浆。犵鸟

蛮花各自媚,那知世外多沧桑。大坡顶上重回首,但见野鹘凌风翔。浮空万象随变灭,白日 欲赤青天苍。

刘可毅

刘可毅,原名毓麟,字葆真,武进人。光绪壬辰进士,改庶吉士,授编修。

壬辰十二月最初以阴雪未作秣陵游予亦膏车不发

黄子本名士,论交四海多。轻帆破冢出,瘴疠夕阳多。斗酒腹犹痛,长途悲作歌。 故乡好风物,相见未蹉跎。

我去瞻园久,三年草又繁。空廊还纳月,穿树不知门。白下旧宾主,青衫新弟昆。 与君期岁晚,飞雪傥论文。

汪洵

汪洵, 字渊若, 一字子渊, 阳湖人。光绪壬辰进士, 改庶吉士, 授编修。

读汉书有感

蠛蠓浮天劫竟乘,居然栖爵上觚棱。窥窗玉女云都散,承盖铜仙露尚疑。此日黄图 成故事,何时赤伏佐中兴。运移新室悲文母,望断瀛台泣渭陵。

顾瑗

顾暖,字亚蘧,祥符人。光绪壬辰进士,改庶吉士,授编修。有《西征集》。

次韵和高子衡观察静中吟

钟动鸡鸣俄顷时,迷离野鹿与标枝。前尘误触婴身网,此日真成无当卮。愧我顽空 耽说偈,喜君解脱善谈诗。犍椎忽忆须弥顶,三十年来悔已迟。

修武县西北有浊鹿城魏受汉禅封献帝为山阳公城即公所居也道经此地感而赋之

炎汉逮中叶,朝纲已不整。桓灵继昏愦,天怒发灾眚。殿陛妖孽生,边塞烽烟警。 维时有张角,啸聚群不逞。公言苍天死,黄巾系要领。扰乱遍九州,响应暨五岭。从来邪术 兴,变乱在俄顷。诛斩不期多,驱治贵用猛。奸雄利时危,乘閒志乃骋。时岂无忠良,出语 剑在颈。哀哉建安君,厉阶遂为梗。戎马走仓皇,流萤借馀景。运际田篡齐,数应吴入郢。 幽囚浊尘城,不死实为幸。客行过遗墟,谈者犹齿冷。前事后之师,何人发深省。

舞狮曲

鸡娄大鼓声渊渊,南村北里车骈阗。神去神来送迎毕,广徵戏具娱新年。寻橦缘曲

走长索,吐火吞刀相继作。陡然变出狻猊形,一啸长风振林薄。盘旋上下声咆哮,寒光凛凛拳金毛。锯牙磨厉地欲裂,铜头目咢视天为高。一狮倒曳一狮走,郁怒追逃气犹吼。兴酣直欲吞万牛,目中久已无三狗。吾闻狮子产大秦,波斯品类尤威神。国初远略振殊俗,重译贡作天家珍。如今沧海方腾溢,杀到角端都骇逸。越南驯象久无闻,何处瑶光呈异质。春镫闇闇动征轺,逆旅光阴不自聊。乡中狮子乡中舞,谁辨黄超与白超。

函谷关

雄关高峙镇岩疆,百二河山此设防。当日丸泥封不得,至今锁钥势犹强。功名我已输杨仆,逆旅君无出孟尝。欲考图经辨新旧,迩来秦汉几兴亡。

阌乡县

秦为头,虢为尾,万树桃花光炜炜。行人到此车轮摧,夸父行之速如鬼。黄帝铸九鼎,博采首山铜。鼎成龙乃去,剩有轩游宫。汉武求仙意未已,讳说文成马肝死。鹤驾西飞意不归,皇天原上空思子。关城压境河声急,单车晓出稠桑驿。

拟陆士龙为顾彦先赠妇往返四首次原韵

悠悠白日晚, 荡荡青春阴。离离羁思积, 窈窈悲绪沈。奔景易有穷, 独轸难为音。 开窗涤欢爵, 掩袂理愁衿。眷言淑媚姿, 冥漠撄我心。

携手送君行,欲起旋复止。春风不留人,君行已千里。忧来无晨昏,梦想见吾子。 长安多丽人,纤腰编贝齿。妖冶良足怡,衰丑胡能纪。席石敢责前,丝萝庶念始。

泥新燕不巢,茧老蚕自萦。闭目少今觌,扪心增往情。秦中昔丧乱,时危地匪灵。 曲池既已平,高台亦已倾。矧我倦孤馆,沈思浩欲盈。谁向支机石,潜照牵牛星。

星辰烂繁辉,云霞发奇观。弱柳媚朝曦,芳葩摇春晏。京洛何煌煌,都人自粲粲。 凤柱戛鸣筝,鹍弦起清弹。联娟约修眉,跌宕攘皓腕。自非秉金坚,畴能导冰散。遥想艳阳辰,笑语切河汉。闷瞀守深闼,对镜独铭赞。蓬首孰为容,铅华几日焕。无倚蕙兰芳,忍弃菅蒯贱。

宋书升

宋书升,字晋之,潍县人。光绪壬辰进士,改庶吉士,加五品卿衔。

拟古

结发为夫妇,两小无猜疑。如何遘不淑,中道相乖离。自君之出矣,不复画蛾眉。 思君如蚕茧,日日吐春丝。春丝终有断,妾意无止期。

祖道东门外,朝朝设离筵。车饰五香穀,马系七宝鞍。杯盘纷罗列,友朋劝加餐。游子且勿餐,听我取琴弹。不唱《江南好》,但歌《行路难》。前有九折坂,后惟惶恐滩。天

地皆荆棘,异乡何由安。一歌《行路难》,主人泪汍澜,再歌《行路难》,游子摧心肝。

昔有希夷子,结宇峨嵋颠。未能甘寂寞,谈笑落人间。携有琴在手,星辰罗轸端。 此琴非凡乐,中有太平弦。一鼓神人洽,再奏四夷安。众人多嫉忌,掣肘不能弹。抱琴归故 庐,中夜坐长叹。

营陵道中遇雨

石径崎岖里,春阴晻霭中。莺啼千树雨,驴背一蓑风。野渚流添碧,村楼雾隐红。 孤山全入画,云水正濛濛。

游大明湖

明湖春后色,不减若耶溪。万绿摇烟起,孤篷载酒迷。舻枝凭鹭引,荷叶与人齐。 游赏浑忘倦,西城日已低。

寄刘笑亭孝廉

话别旗亭易五春,良朋消息滞鱼鳞。落花时节方游楚,折柳阳关又入秦。经史白头 终作客,风尘青眼岂无人。秋来定对樽前月,真识天涯若比邻。

春日山村

十里榆村路,春来入画堪。溪边饮黄犊,屋上晒红蚕。家未兵戈徙,儿能稼穑谙。 山殽供客好,休怪老饕贪。

海畔

海畔群山伏,村居傍石岩。平沙连草白,逆水带潮咸。雁渚横孤艇,渔家晒破帆。 烟中开晓市,处处卖春虫咸。

长山道中

东风吹客倦,振策更山行。入谷已残照,离家尚几程。乱云穿马足,流水杂车声。 犹听城钟起,回看古堞平。

石华洞

洞腹不容人, 石齿横相齧。幽鸟时一窥, 寒藤落古雪。

过齐宣故陵

封畔垦耕绿不匀,田齐雄焰化飞磷。芘芣花发髑髅孔,葛蔂苗缠屃尸赑身。日暮讴 吟愁牧竖,劫馀钟鼎窜风尘。如何不及於陵子,寸冢於今尚姓陈。

莱州词

黄茅十里晒盐场,矮屋人家坐晚凉。何物渔婆偏解事,鲍鱼风里说秦皇。

田家即事

春林带残照,归鸦黑似漆。田家风味清,家人聚其室。共为生计谋,絮语何琐悉。 今年较去年,惊蛰先五日。明日早烧菑,种我三亩秫。小儿方能言,牵衣还捉膝。笑语阿爷 看,屋角犁星出。

题画

寒泉挂壁荔垂檐,鹤发翁疑刘海蟾。霁雪满庭月如水,白梅花下读《楞严》。

懊恼曲

南国休生红豆子,西州漫折绿扬枝。百年最好是欢会,苦莫苦於生别离。

铜雀台瓦砚歌

汉火未熄妖星芒,铜雀一现朱雀藏。高台巍峨连漳起,邺下媚狐肆披猖。凤柱对蹲双结绮,虹桥倒挂若回廊。年月回环书蝌蚪,琉璃金碧覆鸳鸯。汉家兵戈既鼎沸,横槊归来乐未央。大儿弹棋幼傅粉,一门父子盛文章。惆怅东风慕娇女,朝露慨慷对杜康。阿房歌弦秦公子,阳台云雨楚君王。分香卖履留遗嘱,儿女之情抑何长。建安去此二千载,太息阿瞒骨已霜。一世之雄今安在,独留瓦片艳文房。

过郑康成故里

嬴秦烧群籍,发难在臣斯。六经日芜秽,《正义》何由治。大哉康成公,独蕴高世姿。穷经窃奥衮,学道抉藩篱。律吕研迁志,算术察《周髀》。杂考申韩法,旁罗纤纬辞。譬如大河流,百变属冯夷。清浊并相纳,不必分派支。譬如洪炉铸,群材付工倕。金铁齐入治,不必权毫釐。考稽既已久,蔚为大经师。诗笺毛氏故,书证安国遗。易立爻辰例,传可废疾医。三礼尤卓卓,旧典精研稽。老妪数家珍,了了无所迷。汉儒称后劲,有功在宣尼。后学谭性命,反兴菲薄思。大善且不录,吹毛以求疵。遂使昧礼朝,黜祀逞其私。岂知泰岳高,不以划而卑。宋人开理学,汉人为之基。离象安得意,求兔端赖蹄。饮水不思报,昧本当骇疑。更有龊龊者,学语方小儿。掇拾前人说,百端相排诋。有曰男子御,何必五日期。有曰郊天鼓,安得麒麟皮。更仆虽终数,哓哓无已时。骅骝驽骀笑,大鹏学鸟鸠讥。弃鼎宝康瓠,庸庸安足嗤。我朝群儒薈,起而修明之。煌煌东州学,炳若中天曦。余居里相近,先哲常心仪。驱车过东道,搔首访遗祠。自恨生也晚,遗编手徒披。训诂勤钻仰,未得见津涯。生平有向往,瓣香心自知。

祷雨行

天孙庙,击大鼓,满城鼕鼕撒白雨。白雨下时赪日升,但见炎威赫赫天亭午。官吏 祷雨术俱穷,不获蜥蜴搜壁虎。云能吐雾与兴云,浼汝沛泽施下土。壁虎壁虎,汝未从深山 大泽来,身无鳞甲,安能变化为龙弭旱灾?雷公大怒电母笑,若辈竟号作霖材。

沙元炳

沙元炳,字健菴,晚号石为翁,如皋人。光绪甲午进士,改庶吉士,授编修。有《志颐堂诗钞》。

壬子元夕雨

黄韭青芹劫后生,神镫佛火梦边明。分无好月临宫阙,政藉甘霖洗甲兵。病入酒杯 成弃物,乱来铙吹作春声。夜阑忽忆前朝事,延寿街前烂漫行。

十二月十一日至唐闸舟中遇雷雨次日雪

就就冬雷挟浪声,喧喧急雨尼河程。放船百里四时具,掩户一宵三白生。弄客又逢 天作崇,敌寒争遣酒行成。五峰对我头俱皓,不信苍山没世情。

辛酉重九日舟中赋示泽人

寂寞逢生日,频年似此稀。一舟吾与尔,百笑是成非。江海同鱼烂,身心逐雁飞。 从谁较颜稷,道在合长饥。

偕慕逸贯恂游狼山回车过西庐步至梅垞门键不得入遂登我马楼四十韵

黄马交冈尾,修修若伏鳌。西庐踞其罅,左右横双。往岁曾经此,邪许方伐鼛。兹来揽狼胜,馋眼饱犹饕。譬揖故人退,回辔就儿曹。春晚寒尚滞,打背风颾々。残曛迎醉眼,金彩迷千毫。辞车循涧路,泥屐憎涂膏。觅导初惮远,发兴遂忘劳。丹畦间芍药,苞坼红仍韬。缘溪植新柳,黄绿待春缫。一峰忽当面,惊堕{熬山}阳{熬山}。大人谁称汝,脱坏团花袍。骨立空诸倚,肤皱谁敢挠。绚变横侧,步转旋周遭。微香时到鼻,披磴空兰{世皋}。已知梅垞近,疾足轻於猱。擘峡规箭筈,架栈编箐劳。穿桥叩幽闼,锁閟金蟾牢。过墙一枝无,望望头频搔。岸边馀几树,红白乱李桃。不知千五百,何处开芳皋。行行复止止,天半鲸鱼号。言寻石径返,倏遘危楼高。策倦故为目,暂愒思容尻。螺旋进益上,风衣不受绦。云塔压前项,江树罗浅毛。旁翼亭突兀,俯罩岩山聊嶆。惜乏松柏栝,耳绝飞空涛。坐定生虚寂,壁语俄嗷嘈。荒谰微莫省,似寓讥与褒。僧来导我观,甃石泉新淘。云此一泓水,终古无旱涝。池方不盈尺,浊过未篘醪。何论瀹佳茗,未足供淅溞。想患我马渴,於旁凿其槽。众宾各抚掌,惊起群栖嗥。吾亦笑登橹,电掣如追逃。昏黑戒颠覆,镫火趋南濠。相期摹所历,贾勇诗能鏖。

送谛闲上人归江南

肯来海县畅宗风,才歇经坛又欲东。群识神通过鹜子,我惭朝暮似狙公。楼花雨定香云白,江树霜酣战血红。甚欲从师浮苇去,祇愁尘网絓冥鸿。

邓生纪云璞君族弟也依之学佛两载合掌诵佛而化璞君喜为往生之徵贻书远告即用 其见赠韵论次其事

的意生於莲,甘苦同一天。谁甘复谁苦,转眼换尘鲜。究其甘苦种,藕实二何先。藕空实有心,何者相因缘。实落还成藕,生性胡同然。华如车轮大,叶或小如钱。处薉比君子,宅净胎圣贤。净薉性不二,差别随境迁。自非粲莲舌,此蕴终难宣。璞老莲邦客,蓄念金刚坚。成佛佛有待,翻让灵运前。眷属字纪云,两载从餐眠。熏染岂云久,入苦遂能蠲。灵山华藏海,仅挹埃与涓。便闻弥留顷,合掌迎金仙。想有幡幢葆,天半纷反翩。宁歇懈慢国,会叩莲池边。化为池中华,色异根当连。璞也跻百岁,定证如来禅。指月明净性,魄满光自圆。礼日参初观,寂照穷悲泉。十念非诳语,吾曹庶勉旃。

蜀石经残本歌

嬴秦焚经传二世,孟蜀尊经传二世。腐儒苦怨天梦梦,天眷原不私文字。我观广政经,成一百十二。衤異翠墨未完,蜀社置毋家,百万黄金钱。但为新朝儒学地,先石后木劳手民,到今石木无一存。盲左诗礼出炱朽,攟拾旧数赵黄陈。庐江刘翁欧赵选,收揽《周官》及三传。艺风师是今柳东,钩考异同泐成卷。我徒见跋未见经,骨不可揣从声听。经兴经废等亡国,樊榭诗在吾听荧。年衰才退奈此石经何,西望蜀碧年年多。

周景涛

周景涛,字松孙,侯官人。光绪壬辰进士,改庶吉士,历官学部员外郎。

初春述怀

五穷入我家,与我生根蒂。害渠果何事,暗中动我制。坠地无室庐,流转不敢毙。 平生泥雨驴,一步一濡滞。四十知百年,僚底早自筮。只馀玉池肥,静坐自勤闭。谁知失声 哭,痛迸奈何帝。春风非不温,著袷转凄厉。开门呼苍天,空碧但无际。何曾井蛇惊,坐见 国狗猘。永愧匹夫谅,触事潸以涕。旧闻傅青主,奇方辄焚瘗。信哉泰山崩,宁作完卵计。 待我五百年,人间知有世。

新年次东坡韵

万家忙馈岁,一叟念初元。排闷诗宁野,邀眠酒又村。故乡山水隔,世事雨云翻。 欲作挥戈想,其如若水昏。

群公皆有话,吾痗独何之。狐兔方连社,鹪鹩此一枝。春生中酒夜,梦到挂冠时。 犹鼓残年兴,新诗诵与儿。

兹乡滨海尽,眼界若为清。禾黍高登廪,鸡豚富入城。欲消无事日,祇益可怜生。 牡蛎梅花市,吾思豆腐羹。

岂有图南意,吾居亦少东。储粮三月尽,簪笔一生空。贺岁聊从俗,偷生愧作翁。

乾嘉成已事,不敢说咸同。

天心无可转,岁事不应繁。何处为乾土,当春忆故园。閒延家鬼坐,老僻彻侯行。 犹得东坡味,明年说抱孙。

寄郑苏堪

昔吾困江县,而子相临存。惘惘雨中别,寄诗宁吾魂。再面胡不欢,各会难为言。 出悔入亦悔,苟禄安足论。子有千载诗,不官能自尊。使子以诗昌,天意良未敦。长吟且袖 手,勿讶霜鬓繁。不见黄河清,讵乏卮酒浑。

平生所结痛,一语触千万。以子怀旧恩,怆昔予术困。贱臣忽见徵,誓以不欺献。 私忧欲弥天,末策谁许建。呀呀涵光殿,浊泪长径寸。凭几三数言,呜咽但九顿。虮虱不上 昇,苟活在泥坌。微生纵有口,日夕衔巨恨。江湖传子诗,无穷抒哀怨。重来望觚棱,感涕 念垂宪。眼中历历事,对酒那忍劝。陵树冬复春,凄凉问社饭。

留别高曦亭前辈

逋客相逢地,陈人欲尽时。不论廿年长,为诵一生诗。身世同嗟慨,情亲忽别离。 祇应梅有讯,勉副岁寒期。

闲居

欲向何人罪陆沈,强移栖息学盲瘖。自磨短墨消英气,偶爇名香验道心。好睡未妨来日永,闭门便觉敝庐深。书生槁饿由来旧,肯为穷愁损素襟。

病夜

摵摵复摵摵,败叶檐阶进。冻蝇见火舞,候虫切身劲。寒气登床帏,裘被莫与竞。缩蝟听晨鸡,更点未可竞。偶然披衣坐,斜月入窗映。是时心转空,一室见白净。旬月不出门,已适適懒惰性。会当齐彭殇,安问贫耶病。跏趺数鼻息,耸肩索苦咏。醒眼直到明,玄鬓应满镜。

不死

平生言死何曾死,今日奇穷未觉穷。数米为炊仍腹果,量钱沽酒亦颜红。夜深忽梦 先朝事,病起真成隔世翁。黄土待人归宿处,董公健者料应同。

李希圣

李希圣,字亦元,号卧公,湘乡人。光绪壬辰进士,官刑部主事,荐举经济特科。 有《雁影斋诗》。

海上晤葛侍郎连日谈西安事临别有赠

去住无消息,传闻有是非。艰难天险在,予夺圣心违。驿路梅花发,官筵苜蓿肥。 孤臣中夜泪,霑洒向征衣。

西苑

芙蓉别殿锁瀛台,落叶鸣蝉尽日哀。宝帐尚留琼岛药,金釭空照玉阶苔。神山已遣 青莺去,瀚海仍闻白雁来。莫问禁垣芳草地,箧中秋扇已成灰。

陶然亭题壁

车走雷声不动尘,千门驰道接天津。杜鹃九死魂应在,鹦鹉馀生梦尚新。抱蔓黄台 成底事,看花紫陌已无春。汉家陵阙都非故,残照西风独怆神。

感旧

尊前怊怅试罗衣,韦曲莺花乱后稀。紫殿不闻春燕返,青城还见夜乌飞。焚香复道 吞声过,送别都亭洒泪归。一自金仙辞汉去,人民城郭已全非。

湘君

青枫江上古今情,锦瑟微闻呜咽声。辽海鹤归应有恨,鼎湖龙去总无名。珠帘隔雨香犹在,铜辇经秋梦已成。天宝旧人零落尽,陇鹦辛苦说华清。

望帝

玄菟城头紫气横,长安月照国西营。天边马角无消息,海外龙髯有死生。贡使祇 应供夏葛,归期犹及荐春樱。烟花绕禁今如昨,莫遣张衡续两京。

曲江

曲江宫殿锁莓苔,蜡炬炉薰认劫灰。玉杯已随芳草出,銮舆曾为看花来。残镫不照 秦乌返,落日惟馀汉雁回。夜雨秋衾鸡塞梦,归时应过李陵台。

故宫

故宫双阙倚斜晖,雉扇凄凉事已非。城草渐随乌尾长,陌花留送翠翘归。黄金海舶 倾车出,赤羽梁园夹道飞。搜括岂知民力尽,年来江左已无衣。

帝子

帝子苔痕玉座青,鹧鸪啼处雨冥冥。北门剑佩迎蕃使,南极风涛接御亭。江海佳期 愁晼晚,水天旧事梦娉婷。秦丝解与春潮语,一曲蘼芜忍泪听。 天遣

天遣多情有别离,绿杨枝外抵天涯。粉蛾点滴牵丝出,金雁零丁怨柱移。锦字无多 裁恨远,重帘不卷放愁迟。高唐梦雨相逢道,赋就春寒已后期。

呈广雅尚书

孤吟愁听景阳钟,咫尺蓬山隔万重。祈请不妨持汉节,陆沈何处识尧封。论兵白发知无补,挽粟黄脢已不供。夜半金莲承独对,东朝垂涕话神宗。

中兴和广雅尚书

艰难又见中兴年,五胜临朝尚俨然。上相自求王导节,深宫新赐邓通钱。贾生三表 真何益,夷甫诸人太可怜。父老极知哀痛意,白头流涕诏书前。

咏史

夕殿流萤事可怜,天荒地老是何年。江花浩浩无终极,海月沈沈不解圆。已炙凤麟 称万寿,更凭凫雁锢三泉。孤臣欲续湘累赋,中夜吞声拜杜鹃。

秋兴

倚瑟丛台夜不眠,邯郸旧道走三边。铸铜北极难成柱,种玉西陵渐作田。舞马当筵催赐锦,卢龙卖塞不论钱。教坊莫废汾阴曲,秋雁飞时似往年。

咏枣

紫衣传赐出蓬壶,雨露恩光照上都。一例东封成故事,坐令尊酒变明珠。

题辛丑年诗后

惨怛张衡志,芳华宋玉词。《四愁》初有作,三赋故应悲。疾病兼群盗,艰难又一时。试凭沧海恨,还为问王尼。

闻道

闻道君王起渐台,方壶员峤象崔嵬。离宫苜蓿参差长,别殿芙蓉烂漫开。新辟条支 求鸟卵,更通碎叶问龙媒。太平天子无愁思,愿颂南山献寿杯。

寄樊按察

暮云残雨望觚棱,忆掌丝纶佐中兴。新种柳槐春夹道,偶临凫雁夜张镫。酒人刻烛 思高適,仙侣移舟愧李膺。东阁祇今成马厩,知君未忍薄孙宏。 重门

重门詄荡绝跻攀,鸠鸟来时正闭关。花月旧痕非往日,水天新语落人间。陆机已占 东西屋,何点难分大小山。凝碧池头曾系马,当年容易点朝班。

小除日得王抚州重阳书卻寄

腊残春动雪消初,才读浔阳九日书。魏阙江湖犹剩汝,中年哀乐正愁予。论交宿昔心仍在,报国蹉跎计未疏。终见汉廷徵汲黯,郡中早晚候轺车。

三韩

乐浪城外海云低,拜表中朝旧执生。大郡股肱宜擘画,神京肩背失提携。十年教训 归乌喙,百战声名出碧蹄。灭国阴谋君未省,山前泪尽拜摩笄。

题陆放翁集后

颇话朱熹契,难酬史浩知。晚为西第颂,惭对《北山移》。慷慨论恢复,昇平记乱 离。白头翻杜集,应废《洗兵》诗。

咏史

窈窕交疏间绮窗,自修水递接吴江。药储乳雀三千两,衣画轻鸾六百双。烧蜡代薪施锦帐,列钱衔璧出金釭。化淳不似承恩死,彰义门前舐足降。

史悠咸

史悠咸,字泽山,浙江山阴人。光绪壬辰进士,官内阁中书。有《眠琴阁诗钞》。

恼公曲

湘裙潋潋梳微波,画叶仙衣飘翠罗。香桃琐骨怯春影,衣嚼赪霞瑶怨多。烟霄凤葆迎丁佩,红鹍瘦玉弦声碎。媆香迷梦度芳年,一把纤腰倚春醉。凉丝玉网银梳摇,押犀风细开樱桃。芳螺曲写镜中语,皓齿嚼风吹紫箫。仙蕖珠的同心扣,绿衣传语娇鹦瘦。消得层波一脔光,瑶襟圆咽相思豆。蜡花摧焰寒青荧,彩鸾怯翅舒金屏。红笺砑破点斜雁,小押麝煤凄寒馨。宝靥晓星虬水咽,鸾钗敲梦铮瑽绝。豹骢香陌忆珊鞭,六曲青蠡锁霜月。曲水飘香唱恼公,绿巾拭泪珍珠红。金鹅梦破蜀山晓,花底露铃吟断风。

潼关

扶與两戒望中分,终古雄关峙独存。白帝三峰尊太华,黄河一气走昆仑。盘雕沙碛 闻传箭,散马秋原见列屯。揽辔临风感兴废,承平形势漫重论。

柴关岭

长啸万仞冈,寒风战黄叶。不知所历高,苍莽入寒色。山骨郁礧砢,纷如怒猊截。 巨瀑奋雷硠,石力拒而裂。一山千万转,十步八九慑。藤臂或攫衣,石齿乱折屐。†双魂步已却,试险足先蹑。徘徊一线中,欲骋不能捷。巍巍螺负壳,旋旋蚁缘垤。寒萝下无路,踏石觅寸隙。薄暮宿山家,合眸见馀碧。

屠寄

屠寄,初名庾,字敬山,武进人。光绪壬辰进士,改庶吉士,授淳安知县。有《结一宦诗略》。

感事

天马自西极,连翩东南驰。曾食汉苜蓿,不屑黄金羁。高高禺同山,下有昆明池。 舳舻纟互云日,波涛扬旌旗。请缨抑何壮,据鞍亦未衰。忠贞谁能嗣,亮节良易亏。繁华上 官日,嗫嚅对簿时。

炎暑方未阑,徵兵防八闽。连舫通析木,高鏠彗长云。深源盛名士,子房画策臣。 违众令独将,不如弃其军。苍黄戒征轴,咫尺枨胡氛。犀甲相炤耀,龙舻自纷纭。伏波旐空 返,赤壁师竟焚。引领海天阔,太息终何云。

金风何萧瑟,海水扬其波。我军西南征,楼船郁嵯峨。荒荒日南地,窈窈瘴疠多。 宵长湿菵露,昼景流寒沙。燧象走丛薄,飞鸟弋堕谷间阿。岩关有列戟,侧径无横戈。地逼 寇趋险,粮绝士卧痾。戈船遂沦没,铜柱空摩挲。

精卫衔木石,毕志沧海间。爰居巢鲁门,风多避其患。矫矫陈虎贲,方舟盖广川。 抽刀榑木折,饮马咸池乾。节旄脱欲尽,灵查殊未还。天吴激溟涨,浩荡弓频关。青鸟昆仑 来,投我白玉环。素书虽不识,长揖辞蓬山。凤驾有遗音,窈窕难重攀。夜来阊阖风,吹折 山中兰。

雨中泊舟虎牙潬南望荆门忾然有作

孟冬滞寒雨,弭棹苍江隈。湓流忽雷响,圆渊若云回。水落沙渚出,气肃霜柯摧。 虎牙嵥竖起,荆门阙竦开。溟濛远岩失,泐嵼曾厓颓。兹水不可厉,兹山讵能排。巴梁藉紟 带,荆郢冯崔巍。在德信作固,逆理翻为灾。田戎与任满,覆车使人哀。铁纟互亦易断,浮 桥已成灰。桓桓岑吴功,画像悬云台。清时外户辟,岛夷重译来。市舶恣径复,津吏不顾猜。 空潭隐战舰,古辟夷草莱。军府辍右盼,羁旅徒心痗。短歌苦促迫,闻者姑裴。窃比《剑阁 铭》,愧非孟阳才。

杂诗

隆汉盛公卿,郁郁登天衢。致身本经术,应务良不疏。《春秋》可折狱,《三百》当谏书。如何中道衰,渐用章句儒。章句亦不足,篆刻徒区区。河间工数钱,乃更开鸿都。居官且食雁,不恤城上乌。

驱车上西原,白日光欲流。商飙何惨烈,落木声萧萧。猎者四五人,遭我於道周。 狡兔时纵横,苍鹰不下韝。岂无云霄志,一击不中羞。谁能养其气。奋翮陵高秋。

步登黄鹄矶,左顾穷三湘。水草何萋迷,蝮蛇盛游臧。元鹤日羽化,谁能啄其肠。 此物含毒螯,不去将人伤。跂头宜速断,解腕徒自创。寄声蒍敖宰,未然尚周防。

這回眄涂攵浦,翳翳罗榛荆。昏莫无人行,旷兽走入城,犴猛不守狱,狐跳荒祠鸣。 县官正高眠,梦寐时一惊。曲突谋不用,焦烂功犹程。

送李户部蒸铭赴天津

辞官向沧海,临别会长安。老去忧风雅,深谈出肺肝。帝城春色近,岛日夜光寒。 莫倚珊瑚树,浮云直北看。

边愁

西域频年能作梗,班超垂老遂临边。河湟纵复军储耗,弓矢初投部帐迁。草满令居 无牧骑,功成都护尚屯田。关山直北归图籍,积厝仍忧虎穴连。

忆昨狼烽照上都,祇今鲛室遍通衢。离宫苜蓿春烟没,飞舶金银海水枯。白雉几曾 重译献,黄龙安得及时输。汉廷解守和戎策,五利他年恐矫诬。

羽书日日过龙编,赤子殊方正倒县。领峤夕烽惊峒户,瘴江明月静楼船。但期李献 输降款,岂有冯唐惜暮年。早晚昆关真奏捷,洗马银海共归田。

榑木千年不改柯,飓风一夕忽扬波。东瀛信有桑田变,南海初无贡舶过。犹忆陈稜 开绝岛,未闻张政檄群倭。圣朝今日尊文教,蛮触纷纷奈尔何。

又愁

天涯毳幕动银筝,梦里刀环识玉京。却信单于能保塞,不缘瓯脱漫观兵。龙沙嘐唳回猋入,虎穴阴岑贯索明。稍喜渥洼天马至,汉家郊祀荐新声。

句骊首服未穷兵,千古常留衣帻城。别国舟车初互市,中朝职贡拥虚名。毋邱刻石 将石靡泐,杨仆楼船息战争。武德当年容抗礼,诸臣犹恐四夷轻。

震荡交州水气中,午时消息未全通。天边野火烧铜柱,海上浮云接贝宫。南纪苍黄 愁失鹿,北书荏苒怨飞鸿。艾山二月花如锦,剩有胡姬走玉骢。

海潮东下赤嵌城,日月苍凉禾黍平。山过鲲身皆列郡,波连熊指忽交兵。千年寂寞 明珠贡,百丈珂峨战舰横。欲问蓬莱问徐福,蛟台蜃阁故崝嵘。

归梦

故园露冷客心惊,夜色黄楼有雁声。寥落楚天斜月里,西风吹梦过江城。

阳春亭即目

绕郭苍山起暮云, 亭前衰草迟斜曛。回塘风定秋萍合, 鸂鶒无端画作纹。

横江棹歌

画舫油巾廉紫玉箫, 棹歌缓缓度红桥。夫容落尽秋江阔, 归去月明生夜潮。

却忆

玉河烟柳接金台,水畔香车宛转来。却忆江南碧桃树,东风愁寂为谁开。

林旭

林旭,字暾谷,侯官人。光绪癸巳举人,官内阁中书,加四品卿衔。有《晚翠轩集》。

还家题斋壁

嘉树殖有誉,故都望生喜。行人四月至,夏雨洒芳戺。最念手移梅,旁出芽如指。 海棠枝上虫,斑绿状踶跂。筍生不择地,廊陊石尽起。治芜理芳草,坐定青袭几。南邻荔支熟,高繖张红紫。筠笼亦相反,馋眼慰无俚。去年大雪寒,实小酢如李。

书声诸弟好,镫窗无隙地。旋彷行复坐,我自知何意。登盘主簿果,饱啖万事置。 赤嵌客亦还,团团五日洎。但言肥无加,欣慰举杯柶。少孤依大母,西日追无骥。梦归见生 存,欢笑家人侍。梦境不可寻,归日却涕泗。

寄梁节庵武昌

高言不止众人心,折杨皇荂易为音。我见斯人每有得,可知语上资堪任。眼中时贤愿识少,於水譬见潇清深。先生伟节风天下,求匹於古非於今。寒泉旧井不自恻,汲引后进犹钩沈。窥公性情实至厚,忧时念友恒钦钦。去年苏州诔循吏,高台流水朱弦喑。我今师丧重茧赴,服勤一念空差参。感我远行忘新岁,招上湖楼邀客吟。骋妍抽秘盈众态,游心窜句费几斟。北海酒尊谁擎举,颍川公子相追寻。明朝辞去船下水,回看大别春阴阴。武昌三度食鱼美,宿留桑下惭精谌。微回衍声病澈,撞钟试可绳题襟。

写经居士赠诗盛道闽派而病予为涩体谓学芜湖袁使君因答及之

夫子论诗笑口开,叼逢目色却低回。涪翁不忘弦歌旨,杜老谁区排比才。底用为藩 防楚舍,更羞酌水溯强台。似闻辛苦腻颜帢,要傍东家司寇来。

外舅哀馀皇诗题后

七日动心惊帝醉,百年被发卜人为。静观始验过庭语,尽瘁空追筹笔时。易佃菑畲 看灭裂。经行蓝荜付隤摧。分明家国千行泪,词赋江关漫道悲。

答幼遐前辈示词

邂逅真非常乐论,陂边鸥鹭怪纷繁。看山留目依吾土,书笏回思入小言。雨急更催 愁日晚,花清自照忘杯浑。龙沙请念凭何物,政要先生秀句存。

直夜

凤城六月微凉夜,省宿无眠思欲殚。月转觚棱成曙色,风摇烛影作清寒。依违难述 平生好,寂寞差欣咎眚宽。身锁千门心万里,清辉为照倚阑干。

灵泽夫人庙

故国何人举奉匜,竹竿从此钓於淇。韦昭吴史应书卒,不见春秋宋伯姬。

李经钰

李经钰,字连之,号庚馀,一号逸农,合肥人。光绪癸巳举人,河南候补道。有《友古堂诗》。

过卫秧村有感

荒荒斜日下前村,此地重过欲断魂。陵谷变迁原不料,盛衰倚伏更难言。春风自改新亭馆,明月曾陪旧酒尊。西望萧萧人去尽,空巢鸮鸟叫黄昏。

重游法源寺

几树疏松野寺前,松阴踪迹久茫然。故人高节成千古,胜地重来又五年。佛火尚明 烧后影,塔铃独语雨馀天。即今无限沧桑感,不独宫花委断烟。

冒传钧

昌传钧,字旭初,如皋人。光绪癸巳举人,官广西龙胜通判。

寄鹤亭侄

西风一夜桂林霜,入手天涯字数行。世变可怜身渐老,官閒差喜母能将。网罗文献何曾倦,谈笑公卿不讳狂。今日门材衰落尽,眼中惟汝白眉长。

陈锐

陈锐,字伯弢,武陵人。光绪癸巳举人,江苏试用知县。有《抱碧斋诗集》。

自长沙至桂阳途中杂诗

昨宿空泠岸,滩声枕上听。今看樟木寺,岳色眼前青。云物犹潇洒,天人一杳冥。 何因羡翀举,句欠齿诵黄庭。

篙溜沙初落,亭荒雾未收。片峰捎雨过,孤艇坐滩流。馀浪汹岩壁,遥墟散马牛。 居人閒倚立,檐际笑行讴。

东湖

提畔初黄柳,垂垂识客愁。轩亭销丽日,风露共清秋。世外閒双桨,天涯讯一鸥。 君看十刹海,何似百花洲。

李庆丰

李庆丰,字绥埏,茌平人。光绪癸巳举人。候选训导。有《行吟日记》。

扬州放舟

虹桥秋柳绚晴晖, 扬子江头画舫归。试望玉钩斜畔路, 随风黄叶逐鸥飞。

胡薇元

胡薇元,字孝博,大兴籍浙江山阴人。举人,四川知县。有《天云楼诗》。

魏城驿

鸟帽疲驴作壮游,五年犹记魏城秋。消磨意气思田里,散落诗词遍酒楼。井底公孙 人几辈,隆中诸葛自名流。重来燕子新巢觅,也共春光到益州。

罗运崃

罗运崃, 字达衡, 宁武人。举人, 官湖北知县。

四月十二日范仲林易中实陈伯严偕往庐山晚登泰西船发武昌

几度宫亭棹往还,窅然江汉思名山。长风狎浪舟逾急,细雨悬镫客自閒。沧海悲欢 沈物外,酒杯消息在云间。但愁宿雾犹遮岭,不为羁人一解颜。

九江旅夜

夜雨江城有客归,故园梦绕一湖飞。横眠短榻携镫近,漫数疏钟出寺微。独雁唳空 悲远道,乱虫狎火笑忘机。卷帷起向南轩坐,断续轻风已满衣。

晓发九江入山作

朝云拂城垒,残雨鸣松枝。驰策出长道,行人各参差。春去芳未歇,碧草摇清姿。野田何漠漠,群雀鸣相追。幽睇结层巘,微情发凉飔。灵山近可挹,百里乃逶迤。路曲蹑危磴,欲速信难期。抚赏求所適,无言契幽思。

山夜病齿答中实送别之作兼呈伯严仲林

荒村尘锁人寂寥,况复寒雨鸣潇潇。一镫在壁凄无色,照见离人魂欲绝。悲风惨澹千嶂云,破榻病眠愁向君。羡君长吟声独苦,强作微呻答商羽。灵山仙侣皆嵯峨,嗟余五蕴戕冲和。一齿已足窘百体,万窍怒作殊未已。愁心夜傍西山飞,梦里征途屡是非。山中一雨瞀昏晓,故园有讬归应早。我闻读书如游山,一空清虚天往还。澄潭水静潜鳞跃,忽芥吾胸生五岳。闻君筑屋匡山巅,上有古寺名栖贤。归宗瀑挂一千丈,幽愿夙结神区想。楚越相携岂偶然,忧来坐令佳兴捐。我生邂逅那有定,龙蛇出没影流镜。幽人滞迹多名乡,君身梦晋非寻常。新诗留听旗亭唱,此日离杯勿惆怅。

自通远驿还南昌留别仲林兼酧赠诗

夙昔闻高卧,春江一识君。横杯汉阳树,翦烛武昌云。翔鹤飘音远,空林照影纷。 窥天惟有色,独立傍斜曛。

云气沈庐岳,相携入道林。潄泉知内热,闻磬识浮音。归意风为急,高情谷共深。 无言看物外,别酒两悲心。

发通远驿道中

抚枕意不適,去去复山阿。讵好丘壑美,良难佳会多。反膺惭跼蹐,愿言涤烦苛。 微日吐薄曜,停云结层波。山禽时一语,风草间相摩。迢递睠长陂,容与揭谿沱。思摇栗里 树,目醉温泉酡。琴意送烟影,南山尚嵯峨。览景肆幽度,抚化生心和。不睹众物理,岂烛 微躬瘥。

宿归宗寺

孤塔千峰外,幽堂万树前。山光浮月上,钟籁与风旋。室静沈虚响,炉温澹细烟。 余怀迷佛谛,宵梦与谁悬。

金轮峰观瀑布

灵峰下插孤根深,石尖径仄俯百寻。乱藤慄上竞一水,幽奇相赏无古今。结草小憩已山半,遥见飞流惟尺练。谷响沈沈送远音,纡行百折惊河汉。横梁危跨越苍崖。清樽坐隔寒潭开。浮珠散气作五色,石光日影相荡挨。缥缈天梯挂云穴,银痕倒泻漏扃鐍。雷雨潜移

幽谷心,流向人閒逐生灭。激沙溅石气奔放,江湖应失涛澜壮。寂寞荒山睥汝豪,为语涓流 休荡漾。细沬风惊扑面寒,铜瓯煎取非贪泉。世上清流一回首,举杯共吸山中天。

秀峰寺观龙潭

双峰突兀飞剑翠,篮舆蜿蜒入山寺。小室冥悬大瀑寒,山根下结灵湫祕。奇境鸿濛 应始开,刻石怪字何年来。易陈旧题笑相示,墨痕初蚀苍烟苔。蟠龙呼翕窥无底,潭水不枯 龙不死。碧光荡漾凝天云,清冷莫使潜熛起。轻风吹浪生微纹,馀流作涧触石喷,人生外鉴 不自静,临流暂赏徒纷纷。万木低压结深绿,一线支离趋海角。山水声形两杳然,画师落纸 成境角。坐眺万象无纤尘,乍晷不闻虫鸟嗔。蹲石倒影俯流水,悦性无倪思古人。

万杉寺五爪樟歌

人间那得生奇树,五爪横抓天地数。冰霜屡劫坚多心,呼吸阴阳非鬼护。同根异幹苍龙拏,繁枝相接无槎枒。雄姿顾自伍凡木,荒山丛立鹓鸾嗟。霜皮秋暗沈颜色,本性虚含岂天贼。犯雪常贞松柏操,凝烟坐待藤萝匝。叶落旁惊一爪枯,大年同尽悲薪樗。百形浇溉资灵液,纤条不注非吾躯。四爪峥嵘尚凝绿,但恨直上无拳曲。讵为逃刑忌斧斤,道在鸿濛鸡卵伏。

琴志楼赠中实

高楼无鸣琴,所志在弦外。山水有诗书,日与皇古会。主人遗世豪空山,轩冕林壑生人怪。仙佛灵踪不可寻,青天乘龙多富贵。小亭倚槛当初晴,两崖立峡虹桥横。峰头云腾四海气,涧下涛奔五岳声。花光草色入文字,虫喧鸟语皆竽笙。怪君心迹两奇绝,上援栗里排长庚。征衫翻风叹尘重,酒杯坐失神明庭。万物纭纭欣有话,希夷何地潜吾形。

第六泉

初识人间第六泉,谁将杯水倚岩穿。涓流不塞微梯穴,一勺长泓万古天。幽谷月明春脉脉,荒苔客立意绵绵。红亭新盎邻佳宅,琴志同忘世外年。

雨坐琴志楼

吾老乘风气郁盘,大千灵窍雨漫漫。烟林色送群峰湿,涧濑声添一尺寒。杯外客心 沈去鸟,襟边天意有凭栏。乱云作态连层嶂,都付仙人跨白鸾。

云锦亭题壁

径曲趋厓仄,亭空压石平。回桥悬地脉,飞瀑落天声。野榼有鱼鸟,岩花无雨晴。 寥寥招隐意,山海日峥嵘。

连理松歌

玄黄孕形无一奇, 千年老松连理枝。天寸地尺支两臂, 龙腾虎跃颠双髀。混沌萌芽

忆新吐,雷霆变化雄交驰。磐石潜根息以踵,清风吹柯鳞而飞。翠叶青条拂云表,上映五老苍髯髭。阴阳不毗昼夜气,日月还吸山川脂。岂向鸿荒向消长,独从广漠为雄雌。摩挲但识苍颜古,蕴藉谁怜劲节淄。涧曲伫睇白日晚,俯仰众绿生叹咨。纤蒲弱柳孰伯仲,百围大木皆婴儿。

庐山篇

庐山之高高入天,灵胚欲向鸿濛先。丹崖几换神仙骨,银瀑长流日月涎。荆扬分野转飞藿,莓苔屐响飘长烟。尊边初识大千界,芥内今知第几年。五洲云壑中原小,况尔孤山一梯杪。气醖杯流压海涛,神行拳石排苍岛。风雨清吟鸾凤音,松楸怒吐蛟龙爪。虚无天外渺三山,嶻嵲人间尊五老。万峰高下何庄严,涧奔为濑渟为泉。乾坤无形含尺寸,鱼鸟有止交飞潜。野猿自怯层岩峭,驯虎常蹲大石安。竹林泊迹沈辽鹤,石室幽光凝夜蟾。山形睥睨异离合,云霓况复低重帘。沧海有底水可覆,将穷碧落吾心箝。

卧农冈瀑布

高冈峭夹飞流起,何处老龙窥首尾。不卧窟底卧冈巅,垂涎一梦生海水。巨绳嵒罅神力遒,深湫静住波无浮。清宁閒气有丘壑,江心海腹终泡沤。乱石盘陀天不管,临流欲洗人间眼。寒喷四时飞雪霜,籁沈亘古鸣车辇。旁有细瀑轻丝悬,东西合涧齐忘年。洪涛自卷风云壮,涓滴还凝骨髓全。茫茫题壁空遥睇,运衰道往魂同逝。摩顶路隔山花梢,回头舟失湖烟际。

畹岩有仙人掌断委草中感赋

物化莽茫茫,草木胡旦夕。不为太华擎露盘,乃在荒岩卧烟砾。神明浴水蛟为龙, 斧凿撼山玉成石。春心乍失仙葩青,秋声遥望丛兰碧。翻云覆雨日悠悠,百年我亦悲行客。

琴志楼雨中酬伯严大兄送别之作

昔下海濱观海水,云霞楼阙伏还起。龙蛇蝼蚁幻两眸,我欲赴之虚一苇。客帆秋挂武昌风,对君清尊语奇傀。君言怪物海外多,亿变终安一心是。飘风荡洋云翱翔,扁舟更入沧波里。肝胆相携歧楚越,是非欲齐殊彼此。我思归求问端倪,诸臣招我匡山趾。短筇始作寻常游,孤襟渐觑山川。五老峥嵘高向天,千岩万壑一脉倚。可否孤根据地灵,安得使股如使指。山形罗立百涧流,亦於骈枝无捂抵。琴楼十日空氛喧,静悦君言饮我旨。西山归路朝暾红,宿草荒藤为君毁。先人埏墓久累累,嗟余早孤心失掎。奇篇语澹情吐吞,一读一泪悲无止。真悲不生欢不萌,悲欢倚伏岂世以。碧空雨合云冥冥,寒泉石横波瀰瀰。意含欲诉叹辞费,翻作长歌入君耳。

白鹿洞

洞湿寒莓古, 祠荒坏壁低。山光凝地重, 松影倚天齐。水火腾千载, 烟云醖一梯。 潺潺溪濑急, 吾意与提携。

观五老峰三叠泉

五行水气匡庐锺,飞泉裂石奔群龙。君看三叠更神异,杯勺苞含造化功。乾坤未破如一纸,太古肝脾馀此水。亿变谁穷劫后尘,水涸山萎天亦死。霄壤遥悬大海高,二气绵绵一线交。下吸坤精浇日月,还倾云汉苏鲸鳌。凌风飘飖那可度,人间天上知何处。绝壑惟令烟雨栖,层梯乍擘仙尘路。水落一叠潭一泓,第三潭更珠态生。湍崩朴战猛霜镝,萍凝不动浮奇青。昔游卧龙与喷雪,崖回嶂沓闭林窟。长虹独挂天当中,五老峰头辨秦越。鄱阳影漂东苍苍,巨川西瞰沧波长。神畿瓴建注其腹,有如坐治开明堂。悬罍睇隔岩攒{矛肖},奋汲馀淙已无驳。世人那解尝淄渑,祇道泉清沟渎浊。二分垂趾惊巑岏,眼花欲坠魂为颠。四大光音成恍惚,但见冥漠蒙垓埏。

相思桥怀古别伯严仲林中实还南昌

寻常骊唱已侵襟,桥畔人天幼古今。云外断鸿谁是客,鬓边流水不成音。仓皇山海神仙恨,迟暮阴阳草木心。万劫悲欢争一晷,晚烟愁觑故园深。

蔡增澍

蔡增澍,字稚云,益阳人。举人,有《学古斋诗草》。

珍珠泉用涪翁第二泉韵

寻春访古高人俱,故宫剥落题楣书。穿林坐石俯方沼,清泉的的喷明珠。地炉瓦鼎 烹云腴,惠山中泠百不如。买田阳羡亦下策,未若结宇依明湖。

泊臼口

泽国连云梦,迢遥望故关。茶香鸿渐水,暝色马良山。浪迹萍无定,乡愁草不删。 边峰犹未息,应许勒铭还。

【卷一百七十九】

旺都特那木济勒

旺都特那木济勒,字衡斋,蒙古旗人。喀喇沁札萨克郡王。有《如许斋诗稿》。

观水

傍岸携筇独步行, 秋来一色碧澄清。无情水与人情似, 随处翻波随处平。

风雨图

雨气浓遮万岭巅,苍茫树拥远村边。渔翁只作寻常看,如此风波不系船。

张荫桓

张荫桓,字樵野,南海人。官至户部侍郎,如尚书衔。有《铁画楼诗文集》。

九日王胡镇与阎成叔别越日宿祁县奉寄

时艰谬典属,遂堕讥谗中。言者傥易地,吾誉超吴蒙。十年忝高位,砥道如蚕丛。世屯际颠危,遑恤自谋工。衰病不得息,矧欲巢云松。金瓯作孤注,愚虑羞从同。皲手理纷丝,凡百嗟蒙耳。外侮既沓至,惟口虞兴戎。固圉抉樊篱,谁欤郭令公。可怜绕指钢,樽俎皆折冲。力未剸虎狼,况能驯駏蛩。暂期兵祸戢,自治仍从容。养锐事征伐,安知吾道穷。高远自卑迩,郑宋殊昭聋。人情骛风影,利刃纷交攻。四至怵投柱,金铄如在镕。臣罪难自明,藉草诚宜通。新疆但编管,减死嘶边风。去国限三宿,修途无停踪。昨度庆都山,骑步犹憧憧。今兹太原道,村醪聆梵钟。登高此佳日,黄华何处逢。吾睫不自察,明决夫何为。栋压靡怨怒,下瓦频操箠。辕固述黄老,汉廷留令仪。阨运逮今日,周孔难为师。何况晁贾俦,挟筴虚千时。穷变通久理,毅力庸起衰。意歧成枘凿,鱼睨骇新奇。填海鸟何拙,移山愚可嗤。委随工自了,谁与扶艰危。天心妙转圜,呼吁通神祇。

齐克达坂

后沟林木尽,达坂高层层。天山此南榦,到眼皆崚嶒。御者急脂秣,惴惴相扳登。 及巅略喘息,下坂尤难胜。六里更一坂,呼吸天帝甍。半山偶俯视,下界犹瞢腾。马行之字 曲,直道世所憎。坂尽出窄峡,骖靷宜不增。触轮石丑恶,疑有鬼物凭。修路断碑仆,昬衢 閟禅镫。欹危极烦恼,谁参牛车乘。官军昔破贼,桑野仍蜎蒸。奋威夺此隘,氛祲方扫澂。 至今山气静,时来云水僧。迢迢葛逊驿,涧道迷春冰。叱驭吾非拟,几时归杖藤。

华山云歌

华山秋尽多晴云,蔚蓝万里铺龙鳞。缤纷五色成锦缋,睢涣之水难具论。平生五岳恣游眺,海外屡屡驰飙轮。求如此云不易得,奇丽直欲无朝昏。有时散作千万叠,下映林木殷朱匀。山家看云结茅屋,此竟不愿王公闻。凤城双阙蕴佳气,宠蔼霞照何氤氲。应龙鸱吻每遮护,隐拒下界窥天根。荀卿作赋昧揣称,太史奏瑞空斒文粦。何如野观得萧散,荫及艰难行路人。因时洒润或致雨,莲华净洗无纤尘。巫山神妾安足拟,高卧合结陈抟邻。

白水驿

古驿千山里,寒芜夕照中。墙低狼伺爨,天阔鸟忘弓。土匠烧烟赭,神丛画壁红。 比邻惟戍卒,长夜鼓怱怱。

吐鲁番王玛特木迓於苏尼相从至连木齐修谒乃返鲁克沁城仍遣四台吉护行至省寄 酬以诗

先是从军有烈名,吐蕃遗族尚峥嵘。毡帷绿茗苏尼水,锦荐雕鞍鲁沁城。迢递朝班 初返国,艰难胙土早销兵。火州物产丰饶甚,试拓蚕桑急课耕。 蜀中奏建丁文诚师专祠感赋

三峡猿声万古哀,生无奥助赖公才。国侨既死歌谁嗣,诸葛前身有自来。诏旨已湔樊棘泪,祠堂新对锦江开。悠悠公道终难昧,恸哭朱游尚戍台。

正月二十六日寄端中丞索和

稠叠兰丛最善歌,如簧声调倚云和。断肠总是巫峰雨,射影潜掀太液波。不学世犹 夸獬豸,有容海亦厌蛟鼍。青春年伴还乡日,白傅青山兴若何。

一时物论谀双璧,同里朋簪甚八关。众里鹰瞵矜觜爪,秋凉鸥梦误湖山。金瓯补缀 恩雠外,玉水消沈呓语间。天道岂能终瞆瞆,穷荒为尔涕交潸。

胜金驿丛柳已碧

塞外东风绝可怜,邮亭渠水得春先。浑如秃柳当门碧,不管斜阳与夕蝉。

俞廉三

俞廉三,字廙轩,浙江山阴人。历官仓场侍郎。谥勤僖。

自题卧游图

廿年归梦绕江乡,路近乡关梦转长。昨夜乡心更奇特,蹇驴驮梦过钱塘。

北辙南辕席未温,故园閒煞老苔痕。家居喜近兰亭畔,山色当窗水到门。

清溪波软舻声柔,重向山阴道上游。指点西兴烟树里,乌篷白榜是归舟。

放翁阁子贺家湖,携侣重寻兴不孤。到处雪泥鸿爪在,新诗好续卧游图。

水色岚光眼底过,驼峰狮岭任搜罗。客中我亦饶游兴,一幅新图一阕歌。

西风催我束行装, 诗卷图书共一囊。郑重归来轻别去, 湖山应亦笑人忙。

谭嗣同

谭嗣同,字复生,浏阳人。官江苏知府,加四品卿衔。有《莽苍苍斋诗》。

别意

志士叹水逝,行子悲风寒。风寒犹得暖,水逝不复还。况我别同志,遥遥千里间。 揽袂泣将别,芳草青且歇。修涂浩渺漫,形分肠断绝。何以压轻装,鲛绡缝云裳。何以壮行 色,宝剑丁香结。何以表劳思,东海珊瑚枝。何心慰辽远,勤修惜日短。坠欢无续时,嘉会强相期。为君歌,为君舞。君第行,毋自苦。

秦岭

秦山奔放竞东走,大气莽莽青嵯峨。至此一束截然止,狂澜欲倒回其波。百二奇险一岭扼,如马注坂勒於坡。蓝水在右丹水左,中分星野凌天河。唐昌黎伯伯曰愈,雪中偃蹇曾经过。於今破庙兀千载,岁时尊俎祠岩阿。关中之游已四度,往来登此常悲歌。仰公遗像慕厥德,谓钝可厉顽可磨。由汉迄唐道谁寄,董生与公馀无他。公之文章若云汉,昭回天地光羲娥。文生於道道乃本,后有作者皆枝柯。惟文惟道日趋下,赖公崛起蠲沈疴。我昔刻厉蹑前躅,百追不及理则何。才疏力薄固应尔,就令有得必坎坷。观公所造岂不善,犹然举世相讥诃。是知白璧不可为,使我奇气难英多。便欲从军弃文事,请缨转战肠堪拖。誓向沙场为鬼雄,庶展怀抱无蹉跎。生平渴慕矍铄翁,马革一语心渐摩。非曰发肤有弗爱,涓埃求补邦之讹。班超素恶文墨吏,良以无益徒烦苛。谨再拜公与公别,束卷不复事吟哦。短衣长剑入秦去,乱峰汹涌森如戈。

陇山

古来形家者流谈山水,云皆源於西北委於东。三条飞舞趋大海,山筋水脉交相通。 我谓水之流兮,始分而终合,夫岂山之峙兮,愈歧而愈弱。吁嗟乎,水则东入不极之沧溟, 山则西出无边之沙漠。错互乾坤萃两隅,气象纵横浩寥霏。昔我持此言,密默不敢论。足迹 遍陇石,了了识本原。陇石之山崛然起,号召峰峦俱至此。东南培塿小於拳,杂沓西行万馀 里。渐行渐巨化为一,恍若朝宗汇群水。其上宽广不可计,肉张骨大状殊异。欲断不断势相 蹙,谁信人间犹有地。譬如亡秦以上之文章,鼓荡寥天仗真气。不复矜言小波磔,横空一往 茫无际。策我马,曳我裳,天风终古吹琅琅。何当直上昆仑巅,旷观天下名山万叠来苍茫。 山苍茫,有终止。吁嗟乎,山之终兮水之始。

汉上纪事

沧海横流日,长城人款年。雁臣皆北向,马市亦南迁。冒顿雄心在,馀皇夜语传。 耀兵骄未已,江上试投鞭。

微闻夏元昊,少小即凶残。法令轻戎索,威仪辱汉官。行看飞羖*芦*历,岂是召呼韩。 帛树休相拟,熙朝礼数宽。

辽儿曾奉使,主父竟窥邻。厚德终归宋,无人莫谓秦。桥门虚入侍,汉室重和亲。 转悼南征者,凄凉问水滨。

蹈海闻高义,斯人亦壮哉。岂知宾日地,犹有报韩椎。蕞尔蜻蜓国,居然獬豸才。 一声燕市筑,千古尚馀哀。

览武汉形势

黄沙卷日堕荒荒,一鸟随云度莽苍。山入空城盘地起,江横旷野竟天长。东南形胜

雄吴楚,今古人才感栋梁。远略未因愁病减,角声吹彻满林霜。

崆峒

斗星高被众峰吞, 莽荡山河剑气昏。隔断尘寰云似海, 划开天路岭为门。松拏霄汉 来龙斗, 石负苔衣挟兽奔。四望桃花红满谷, 不应仍问武陵源。

自平凉柳湖至泾州道中

春风送客出湖亭,官道迢遥接杳冥。百里平原经雨绿,两行高柳束天青。蛙声鸟语 随鞭影,水态山容足性灵。为访瑶池歌舞地,飘零黄竹不堪听。

到家

孤岭破烟石径微,湾头细雨鸬鹚飞。有人日暮倚门望,应念归人归未归。

别来三见流火星,秋风猿鹤哀前汀。谁知骨肉半人鬼,惟有乱山终古青。

蔡希邠

蔡希邠,字稼堂,一字仲岐,新建人。诸生,历官广西太平思顺兵备道。有《寓真 轩诗钞》。

佳人

佳人抱绝色,贞静性寡欢。容华耀霜菊,姿态凌风兰。浣纱自织布,羞被绮与纨。世情向浮薄,得贤古所难。绸缪缔君子,自谓摅肺肝。和鸣悦同调,丹凤谐青鸾。岂知中道乖,一旦分羽翰。回文叠缄恨,鱼帛沈江湍。君虽弃妾好,妾弃良亦安。人生靡新故,终始贵不刊。愿君三复思,群口方讥弹。

柳州偕曹介藩太守金辅臣司马游立鱼峰遍探岩洞诸胜遂题

灵鱼自何年,波底猝飞出。龙门不得上,矫首作山立。化龙虽未成,终胜枯鱼泣。至今石缝髓,常带残沫湿。其腹空能容,中有洞六七。平生抱奇好,特为留一日。招携两长官,车马亭前集。幽岩户不扃,左右随客入。突兀挺孤砫,诡异罗四壁。仰骇崩朵云,离地才数尺。摩顶防欲压,势甚危岌岌。缨络纷下垂,纯是钟乳汁。天女霞裁帔,罗汉风飘笠。貌固难尽传,目亦无暇给。岂知涉犹浅,愈转境愈密。窈深曲而达,白昼黑於漆。秉烛为我导,所到必穷历。雪窦放光明,变幻相千亿。神物互屈蟠,恶兽相搏击。森然欲攫人,对此毛发慄。睨视忽猛省,谬想潜起蛰。安得驱雷霆,更挟风雨力。奋鬣山动摇,一夜头角戢。阴崖徙空潭,惊舞赤鯶赤。骑之蹑云汉,万里江倒吸。

刘孚翊

刘孚翊,字鹤伯,一字纶阁,南丰人。官候选道,出使英、德等国参赞。赠光禄寺

卿。

至日示舍弟

历历经过事,昏昏醉梦中。江湖愁日短,天地泣途穷。佳节因人过,伤心有尔同。 平生忧患意,何处问苍穹。

吴广霈

吴广霈,字剑华,号汉涛,泾县人。江苏候补道。有《劫后吟》。

投赠王湘绮先生

到处青山好杖藜,沧洲小住即关西。非因赋鵩思辞楚,宁感蜚鸿佐霸齐。风息神鹏 图海运,春归杜宇背花啼。愿从五斗乡闾醉,付与龙门传滑稽。

海角欢迎李郭舟,同袍何地咏同仇。大言自昔轻刘季,好勇奚妨哂仲由。偶聚耆英 闻凤吹,敢贪富贵羡羊头。吴儿拟作无家别,一剑题名天地留。

李经达

李经达,字郊云,合肥人。江西候补道。有《滋树室遗集》。

题洄溪别墅

绿云深护宛山家,消夏园林景物奢。雨后雷抽三径筍,昼长风落一溪花。结邻应许招巢父,寄钓何妨拟若耶。有客隔溪曾立马,芰荷香拂锦鞭斜。

徐樾

徐樾,字季同,番禺人。官四川候补道。有《遗园诗集》。

于晦若穆若昆季侨居倪氏庄秋夜过谈有作

孤馆池塘上,高谈秋夜凉。林疏低近水,菜好嫩经霜。踏月人三五,吟诗句短长,漏残书乱检,讹字费商量。

虎门

一气天风荡碧涛,群山尽伏虎山高。中原职贡梯航盛,南海关门锁钥牢。万里车书 通鬼国,九州日月拱神皋。乘槎我欲浮霄汉,且向苍溟钓巨鳌。

喜朱乡谿至

江清莎暖乍阴晴,啼鸟声中拥篲迎。帆影远随春水至,暮云不及客心平。蛮烟瘴雨 关山感,白酒黄鸡故旧情。三百滩头来往熟,风波惯历已无惊。

与秦稚樵张春泉江叔海至望江楼

冻云低压锦江头,待雪同登江上楼。傍水风声常似雨,严冬树色尚如秋。天边远岫 参差没,槛外寒涛日夜浮。是处园林堪吏隐,可容高卧对沧洲。

奉答李子璈见怀

茂苑时萦怀旧梦,合江闻有远归人。非关风雅思林壑,那有诗歌入鬼神。戎幕空多 忧国念,乡园暂返济时身。暮云深处遥相望,放棹来探锦里春。

徐士霖

徐士霖,字澍生,晚号樗叟。江西清江人。诸生,历官浙江金衢严道。有《养源山 房诗钞》。

题李穀宜观察云门话旧图

家住匡庐西,行迹遍南岳。一别三十年,胜景时追索。苦被薄宦牵,久负归门约。 旧雨怅彫零,笑言无由博。卓哉李使君,襟怀殊落落。耻溷武林尘,远驾青齐鹤。一鞭指云门,声闻弦歌作。君昔侍高堂,曾登此间阁。父老与儿童,情话犹如昨。抚景念流光,慷慨 图城郭。

赠刘问刍观察次鹿道人水竹居消夏韵

新辟层甍对紫阳,湖光山色极苍凉。好招旧雨联今雨,却把他乡当故乡。小隐漫言 天下事,高歌未减少年狂。白云缥缈思千里,偶为陶情一举觞。

轮舶夜行

鱼鳖惊秋夜,鲸鲵驾海来。山移轮转岸,风涌水成堆。云里疏镫见,江心画角哀。 四夷知向化,锁钥故常开。

严谨

严谨,字子衡,号叔和,桐乡人。历官石阡知府。有《清啸楼诗钞》。

贵州省旅店题壁

万里趋庭暂息肩,一檠孤坐思茫然。才辞水驿三湘路,又数山程五月天。书到途中慵检点,诗成客里倍缠绵。白云翘首原非远,翻恨春归在客先。

芦溪舟中

芦溪溪船小於叶,芦溪舟子猿猱捷。溪流直下不可前,短篙借作短兵接。舟霝间却受两三人,看山不分谁主宾。哑哑数声出芦去,濛濛烟霭迷溪滨。中无馀地不得卧,欠伸常自跏趺坐。沾衣欲湿雨忽来,篾帘半扇芦篷破。天低野旷邻钟急,争向村中买箬笠。舟子西笑指斜阳,顷刻阴霾尽收拾。候馆依稀在眼前,对床今夜任安眠。沿溪急棹二十里,回望芦丛何处边。

薄暮舟发常山

之江东去暮云深,到此清流惬素襟。叶叶轻帆随岸转,亭亭落日傍山沈。滩声呜咽流归梦,鸟语绵蛮和醉吟。今夜月明来故国,可堪胜景负登临。

翁延年

翁延年,字笠渔,晚号笠髯,湘潭人。官江苏知府。有《潇湘词馆诗钞》。

宝刀篇

宝刀未磨洗,形与凡铁同。土花久斑驳,拂试须良工。唐砖汉镜有时售,此刀弃掷都市中。赏识之人亦无意,摩挲怪有数番字。贱市携回心不珍,旁人怂为千金器。装潢重复入五都,明珠作饰兼珊瑚。锋锷一新宝气吐,山鬼走泣狐潜驱。吁嗟时事已沸鼎,此刀杀贼利无并。闭置匣中贵谁识,至宝仍与顽铁等。

赠琴园主人张勤夫

名园风景画图开,浮玉山边辟草莱。春水绿拖游客舫,夕阳红上妙高台。中流砥柱 一孤塔,北顾云烟几霸才。猿鹤依人花解语,珮环风送晓鸿来。

海天何处觅桃源,渔父重来泣夜猿。点缀小园招庾信,扫除尘榻待陈蕃。主人座上 琴求友,杜宇声中客断魂。未必汉皋逢解珮,却留鸿爪印江村。

郭庆藩

郭庆藩, 字子瀞, 一字岵瞻, 湘阴人。诸生, 官浙江知府。有《十二梅花书屋诗集》。

野望

幽居一何适,独步倚空林。远树喧山鹊,方塘拂水禽。芰荷香送晚,藤蔓老成阴。 云壑藏萧寺,遥闻钟磬音。

新霁

纤云四卷碧天遥,雾散江清冻未消。万树梅花香似海,因风吹送过溪桥。

将之日本奉别张雨珊司马即送其之山东兼简喆弟冶秋提学

十二年前同里闰,当时风谊友兼师。抟沙聚散一弹指,斫地歌吟空自奇。我向沧溟 观日出,君归海岱数秋期。临歧更忆颍滨老,云树苍茫系梦思。

李宗祎

李宗祎,一名向荣,字次玉,又字佛客,闽县人。官分部员外郎。

新雁

秋信谁家先一旬,哀弦欲绝黯伤神。关山断梦初黄叶,时节惊心又白蘋。湘水浅寒 无睡夜,衡阳凉月未归人。南来枉诉羁愁苦,我已天涯十载身。

读心史

匣铁沦精鏽碧苔,黑阴天遣出尘来。毫端兰气含秋烈,梦里梅花冒劫开。卷土心灰 悲北狩,礼魂声惨接西台。洪荒十点孤臣泪,莫误遗山野史才。

吴保初

吴保初,字彦复,一字君遂,庐江人。荫生,官刑部主事。有《北山楼集》。

有感

蹉跎閒岁月,往事不堪论。岂意终天恨,翻因受国恩。修名愁未立,先业必思存。 读史怀韩范,忠清遗子孙。

春日遺怀

门前旷幽瞩,春风吹裳衣。四顾何萧条,鸟语相婓婓。原上滋青草,游子殊未归。 俯仰复三叹,徘徊久瞻睎。相思在长道,之子与我违。萝径自岑寂,孤琴为谁挥。余怀跼未 展,斯世将焉依。朝饮木兰露,夕采北山薇。乾坤逝安适,日暮独扃扉。

旅夜书怀

明日江城道,行踪不可留。孤镫怨遥夜,残月落高楼。风雪岁云暮,关山我旧游。故人何日见,樽酒话离愁。

晚晴

将赴都门留赠家山亲故

束发就外傅,迟钝百不如。一朝承明诏,驾言觐皇都。年齿逾二九,仍复滞里闾。 余心日茅塞,学业多荒芜。淹迟非吾事,欲往还踌躇。岂谓贫而致,匪为饥所驱。宁甘骨肉远,况与田园疏。聊欲继先志,讵敢堕其躯。悠悠帝乡远,一去千里馀。世途多荆榛,安得不崎岖。相期各努力,岁月如白驹。

简裴伯谦农部

阴雨初含霁,垂甍溜尚滴。袅袅来风凉,黮黮流云湿。逍遥溽暑退,索寞日将夕。 咄哉风雨师,连朝阻良觌。

夜梦故人朱曼君感怆赋此

青天碧海骑鲸去,小别千秋返夜台。季重旧游成鬼箓,谪仙词赋岂凡才。天荆地棘 归魂惨,月黑枫青入梦来。欲挈只鸡向何许,山阳笛里不胜哀。

吾生

凤叫丹山鹤在林,吾生祇合老墙阴。学琴未解幽忧疾,去国常怀浩荡心。亲见蛾眉成碧血,更无骏骨市黄金。不才自分终何补,敢问明时怨陆沈。

国门

十五髫年致此身,涓埃无复答君恩。诗书聊欲酬先志,名字深惭籍党人。北阙觚棱 重回首,南山风雨独伤神。从今膝下承欢去,清泪潸潸出国门。

归省吟

九阍绝叫欲何如,去国还堪慰倚闾。母喜不疑添蔬食,儿非制语堕金鱼。寒泉喷薄朝挥轸,草阁萧疏夜读书。差喜谢庭多逸趣,森森玉树满阶除。

读陈石遗诗集遂和其论诗原韵

客邸镇无聊,向人借书看。游兴久已阑,吟侣亦渐罕。暮携陈子诗,兀兀诵至旦。 珠玉随风翻,咳唾落天半。咏怀追步兵,耆酒过中散。云梦偶相值,江湖游汗漫。师门君所 思,世途吾已惮。虽有鸿羽仪,不及羊头烂。泽畔放臣吟,楼头思妇叹。词妥极艰辛,语妙 益凄惋。始觉涪翁豪,不逊临川锻。吾师擅风雅,薪传火未断。救衰虽已迟,振靡或未晏。 谁为压卷篇,有人唱之涣。

饮酒

屈宋留辞赋,杨朱泣路歧。荒唐思楚梦,窈窕望云旗。江汉春归早,潇湘雁到迟。

眼看人尽醉,安用独醒为。

冯咏蒨

冯咏蒨,字秀如,高要人。官工部主事。有《双翠阁诗钞》。

过横塘古渡

胜游端拟续流觞,杏子花开日渐长。买得蜻蜓小如叶,半晴天气过横塘。

唐际虞

唐际虞,字赞襄,嘉善人。贡生,官民政部七品小京官。有《春星草堂集》。

舟过石门

离家才百里,未觉客行恶。五两逐翻风,催来石门郭。人家背山住,烟火出林薄。深竹乱禽声,斜阳澹村落。嗟哉荒戍后,鸡犬皆萧索。民俗颇自敦,穷秋念偕作。因依桑树下,时见收败箨。移棹去孤城,烟波渺难话。

书怀

元驹守一垤,黄鹄游四方。寓形大块间,何者为我长。杯酒儿女欢,不浇壮士肠。 嗟哉羁旅客,鹣鹣思故乡。摩挲三尺铁,生死无相忘。

大风摇坤轴,倚剑登层台。瀰迤八荒外,漫漫见蒿莱。丘墟叠隐蔽,虎豹相嗥豗。 颓景薄西海,逝哉不复回。愿为黄鹄举,长歌归去来。

送程鹤舲赴闽

一笑怱怱竟束装,飘然闽海控飞航。水从螺女江边静,月到龙王社里凉。榕叶黑连 秋夜雨,橘林黄带晓天霜。衣间浣尽缁尘色,何似低迷在故乡。

病中柬钱心垞

兀坐自沈思, 閒窗展卷迟。人无离病日, 天有放晴时。孤负三秋节, 空成一首诗。 还持寄吟席, 此味想同之。

题扇

花雾冥冥动远思,春葱按遍玉参差。银河不隔红窗路,坐到东溟月上时。

岳嗣仪

丘嗣仪,字凤吾,成都人。诸生,袭轻车都尉世职,官参将。

汉昭烈帝惠陵神弦曲

土花漠漠青成堆,石麟卧月苍烟开。君王夜半乘龙来,天风吹酒金光杯。桑影童童覆朱瓦。玉人背立漆镫下。镡角荧荧的卢飞,金凫不到九秋野。蕙肴蒸兮兰籍陈,灵飙动兮璆锵鸣。蹇将憺兮不可接,云旗华衮光觥觥。疏缓节兮扬枹鼓,风前翁仲学巴舞。繁音吹落雕觚棱,纷纷楸槚摇神雨。

王燮

王燮,字襄臣,一字湘岑,宁河人。诸生,袭骑都尉世职,历官京城左营游击,加 总兵衔。殉难。有《秦园诗钞》。

哀故九江知府王君应孚

高唱曾随鹤唳闻,中年壮气得支分。抱关亭馆宾犹主,当代英雄操与君。垂老一麾 辞魏阙,清声千古落江濆。太平湖上行吟处,疏木寒蝉向夕曛。

高上傅宅海棠敬次原韵

朝朝辇路迷官柳,无事閒居羡犀首。不知花发满城春,劳疲岂暇思樽酒。青宫高选列仙居,素怀静得仁者寿。禁中待漏惹芳菲,花底开筵杂齑韭。凤城西偏西蜀种,四株植自何人手。甲第云边第一人,乞与先生此留守。琼瑶飞佩肃行列,粉黛联裾侍左右。香散霏霏被比邻,辉映两两如相偶。何来俗吏走风尘,窥门只见长鬣叟。君实不在语习惯,子敬径造孰可否。蝶恣蜂狂春正闹,目游心醉浑忘久。虽云未得坐春风,此日此花吾不负。曾闻文宴泛三雅,应许词章富二酉。先生调高真寡和,诗成妙理包万有。天赋清才与清景,信知有德堪消受。京华几日留甘棠,咫尺星轺傍南斗。

赠吴述之先生

中原有名士,白首犹潦倒。一身大布衣,浩然畅吟啸。涉境极坎坷,诙谐语仍妙。 自云父母身,珍重敢自暴。风霜系远念,精力苦衰耗。高堂垂爱心,艾老甚幼少。千钧慎担 荷,百岁求自劭。努力尚加餐,保身即纯孝。

石君炫锦障,申公迓蒲车。岂知醉中狂,天地为之庐。惟兹富若贵,本为人所趋。 金谷罹奇祸,坛席讥竖儒。李杜并沈沦,颢气冲太虚。如何千载后,共许经济储。乃知穷达 理,不在荣与枯。先民亦有言,浊水求明珠。

苦雨叹柬张四

皇天积雨何惨酷,贫贱知交益困蹙。京师十日滞霪霖,星漏满床湿囊簏。秦园旅客心孔哀,拥衾兀坐愁瑟缩。门外潦水深七尺,讵止污泥阻华毂。城南北音梗绝,停云怅望几信宿。为念萧馆索居人,饥渴无乃绝饘粥。欲持樽酒相慰藉,咫尺千里空踯躅。东望黑云多

水气, 故园应已伤禾菽。呜呼, 饥馑何待卜。

路承鋆

路承鋆,字仲量,毕节人。诸生,历官云南候补、直隶州知州。有《啸亭诗钞》。

题李簠青太守巫峡归舟图

蜀山著奇险,蜀水多风波。芳洲有蘅芷,委弃同薜萝。昔日秀空谷,胡杂苔与莎。 凄凄迅商薄,零落悲枝柯。岂不惮艰险,凤辖逢网罗。落日蔽轻云,蒿莱障山河。今君且归 去,华表看峨峨。芝兰纵枯槁,馨香终不磨。

新晴

天气新晴昼启扉,远山青翠上人衣。雨馀败壁群蜗聚,日落横塘一鹭飞。小径红稀 花未放,荒畦绿满菜初肥。前溪昨夜添三尺,采药僧还不得归。

褚成昌

褚成昌,字稚昭,馀杭人。贡生,官华州知州。

夜行桑乾河

游子苦行役,长途晓夜征。荒寒增客思,哀乐感吾情。沙软馀龙气,天寒辨马声。 狂澜忧未已,何术奠苍生。

沈逢春

沈逢春,字季华,号稣民,归安人。候选同知。有《烬残集》。

登北固山

两点金焦在,荒峦势不孤。江声摇石壁,夕照淡浮屠。寺古禅扉寂,时清战垒芜。 昔年山下路,何处走乌珠。

张登善

张登善,字箴劼,平湖人。诸生,候选同知。有《求己斋稿》。

赠金君篯孙

凤凰池上蜚声早,为念莼鲈一棹回。才竞当阶红药艳,家馀止水碧芦灰。赋诗自写循陔乐,济物曾闻洒润来。沧海横流吾道在,风尘怀抱对君开。

费湛

费湛,原名恩湛,字继香,号巽盦,武进人。诸生,官运判。

汉使

汉使能为凿空游,穷源直尽海西头。槎回惟见支机石,谁向天边问女牛。

偶作

夫容湖水野桥平,画里溪山梦里行。依旧晚来留客雨,孤篷听得是离声。

蒋肇龄

蒋肇龄,字光廷,一字伯遐,合江人。诸生,官山習峨知县。

与左笏卿比部佗城话别

别离尊酒越王城,见惯风波海上行。书画压船新推税,烽烟防垒又增兵。洪涛日涨 滔天势,宝剑时闻斫地声。招我不来麾不去,此心难剖是忠贞。

张翰

张翰,字愚庵,长沙人。官贵州知州。有《铁笙庵诗集》。

将别贵阳感赋

严城风急起骊歌,此日开樽唤奈何。老去和戎怜物绛,市中屠狗忆荆轲。蛮天落木 秋容淡,夜雨孤镫别泪多。为问东南诸将帅,几时边徼议横戈。

忠满

忠满, 字若虚, 满洲旗人。官馀姚知县。

自遣

李沧瀛

李沧瀛, 字东溟, 阳丘人。官蠡县知县。有《海樵诗钞》。

题北园主人壁

春山青似螺,春水绿於鸭。一屋围短篱,秾花数枝压。客来幽兴长,同话武陵业。

别在星凌晨一杯酒,欲别复踟蹰。顿使肝肠热,翻令意气孤。花枝当绮陌,草色满春芜。更莫歌行路,前林有鹧鸪。

〇北店小憩

仓皇日暮小停车,倦倚匡床待煮茶。风送莺歌帘影外,玉楼人拨玉琵琶。

交河道中

一鞭挥夕照,千里渡交河。地僻行人少,天寒旅雁多。芦花水深浅,黄叶树婆娑。 远道频回首,故园荒薜萝。

蒋兹

蒋兹,字今吾,睢州人。山东候补知县,署濮州知州。有《绿槐草堂诗存》。

山游

山不厌人游,游山人不倦。一峰高一峰,峰峰露真面。片片白云飞,声声黄叶战。 秀骨瘦撑空,清癯奇独擅。我今登绝顶,如列神仙眷。天地此空阔,足广我所见。落霞失翠微,明月头上见。不从尘外赏,何知静中变。风雨秋山多,霜露秋山遍。游尽赋归来,收入丹青卷。

咏兰

曲奏当年明月夜,美人心事水潺潺。如何芳草迷归路,洒落香痕满世间。

王宾基

王宾基,字叔鹰,海盐人。官石城知县。有《堇庐遗稿》。

白鹤泉

泉脉枕云宝,洞涯日无辉。悬崖擘垂练,企石心奋飞。封池惊雷吼,巨斧安可挥。 奎曜应灵宅,众口互乖违。松磴饯落月,醉卧铿琴徽。送声出山去,飞念迥无依。

出东门观海

霜角雁声哀,孤城向晓开。日光带雨出,山色渡江来。黄叶归村路,青衫浊酒杯。 年年几登眺,结客上高台。 江澄

江澄,字梅生,长洲人。诸生,官浙江知县。有《吟秋馆诗存》。

送查客槎回杭

同是飘零客,君归在我先。乱馀思故国,归去少人烟。后会西湖近,重逢八月前。 联吟前夜雨,话别又江船。

陈矩

陈矩,字衡山,贵阳人。官四川知县。有《灵峰草堂集》。

即事

依山小筑静无哗,风堕琴弦响落花。三径竹松新活计,一编文字旧生涯。引泉婢浣 芝云石,扫叶童煎穀雨茶。傍晚消閒无个事,悄听虫语隔窗纱。

何承道

何承道,字璞元,衡阳人。优贡,官四川知县。有《通隐堂诗》、《慧定庵近诗》。

水宿怀赞君先生

推篷落残月,津鼓响初沈。斜汉澹微碧,澄川生夕阴。华年同寂寞,遥夜忆徽音。 坐对沧江色,萧然禽向心。

冬夜睡起作

猜纱隔子护红蛮,栩栩游仙梦乍还。满院严霜催市柝,一帘寒色上屏山。重温茗碗都成趣,微拨薰炉尽著閒。便听檐铃语长夜,静中清福几曾慳。

南园看荷花作

静练涵虚光, 赪霞散奇绚。繁葩竟何力, 矫此炎威煽。逶迤映华馆, 窈窕移清宴。 污黦岂独殊, 高怀亮谁见。世人贵稀得, 纷晻神先倦。鳞鳞秋水间, 凉红坐疏贱。微波亦何 话, 孤香若为恋。尽日对方池, 逍遥欲忘膳。却怜西商急, 转幸孤赏先。怜赏难自任, 遐心 滞閒院。

重游吊黄楼

荔支香遍古戎州,有客轻维一叶舟。如此溪山谁管领,夕阳重上吊黄楼。

郭绥之

郭绥之,字靖侯,潍县人。官江苏知县。有《沧江诗集》。

石桥晚归

木落随秋雨,河流带晚沙。笙歌喧两岸,镫火聚千家。市散游人醉,风高旅雁斜。 濠梁归去晚,霜月满芦花。

孙思奋

孙思奋,原名澄清,字靖江,浙江山阴人。官江西知县。有《天鬻山房集》。

乞种山茶花示萧大令

细雨如烟荡曲尘,山茶新乞自东邻。十年树木归吾辈,百岁看花待后人。幽幹能贞 存晚计,名心未死讬芳春。何当永作昇平想,薪木无他日月仁。

初月

昏黄渐翳风林色,树杪明星耿欲光。稍觉倾愁在何汉,略随残吹下城墙。忧时天意春无信,绝塞军声夜有霜。独向清宵悲宿府,晚来碪杵动苍茫。

释梦示桂秀才

至人不遗物,神定物自遗。纷然六凿内,一与神委蛇。原澄万汇见,妖眹相纷披。 天人晚交午,忧患生龟蓍。魔魇何足凭,水魅山有魑。我梦若堂府,百怪堂下驰。炼我定中 力,神胜妖自疲。惧德不虑患,逐物圣所嗤。夫子定者流,颇怪含嗟咨。子心良足闵,同此 离家悲。我有一樽酒,媵此五字诗。不为爱酬酢,劳苦聊娱嬉。神全气自王,理极天根移。 倒床失思议,归梦章江湄。忧喜两无用,惟有春熙熙。

田文弨

田文弨,字时卿,一字君贶,汉阳人。诸生,候选知县。有《立矣定堂诗钞》。

幽寻

幽抱挹山光,峰回僻径藏。人家三五树,湖口去来樯。古寺少行路,乱谿流夕阳。 裴回忘近远,空外野烟苍。

冯咏芝

冯咏芝,字诵芬,高要人。官江苏知县。有《耐禽诗钞》。

秋水叹

身不作村农,不知村农苦。今夏苦淋漓,秋来仍多雨。万顷与千畴,茫茫无片土。始尚望开晴,新秧还可补。何期白露降,旭日犹未睹。农户最关心,妇子愁无语。征赋虽初完,衣食出何所。离乱痛相遭,正宜舒民力。天道竟无知,饥馑生不测。拯济乏良方,中心常感感。叹息诗初成,寒虫鸣四壁。

王敬铭

王敬铭,字菉君,一字澹如,汾阳籍浙江山阴人。官江苏知县。有《缘督轩遗稿》。

哭陆静山公子

昔我来吴门,憙识陆公子。公子不羁才,饮酒被纨绮。长剑倚耿耿,胡绳索纚纚。弱冠爱文章,奇书称宛委。俯仰隘八荒,海内望丰采。伫看列上台,雍容辅当扆。鼎门庆有馀,周道平如砥。忽传消息来,竟以蹈海死。乍闻犹恍惚,沈沈乃真矣。遗蜕逝茫茫,凄凉馀行李。上有白头亲,梦中舞莱彩。君性旷且聪,陶然乐素履。纵有难言隐,未必无生理。胡不遯空山,胡不归故里。岂其厄龙蛇,无端折蘅芷。国运丁阳九,天下滔滔是。荆天兼棘地,堕入樊笼里。众醉我独醒,人事久糠秕。敢效屈灵均,一洗顽懦耻。毁誉听之人,我心终不悔。君也本通儒,一朝成烈士。此时震寰区,异日垂惇史。霭霭岭头云,潺潺江上水。至今池馆夜,仿佛逢山鬼。临风酹一杯,四野秋声起。落日望崦嵫,吾将诉真宰。

过洛阳赠文仲恭太守

久闻直谏伏青蒲,又见仁风被故都。祈雨虔为民请命,论文閒共士摊书。旧时荆国 奸能辨,今日吴公治独殊。私望岁寒珍晚节,有人秉笔在菰芦。

灵宝道中口占

游子身尝境, 衰亲心历时。家书不敢说, 白发已如丝。

周恩煦

周恩煦,字晓芙,泰顺人。拔贡,官江苏直隶州州判。有《晚华居遗集》。

有感

峻望久崇黄魏郡,清时岂有董临洮。疾雷过后青天迥,仰见摩空一鹤高。

月夜

皓魄挂檐端,虚室忽生白。案头罗积卷,字字光相射。欣然就读之,书味溢胸膈。 顿使一片心,化为五色帛。境空趣自生,虑静物可格。试问赤壁游,何如我今夕。

沈闻喜

沈闻喜,字子修,平湖人。贡生,官江苏直隶州州判。有《复庐遗诗》。

郊行

小径通幽处,秋光引兴长。几家茅盖屋,比户稻登场。岸草冷新雨,篱花娇夕阳。 料知村酿熟,触鼻醉深香。

黄舒景

黄舒昺, 字曙轩, 湘潭人。官凤凰厅教谕。有《晚悔葊诗草》。

归田园

山外白云满,先生归去来。垂纶坐香茝,把卷立苍苔。好雨适然至,小花争欲开。 化机本无尽,玩物一徘徊。

曹树德

曹树德,字树滋,绵竹人。诸生,官教谕。有《紫岩吟稿》。

读虞永兴夫子庙堂碑有感

右军工书穷神化,嫡派相承虞永兴。内含刚健外婀娜,天然墨妙超人群。把玩再三不忍释,置之座隅忘朝昏。如与有道相接对,顿教方寸澹俗氛。书法至唐乃大盛,欧褚颜柳世所敬。率更猛将挽强弓,深入时或摧其锋。河南绰约如美女,薄媚不任罗绮丛。平原雄杰迈千古,字以人重谁敢攻。诚悬清劲亦可喜,人谓结体同鲁公。行间究少飘逸气,魏晋风流已扫地。惟有秘监擅众长,有如君子善藏器。但论行草亦偏工,暮年所得更深邃。兰亭茧纸空复空,即此已可追其踪。晚近俗书体尤弱,妩媚祇成俳优风。临摹虽工神气失,枯枝断梗将无同。书法与世相流转,识者观此忧忡忡。

杨宗济

杨宗济,字用舟,无锡人。贡生,官溧阳训导。有《修竹吾庐诗集》。

山中晚步

山斋疏雨歇,圆月在松顶。空翠生夕凉,梧竹散清影。风泉夜更喧,林涧秋愈静。 孤吟结遥想,独往穷幽兴。樵唱度溪来,转入青萝径。

廖树蘅

廖树蘅,字荪畡,湖南宁乡人。官清泉训导。有《珠泉草庐诗钞》。

督植棫朴入山拾薪

汗漫陟秋山,凉风动巾帻。辞柯霜叶乱,溪涧丹黄积。呼儿拾堕薪,少小各勤力。 携筐竞奔命,草影穿林隙。叶乾声窸窣,肩压行盘辟。相携返林屋,喜笑声阗溢。承欢到公 妪,一一颁枣栗。眷兹真朴情,良用增愉怿。渊明古贤哲,儿躬柴米役。矧余未闻道,生事 恒多绌。不凭手足劳,曷由供朝夕。吟成授儿读,聊以示鞭策。

删丹道中

乌帽东归弱水西,天涯云物怅分携。轻衫短策删丹道,榆叶秋风衬马蹄。

早稻如云被陇黄,一般风物似湖湘。渠分燕尾靴纹细,村落鸡啼午饭香。

陈獬

陈獬,字去恶,怀远人。贡生,官建德训导。有《冷髯诗草》。

舟次高良磵

反侧复反侧, 旅夜何漫漫。薄酒不成醉, 愁怀难暂宽。夜寒镫影瘦, 霜落雁声乾。 一片平湖月, 年年客里看。

褚成允

褚成允,字季荪,号连士,馀杭人。诸生,官萧山训导。有《补拙草堂诗稿》。

游沈氏啸园

二百年前梦,名园是壮观。笙歌低落日,楼阁耸层峦。旧业随流水,新愁独倚阑。 废兴今古事,且作等閒看。

周庆森

周庆森, 字蓉史, 号古城, 乌程人。贡生, 官平阳训导。有《敝帚集》。

登北高峰

霸业当年竟沼吴,而今古寺奉僧盂。海生明月潮千里,塔隐残阳雨半湖。虚洞呼猿 谈赵宋,荒台游鹿陋姑苏。新诗准拟镌悬壁,蜡屐重来认故吾。

秦荣光

秦荣光,原名载瞻,字炳如,号月汀,上海人。贡生,官候选训导。有《养真堂诗稿》。

东庭作

小小三弓圃, 疏疏六尺篱。有花难辨种, 无树不交枝。聚石新增坞, 环墙半傍池。 眼前生意满, 绿草碧苔滋。

拟杜登岳阳楼

岳阳楼上望,高出岳阳城。山势趋南戒,潮流混太清。星辰仍北拱,车马尚西征。 我问今宵月,鄜州隔几程。

黄家鼐

黄家鼐,字彦生,鄞县人。官福建布政司理问。有《艺兰山馆诗存》。

寒食寄怀仲兄用子由寒食前一日寄子瞻韵

禁火遗风久寂然,家书惆怅阻烽烟。炎方瘴毒驱难尽,蛮语侏亻离习渐便。鸿雁分 飞空望远,虫鱼笺释未成编。遥知潘县勤农政,春雨扶犁看力田。

黄瀚

黄瀚,字舜琴,大冶人。诸生,官湖南府经历。有《枕溪园诗稿》。

雨后发湘潭

一雨添新涨,轻艭去不停。云收江树净,风卷浪花腥。鸥影依沙白,岚光逼岸青。 莫怀湘水恨,天问久无灵。

重至罗田

楚客自来往,秋花解送迎。虹边疏雨歇,衣上晚凉生。山驿新添吏,岩关旧戍兵。 劫灰犹在目,不尽古今情。

王廷鼎

王廷鼎,字梦薇,震泽人。官浙江县丞。有《紫薇花馆诗稿》。

自遣

便当卜宅水之滨,携得全家作散人。閒坐溪桥松是盖,醉眠石磴草成茵。未能谐俗难云达,但免干人不碍贫。荠菜调羹菰煮粥,绿藤阴下款亲邻。

登铜山绝顶

第一高峰第一春,梅花香里著閒身。狂吟不怕山灵笑,绝顶题诗有几人。

潞河客怀

不因王事为谁留,陆困轮蹄水困舟。亲旧杂萦游子梦,雨风并作旅人愁。才疏多怕 逢青眼,体健遥知慰白头。一职未容轻簿尉,可堪王粲又登楼。

董敬舆

董敬舆,字临之,闽县人。官常熟典史。有《锺陵剩草》。

出峡

霜威扑面欲生稜,枯坐篷窗唤不{雁言}。笑指彩云辞白帝,贪看红树下黄陵。冷猿 哀雁声何楚,暮雨朝云画未能。知有精灵镇来往,碧虚想像最高层。

十刹海观荷用苏文忠公金山诗韵

北人不识江与湖,潴水为潭便称海。金源十刹迹成尘,指点烟萝果安在。空馀高柳绕坡陀。屋宇之外皆澄波。恍到江南水云壑,花时微病游人多。嗟余淮海迟归楫,大难米贵长安日。六街车马涨尘沙,白汗翻浆午曦赤。何期到此清吟魄,片云著意催诗黑。柳丝历乱夕阳明,三两沙鸥睡不惊。辇下才人半相识,招呼况具杯中物。酒酣兴极忆家山,不安寒饿真痴顽。归心日夜无时已,梦落苍霞半江水。

陈伯潜太史宅喜晤宝竹坡学士

深丛蹲孤罴,冷面寒於铁。百寮仰丰采,重臣亦心折。谏牍心写藏,钦公有施设。延陵吾故人,捐躯事何烈。廷议愍孤忠,公为表其节。抔土傍惠陵,千秋埋碧血。言念平生欢,五哀为郁结。贱子田间来,颇亦耻干谒。华筵获良覯,形神为愉悦。杯酒话名山,神往水云壑。冻鼓起岩城,惜此仓皇别。

采石舟中走笔寄呈刘绍庭孝廉

峭壁陡立洪涛风,孤影倒入鼋鼍宫。建业千峰似奔马,磅礴至此形将穷。蛾眉博望渺天际,大江东去青濛濛。我来吊古意怆恻,所惜不见大峨仙子锦衣玉带乘云鬉。骑鲸仙去倏千载,空馀酒楼嶻嶪撑苍穹。宋虞雍公亦健者,书生唾手成大功。想其视师出仓卒,已有成竹藏胸中。或言破贼出天幸,此辈安足知英雄。英雄千古浪淘尽,惟馀二子姓氏长留天地不与江流东。问天搔首发悲咤,昏鸦如墨腾遥空。江波动摇忽变色,海天落日磨青铜。馀霞半空散成绮,寒铓激射光熊熊。天公愍我所如独不偶,故幻异景娱双瞳。忆昨夔巫返孤棹,亦於此地维乌篷。江风飒飒起遥渚,雨洗翠巘轻烟笼。芦花荻絮白於雪,青枫乌桕酣初红。终竟山川秘灵怪,朝暮变幻羞雷同。饥劬慰劳起斟酌,银鳞尺半初收筒。醉来閒抱水云宿,诗成啸傲夸穷工。因之哦诗寄刘子,缄题留待东归鸿。

重至关中

陵墓累累古道旁,我来凭吊感兴亡。碑焚野火埋秦畤,瓦出春耕识萯阳。旱苦叶彫 黄阁树,宵深燐语白沙场。城南韦杜莺花劫,一度吟看一断肠。

王师曾

王师曾,字敬常,上海人。官浙江道头司巡检。有《拄颊楼诗钞》。

近怀寄朱生半人上海

老树空庭立,婆娑生意微。位居人下偪,春向客前归。体弱稀交际,时危敢腹诽。 虞翻无媚骨,动与世相违。

偕缦云游山至玉泉池小憩

携酒入林隈, 幽花细碎开。山情多变幻, 云意自迟回。奔竞岩间瀑, 清疏石上苔。 留连慕鱼鸟, 日暮尚徘徊。

陶寿煌

陶寿煌,字丽南,一号泊鸥生,会稽人。官广宁典史。有《阙箴斋诗剩》。

书边事

日射之罘海气昏,蓬莱高阁黯潮痕。青蒲竟折贤臣槛,碧血空归烈士魂。方见失机 诛马谡,旋传建节拜刘琨。书生枉挟匡时策,短后衣难向戟门。

登坛表祃建殊勋,太一灵旗指海濆。免胄威名唐郭令,请缨远志汉终军。誓师迅共 雷霆锐,传檄风生虎豹群。天子宵衣民力竭,铙歌露布望斜曛。

【卷一百八十】

徐坊

徐坊,字梧生,临清人。历官国子丞。赠太子少保,谥忠勤。有《徐忠勤公遗诗》。

樊川春望

旅食京华两鬓丝, 江湖落魄亦堪悲。谈兵忧国人何在, 小杜坟连老杜祠。

会兴镇河干悬崖数百尺平挹中条俯临茅津乔生建飞阁三楹於其上置酒高会以落其

成即席赋此

凭阑俯瞰暮烟屯,郁郁羁怀讬酒尊。北向云山终破碎,西来浊浪太奔浑。閒看倦鸟 归飞急,静听行人争渡喧。巨壁高崖自千仞,不随砥柱障三门。

偃师武虚谷墓下作

路侧累累马鬛封,渚蘋一荐授堂翁。中州人物今谁考,汉代循良相与同。大吏从来 恶强项,古人先为写遗容。传经若问先生学,原异谈玄魏晋风。

和莘夫见寄原寄

纵横懒读短长书,一任閒云在太虚。历历古今观轸辙,悠悠天地作蘧庐。穷通何事 同齐变,草昧应知有鲁初。只入深山最深处,不闻理乱狎禽鱼。

志隐堂成

飞乌语燕有哀音,背郭堂成百感侵。窗外秋声黄叶下,门前残照绿苔深。凄凄茹苦含辛意,落落逃名遯世心。千古斜川同抱痛,欲书往事泪沾襟。

秋雁

秋雁参差起,随阳正远寻。欲穷霄汉力,只遂稻粱心。声急繁霜冷,归迟夕照沈。 还应念矰缴,莫恃塞云深。

春日寄士范

百年无计挽流光,两鬓飘萧渐有霜。灵鞠一官宜祭酒,相如当日本赀郎。天薶积雪暮寒重,梦绕春山归思长。与尔何时共游赏,梨云万树照书堂。

和弢斋早春閒坐

春回先向岁寒知,欲约看春未有期。麝自成尘香自在,灰难生焰冷难支。空馀燕垒 留虚幕,惟见蟾光照素帷。万种閒愁两行泪,断肠滋味梦醒时。

再叠浪字韵寄玉初山中

缄愁无复寄穹苍,咄咄书空字数行。里社追随聊结约,近郊耕凿胜还乡。心伤蜀魄 依群鸟,目断虞渊望九阳。荏苒光阴今日尽,洒将衰泪任浪浪。

题女夫卢氏史吉甫编修鹿车偕隐图

名山五岳游能遍,緊向子平最堪羨。纵令晚不知所终,苍莽尘寰何足恋。相攸我昔得史生,崭然头角何峥嵘。手把一编日吟诵,嗟余荒落惭冰清。陵谷迁移兵火盛,伤时衰泪

如泉迸。风尘浩浩闭閒门,与尔相依以为命。熊耳双尖洛浦深,梦中归路渺难寻。布裙椎结相料理,不负平生教女心。阿舒二八泉明老,遗山羁旅阿茶小。何时婚嫁愿能偿,使我一生心事了。大黉小黉高凌空,春花如雪秋叶红。便携德耀入山去,年年常住画图中。

题劳玉初学副釜麓归耕图

吾庐二黉下,南睇釜山顶。有田不得归,泛泛如萍梗。去年经丧乱,风尘恣顽犷。 时移人事迁,衰泪下如绠。披发还故山,去去事幽屏。空山寂无人,白云在高岭。

我爱子劳子,釜麓同归耕。此邦有遗爱,父老争欢迎。昔为陶彭泽,今作王深宁。 农隙教乡里,正学传遗经。有时带经锄,莠去嘉苗荣。相期理荒秽,戮力望秋成。

岩扉静不开, 岚翠环茅屋。门前散鸡豚, 墙外垂绿竹。丹青话画师, 窈窕状谿谷。 剧怜耦耕人, 释耒吞声哭。伤心画不成, 但写西山绿。西山有薇蕨, 采采不盈匊。

韧叟顽山以壬子仲秋偕渊静游长隄山望秋澜行宫和壁间黄叶村人原韵见示同作

萧萧黄叶下,故国剩离宫。古木樵人径,斜阳牧笛风。纵横秋潦浊,莽苍乱山童。 往事空回首,含悲问朔鸿。

孟夏朔日立夏作

九日春光齐掣电,小园狼藉风花乱。不知今夕是何年,晓钟声动空凄恋。山中无历 无春秋,节序惊心暗中换。莽莽都成夏木阴,啾啾已异春禽啭。送春归去发春愁,痛惜馀春 泪凝霰。写忧我欲泛舟行,沿溪不见桃花片。

读罗叔蕴参事所著殷虚书契考释奉怀却寄兼呈王静安主事

越海乘桴去,吾思管幼安。学通殷甲子,节见汉衣冠。遯世心无闷,蒐奇力未弹。 高名王彦考,薇蕨好同餐。

我老真无补,空教侍讲帷。一瓻还秘阁,三礼愧经师。病起凋颜早,书来作答迟。 良朋隔瀛海,东望涕涟洏。

和兰畦早春书事韵

寒尽山中未觉春,更惊白发夜来新。桃源幸不经秦火,栗里端宜署晋人。俯仰百年 终有恨,推敲一字未全贫。诗成且漫题名姓,莫被遐荒传逸民。

黄叶

宫槐苑柳影离披,黄叶潇潇下玉墀。践职甘从多难日,温经悔向既衰时。贤於尧舜 天宁厌,变到沧桑地不知。为语西风漫凄紧,贞松原有岁寒姿。 李葆恂

李葆恂, 字文石, 义州人。直隶候补道。有《红螺山馆诗钞》。

泊楚望

百丈摇曳寒波间,阴云薄暝低阑珊。行人被酒雪兀兀,长年歌曲腰环环。衔芦一雁 未可篡,带甲万士何当还。角声永夜客头白,岁晚风尘愁故山。

田伏侯太守招同诸君崇效寺看牡丹衰病到迟主客尽去独坐成咏忆光绪丁酉偕王幼霞侍御看花此寺恰此日故卒章及之

客去亦已久,独游谁与同。相看如胜侣,小立逆香风。色岂依僧浅,娇疑向日融。 无嫌煞风景,啜茗夕阳中。

记与半塘叟,同游恰此晨。几丛仍故种,何处复斯人。得句留花片,题名拂壁尘。 芳菲看欲歇,凄恻并沾巾。

沧州

度帆楼下晚风徐,倦客重来系缆初。古碣犹存资考据,故家无恙尚诗书。州传善酿 偏慳酒,我适临渊却羡鱼。剩有当年残破胆,河干废垒已成墟。

赠陈伯严吏部

相见遽言别,思君廿载劳。冥心更世变,埋照益名高。句健规双井,杯深藐二豪。 无言看鬓发,江海日滔滔。

莲丈以新作见赠步韵奉酬

徵图觅句续前盟,泥饮何须效步兵。幸有藏书宜子弟,耻将行卷上公卿。萧萧白发 三千丈,落落青琴一再行。世网同逃应自喜,顽空何事不平鸣。

吴俊卿

吴俊卿,字仓硕,安吉人。诸生,江苏候补知县。有《缶庐集》。

赠野僧青望

黄茅盖屋石堆墙,浦浦风回薜荔香。笼阁夜镫通窈窕,雨出流水犯凄凉。月明古庙蛇神出,路滑秋芜马足荒。输与山僧摊粥饭,笑人行役太怱忙。

赠谭复堂先生

种柳红尘隔,填词白屋温。天宽容故我,地僻闭閒门。冷抱箧中集,凉开湖上尊。 归来陶靖节,松菊想犹存。

强饭

强饭能驱病,禁寒惯典衣。打头朝雨下,梳发旅尘飞。潮影白沈屋,石苔青刺扉。 无人慰寥落,梁燕故依依。

张祖继

张祖继,字瓞民,又字瓠肥,晚号老,南皮人。有《民诗钞》。

问天

把酒登高一问天,无私毕竟是虚传。裴航渠有何功德,既作鸳鸯又作仙。

漫兴

春秋无冰记冬月,地气从南又北行。切莫天津桥上过,而今恐有杜鹃鸣。

春雨

春雨如贤才, 年来见愈少。跋扈惟春风, 力吹白日小。

春去

春来何足乐,春去未尝悲。别有关心事,旁人那得知。

孟冬

园林秋又去,旅泛度年华。叶落槐馀实,花残鞠护芽。避寒人在阁,乞食我无家。 草木春仍发,浮生叹有涯。

秋杪

天空地旷初过雨, 白项乌啼欲冷时。残菊暴心人暴背, 大家篱下共朝曦。

春兴

折枝得水花开早,老树逢春叶放迟。不信蒙庄《齐物论》,眼前生意尚参差。

客中九日

九月九日风雨寒,病躯顿觉征衣单。两鬓应教好花笑,十年都在他乡看。落英苦口

餐不饱,来雁退飞书寄难。曰归曰归又中止,一声长啸天地宽。

题樊南生小象四十韵

文士如飞将,终身太数奇。问年丁午壮,卜命甲辰雌。易辙原无那,陈情总见疑。 虽蒙濮阳辟,敢负相公知。金屋新人笑,红尘故剑遗。何年荐绵竹,九日咏江蓠。完璧傥归 赵,明珠终报随。谁容祢处士,我忆郑当时。排笮党人结,机权宦竖持。殊勋尊圣相,大手 赋韩碑。忠过刘司户,情深杜牧之。怜才拌痛哭,感事讬微词。传仅入《文苑》,生堪为士 师。仁心独活狱,强项自无私。才大难为用,平生未展眉。鹏抟中道滞,獭祭后生嗤。学比 南溟富,胸罗太华奇。梦中传彩笔,意外见深思。颇得风人旨,原非浪子诗。晚成唐格调,深入杜藩篱。事业已如此,家庭更可悲。早孤天不吊,多累母先衰。兼抱安仁痛,还生白老 痴。居贫敢言孝,失教不能慈。大卤穷凶久,天王问罪迟。四方兵振动,万户众流离。故宅 悬如磬,长安乱似棋。渠魁才授首,大雨又愆期。衡岳删文稿,湘滨洗砚池。浮生口嚼蜡, 多病鬓添丝。遣兴吟桃叶,知音失柳枝。鸳机梦惆怅,莲府客罗维。系本出元帝,饥当餐紫 芝。养生心见性,止念寿齐颐。玉洞清凉地,金炉大药资。藏修一麟角,莫恋五羊皮。赖有 丹青手,写成鸾凤姿。心香烧一瓣,清酒咒三卮。欲救江西派,先为刘子仪。寸心无限意, 相对自神驰。

田家夏日

雨鷇凤胎燕雀忙,隔溪村锁枣花香。田家此际尤辛苦,禾正开锄麦又黄。

杂诗

煎茶似穷士, 聒耳不平鸣。炉待活火然, 水熟翻无声。从前不守口, 由来为钓名。 君子异於是, 穷通不移情。

村外

村外偶游眺, 乍晴无点尘。林深恋栖鸟, 野旷滞行人。农有千年利, 春医万物贫。 归来仍不倦, 閒话过比邻。

秋景

秋色平添己十分,霜磨雨润夕阳熏。紫泥苍石黄花圃,红叶青天白雁群。放眼四围 来爽气,遐心一片寄閒云。传神凭仗诗书画,谁作唐家郑广文。

秋夜

向晚柴门闭,小村新卜居。消磨秋夜永,涉猎古人书。照案镫光冷,横帏菊影疏。 来朝先众起,带露采园疏。

柳

多情爱垂柳,妙手孰传神。临水自怜影,无风亦动人。消磨燕地冷,袅娜楚宫身。 更念鹑衣士,年年早报春。

枣

叶薄不争桃李阴,子多却胜栗成林。风枝偶落空闻响,露草潜藏没处寻。自负晚年 仍火色,谁知野老有丹心。杜陵时感徵求苦,枨触西邻泪满襟。

苦雨

黄梅霪雨江山气,祇在江南卑湿地。畿南无山亦无江,大风一起尘飞扬。竹木灰石远难致,以柴盖屋土筑墙。倾河倒海天瓢浆,土化为泥泥压床。七十病翁佯聋瞽,室人交谪默无语。通夜露处鸦落巢,连日断炊鱼在鬴。四民皆以食为天,阴阳不燮安种田。宰辅谁能继姚宋,救时无术非无权。名言尝闻吕叔简,发泄太早总归旱。闰逢夏五多凶年,祇愁饥馑不得免。何况临海时用兵,国家租税那忍缓。天津桥更啼杜鹃,南来地气何时返。

秋夜

客舍垂帘更闭门,读书消夜静无言。翻声古鼎煎茶髓,弄影秋镫写菊魂。孤僻天生谁过访,衰残风骨自能存。寒侵布被眠难稳,暖足何年始抱孙。

秋景

秋林环绕秋水池,借他娱老须及时。性情与人大悬绝,寻常之物翻居奇。枫树丹青设色画,藕花开阖无声诗。一钱不费许游眺,天赐眼福那敢辞。

自况

三千里外八旬翁,总在劬劳忧患中。失侣通宵鹤警露,哺雏镇日燕衔虫。欲归无计消家难,再住有谁娱客衷。进退维艰方寸乱,疑蛇入腹忘杯弓。

范当世

范当世,字肯堂,江苏通州人。诸生。有《范伯子诗》。

酬方子箴廉访赠文序

昔闻邗上题襟处,今过高斋得见公。江左文章诸老尽,淮南钟鼓几人同。青天酒盏 无弓影,夕照轩窗有绪风。一序深惭负滕谷,江关庾信尚西东。

晚凉置酒坐诸君堂下即席赋诗

使君为月我为星,却为诸君放晚晴。祇可谈天说瀛海,不须想帝梦瑶京。眼前瓜果 新离土,脚下蓬蒿半掩城。问客尔从繁会至,筝琶何似席间清。 采南为诗专赠我新奇无穷倾倒益甚再倒前韵奉酬以其爱好也亦稍为戏语调之

我与斯文交,寥寥孰今曩。无端忽见君,魂梦犹自壮。平生在江沱,神孤意凄怆。 拓海方寸间,蓊郁不能放。岂无山中人,因风话远响。解佩一要之,佳期什九爽。旨哉荒州 庭,每饭有奇赏。君诗复绝伦,光怪非吾想。以此横山东,那弗招人谤。谬以小国称,来侵 大国壤。丈夫何娟娟,面好复有障。看君善跃鳞,今落任公网。瑜来亮则无,邢出君何两。 君知桐城否,所学一身创。我来三载馀,眼中失烟莽。久住方自然,聪明祇能强。应须白发 生,始附青云上。坚留愿学心,勿与身俱往。

南康城下作

雪里送舟出江渚,维舟忽被南风阻。日日登高望北风,北风夜至狂无主。似挟全湖 扑我舟,更吹山石当空舞。微命区区在布衾,浮漂覆压皆由汝。连宵达昼无人声,卧中已失 南康城。眯眼惊窥断缆处,惟馀废塔犹峥嵘。老仆颠隮强为饭,慰我风微得远行。嗟尔何曾 当大险,一风十日天无情。吾有光明十捆烛,瓮有残醪钵有肉。新砚能容一斗墨,兔毫蛮纸 堆盈簏。为吾遍塞窗中明,早晚澄清煮糜粥。吾欲偷閒疾著书,谁能更待山中屋。

謇博酬余赠荔支倒押子瞻南村诸杨一首韵余仍依原诗韵次答和并饷以茶

三日不闻提壶卢,便愁吾友诗肠枯。海航荔支一夕到,乃命短仆提篮驱。午风亭榭 汗渍襦,此物著口凉生肤。醍醐灌汝足真悦,勿复暖暖还姝姝。东南口腹天下无,嗟尔堕落 东北隅。槎枒大饼实肠胃,盐酪不美茶叶粗。道人有道服食异,双龙煮汤生吞珠。荐汝赪虬 亦易尽,再割云脚分精腴。莫嗤座上左元放,还能立致淞江鲈。倾筐倒箧吾何吝,相可而授 君其图。

适与季直论友归读东野集遂题其耑

昌黎下笔天光完,滋有意外呈毫端。东野琢句多断残,湮郁不发埋心肝。以兹论文百不合,而彼二士相波澜。惟恐人间有离析,欲把形影搓成团。张君昨来适语我,交友异性非所患。有从天来入幽可,有非梧竹栖不安。但取龙鸾合奏曲,勿与犬鸡同叫讙。我言奏曲亦须异,仿佛列鼎调醎酸。刚克柔克有二道,相成相反兹焉殚。郊亦滔滔挟愈势,愈有矗矗资郊寒。不然一倡百声和,正使吾道愁孤单。

伯严言古之圣贤人德充而才大则有波澜有云雾诙诡以游於世不为匹夫匹妇沟渎之 行其安身立命之处乃因不可得见而知德者亦鲜矣余闻其言而悲之聊因记述并参一解

藐姑冰雪寻常事,四海风香尽可餐。只为女娲播黄土,被他吹上万山端。

浊世糟醨那可啜,也因回面向吾徒。伤心只博群儿笑,诞谩饥寒岂丈夫。

光绪三十年中秋月

噫余瘦削不成影, 见汝盈盈在上头。一世闺人齐下拜, 八方园实竞前投。移镫读曲

行行怨,倚杖看云片片愁。病久可胜寒彻骨,颓然掩袂若为秋。

崔適

崔適,字觯庐,号怀瑾,归安人。贡生。有《觯庐诗集》。

春日有感

古月照今人,西马驰东道。太始有迁易,故步焉常保。萧萧黄叶路,芊芊生芳草。 冉冉孤生桐,根株半枯槁。日月一何速,忧心瞀如捣。不戚吾年往,因知我亲老。独步空堂 上,何以靖怀抱。

下唐福

推篷下唐福,振策自东山。惊浪喧沙上,孤舟出壁间。绿浮岩竹净,白拥水鸥閒。 纵目多幽赏,何辞此往还。

吴兴怀古

祖孙先后享殊荣, 胙土分茅在此城。破虏起家归命覆, 大吴终始在乌程。

舟中作

東身入舟如槛猿,坐卧不稳心苦烦。夜泊梦打鼍鼓破,昼行饮泼风帆翻。奈何千里 遂蹈海,安得一朝长闭门。我生栖栖何为者,桃梗岂闻土偶言。

张宗瑛

张宗瑛,字献群,南皮人。有《雄白诗》。

朱仙镇题壁

临歧一杯酒,门外即天涯。万里远行役,时危敢恋家。冻云侵晓日,远雁落平沙。 挥手自兹去,悠悠惜岁华。

夜中不寐慨然成咏

茫茫沧海叹横流,谁挽狂澜奠九州。天地无情成浩劫,英雄有志任穷愁。镫光尚耻 争魑魅,烟水何心逐鹭鸥。试看中原名士传,羊公舞鹤景升牛。

吴辟疆以用韩退之山石韵见示依韵酬之

闚幽汲远穷渺微,与世背若东西飞。老马龁草常苦瘦,蠹鱼食字宁能肥。卿云迁愈去千载,强言我贵知者稀。搜抉怪奇姑自嫔,那知炊断来朝饥。桐城吴君名父子,秦王真气

惊牖扉。肝鬲已作针磁吸,耳目尚隔烟雾霏。斗文战艺日百合,短兵渠可斫重围。嗟予薄游 经岁载,沙尘滚滚缁征衣。燕市屠狗不可作,胡为尘网犹绁鞿。吴君吴君真健者,吾生舍子 行安归。

杨世谦

杨世谦,字伯捻,醴泉人。有《伯捴遗稿》。

即事

露蛩吟砌动秋思,一镫耿夜神欲疲。萧萧西风妇卧病,沈沈长夜儿啼饥。承尘黠鼠 纷窜窃,天末归鸿声参差。萧骚閒散有真性,封侯自分了无期。

读忠州李芋仙刺史天瘦阁集

记得儿时识司马,超宗殊愧凤毛夸。尊前每坠穷途泪,门外常停长者车。耿耿一镫 湖上雨,明明孤月阁中花。吟魂何处招难复,巫峡萧森日易斜。

雨夜

南渡看群雁,凄凉万里情。乾坤憔悴客,关塞别离声。竹密风先觉,云深雨易成。 稻粱谋正苦,飘泊似浮生。

叶元吉

叶元吉,字子谦,怀宁人。有《怀园诗钞》。

早春自泉水山归少憩清凉庵迟友不至

十丈尘中眼忽明,好山如笑快相迎。官桥杨柳稊初茁,墓道棠梨叶半生。古木丛祠 成独憩,夕阳寒色下层城。归来却忆山堂事,密雪疏镫坐五更。

息机

榆楮成阴柳四围,病回扶坐玩朝晖。晴空坠叶游丝罥,故垒将雏候燕飞。已是厖凉 双鬓改,可能浩洁此身归。十年困踬心期倦,那更逢人话息机。

秋思金陵客邸作

疏疏红蓼避人开,寒雨连江雁叫哀。知道南州矰在,年年何事却飞来。

小雨饮郊云斋中

深堂埃壒少,常此息劳薪。高树过疏雨,虚窗落午阴。江淮聊酒,辽海遍胡祲。不

受飘飖感, 高飞羡羽禽。

暮秋同郊云江楼静坐

叠嶂寒云表,飞流峻阁前。孤华状秋色,乔木出晴烟。水驿仍分戍,山墟正泊船。 塔铃閒自语,沙鸟静同眠。冷兴从君遣,清游乐地偏。楼尊阑琢玉,佛古座垂莲。宵旰忧方 甚。耑蒙愤孰蠲。西瞻遍榛莽,北顾乱腥膻。路绝风云会,情生水石缘。中枢忘鼠器,下泽 惜鱼筌。选胜初青眼,端思渐白颠。暂从尘境外,容我一周旋。

与雪如露坐看月遂过前涧观瀑布

空山坐遥夜,满目生幽情。邻家已闭户,人静山沈沈。惊寒吠狂犬,涧谷声相磨。却疑远客来,自启柴门迎。门启月光入,照见南枝春。悠然写生意,不见氛埃生。夜山寒亦睡,兀兀唤不醒。飞流溅襟袖,匹练当桥横。支筇聊散步,履蹈音微腾。踏林碎寒玉,落叶乾有声。人境并怛化,顾视都幽情。转厌尘市中,扰扰无时宁。

高延第

高延第,字子上,江苏山阳人。官翰林院待诏。有《涌翠山房集》。

郭外春游

清风引游骑,出没翠崖间。老树欹仍直,幽禽语自閒。寻溪初得路,停策再看山。却背斜阳去,严城欲上关。

唐韦南康郡王纪功碑

天宝失御隳乾纲,四海摇荡无完疆。西南门户恃巴蜀,吐蕃些蛮长称强。绳桥西山几挞伐,泸戎邛筰烦边防。南康秉钺布威信,臣服南诏降西羌。官军深入维保路,婴笼执缚同驱羊。烽火衰息振彫敝,置渠修堰勤耕桑。当时功名推第一,赐以异数称勋王。至尊亲为染宸翰,纪功勒石词辉煌。此邦自昔号难治,错杂夷夏参伧荒。年来盗贼起闾里,跳刀走戟纷螟蝗。贯穿城郭谒长吏,牙纛避道人走藏。幺{麻骨}鼠子已如此,洪流忽溃焉能当。摩挲此碑重叹息,救时之才亦难得。豺狼塞道狐夜嗥,未暇作诗歌乐职。

观嘉陵江涨

幽居长闭门,苦被城郭束。朅为郊外游,聊寓川上目。时值秋水涨,势若海波蹴。 混混万象涵,悠悠千古速。遥观失崖涘,俯挹荡尘俗。轻烟沙际起,归鸟时相逐。何当拏扁 舟,长伴鸥鹭宿。

住马道闻雁

萧条旅舍欲三更,残月初开屋角明。一夕霜碪催客梦,千山风树动秋声。飞腾宝气看长剑,枨触吟怀对短檠。关塞迢遥惊岁晚,南来群雁正纵横。

蕲州晓起书所见

扁舟西来傍山宿,山云横江压船腹。晓来忽失江上山,浮空一握青孱颜。云移波动山失据,白云载山欲俱去。山云变灭岂有常,白羽片片随风扬。推篷回望忽无迹,青峰飞堕船之旁。我叹山色佳,还为山作计。峰蹲岳峙好自立,无为出云以自蔽。

陈瀚

陈瀚,字裕楣,号子峻,一号德轩,湘乡人。贡生。有《剑閒斋遗集》。

客中有怀东山诸子

知我邓夫子,英年好论文。平生多白眼,高义薄青云。湖海能穷命,狂名痛累君。 祇今伤肮脏,不敢对斜曛。

卓荦张公子,温纯曾秀才。谈心出肝胆,挥手谢尘埃。性静城孤往,时危岂废材。 相思隔云水,绕屋几徘徊。

车落悲黄四,艰难百计疏。须眉违世好,老大泣穷途。更忆燕山客,言裁乞米书。 凄凉还共惜,瘦骨近何如。

绝爱潘公子, 奇情隘八荒。疏狂嵇叔夜, 放逸米元章。蜑雨迎人白, 蛮风接戍黄。 趋庭应有计, 终古此边防。

王魏亦奇士,易曾饶古风。行藏看宝剑,聚散叹飘蓬。铁马嘶风劲,苍鹰抟野空。 平生尊酒意,回首各西东。

嗟余亦萧瑟,万感荡无边。病骨迎秋瘦,羁愁逐雨悬。风云幻人海,霜雪逼残年。 对镜羞华发,伤时一怆然。

留别湘上诸友

久处情殊淡,将离意转亲。寒江哀断雁,秋雨送行人。文酒平生事,艰难日后身。 敢为儿女态,騄駬自风尘。

京口怀古

铁瓮城边暮气凉,丹阳湖畔晓飞霜。江山四顾空吴楚,父老千年说霸王。山寺梵钟 连废垒,贾胡楼阁蔽垂杨。临江歌管今犹旧,逝水悠悠祇自伤。

陈璟章

陈璟章,字鹿侪,大兴籍祁阳人。贡生。有《见真吾斋诗集》。

别淮上诸故人

浮云黯长天,我今与子别。执手噤无声,悲哉此决绝。岂曰不重来,世事渺难说。 悠悠燕云高,汤汤淮水咽。行矣复何言,肝肠为寸裂。寄语世间人,何必衷肠热。

日明照新竹,苍翠成琅玕。竹间惊宿鸟,飞入白云端。云端高万里,应怯天风寒。 寒风尚可持,此去路漫漫。想君对清夜,思我坐愁叹。愁叹亦何益,凄恻中心醉。

我今涉波涛,远适蛟龙窟。秋风动地来,独眺长安月。长安众才薮,冠带阗金阙。 自无千里技,恐终致竭蹶。出门何所求,仰天空咄咄。亦知与俗违,谁能换傲骨。虽非玉求 沽,敢令车无軏。愿君迈前修,芳华易销歇。思君若痼疾,魂梦时飞越。耿耿万里心,相思 成白发。

亳州哀诗五十韵

清芬追义门,旧泽溯江水。家风忠孝存,我祖尤杰士。嗟予生已晚,未得亲杖几。 侧闻我父言,泪落难仰视。我祖秉奇节,勋名耀青史。虽云耀青史,赍恨何时已。我祖少奇 嶷,为学俗儒耻。头角腾霄龙,诗书趋庭鲤。静参象纬经,深探阴符旨。清尘迈时哲,城府 恶谲诡。随官洛下来,壮怀摅万里。文雄奈数奇,五下考功第。蹉跎恐终老,弹冠为强仕。 献赋杜陵哀,捧檄毛生喜。天马与神龙,未工奔走技。翩然辞簪组,上堂亲甘》随。远望衡 山云, 乡思起江涘。深夜仰观天, 忽讶时事否。烽燧象已形, 四郊多战垒。戎马忽仓皇, 赤 地痛如毁。日日闻鬼哭,豺狼满城市。励志思从戎,感时忽抚髀。群盗弄潢池,寇氛近溱洧。 孤城累卵危,端赖中流砥。天下承平久,武事尽废弛。营屯细柳开,将军大树拟。组练未成 军,干戈遽连轨。深入狐狸穴,逼迫莫能止。千帐偃熊罴,四围突蛇豕。金甲夜不脱,铁骑 昏尽靡。入齐利用矛,叱项怒裂眦。月死阵云黑,沙暗刃光紫。慷慨答君王,节义遗孙子。 痛哉平生心,马革何处是。大节天地昭,川流与岳峙。庙食垂千秋,帝德嘉奕世。我父寻忠 骸,虫沙迷旧址。衣冠怆招魂,丹旐归桑梓。著书虽等身,皆共尘沙委。钱刀谱汉法,韬钤 述戚氏。只馀怀友诗,丛残三四纸。父也表泷阡,涕泣颡有泚。小子梼昧材,祖武难绳美。 方今切隐忧,养痈酿奸宄。浮云变苍狗,寒山出青兕。谁能作霖雨,几处呼庚癸。哲人既已 遥,国事嗟何裨。我乏班谢才,祖德讵可纪。嵩山自巍巍,河流自瀰瀰。翘首瞻松楸,谁与 荐兰芷。

感事赠周醅仲并忆湘人

未卜天公意,斯人久折磨。有家谁可寄,无地放狂歌。关塞凝残月,潇湘咽去波。 两年书始达,伸纸涕滂沱。

定远思投笔,终军欲请缨。登楼愧家世,闭户负平生。鲁酒三蕉醉,吴钩半夜鸣。 良朋容我傲,起看斗牛横。

梦醅仲即答其见梦之作用杜甫梦李白韵

行李正仓皇,奄忽梦君至。执手苦怱卒,未尽平生意。人生本如梦,此梦良非易。

豪气干云霄,壮怀幸未坠。书来梦亦同,诚哉此同志。短什见深情,毋乃太憔悴。丈夫挺傲骨,岂为世所累。悠悠今日欢,遑问他年事。

李佳

李佳,字瘦生,丹徒人。诸生。有《独诵堂遗集》。

南山访友人

朝雨过清谿,风生水云活。馀霞散城表,残虹霁天末。青山如拱人,万黛浓欲泼。 小桥通幽径,林尽见疏豁。坐石埽菭花,登峰拊藤葛。隔树透晨烟,依依一痕抹。遥仪素心 人,越夕成契阔。抱琴叩柴关,相见慰饥渴。

出门行

十五出门行,父母泣中堂。二十出门行,妻子悲空房。三十出门行,儿女牵衣裳。出门既已苦,况复道路长。道路三万里,不复见家乡。黄金络马头,青丝为马缰。行行从此去,已去休旁皇。上堂别父母,父母愁未央。入房别妻子,妻子悲断肠。出门别儿女,儿女询归装。此去三万里,远道殊茫茫。黄河无舟楫,深山多虎狼。绝域不通书,谁复知死亡。家居何不乐,耽此道路长。

短歌行赠王义门

相君不合长数奇,胡为劳劳久行役。一第驰驱国士心,十年沧海风尘色。世乱纷纷 如弈棋,归来少妇展双眉。出门谁道长安乐,老大王生空尔为。

将有远游示舍弟美叔

行行远离别, 手足诉悲辛。万里吾为客, 三年汝养亲。仓皇忧世乱, 少小际家贫。 淮海春波绿, 相期寄尺鳞。

客思

少小依亲侧, 饥驱走此身。堪怜倚闾意, 常念远游人。树色随淮尽, 梅花过海春。 南辕何日返, 挥涕望风尘。

郭外

佣书已罢浑无事,出郭寻春不厌遥。桑桑满畴蚕妇喜,麦田三月雉媒骄。香雏美酒 村前市,画鹢垂杨水外桥。岁晚傥营三亩宅,故人栖隐许相招。

金陵词忆葆之

城北城南杨柳枝,金陵三月雨如丝。天涯有客应惆怅,正是江南草长时。

王嘉诜

王嘉诜,初名如曾,字少沂,一字劭宜,晚号蛰菴,铜山人。贡生,试用通判。有《养真室诗存》。

车中吟

黄犊上阪不得息,苍鹰啄泥长苦饥。秋原四顾惨白日,茫茫使我中心悲。我驱单车来,落拓走燕赵。市上今无击筑人,高歌呜咽谁同调。道逢乞食儿,脱剑赠之聊一笑。北风浩浩吹桑乾,洪潦没辙行路难。村庐漂尽禾黍槁,嗷嗷鸿雁声嘶酸。谁家少年解行乐,金丸如雨弹黄雀。

江行晚眺

片帆卷轻云,有客登舻啸。凉风江介来,潇洒送残照。吴楚正苍然,秋色耸群峭。 寥天鸟双下,寒渚雁孤叫。微波澹容与,中流荡逸棹。旷哉云水观,適我沧洲傲。会当理双 纶,夫学任公钓。

岁暮杂感

崚嶒瘦骨醒犹狂,餔醊羞随举世忙。游倦祢衡常灭刺,客来江欲移床。墦间富贵怜东郭,坐上伊优笑北堂。未许车尘涴襟袖,岁寒自惜薜萝裳。

寄刘朴生孝廉武昌

越石忧时久枕戈,浪游忽复阻沧波。神州几遍豺狼迹,旷野谁闻兕虎歌。江汉穷愁 荃佩老,乾坤涕泪布衣多。天寒黄鹄矶头路,风雪扁舟奈尔何。

东城晚眺

秋山几点澹无辉,官柳萧疏尚拂衣。落日半城风色紧,寒鸦偏傍楚宫飞。

泛舟勺湖因携馔具游文通寺

湖光碧浸天,塔影出天半。寺门犹未至,遥望目已眩。舣舟携馔具,僧舍饱一饭。 长松隐曲廊,苍藓閟深院。初日丽层甍,突兀瞻崇殿。宝珞森庄严,化身亿千万。沈沈浩劫馀,佛容亦惨变。老僧出迎客,破衲不掩骭。向我作乡语,凄切问离乱。俯仰增感伤,但有 泪如霰。众生尽疮痍,大野困龙战。如何象教力,不足任回旋。寂寂钟杵停,冉冉炉烟散。 辞僧却登舟,云水茫无畔。津梁谁指迷,色相终成幻。皈依无苦行,兹游徒汗漫。

邱晋成

邱晋成,字云颿,官宾人。有《古苔室诗存》。

叙州怀古•东楼

重城俯江皋,岌嶪起曾观。峣构凌紫氛,飞甍入霄汉。玲珑辟窗扉,洞达卷帷幔, 嵚巘廓西眺,滉瀁悦东眄。云岫暖孤塔,烟筿没归翰。山川信开旷,景色变昏旦。戢戢市廛 居,纷错皆可见。缅邈少陵游,寂寥使君宴。举斝追堕欢,聆风想遗转。芳尘竟谁嗣,矫首 深遐眷。

叙州怀古•南寺

步出城南闉,言寻无等院。迤逦背街术,崥崹面江岸。茅茨乱垝垣,竹柏隐颓殿。 寂寂槁木居,翳翳荒草蔓。凄凄拂寒飔,怅怅吊迁宦。陟径缅游躅,摩碣企遗翰。想见轩中 客,摛华一何灿。载笔事徒勤,垂翅迹已远。鸮鸾不共栖,湿渭竟谁判。获戾在蛾眉,古今 有同叹。

叙州怀古•初夏游南岩佛寺

冷官局横舍,精莩坐消歇。薄霄愧鸿冥,晦迹惭蠖屈。烦忧谁为袪,陟巘庶轩豁。 胜引偶相从,援萝陵嶻嶭。飞泉洒云根,古刹荫清樾。倾耳聆啁啾,举目眺凹凸。阴壑偃贞 松,阳林蔓纤葛。凡英秀孤椒,芳兰秘灵窟。菀枯亦何常,位置随造物。众绿难强名,当夏 皆葱郁。绵连胡佯岭,寂寞蛰龙穴。登览讵弭忘,萱苏徒采掇。愿言谢尘网,葺宇伴石佛。

叙州怀古•两江口道中

竹與才下最高峰, 乱峡回环又几重。人带晓烟穿古道, 天留残雪在孤松。林间霜叶 飞红蝶, 石罅银涛吼白龙。回首山中读书处, 寒云锁断碧芙蓉。

朱启运

朱启运,字跂惠,萧山人。有《棣垞集》。

雨中过句漏洞

北流群山美清峭,此地信有仙人踪。绣屏围峙篸笏立,秀出万朵青芙蓉。我来手扶 六尺筇,径欲独往登支峰。舟行日薄阴雨至,川陆一气腥鱼龙。西崦半明疏节行,东磵尽暝 危根松。长虹下注吸江底,飞动似有风云从。千林无声歇螀蚓,万籁俄顷酣笙钟。村烟幕树 摇葱茏,线缕并入江雾浓。须臾急点到篷背,凉意深袭秋衣重。驱舟出雨得一快,百道晴瀑悬淙淙。却思青鞵恣攀陟,但见丹壑浑霾封。吾生胜因夙所宗,洞天幽绝思一逢。仙源咫尺 论万里,何物尘土汙我容。推窗渺然默惆怅,山风猎猎如寒冬。

随山馆重晤节堪

七载山楼替海浮,梁髯风骨冷砭秋。相看不改当时貌,一笑那知举世忧。挂壁龙吟须起蛰,通天狐醉可深尤。神中诗卷镫前语,恐惹霜痕拂钓钩。

赠张廉夫

家无可以质钱之长物,乃有不知何代之古琴。张侯介介获我心,呜呼海内谁知音。 颇闻此琴取高直,持向豪门不能识。三年折阅无售处,始肯贬捐为君得。我因何子幸接君, 宫商入指如有神。此琴斫者亦是雷霄伦。其清如秋温如春,坚乃如石高如云。翔鸾注竹犭员 挂树,哀雁唳宵鸾唤晨。又如端人正士在林谷,观者但见衣冠肃。每问必答随浅深,有犯不 校谁荣辱。知天下事不出门,尽人间书皆已读。艺成道见仕亦优,君复於世当何求。卑官叵 耐五斗瞰,苦羡八极逍遥游。我思仙人皆古丘,偓佺征侨今在不。千金之躯且不恋,此琴性 命相贼雠。知君读诗哑然笑,泠泠试作耳与吾心谋。

追和厉太鸿秦淮怀古

忽忽南渡竞衣冠,谁料残棋一局看。末路功名如狗贱,先朝形胜本龙蟠。从来烟月 悲尘劫,剩有春秋纪圣安。怊怅雨花台上望,孝陵松柏总摧残。

小朝廷已足欷歔,更遣偷安只岁馀。党论争迎秦相鹿,饥军犹厌武昌鱼。难凭锁钥千寻浪,若问兵戈一纸书。太息万梅花树下,衣冠遗瘗恨何如。

尚忆湖边选莫愁,轻车细马一时收。但稽南部烟花籍,不筑东风燕子楼。玉树临春 夸越艳,金鞭沙市看吴钩。依然采石矶前水,相送降旗出石头。

朱门草没大功坊,燕子归来旧话长。柳色自摇瓜步雨,笛声偏傍板桥霜。凄清玉匣 藏衣地,想像宫车堕马妆。一种兴亡儿女怨,冷烟斜日吊孱王。

朱福清

朱福清,字仙槎,嘉兴人。诸生,宣统初举孝廉方正。有《最乐亭诗草》。

渔舟

春波春草一篙中,小泊渔舟不挂篷。烂醉渔翁船尾卧,桃花如雨葬东风。

老圃

老圃生涯辟半弓,此身拌老灌园中。夕阳花瘦一篱菊,细雨叶肥千本菘。活水豆浇牛踏碧,新绳架护雁来红。名利锁而今脱,荆棘何从困遯翁。